



BIBLIOTECA NAZ.

Vittorio Emanuele III

XXIII

C

41

NAPOLI





EDUARDI CORSINI
EX CLER. REG.
SCHOLARUM PIARUM
INSTITUTIONES
PHILOSOPHICÆ.

*Semper in his studiis, laboribusque vi-
venti non intelligitur quando obrepit
senectus, ita sensim sine sensu etas
senescit, nec subito frangitur, sed
diuturnitate extinguitur.*

2110177 Cic. in Caton.

1777 OCT 11 11 11



INSTITUTIONES
PHILOSOPHICÆ

A D U S U M

SCHOLARUM PIARUM

TOMUS QUARTUS

CONTINENS TRACTATUM

DE ANIMA
ET
METAPHYSICAM:



FLORENTIÆ. MDCCXXXIII.

CUM APPROBATIONE.



• INSTITUTIONES
• PHILOSOPHICAE

• M U S U D A
• IN LINGUA ITALICA

• LUTHERUS

• MUTATIONES

*Cum videamus tum arbores frondescere,
segetes largiri fruges, florere omnia,
tum multitudinem pecudum, homi-
nemque ipsum contemplatorem cæli;
possumusne dubitare, quin his præsit
aliquis, vel effector, vel moderator
tanti operis?*

Cic. de Fin. I.





I N D E X

C A P I T U M.

PHYSICÆ PARTICULARIS TRACT. II.
De Corporibus viventibus.

Prefatio. Pag. 1.

DISPUTATIO I.

De Animæ nomine, naturâ, & speciebus. pag. 3.

DISPUTATIO II.

De Animâ vegetativâ, sive de Plantis. pag. 17.

Caput. I. De Anima vegetativa naturâ, & origine. pag. 18.

Cap. II. De partibus, anatome, sive structurâ plantarum. pag. 28.

Cap. III. De varietate, sive generibus plantarum. pag. 35.
Cap.

| | |
|---|-----------|
| <i>ganis, & objectis, sive de sapore, & odore.</i> | pag. 193. |
| Cap. XIII. De auditu, ejusque organo, & objecto. | pag. 201. |
| Cap. XIV. De visus organo, sive de oculi structurâ. | pag. 209. |
| Cap. XV. De visus perficiendi ratione, sive de conspiciillis, telescopiis, speculis, ac microscopiis. | pag. 225. |
| Cap. XVI. De luce, & coloribus. | pag. 247. |
| Cap. XVII. De sensibus internis. | pag. 267. |

DISPUTATIO IV.

| | |
|---|-----------|
| De Animâ rationali, sive de homine. | pag. 288. |
| Cap. I. De Animi naturâ, & origine. | pag. 290. |
| Cap. II. De Animi spiritualitate, & immortalitate. | pag. 299. |
| Cap. III. De modo, quo animus corpori conjungatur. | pag. 314. |
| Cap. IV. De potentiis, proprietatibus, & accidentibus anima rationalis. | pag. 324. |

METAPHYSICA.

| | |
|-----------|-----------|
| Prefatio. | pag. 337. |
|-----------|-----------|

DISPUTATIO I.

| | |
|---|-----------|
| De Ente, vel Ontologia. | pag. 342. |
| Cap. I. De Ente, ejusque divisione. | pag. 343. |
| Cap. II. De essentiâ, existentia, & subsistentia. | pag. 349. |
| Cap. | |



PHYSICÆ PARTICULARIS

TRACTATUS SECUNDUS

De Corporibus Viventibus.

PRÆFATIO.

0220



Si veteri, constantissimoque Philosophorum omnium consensu pulcherrimam, jucundissimamque cœlestium corporum cognitionem esse ostenderimus, quâ mortalium animi delectari plurimum consueverunt, longè tamen uberior, jucundior, nostræque mentis ingenio accommodatior haberi meritò poterit altera Physices Particularis cognitio, quæ viventia, vel animata corpora, singulasque illorum species, & accidentia contemplatur. Si etenim incredibilis illa rerum varietas, quæ in hoc amplissimo rerum theatro oculis nostris obversatur, atque ipsa in


37

PHYSICÆ
PARTICULARIS.
TRACTATUS SECUNDUS.



DISPUTATIO I.

*De Animæ nomine, naturâ,
& speciebus.*

I.  A plerumque esse solet maximarum, nobiliorumque rerum conditio, ut cum sui magnitudine, sive splendore perspicaciores etiam ingenii vires eludant, vix illæ a nobis intelligi, deprehendique possint, sed occultâ quadam, gravique caligine circumseptæ maximum quidem inquirendæ veritatis amorem in nobis excitent, tenuem tamen illius inve- niendæ, contemplandæque spem nobis relin- quant. Quod sanè pluribus quidem in locis experti fuimus, ubi de primis rerum princi- piis, de gravitatis origine, de siderum ordi- ne, de maris æstu, de magneticâ vi, aliis- que sexcentis disseruimus, nullibi tamen cla- riùs, & uberiùs effulget, quàm cum Animæ natura, & origo contemplanda, vel exponen- da nobis occurrit. *Quid enim sit Anima non-*

DISPUTATIO I.

5

tæ in expirando, inspirandoque aëre consistet. Atque eadem prorsus ratio videtur cur Græci *Animam* ψυχὴν vocarent ἀπὸ τῆ ψυχῆν *a refrigerando* ut a Platone, (a) Aristotele (b), Plutarcho (c), aliisque compluribus observatur.

Quæ quidem omnia de corporeâ quadam Animâ, quæ Plantis, Brutis, & hominibus ipsis communis haberi solet, intelligi debent. Purior illa nimirum, atque nobilior percipiendi vis, & facultas, quæ in homine reperitur, a Græcis Νῆς, *mens*, a Latinis *Animus* appellatur, ut expressè docet Macrobius *Animus propriè mens est, quem diviniorem Animâ nemo dubitavit* (d); idemque discrimen Lucretius (e), Lactantius (f), Aristoteles (g), Cicero (h), alique servarunt, etsi animum ab animâ dictum esse Cicero fateatur.

III. Sed explicatâ jam vocis origine, paullo difficilior, & obscurior est altera quæstio de illius significatione, vel usu, quid nempe hoc celebri, communique *Anima*, seu *vita* nomine intelligatur. Cum etenim pluribus, variisque rebus id nominis concedi soleat, ut ignis, plantæ, bruta, homines ipsi *vivere*, vel *animari* dicantur, meritò ambigitur, quid hæc ipsâ vitæ, vel animæ voce exprimat, in quo vitæ, animæque natura sit posita, quodum discrimine ab animatis inaninata corpora distinguantur. Quaquidem in re, etsi variæ Philosophorum sententiæ circumferantur, illud unum verisimilius, ac veluti certum haberi poterit, animæ, vel vitæ ideam ex solo motu in hominum mentibus excita-

A 3

tam

(a) In Cratyl. (b) 1. de An. 2. (c) Lib. de repug. Stoic. (d) Somn. 1. cap. 14 (e) Lib. iii. v. lib. 1. v. 132. (f) De Opif. c. 18. (g) 11. de Gen. An. c. 3. (h) 1. Topic.

• 6 PHYS. PART. TRACT. II.

tam esse, ut illa nimirum corpora vivere, vel animari dicerentur, quæ continuo, ac ferè perenni quodam motu prædita forent. Id ipsa vocis origo satis apertè demonstrat, quòd ab aëre inspirando, expirandoque animæ nomen incœperit; demonstrat etiam, quòd illa corpora viva dicantur, quæ motu cientur, ut flamma dicitur *vivere* dum celeri partium motu splendorem, caloremque emittit; *extingui* verò, vel *mori*, dum illo motu privatur; sic aqua dum erumpit e fontibus, & inter aggeres decurrit, *viva* appellatur; *mortua* verò dum in palude, vel stagno quiescit; amor ipse, dum vehemens est, ac operatur, *vivus* vocatur, ut apud Virgilium:

.... *vivo tentat prævertere amore* (a):

mortuus verò dum otiosus est, nihilque molitur. Itaque ex motu viventia corpora a non viventibus distinguuntur, ut ipse proinde motus veluti primum vitæ indicium, nota, five character haberi possit. Non tamen quilibet motus vitam constituit, alioquin & horologium, & lapides, qui projiciuntur in aëre, vivere dicerentur; sed ille motus innatus, naturalis, intrinsecus esse debet, hoc est non ab alio imprimi, sed ab ipsâ ferè corporis viventis naturâ oriri. Postremò non quilibet intrinsecus etiam motus ad vitam sufficit, alioquin lapides vi gravitatis in Terram decedentes, & fluminum aqua in declive, vel Oceanum excurrans, propriè, & rigorosè vivere diceretur; sed nobilior quidam motus requiritur, qui non a gravitate, & levitate, externoque impetu, aliorum instar, sed ab alio quodam nobiliori, puriorique principio produ-

ca-

[a] *Æneid* I. 9. 725.

catur. Ut verò corpora non *viventia* solum, sed *animata* quoque, vel *animalia* dicantur, purior adhuc, atque nobilior motus requiritur, ut nempe objecta, sive proposita corpora sensu percipiant, variis, internisque motibus afficiantur, qui a nullâ corporeâ qualitate oriuntur, sed omnes corporis vires excedant. *Animatum igitur ab inanimato duobus maximè differre videtur, motu, & sensu. Accepimus autem & a progenitoribus ferè duo hac de Animâ. Dicunt enim quidam & maximè, & primò Animam esse id, quod movet; existimantes autem quod non movetur, ipsum non contingere movere alterum eorum, qua moventur, aliquid animam sic arbitrati sunt esse (u).* Itaque, ut ambigua, & obscura animæ notio, vel idea, quoad fieri poterit, nitidè, & perspicuè proponatur, cum singula corpora molem, figuram, gravitatem, aliasque plurimas qualitates habeant, quibus aliquid efficere existimantur; si quædam corpora effectus aliquos producant, qui ab ejusmodi qualitatibus oriri, sive pendere non possint, tunc ista corpora *vivere*, sive *viventia* fore dicuntur; quod si nobiliori huic motûs generi, quo prædita sunt, sentiendi, percipiendique vim conjunctam insuper habeant, *animalia* vocantur.

Addi etiam poterit *viventia* corpora a non *viventibus* differre, sive distingui, quòd ista naturam, viresque proprias in qualibet mole, sive figurâ retineant, ut *aurum, lapis, ignis, & magnes* sub qualibet, vel exiguâ, mole *auri, lapidis &c.* nomen, naturam, ac proprietates conservant; planta verò, vel animal certam quandam molem, figuramque requirit,

A 4 motu ut

(a) *Arist. I. de Anima c. 1.*

• 8 PHYS. PART. TRACT. II.

ut operetur. Viventia similiter, ac animata corpora miramur, & incredibilem organorum varietatem; partiumque structuram exigunt, quæ subinde, servato eodem ordine, vel configuratione, augeri, nutrirî, adolescere videantur, cum inanimata vel nullam habeant partium varietatem, vel eandem semper obtineant. In hoc postremò Plantæ, & Animalia, sive viventia corpora a mortuis, ut a lapidibus, distinguuntur, quodd illa sibi similia procreant, ac successivâ sui generis propagatione conservantur; hæc verò, cum omni prorsus semine careant, corpus aliud sibi simile gignere, sibi que superstes relinquere non possunt.

IV. Hæc ferè sunt omnia viventium corporum a non viventibus discrimina, quibus animæ, vitæque natura, & idea exprimitur; ut illa proinde describi commodè possit. *Perfectio, sive principium, quo quadam corpora certâ figurâ, magnitudine, organorum varietate, structurâ prædita motus aliquos & operationes efficiunt, qui a gravitate, aliisque corporeis qualitatibus oriri non possunt.*

Quod enim Aristoteles dixerit Animam esse *actum primum corporis physici organici in potentia vitam habentis*, hæc celeberrima definitio vitiosa, & inepta censerî merito poterit, cum obscurior sit ipsa re definitâ, & explicet idem per idem, animam nempe per vitam, quæ cum animâ ipsâ confunditur, vel ipsâ certè nihilo clarior supponitur; unde asserere quod anima sit *actus corporis in potentia vitam habentis*, idem est ferè ac asserere, quod anima sit *perfectio corporis*, quod *hujus perfectianis*, aut *anima capax est*. Sed hæc alibi.

V. Quid autem sit illa perfectio, sive prin-

cipium intrinsecum, per quod animata, sive viventia corpora operantur, motusque proprios efficiunt, definiri vix poterit, cum & obscurum id maxime sit. & hac in parte Philosophi mirè dissentiant. Plurimæ tamen illorum sententiæ ad duo veluti capita revocari posse videntur; ut alii nimirum corpoream alii verò spiritalem & incorpoream animam admiserint.

Et quod ad illos quidem attinet, qui incorpoream animam admiserunt, celebris est opinio Pythagoræ, Thaletis, Platonis, Stoicorum, aliorumque, qui, cum Mundum ipsum divino quodam spiritu regi, sive divinæ mentis substantiâ foveri, vel animari putarent, hominis, aliorumque viventium corporum animas inde excerptas, haustas, & avulsas esse docuerunt, ut illæ veluti mundanæ animæ, sive divinæ substantiæ particulæ haberi possent; *Et quemadmodum corpus nostrum corporis Universi pars est, sic etiam & anima nostra animæ Universi pars foret.* (a) Id expressè dixerat Orphæus, *unam esse nimirum generalem animam, ex cujus multiplici divisione particulares anima oriantur* (b); quemadmodum Thales omnia diis esse plena (c) putavit; atque Pythagoras inquit animam avulsionem ætheris esse; esseque immortalem, quandoquidem & id, a quo avulsa est, immortale sit (d). Quem imitatus Macrobius (e) Animam Mundi earundem animarum fontem vocavit. Omnium tamen elegantissime id ex Platoniorum sententiâ expressit Virgilius, cum illorum opinionem commemorans ait quod ipsi

Esse

(a) In Phileb. (b) Apud Stob. (c) Arist. 1. de An. cap. 5. (d) Laer. ix. seg. 28. (e) 1. Som. & Aput. de Dogm. Plat.

*Esse apibus partem divina mentis, & haustus
Æthereos dixere: Deum namque ire per omnes
Terrasque, tractusque maris, cælumque pro-
fundum.*

*Hinc homines, armenta, viros, genus omne
ferarum*

*Quemque sibi tenues nascentem arcessere
vitas (a).*

In hac itaque Philosophorum hypothefi non aliud est anima, quàm eadem divinæ mentis fubftantia; quæ dum ubique per fingula Univerfi fpatia diffunditur, fingula corporum genera penetrat, ac pro variâ illorum difpofitione fovet, agit, æ impellit: ea ferè ratione, quâ eadem folis lux per varias cryftallos diverfo colore perfufas trajecta varios & ipfa colores inducit; five aqua per varias arborum fibras afcendens varios quoque fapores, variosque flores, & fructus producit. Quo certè fieri oportuit, ut nullum Platonici inter hominum, brutorum, plantarumque animam difcrimen agnofcerent, fed eandem omnibus divina particulam auræ (b) inefle putarent, velut inquit Plotinus (c) fingulares animas ex eodem cratere, velut ex oceano fontes; derivarent; quin etiam corporibus fingulis animam concederent, quæ tamen, ob inertiam materiæ, rudiorẽque partium texturam, delitèfceret. Quæ quidem illorum opinio confutabitur ubi de animæ rationalis origine differetur.

VI. A fuperiori fententiâ non plurimum certè diffidere videtur opinio illorum, qui fingulis viventium generibus fpiritualem; & incorpoream animam concedunt, quæ non di-

VI-

(a) Georg. iv. v. 219. (b) Horat. Sat. II. 2. (c) En. iv. lib. 3. c. 7.

vinæ quidam auræ, siue substantiæ particula sit, sed animæ rationalis instar a Deo creetur, & iis corporibus jungatur. Empedocles certè, Democritus, Diogenes, Manichæi, alii-que plurimi Plantis, & Brutis sensum, dolorem, voluptatem, mentem, cognitionemque tribuerunt, ut suis in locis opportunè ostendatur, cum de Plantis ipsis, Brutisque loquimur.

VII. Alii deinde animam corpoream esse dixerunt; tenuissimum nempe corpus, quod flammæ instar per varia corporum membra, subtilioresque fibras, celeri, perennique motu diffusum singula foveret, impelleret, ac animaret. Hinc Hipparchus, (a) & Heraclitus (b) igneam, vel ex igne compositam docuerunt, quemadmodum etiam Stoici, Leucippus, atque Democritus (c) tenuissimis, rotundis, mobilibusque particulis flammam, animamque componi putarunt. Non defuere, qui aërem potius, & aquam, vel aërem simul cum aqua, vel igne conjunctum ad efformandam animæ naturam assumerent; ut alibi demonstrabitur. Id unum interim observasse juverit, non modò veteres ante memoratos, sed recentiores etiam Philosophos hac in parte mirificè consentire, quod in animatis corporibus mira prorsus, & incredibilis esse debeat organorum varietas, partium textura, ut illæ cum ab exterioris objecti corporis particulis percellantur, & excitentur, juxta varias Mechanicæ leges vario, concinnoque motu flectantur, eosque motus peragant, quos in ipsis conspiciamus. Neque aliud certè sensisse videtur Aristoxenus ille Dicearchi

[a] *Macr. Som. I. cap. 14.* [b] *Tertulli. de Anim.*
[c] *Ap. Arist. 1. de Anima cap. 2. & Cic. Tusc. 1.*

chi auditor, qui ita delectatus fuit suis cantibus, ut etiam ad hac transferret [a], sentiens, sicut in fidibus ex intensione nervorum effici concordem sonum, atque cantum, quem Musici harmoniam vocant, ita in corporibus ex compage viscerum, ac vigore sensuum vim sentiendi existere; quod non modò Platoni [b], sed ceteris etiam plurimis mirificè placuisse testatur Aristoteles inquitens: Tradita est opinio compluribus probabilis, & nulli earum, quæ de animâ circumferuntur, inferiori, animam esse statuens harmoniam [c].

VIII. Peripatetici verò corpoream quidem esse viventium animam existimarunt, plurimum tamen a corpore, corporisque structurâ dissidentem. Cum etenim Plantas nutriri, adolescere; Bruta verò sentire, vel objecta percipere existimarent, neque operationes illas a solâ partium structurâ, fibrarum ordine, organorum varietate, subtili, & irrequieto ignis, aëris, alteriusque corporis motu fieri, vel explicari posse intelligerent, cum nulla corporis organizatio, vel perfectissima partium structura objectis corporibus percipiendis par esse possit, purius quoddam, atque nobilius principium in ipsis admitti oportere putarunt, quod operationum illarum fons, & origo haberetur. Eiusmodi verò principium non corpus, non spiritum, non corporeum, aut incorporeum accidens existimarunt, sed substantiale quoddam principium, perfectionem, substantialemq; formam, quæ materiam primam quolibet actu, formâ, vel perfectione privatam perficeret, informaret, illique primum, & substantiale viv-

[a] Cic. 1. Tusc. & Lat. Inst. vii. c. 13. [b] In Phæd. [c] 1. De Anim. cap. 4.

ventis *esse* concederet, quod fusiùs, & oportuniùs in Physica generali explicavimus cum de substantiali rerum formâ loqueremur. Hinc ab Aristotele Animam definiri jam diximus *actum primum corporis physici organici in potentiâ vitam habentis*; *actus* quidem, entelechia, sive perfectio vel, ut Hermolaus Barbarus interpretatur, *perfecti habitus* dicitur, ut a corpore, sive substantiâ corporeâ distinguatur, quæ potius perfici, quàm subiectum aliud perficere potest; *primus*, ut a corporis animati accidentibus distinguatur, quæ illud animatum esse supponunt, & secundarias solùm perfectiones illi communicant; *physici*, & *organici corporis*, in quo nimirum organorum varietas reperiatur, quæ functionibus animalibus ritè peragendis requiritur; *in potentiâ* denique *vitam habentis*, ut non modò partium, organorumque varietatem habeat, statux, vel cadaveris instar; sed etiam proximè capax sit vitæ, sive perfectionem illam, actumque primum recipere possit.

IX. Hæc ferè sunt omnes Philosophorum sententiæ, quibus animæ naturam expressere; sive hæc principia, quæ in viventibus, animatisque corporibus excogitarunt, ut animæ vires, & animalium operationes exponerent. Illarum singulas accuratiùs examinare, quidve in illis probari, vel improbari debeat, ostendere in sequentes Disputationes conjicimus; hæc innuere solùm debuimus, non modò ut concipi, deprehendique posset, quid animæ nomine Philosophi intelligant, sed ut ipsa quoque animarum, varietas, sive divisio ostendatur.

X. Cum itaque nihil aliud sit anima, quàm principium illud, sive perfectio, quâ substantiæ quædam intrinseco quodam, nobiliorique mo-

tu moventur, nutriuntur, adolefcunt, percipiunt, eas nimirum operationes peragunt, quæ a folis, fimplicibusq; corporibus, corporeisque accidentibus fieri non poffunt, totidem Animæ genera communiter admitti folent, quot funt hæc ipfa motûs intrinfecci genera, vel operationum principia. Tribus autem modis, vel interno quodam, nobiliorique motu fubftantias moveri, vel operari confpicimus. Aliæ nimirum nutriuntur, adolefcunt, fibique fimile procreant; aliæ res, & objecta corporea percipiunt, doloris, ac voluptatis fenfu afficiuntur; aliæ denique fpiritalis etiam, & incorporeæ cognitionis capaces funt. Illæ ergo fubftantiæ, quæ primi generis funt, vegetare, five *vegetativâ* Animâ vivere dicuntur, ut Plantæ; illæ verò, quæ sentiunt, ut Bruta, *fenfitivâ*; Homines denique, qui fpiritali, vel incorporeâ percipiendi vi præditi funt, *rationalem* animam habere dicuntur. Tres itaque funt animæ, quæ tribus Viventium rerum generibus tribuuntur, *vegetativa* Plantis, *fenfitiva* Brutis, *rationalis* Hominibus; quarum quidem ultima fpiritalis, & incorporea eft; priores verò corporeæ, materialesque funt.

XI. Si tamen hæc Animarum divifio diligentius perpendatur, vereor certè ne rudis admodum, vitiofa, vel imperfecta videri debeat. In illâ fi quidem una divifionis pars, vel anima rationalis, eft incorporea; aliæ corporeæ; incorporeæ verò nullo, vel certè levi, ambiguoque difcrimine inter fe diftinguuntur in communiori illorum fententiâ, qui Bruta adolefcere quidem, atque moveri, non verò sentire, five cognofcere exiftimant; quemadmodum certè Plantæ viventia folùm, non ani-

animalia ab Aristotele, aliisque pluribus vocantur. Quid verò quiddam neque satis apparet an ipsa Bruta, vel Plantæ verè; & rigorosè viventia, vel animata vocari possint, atque a ceteris corporibus, quæ inanimata dicuntur, distingui debeant, cum singulæ illorum operationes solâ partium texturâ veluti fonte, ac principio fieri, vel explicari posse videantur, ut in illis proinde nobilior solum, major, atque perfectior organorum varietas, & partium ordo admitti debeat, quo tamen majori, minorique ordine, vel perfectione distincta, siue diversa rerum genera constitui non possunt. Hæc, aliaque id genus plurima opponi possent, quæ Dicæarchum ab Empyrico (a) & Phtiotham illum senem a Cicerone memoratum (b) impulerunt, ut *nihil esse omnino animum diceret, & hoc esse nomen totum inane, frustra que animalia, & animantes appellari, neque in homine inesse animum, vel animam, nec in bestia; vimque omnem eam, quâ agamus aliquod, vel sentiamus, in omnibus corporibus vivis aqualiter esse fusam, nec separabilem a corpore esse, quippe quæ nulla sit, nec sit quidquam nisi corpus unum, & simplex ita figuratum, ut temperatione Natura vigeat, ac sentiat.*

XII. Ceterum, quod ad hominem quidem pertinet, ineptissima censi debet Aristoxeni, Dicæarchi, & Phtiotæ senis opinio, & hoc dici nihil delirius potest. nam ille oculos quidem habuit incolumes, cor tamen cæcum, qui vivere se, & habere mentem, quæ idipsum cogitaverat, non videbat (c); aut ne condoluisse quidem

(a) II. Hypoth. 5. (b) Tuscul. I. (c) Laet. VII. Instit. 13.

*dem videtur, qui animum se habere non sensis. Quod verò ad Plantas, & Bruta pertinet, sive illorum vita metaphorica potius, & allegorica existimetur, sive aliquid verè ab admirabili corporis structurâ, subtilissimorum spirituum motu distinctum putetur, quod ad hunc locum pertinet, perinde est; semper etenim ex veteri Philosophorum consensu, communique dicendi more tres Animæ species satis accommodè distingui poterunt, quarum singulæ in hac alterâ Physicæ Particularis parte exponentur, ut in secunda Disputatione de *Animâ Vegetativâ*, sive de *Plantis*; in tertiâ de *Brutis*, & *Animâ Sensitivâ*, quæ illis conceditur; in quartâ verò de *Homine ipso*, vel *Animâ rationali* differatur.*



17

P H Y S I C Æ

P A R T I C U L A R I S

T R A C T A T U S S E C U N D U S .



DISPUTATIO SECUNDA


De Animâ Vegetativâ, sive de Plantis.



Nter viventia, vel animata corpora infimus quidem locus ex veteri, communique Philosophorum omnium sententiâ Plantis concedi solet, incredibilis tamen, & excellens adeo partium varietas, florum pulchritudo, fructuum suavitas, coloris, aliarumque qualitatuum series in ipsis conspicitur, ut in illis infinita Divini Artificis sapientia mirificè effulgeat. De Plantis itaque in hac alterâ Disputatione solitâ methodo loquuturi, priùs illarum, seu vegetantis animæ naturam inquiremus; deinde verò, cum Plantas nutriri, adolescere, sibi-que simile producere soleant, unde *nutritio*, *augmentatio*, alteriusque Plantæ *productio* veluti communes Plantarum proprietates haberi contueverunt, illarum singulas ordine contem-
plabimur, ut expositâ nimirum Plantarum stru-
cturâ, de illarum nutritione, augmento, ori-
gine differamus. Si quæ verò subinde conti-
gerint, quæ ad Plantas ipsas, illarumque vi-
res, & accidentia spectare videantur, hæc ac-
curatè suis ordine, & loco, uberiusque re-
rum copiâ complectemur. B CAP.

C A P. I.

*De Animæ Vegetativæ naturâ,
& origine.*

I.  E Plantarum animâ, ejusque naturâ, & origine paullò nunc uberiùs, & opportunius loquuturis, juverit aliqua, quæ superiori jam loco insinuata fuerant, clariùs, atque nitidius exponere, ut quidquid hac in parte veteres, recentioresque Philosophi senserint, intelligi possit. Illos itaque de Plantarum animâ mirificè dissidentes conspiciamus, ut illorum aliqui spiritalem, & rationalem animam Plantis concesserint; alii verò tantummodo sensitivam; alii vegetativam; alii denique nullam prorsus animam, sed meliorem solùm, nobilioremque in ipsis partium texturam agnoverint.

II. Qui Plantis rationalem, & incorpoream animam concesserint, præcipuè memorantur *Anaxagoras*, *Democritus*, & *Empedocles*, qui mentem quoque, & cognitionem eis inesse affirmarunt. *Anaxagoras* itaque, & *Empedocles* desiderio eas duci ajunt; sentire item, ac tristitiâ, voluptateque affici affirmant. Et *Anaxagoras* quidem animalia ipsas esse, & voluptate, ac dolore moveri docuit, e foliorum scilicet destuvio, & ex excremento istud colligens, *Empedocles* verò sexum his admixtum esse arbitratus est (a).
Om

(a) *Arist. de Plant. I. cap. 1. & sens. & lib. de sens. c. 3.*

Omnibus verò Philosophis hisce præluxisse videntur illi, qui non modò Plantas, sed singulas etiam Universi partes, aut corpora divino spiritu perfusa, atque animata putarunt, qui, etsi lucis, & caloris instar singulas Universi partes intimè pervaderet, parique spiritu regeret, in Plantis tamen, ob meliorem, perfectioremque partium texturam, clariùs effulgeret. Præluxisse quoque videntur illi, qui cum Pythagora spirituales hominum mentes, vel humanos animos, ex humanis corporibus in Plantam migrare putarunt; ut animus nempe ex effæto morientis hominis corpore, vel in corpus aliud humanum recens organizatum, vel in Plantam, veluti ex uno in carcerem alium, sese reciperet; quem admodum ferè Poëtæ Dryadas, & Hamadryadas Plantis inesse sinxerunt, non modò ut sylvestria quædam Numina, sed ut animas etiam vel spiritus, quibus eædem Plantæ foverentur, ac adolescerent; atque Empedocles ipse puerum se, puellam, fruticem, volucrem, piscem fuisse memorabat (a). Quorum insaniam non imitati modò, sed etiam prætergressi Manichæi, sic rationalem animam Plantis inesse dixerunt, ut quisquis folium, fructumque decerperet, homicidium committere videretur (b). Nihil est autem cur opinionem hanc vanam, absurdam, & impiam esse ostendamus, cum neque ullum mentis indicium in Plantis appareat; neque, ut a ratione, sacrisque, Literis erudimur, rationalis anima alteri substantiæ, vel corpori, quàm homini concedi possit.

B 2

III. Mo-

(a) *Laërt. IX. seg. 77. vid. August. Civ. X. cap. 30.*

(b) *August. XII. de mor. mem. 17.*

III. Moderatiùs itaque loquuti sunt illi, qui Plantis corpoream solùm sentiendi vim, doloris, voluptatisque sensum concessere. Certè Plato, etsi divinam mentem, quemadmodum ceteris corporibus, Plantis etiam inesse putaverit, attamen appetitu solùm illas duci, ob vehementem scilicet facultatis altricis necessitatem, affirmabat. Quod si constat eas voluptate, ac dolore affici, tum sentire quoque rationi erit consentaneum (a).

Plurima quoque sunt argumenta, quibus ostendi posse videtur aliquem doloris, voluptatisque sensum Plantis inesse. Ac primò quidem si quid alatur, idem quoque appetitu ducitur, & voluptate afficitur per saturitatem, dolore autem per famem, & absque sensu affectiones illa non fiunt (b). Præsertim cum Planta nutriri, vel adolescere certè non possit, nisi hoc potiùs, quàm aliud cibi genus elegerit, ac depascatur; nisi puriores, subtilioresque partes a crassioribus secreverit; nisi denique attractas alimenti particulas, succumque nutritium per fibras, & organa ritè traduxerit, ac admirabili quodam ordine, sive ratione digesserit. Celebre est etiam arbores in apertiore aëris partem pendere, ut aëri liberiùs inspirando, recipiendoque exponantur. Celebre est palmam foeminam blandioribus, virentibusque foliis in marem nutare, ut afflatu quodam, sive præsentia illius nova, meliorque in ipsâ fœcunditas oriatur. Celebre est etiam Plantas aliquas aliquod terræ genus, vel Plantas alias averfari, longiusque ab illis recedere, ut a cucurbitâ vitis, brassica a co-
rylo

(a) *Arist. loc. cit.* (b) *Ibid.*

rylo; quasdam alias amare, iisque tenacibus vinculis velut amplexibus adhærere, ut vitis ulmo.

Quid verò commemorem heliotropium sic solis amore duci, ut in Solem ipsum, vel orientem, vel occidentem folia mirâ quadam, constantique serie convertat? Plantas alias a Theophrasto memoratas apud Euphratem nasci, quæ occidente Sole quodam veluti doloris sensu folia sensim infra labentis aquæ superficiem demittant, oriente verò sensim attollant, atque vividius expandant (a); arborem denique ad Memphim fuisse, cujus ramulos siquis attigisset delabi folia videbantur, virescere verò, sive renasci dum manus ipsa removeretur (b)? Cui quidem *arbori affinem herbam prodidit Apollodorus, quam idcirco ἀίσχυρομένην*, sive pudicam, appellabat, quia *admotam manum refugeret foliorum contractione* (c); quod in aliis etiam Plantarum generibus non sinè maximâ admiratione fieri ab ingenuis, accuratissimisque Scriptoribus erudimur (d). Hæc itaque, aliaque id genus non veteres modò superiùs memoratos, sed ex recentioribus quoque Veslingium, Oricellarium, Redium, impulerunt, ut aliquem, rudem licèt, tenuissimumque doloris, voluptatisque sensum Plantis concederent; ut quemadmodum sensus ille, qui brutis animantibus concedi solet, in illorum aliquibus ex. gr. *conchyliis, ostreis*, & quæ communiter *Zoophyta*, sive *Plant-animalia* vocari solent, iners adeo, languidusque conspicitur, ut nihil ferè operari posse videatur

B 3

tur

(a) *Hist. Plant. IV c. 10.* (b) *Ibid. c. 3.* (c) *Plin. XIII. c. 10 XXIV c. 17.* (d) *Vid. Gassend. de Plant.*

tur, eodem fortasse, vel meliori etiam jure Plantis concedatur, quæ vividius, atque liberiorius moveri, objectorumque corporum præsentiam percipere, variisque motibus, & affectibus declarare videatur.

IV. Sed hæc tantum certè non sunt, ut ullus doloris, voluptatisque sensus, vel ulla sentiendi vis, & facultas Plantis concedatur. Quemadmodum enim opportunius alibi demonstrabitur, operationes illæ, vel motus, qui aliquem doloris sensum præferunt, solo admirabili partium ordine, fibrarumque texturâ fieri, & explicari faciliè possunt; quin etiam sensum illum, qui in brutis ipsis conspicitur, ab hac sola partium varietate, organorumque dispositione oriri posse plurimi, accuratioresque Philosophi arbitrantur: quanto igitur facilius operationes illæ, quæ non in omnibus, sed in aliquibus solum Plantis observantur? Itaque nos talia tanquam falsa repudiantes sano insistamus sermone; affirmando quod neque appetitum Planta habent, nec sensum. Appetitus enim non aliunde quàm a sensu est, neque igitur sensum in his deprehendimus, neque partem, qua sentiat, nec ejus similitudinem, neque viam ad sensibile aliquod, neque signum quoddam, quo judicari possit, sensum iis inesse, ut signa habentur, quibus ali sciuntur, & incrementum omnino accipere deprehenduntur (a). Quæ etenim sensûs indicia, vel signa superius allata sunt, ex solâ Plantarum structurâ Cap. VI. facillimè explicabuntur.

V. Aristoteles verò, atque Peripatetici rudius quoddam, & imperfectius vitæ, vel animæ

(a) *Arist. loc. cit.*

mæ genus Plantis concedunt, quam vegetantem, sive vegetativam appellant. Neque verò, ait Aristoteles, ita a nobis hoc constitueretur, nisi altricem, austricemque facultatem partes anima esse cognitum foret. Præinde cum talem quandam hujus Anima partem continere Planta deprehendatur, necessariò sit, ut animam quoque habere eam statuamus (a). Cùm itaque Peripatetici animadverterent Plantas virescere, augeri, fructus, & folia, similemque sibi Plantam aliam producere, neque id ulli corporum inanimatorum convenire intelligerent, neque solâ, vel admirabili, partium texturâ fieri, & explicari posse putarent, purius quoddam, atque nobilius principium, vim, facultatemque in Plantis admiserunt, a quâ, velut origine, & fonte, effectus illi profluerent. Plantas tamen viventia quidem, sed non animata, vel animalia corpora vocarunt, quòd cum quinque in viventibus corporibus vires, seu facultates distinguerent, *nutrientem, sentientem, appetentem, loco-moventem, ac intelligentem*, primam solùm Plantis concessere, ceteras autem omnes animalibus inesse volunt, unde Porphyrius in Categoriis corpus *animatum*, veluti *viventis* speciem exposuit, quòd nimirum in vivente veluti superiori, communiorique genere contineretur; quod etiam Cicero expressit, cum varia corporum genera distinguens, hæc, ait, *partim sunt inanimata, ut aurum, argentum, & ea, qua gignuntur e Terrâ, cujusmodi certè sunt Plantæ, partim animalia* (b); & ipsa denique Scripturæ auctoritas satis apertè demonstrat, dum Plantas vi-

(a) loc. cit. (b) Offic. II,

vere quidem, *semen habere*, fructumque producere expresse docet; nunquam verò vivere, ac animari testatur, ac si id homini solum, brutisque animantibus conveniret, quæ facta dicuntur *in animam viventem*, quibusque *anima vivens* inesse affirmatur (a).

VI. Ab Aristotelis, aliorumque Philosophorum sententiâ mirificè dissident Epicurus, Stoici, ac recentiores omnes Philosophi, qui nullam Plantis animam inesse volunt, sed omnes illarum motus, & affectus omnes solâ partium texturâ fieri, & explicari posse arbitrantur, ut nullo proinde discrimine Plantæ a metallis, lapidibus, ceterisque corporibus, quæ inanimata censeri, vocarique solent, quàm meliori solum, nobiliorique partium ordine, vel organorum apparatu distingui debeant.

Hanc Epicuri sententiam fuisse pluribus auctoritatibus ostendi posset, satisque ex iis intelligitur, quæ de primis corporum principiis ex Epicuri sententiâ jam diximus. Ostendimus enim quod ille in rerum naturâ, sive in singulis corporum generibus nihil aliud agnovit, quàm atomos, variasque atomorum complexiones juxta celebre principium illud

Intervalla, via, connexus, pondera, plaga, Concursus, motus, ordo, positura, figura

Cum permutantur, mutari res quoque debent (b).

Stoici verò Plantas animatas non esse dixerunt, nam animatorum quidem alia donata esse movente, appetenteque animâ, alia etiam ratiocinante; at Plantas sponte quadam Natura, non verò ductu anima regi (c), quemadmodum

(a) Gen. c. 1. (b) Lucr. II. vers. 1029. (c) Plin. V. cap. 26. & Themist. in II. de Anim.

dum etiam Plato, etsi Plantis ipsis rationalem, animam, sensumque concesserit, ut antea dicebamus, animalia quidem bruta, ut observat Galenus, viventia esse docuit, lapides autem, herbas, & Plantas omnes *de inanimatorum numero esse dixit (a)*.

VII. Quæcumque tamen Platonis, aliorumque sententia fuerit, obscurius enim plerique aut loquuti sunt, aut a Scriptoribus aliis expositi, id unum constat recentiores omnes Philosophos hac in parte mirificè consentire, ut nullam Plantis animam inesse velint. Ac ceteros quidem inter principem locum occupant, ceterisque facem prætulērunt Malpighius, Grævius, Rajus, qui Plantarum Anatomen, varietatem, vires, & accidentia accuratissimè demonstrarunt, certisque rationibus ostenderunt unde varietas illa, vel effectus ejusmodi oriri possent. Inutilem itaque, & absurdam, prorsus existimant Vegetativam Animam a corporis partibus, illarumque texturâ distinctam, quam liberaliùs Peripatetici Plantis concessere.

1. Si etenim eâ solùm de causâ in Plantis hæc animâ admitti debet, quod illarum vires, nutritio nimirum, augmentatio, & fecunditas aliter intelligi, vel explicari non possint, inutilis illa certè censeretur, reiicique poterit ubi singulæ Plantarum vires, & effectus omnes absque animâ, solâ nimirum partim varietate, ac admirabili organorum structurâ, quæ in Plantis conspicitur, non modò fieri, sed explicari quoque faciliè possint. Id verò fieri, præstarique posse, sequentibus Capitibus

(a) *De facult, subst.*

bus ostendetur, ubi expositâ jam, & explicatâ Plantarum Anatome, varisque partibus, quæ in ipsis reperiuntur, Malpighio duce exponemus, quâ ratione, seu lege Plantæ nutrantur, adolescent, novamque Plantam producant.

2 Deinde quis apertè non videat plures ex effectibus illis, qui conspiciuntur in Plantis, atque in illarum animam vegetativam referri solent, in inanimatis etiam corporibus reperi, atque a solâ partium texturâ produci? Celebre est enim magnetem ad polum converti, ferrum allicere; metalla in ipsis terræ visceribus, nutriri, adolescere, novisque seminibus renasci, vel renovari; ellychnium ipsum facis accensæ subjectum oleum, aut ceram sensim depasci, Plantæque instar nutriri, ne alia sexcenta commemorem, quæ subinde sunt explicata; quid itaque prohibet ne si illorum effectuum aliquis a radiori, partium texturâ, quæ in magnete, metallis, ellychnio reperitur, præstari potest, illorum plurimi, & omnes etiam a nobiliori, & incredibili prorsus organorum varietate, ac dispositione oriri possint, quæ observatur in Plantis? Sed conjecturis uti jam dedecet, ubi clarissima experimenta jam suppetant inferiùs exponenda.

3. Addi postremò possent argumenta singula, quibus recentiores Philosophi substantiales Peripateticorum formas evertere conantur, ut exinde inferatur, hoc animæ vegetativæ genus, sive naturam, quæ neque spiritus sit, neque corpus; neque spirituale, neque corporeum accidens, sed aliquid medium corpus, inter, ac spiritum, sive corporeum inter, & incorporeum accidens nullâ ratione intelligi, probarique posse. Itaque in Plantis vegetativam


tivam animam esse dicemus; illas vivere, adolescere, nutrirî, mori putabimus [quid enim elegantes ejusmodi, & allegoricas dicendi rationes, usu præsertim, diuturnoque more receptas deferamus?] non eâ tamen lege, ut aliquid in ipsis præter admirabilem partium structuram, succique nutrititii per easdem circuitum admittamus, quo solo operationes omnes Plantarum perspicuè peragantur.

VIII. Ex iis verò, quæ de Animæ vegetativæ naturâ juxta varias Philosophorum hypotheses ostensa sunt, faciliè intelligi poterit ejusdem animæ origo. Qui etenim rationalem animam, mentemque Plantis concedunt, novæ Plantæ corpus a veteri Plantâ per semen produci existimant, cui vel divinæ substantiæ particula inhæreat, vel rationalis anima ex humano corpore egressa, vel recens creata novo fœdere jungatur. Qui verò sensum, aut veram vegetativam animam Plantis inesse opinantur, certâ quadam lege, certisque præviis dispositionibus in corpore jam sufficienter organizato, recipiendæque sentienti, sive vegetanti animæ proximè capaci ab animâ vegetante, sive sentiente, quæ in veteri Plantâ reperitur, novam hanc animam, produci, vel e sinu, potentiæque materiæ educi arbitrantur. Qui denique Plantarum animam in solâ partium texturâ consistere existimant, hanc ipsam partium varietatem, admirabilemque ordinem in quolibet Plantæ semine a sapientissimo, divinoque Artifice positam demonstrant, quæ sensim turgescere, partibus aliis adjectis nutrirî, adolescere, in novamque Plantam erumpere videatur. Admirabilis autem hæc ratio, quâ nova Planta producitur fusiùs,

fufius, & opportuniùs exponetur ubi de Plantarum propagatione, five fecunditate differemus.

C A P. II.

*De partibus, anatome, sive structurâ
Plantarum.*

I.  Admirabilem esse in singulis Plantarum corporibus partium varietatem, texturam, quæ cum humani corporis organizatione non prorsus immeritò conferatur, superiori loco jam diximus, nullumque clarius, certiusque discrimen inter Plantas ipsas, & cetera inanimata corpora afferri posse putavimus, quàm pulcherrimum hunc partium ordinem, quo plurimos effectus, & operationes Plantarum fieri, & explicari posse ostendemus. Breviter itaque varia Plantarum organa, variasque partes, quæ in ipsis conspiciuntur, hîc ordine complectemur, tum quæ veteribus cognitæ fuerunt, tum etiam, quæ superiori sæculo ope microscopii a Malpighio, Grævio, aliisque sapientissimis viris accuratissimè sunt exploratæ.

II. Atque, ut in ipsâ rerum varietate ordo, vel perspicuitas observetur, Plantarum partes primùm in *solidas*, ac *fluidas* distingui poterunt. Fluida Plantarum pars est humor ille, vel succus, qui in Plantis ipsis præsertim contusis, vel resectis conspicitur, qui nempe e terrâ paulatim exfugitur, sensim ascendit, per omnes Plantæ ramos diffunditur, perennique circuitu subtilior, nutriendisque Plantis aptior est.

efficitur, ut suo loco ostendemus. Sic ex. gr. ex incisis papaverum capitibus *opium* colligitur; ex resectâ vite *gemma*, lacrimarum instar, distillant; ex inciso cortice succus modò purior, modò crassior, atque viscosior erumpit, ut in *pinu*, *ceraso*: in quibusdam etiam arboribus, illarumque foliis albicans humor, lactis instar educitur, ut in *ficu*, &c. Incredibilis autem est, ac mira varietas, quæ in hoc humore, vel succo observatur, siue colorem, siue saporem, siue qualitates alias consideres, ut ostendetur cum de *Plantarum qualitatibus* differemus. Solidæ verò partes, quæ veluti Plantarum substantiam componunt, plurimæ numerantur, ac præsertim *radix*, *truncus*, *cortex*, *rami*, *folia*, *flores*, *fructus*, *semina*, de quorum singulis hîc ordine differemus.

III. *Radix* est illa pars infima Plantæ, quæ solo adhærens, atque per terræ poros veluti serpens humorem, nutritiumve succum depascitur. Hinc innumeris illa poris est pervia per quos ingressæ puriores, subtilioresque succi particulæ sensim ascendunt, nutriendæque Plantæ per ramos distribuuntur: unde etiam ex variâ figurâ, quâ in variis Plantarum generibus radicum poros præditos esse concipimus, varias quoque humoris particulas variis Plantarum saporibus producendis ingredi oportere ostendemus. Quemadmodum verò Plantæ sine humore nutriri, vel adolescere non possunt, ita sine radicibus, per quas humor ipse seceratur, exfugitur, & percolatur, vivere nequeunt; ideoque, licet Plantarum aliquæ fructibus careant, ut *gelseminum*; aliæ ramis, ut *triticum*; aliæ floribus, ut *ficus*; aliæ foliis, ut *sylvestris aspa-*

asparagus ; nulla tamen radicibus carere potest, atque illæ etiam Plantæ, quæ aquæ insidere, vel innatare videntur, etsi radicibus destitui videantur, cauliculum tamen, subtilemque truncum, & exiguas radices habent, quibus fluminum alveo adhærent; viscum verò, alia que id genus arbuscula easdem radices habent, ac arbores illæ, quibus adhærent, vel adnascuntur.

IV. Altera Plantæ pars, quæ post radicem Telluri infixam proximè sequitur, & supra terram ipsam assurgit, communiter quidem *truncus*, in arboribus verò *caudex*, vel *stipes*; in herbis, & leguminibus *caulis*, vel *scapus*; *calamus*, aut *culmus* in tritico vocatur. Ejus figura plerumque rotunda, sive cylindrica videtur, atque in pluribus etiam Plantis transversim sectis variis veluti corticibus concentricis componi deprehenditur; in aliis tamen etiam angulosa, ut in *narcisso* duarum, in *cypetro* trium, in *marrubio* quatuor angulorum. Porro truncus, aut caudex veluti Plantæ substantia censerì potest, ex quâ rami, frondesque erumpant, & a quâ rami, fructus, & folia sustineantur. Hinc in arboribus plerumque durior, atque rigidior conspicitur; & in fruticibus, qui vel altiùs assurgunt, vel graviore fructus emittunt, iisque sustinendis impares forent, ut *bedera*, *vitis*, *cucurbita*, tenues radículas, veluti cincinnos, capreolas emittit, quibus illæ alteri Plantæ, muro, vel palo adhæreant, arctissimèque devinciantur.

Plantarum plurimæ in trunci medio, veluti centro *medullam* habent; quæ sive fungosa est, ut in *sambuco*; sive carnosa, ut in *vite*;
 si.

sive lignosa, ut in *pinu*; sive nullo ferè discrimine a reliquâ trunci substantiâ distincta ut in *ebeno*, *quercu*, aliisque pluribus. Reliqua demum Plantæ substantia, quæ corticem inter, atque medullam reperitur, communiter *lignum*, *corpus lignosum*; vel, ut auctor est Plinius, *caro* vocatur, quæ in arboribus quidem solida; in herbis verò, fruticibus flexibilis, sed instar ligni in longum fissilis reperitur. Hæc Plantæ caro plurimis, subtilissimisque fibris componitur, ut truncus ipse veluti fibrarum fasciculus cortice obvolutus videatur. Ijusmodi verò fibrarum ordo, vel series duplex a Malpighio describitur. Plurimæ nimirum fibræ, in varios, ut mox dicebamus, fasciculos ferè collectæ, in longum extenduntur, unde ligni fissilitas oritur. Aliæ deinde fibræ horizontaliter, sive transversim ductæ priores intersecant, iisque inseruntur, unde *insertiones* a Grævio, *utriculi* verò, vel *bullæ* a Malpighio vocantur, quodd tubulorum instar inanes sint. Præter hæc duo fibrarum genera, *tracheas* insuper, sive *spiralia vasa* describit Malpighius, quæ cum laminulis in spiram contortis, facillimèque flexibilibus composita sint, facile & ipsa contrahi, diducique possunt, unde aëri inspirando, respirandoque inservire meritò existimantur. Quarum quidem partium singulæ figurâ 1. exhibentur. A B, C D sunt ligneæ fibræ in longum extensæ; E F, G H *utriculi*, *fibræ*, *insertiones* fibris intextæ; I K, L M *vasa spiralia*, sive *tracheæ*, quorum fibræ spiraliter intortæ N O, P Q. Atque ista quidem fibrarum, utriculorum, trachearumque series, & ordo singulis Plantarum generibus convenit; plurimæ nimirum Plantarum species

pe-

peculiares habent utriculos, quibus peculiarem succum digerant, ut *lac*, *resinam*; qui proinde succus elaboratior, purior, atque subtilior conspicitur. Sed hæc inferiùs cum de Plantarum nutritione res erit.

V. Plantarum caro, vel lignum, ut antea dicebamus, cortice ambitur. Est autem *cortex* veluti membrana quædam, aut cutis, quæ rotundæ ligni substantiæ circumvolvitur. Tribus ferè partibus illa componitur; exteriori nempe, quæ instar cuticulæ interiorem, crassioremque circumdat; crassior deinde, in quâ fibræ, nervique conspiciuntur; intima denique, ceterisque subtilior, quæ ligno proximè adhæret. Et si verò cortex ipse, in variis Plantarum generibus varius observetur, ut crassus, ac veluti carnosus in *populo*: nervosus in *vite*; membranaceus in *arundine*; tenuis in *lauro*; politus in *ficu*; asper in *subere*; aculeatus in *rosa*, & *urtica*, &c. in omnibus tamen utilis adèò, vel necessarius conspicitur, ut Plantæ plurimæ, præsertim teneriores, detractò cortice, arescere, ac interire videantur; *subere* excepto, in quo phylira sensim durior, & crassior effecta detracti corticis vices supplet.

VI. Ex ipsâ porrò trunci substantiâ ramî prodire, vel erumpere conspiciuntur, qui plerumque ramos alios, frondesque emittunt. Incredibilis autem est illa varietas, quæ in ramis ipsis observatur; plerique enim longiùs a terrâ, sive radice producuntur, ut in *pinu*; alii statim ab ipso trunci initio, ut in *cupressu*; alii nullâ certâ lege, vel ordine, ut in plerisque arboribus; alii, ut in *picca*, & *abiete* eleganti quadam, constantique serie; alii breviores sunt, ut in *cyparisso*, alii prolixiores, ut

ut

ut in *quercu*. Qui prope ramorum extremitatem, extectis præsertim illorum verticibus, erumpunt, *gemma*, vel *oculi* Plantæ vocantur. Quodd si ramus aliquis ex inferiori grandioris arboris trunco egrediatur, novamque ferè Plantam alterius radicibus innixam efficiat, *stolo* vocatur; sicuti si plures herbæ, vel arbores radices, truncosque mutuò adnexos haberent, *frutices* appellarentur.

VII. Ex ramis insuper, furculisque *folia* oriuntur, quæ non modò Plantis ornatum, & pulchritudinem largiuntur; sed tegendis etiam, conservandisque fructibus conferunt, præsertim verò succo, vel humori nutritio purius adhuc percolando, perficiendoque; unde deductis foliis sterilefcere solent Plantæ, vel quidpiam pati videntur. Hinc mirari certè nos possumus placuisse Theophrasto (a) folia inter alias Plantarum partes haberi non posse, sive quodd ilia subinde a Plantâ deciderent, sive potius quodd illius fœtus, & fructus aliquis viderentur, ut omnibus ferè veteribus creditum ait Aristoteles (b). Varias, & innumeras propemodum esse foliorum figuras experimento didicimus, ut aliæ exiles, acutæ, nervosæ, teretes, læves, solidæ, cavæ, seu fistulosæ; ingentes aliæ, exolitæ, molles, angulosæ, asperæ, flexibiles, planæ observentur. Omnibus tamen id commune conspicitur, ut fibris vario ductu, texturâque dispositis veluti nervis distinguantur, quibus partes aliæ subtiliores, gracilioresque intexuntur. Denique folia ramis, e quibus erumpunt, plerumque pediculo modò breviori, exiliorique; modò longiori,

Tom. IV.

C

giori,

(a) *Hist. I. c. 1.* (b) *Arist. de Plant. II. c. 3.*

34. PHYS. PART. TRACT. II.

giori, crassiorique conjunguntur; quemadmodum aliquando ex uno pediculo folium unicum pendet, aliquando verò plura, unde *triphylla*, *pentaphylla*, *eptaphylla*, nempe *trifolia*, *quinque folia*, *septi folia* distinguantur.

VIII. Ceteras verò Plantarum partes admirabili varietate, decore, vel pulchritudine superant *flores*, quos tamen veluti Plantarum fructus haberi solere jam diximus. Quatuor in ipsis partes distingui solent, *unguis*, *foliola*, quæ *theca* vocantur, *stamina*, & *floci*, quæ singula nitidiùs in rosà, vel lilio distinguuntur. Quod si florum texturam consideres, ipsi quoque tenerioribus, mollioribusque veluti fibris componuntur, in quibus aliæ duriusculæ nervorum instar reperiuntur. Alii similiter pedunculum habent, alii ipso carent; alii expansa folia, alii recurva, sive contorta gerunt; alia denique ut innumeras ipsorum varietates, quæ præsertim in odore, atque colore mirificè effulgent, omittā, variis loco, & tempore virere deprehenduntur; etsi communiter omnes blando, lenique veris calore ita florere, Telluris superficiem ornare videantur, ut nihil fere jucundius oculos, animumque delectet; prorsusque meritiò dicatur agri lilia, quæ neque nent, neque ferunt, sed a cœlesti Patre vestiuntur, pulcherrimum Salomonis ornatum superare.


IX. Supremo denique loco superest *fructus*, quem potius Plantæ finem, aut opus, quàm partem meritiò dixeris; cui nimirum producendo eadem Planta, & incredibilis etiam illa partium varietas, fibrarumque textura, quam Plantis inesse diximus, ab optimo, sapientissimoque rerum Opifice destinata videtur. Nec minor certè organorum series pulcherrimo huic operi

pro-

producendo par esse potest, in quo non odoris solum, coloris, saporis, aliarumque id genus qualitatum mira varietas reperiretur, sed etiã semen ipsum, in quo nova Planta tenuissimis filamentis veluti delineata accuratissimè contineretur. Verùm hæc alibi cum de Plantarum productione. Interim observasse juverit in fructu vel purum semen, vel semen ipsum unà cum tenui membranâ, ut in *tritico*; aut lanugine ut in *lactuca*; aut crustâ, ut in *amygdalo*, aut carne, dulciorique putamine, ut in *uva*, *persica*, &c. aut in aliis aliâ, quod usu jam accuratè didicimus, ideoque fusiùs exponere nec juvat, nec decet.

C A P. III.

*De varietate, sive generibus
Plantarum.*

- I.  Proximum deinde foret, ut varia Plantarum genera, variasque proprietates, & accidentia, complecteremur, quibus eadem certo veluti discrimine distinguuntur. Verùm neque id facile fieri posse videtur, cum accuratiores etiam Botanici, qui singula Plantarum genera diligentissimè observarunt, inter se plurimum differant; neque ad Philosophum, qui summa veluti rerum capita, fontesque aperiens, cetera Medicis, & Herbariis relinquit, spectare debet. Itaque pauca de variâ Plantarum divisione breviter hìc attexemus, non modò ut Naturæ vis, ubertas, atque sæcunditas illu-

frius effulgeat, sed etiam ut clariùs intelligantur ea, quæ de Plantarum viribus subinde dicturi sumus.

II. Celebris autem est, omniumque serè consensu recepta Plantarum divisio in *arborem*, & *herbam*; ut arbor illa dicatur, quæ ligneum, durioremque caulem, vel truncum habeat, & altiùs ascendat; herba verò, quæ humili, teneroque caule componitur. Ac Theophrastus quidem inter utrumque genus constituit *fruticem*, arbusculum nempe, quod in plures truncos assurgit, ut *corylus*, *rosa*, &c. obscuro tamen, ac incerto adeo discrimine, ut eadem Planta modò arbor, modò frutex, modò etiam herba a variis Scriptoribus censeretur, vel haberi consueverit. Addunt etiam alii *tubera*, *fungos*, ac si distinctum Plantæ genus ista componerent, cum tamen ad arbores illas commodè revocentur, quibus adnasci solent.

III. Nec clarior est certè arborum, ut ab iis exordiamur, divisio, quæ a variis Scriptoribus adhibetur. Alii enim ex varietate partium, quibus arbor ipsa componitur, alii ex origine, modoque nascendi, alii ex loco ubi nascuntur, alii ex temporibus, alii ex qualitatibus aliis Plantarum discrimen repetunt; quò fieri profectò debuit, ut illarum plurimæ inter se dissidentes sub eodem veluti genere continerentur; vel aliæ maximè similes in diversis ordinibus haberentur. Commodior itaque series, atque divisio videtur illa, quâ in *domesticas*, vel *urbanas*; & *exoticas*, vel *sylvestres* distinguuntur. Domesticæ dicuntur illæ, quæ cultu uberiores, mitioresque sunt, nostrisque regionibus innascuntur; exoticæ verò, vel sylvestres, quæ aut ab exteris regionibus ad-

advehuntur, aut sponte quadam naturæ, sinè ullo cultu, vel arte in silvis nostris oriuntur.

IV. Atque urbanæ quidem, sive domesticæ, cum fructuum causâ excolantur, ex fructibus ipsis distingui solent in *pomiferas*, *nuciferas*, quæ nimirum poma, vel nuces producant. Poma dicuntur illa, quæ fructûs partem esui destinatam exterius habent, interiùs verò nucleum, durioremve partem, ut *persica*, *pruna*, *cerasa*; nuces autem, quæ duriori cortice exterius componuntur, intra quem teneriorem, edendumque fructum contineant, ut *amygdala*, *nuces*, *castanea*. Iterum poma, vel nuces in plurimas species alias formâ, sapore, coloribus admodum differentes dividi possent; ut Botanici norunt; nobis suprema solùm ipsorum genera indicasse sufficiat cum cetera vel experimento ipso clarissimè appareant.

V. Exoticæ quoque, sive sylvestres arbores in *montanas*, & *aquaticas* dividuntur, quarum illæ in montibus oriantur, & loca arenosa, vel saxea desiderant, istæ palustribus delectentur, & uberiùs in illis adulescant. Ac montanæ quidem in *glandiferas*, ut *esculum*, *quercum*, *fagum*, &c. & *coniferas*, ut *pinum*, *cyparissum* distingui possunt, quodd illæ fructum glandis instar subrotundum, hæ verò acuminatum, conicum, vel turbinatum producant. Illud etiam in coniferis observari meretur, quod plerumque resiniferæ sunt, ut *pinus*, *cupressus*, *abies*, unde etiam perpetuò vivere conspiciuntur; quemadmodum arbores aliæ; etsi coniferæ non sint, sed *baccas* potiùs producant, & *baccifera* nominentur, resiniferæ videantur, ut *juniperus*, *hedera*, &c.

Inter aquaticas *populus*, *salix*, *ulmus*, *platan-*

tanus, aliæque plurimæ memorantur, quæ flexilitate, foliorum amplitudine, ingentique ramorum expansione insignes sunt.


VI. Longè major est herbarum series; quæ arborum instar, in *sylvestres*, & *urbanas* distinguì possent, quandoquidem ipsæ quoque, vel sponte oriuntur, vel arte excoluntur; sylvestres iterum in *montanas*, *campestrès*, *palustres* satis accommodè dividuntur; domesticæ verò in *fruges*, *legumina*, *olera*; Ac frugum, quidem, tritici, leguminum, oleumque species innumeras attexere inutile foret, cum experimento cuilibet facilè innotescant: de hortensibus verò, quæ nimirum solâ voluptatis, florumque causâ nutriuntur, id unum hic addi poterit ceteras omnes tum elegantiam, tum caulis, foliorumque magnitudine a lilio superari, quo proinde *Veneris volupe*, *Junonis rosam* a Græcis, *regium florem* a Latinis vocatum testatur Plinius.

VII. Admirabilis porrò hæc herbarum, arborumque varietas, & elegantia plurimos impulit, ut immenso ferè studio, vel diligentiam, singulas illarum species, accuratissimè inquirerent, & elegantissimis etiam figuris exprimerent. Atque ex veteribus quidem Hippocrates, Theophrastus, Varro, Dioscorides, Columela, Plinius, Galenus, Mathiolus, Clusius, Joannes, & Gaspar Bavvini fratres, Fallopius, Gesnerus, Rayus, nuperrimèque Tournefortius, Milius, Michelius id operis susceperunt, maximaque gloriam perfecerunt: quos inter Tournefortius, cum 8846. Plantarum species edidisset, 1356. ex variis Orientis regionibus Europæ incognitas attulit, ac Institutioni herbariæ corollarii, sive coronidis instar

star adjecit, Michelius vero Plantarum
species nuperrimè enumeravit, quas subiectis
etiam imaginibus elegantissimè descripsit.

CAP. IV.

*De nutritione, & augmentatione
Plantarum.*

I.  Uæ de Plantarum naturâ, variisque illarum partibus superiori loco explicavimus, non aditum modò, sed plurimam, quoque lucem præferre videntur iis, quæ de illarum viribus, aut facultatibus nunc explicanda, vel illustranda nobis occurrunt. Ex tribus itaque viribus, quæ in Plantis satis accommodè distinguì solent, nutritione nimirum, augmentatione, & productione, priores duas hoc uno Capite complectemur, de tertiâ postremò loquuturi.

II. Nihil est autem, quod Plantas virefcere, nutriri, adolescere, subiectum nempe, terræque admixtum humorem depasce dicamus, cum id Plantarum naturam, nobiliusque illarum discrimen ab inanimatis corporibus esse ostenderimus. Exponenda solùm est arcana ratio, vel admirabilis series, quâ alimentum ipsum in nutritæ Plantæ substantiam convertatur; optimè siquidem, accuratèque nutritio definitur *conversio alimenti in substantiam aliti*; & nutritiva potentia *facultas anima ve-*

getativa, quâ vivens alimentum in sui substantiam convertit.

III. Quid hac in parte Aristoteles, alique Peripatetici senserint intelligi potest ex iis, quæ alibi de substantiali rerum mutatione, paulloque superiùs de animæ vegetativæ naturâ explicavimus. Ii nimirum cum vegetantem animam Plantis inesse arbitrentur, vim quandam ipsis concedunt, ut veterem cibi substantiam in novam Plantæ substantiam convertant, neque id solâ partium texturâ, motu, vel ordine fieri posse defendunt, sed nobiliori quadam vi, quâ præviis quibusdam alterationibus cibi substantia ex non vivente vivens reddatur. Cui quidem opinioni plura opponi solere jam diximus; præsertim verò, quod hæc anima, sive facultas omnino inutilis videatur cùm Plantarum nutritio solâ fibrarum texturâ, aliisque mechanicis viribus, & effectibus, quos nuperrimè in Plantis observavit Malpighius, optimè fieri, & explicari commodè possit.

IV. Itaque compertum est primò Plantarum radices longè, latèque per Terræ viscera diffundi, vel serpere, eoque humore perfundi, quo circumpositæ terræ partes imbutæ fuerint; cumque humor ille vel tenui Solis calore, vel innato etiam ejusdem Telluris tepore agitur, rariores, subtilioresque illius partes a crassioribus secernuntur, externique aëris pressione intra adaperitos radicum poros impelluntur: eâdem ferè ratione, quâ vel fumi, vel accensæ flammæ particule sursum impelluntur, aut subtiliores aquæ, vel terræ partes in aëre eleventur, aut in capillaribus tubis subjectus humor sensim ascendit, atque
per

per internam tubuli superficiem perrepat : Quandoquidem verò aëris calor, & gravitas sensim operatur, succusque rarior, atque subtilior efficitur, sensim quoque ascendere, vel altiùs impelli debet in canaliculis illis, qui inter lignosas arboris fibras reperiuntur. Huic etiam nutrititii humoris ascensui promovendo, vel efficiendo plurimùm confert aër ille, quem Plantæ, animalium instar, inspirant (a). Observatum est enim, quod aër in tracheis excipitur, ibique rarefactus arboris fibras tracheis circumpositas urget, & comprimit, succumque nutrititium in illis contentum versùs superiores partes, in quibus minor est resistentia, continuò impellit. Neque ad superiores solùm arboris partes purior, atque subtilior humor ille ascendit, singulosque per ramos diffunditur, sed a supremis etiam, vel extremis iterum ad radices descendit, perennique circuitu per Plantæ *utriculos*, veluti venas excurrit, ut a Malpighio, aliisque pluribus demonstratur.

1. Et certè, nisi attractus humor ad inferiores partes reflueret, inferioribus ipsis Plantarum partibus, atque germinibus, quæ iis adnascuntur, nutriendis impar foret. Succus enim, qui proximè a Terrâ ascendens per Plantæ radices, truncumque excurrit, crassior, minùsque tenuis, atque digestus conspicitur, ideoque vel ipsi trunco, vel tenerioribus certè ramusculis, germinibus, stolonibus, qui ex trunco erumpunt, nutriendis aptus esse non posset. Quod si humor ille, qui ascendens assidue percolatur, interim dum refluit, sive descendit, iterum percoletur, purior cer-

tè, 13.

[a] Vid. Bevel, de motu anim. pars. II. prop. 181.

tè, longèque subtilior ad inferiores Plantæ partes perveniet.

2. Hinc ubi vites, & aliæ plantæ foliis spoliantur, aut prorsus arescunt, aut certè fructus ad illam suavitatem, maturitatemque non perducunt, quæ in ipsis haberi consueverat; quodd nempe succus in subtilioribus foliorum venulis purior effectus nutriendis fructibus plurimum conferat.

3. Clariùs etiam perennis ille humoris circuitus in *lactariis* plantis conspicitur. Si etenim illæ arctiori vinculo, ut ferreo circulo transversè constringantur, illorum truncus supra vinculum turgere, vel intumescere observatur, quod fieri certè non potest, nisi ab humore, qui a superioribus ad inferiores partes descendat; quemadmodum ferè si homini brachium vinculo constringatur, venæ longiùs a corde, vel infra vinculum intumescunt, quodd ibi sanguis a manu ad cor refluus impediatur, & stagnet.

4. Neque humor ille solùm refluere, sed inferiores etiam Plantæ partes alere, atque augere conspicitur. Si etenim Plantæ cortex duobus circulis transversè, vel horizontaliter ductis secetur, corticisque pars circulis intercepta avellatur, ut superior ab inferiori cortice disjungatur, inferior quidem cortex minimè augetur, superior verò sensim nutritur, ac versùs inferiorem extenditur, succo nimirum per corticem refluyente novas partes acquirat, ut accuratissimè observavit Malpighius.

5. Affine denique est huic experimentum aliud, quod a Mariotte factum accepimus. Cum etenim duæ arbores supra Terram in truncum unum coeuntes observasset, illarum alteram
in-

infra communem truncum, sive truncorum unionem transversè dissecuit, sectionisque loco lapidem inseruit, ut inter divisas, sejunctasque partes nulla connexio, sive communicatio superesset; cumque sequenti anno plantas jam virescentes inviseret, ramulos quosdam in dissecto trunco inter cohæsionis, sectionisque locum productos observavit; qui non ab ascendente succo, qualis in dissecto trunco nullus haberi poterat; sed a refluxo solùm, vel descendente produci debuerunt.

Quâ verò serie, vel ductu perennis illæ succi circuitus peragatur definiri vix potest. Credibile est tamen, sapientissimisque viris videtur succum per *fibras lignosas*, ut antea diximus, ad superiores Plantæ partes ascendere; exindè verò per utriculos a cortice in medullam, vel medium arboris locum extensos deferri, ubi cum ejusdem medullæ succo permixtus, atque ulterius fermentatus per universam demum Plantam distribuatur.

Cùm itaque hoc assiduo, perennique circuitu succus, aut nutritivus humor rarior semper, atque subtilior evadat, ac juxta varium fibrarum, quas penetrat, ordinem, atque figuram, variâ ratione percoletur, digeratur, ac veluti concoquatur, tenues partes illas, quæ subindea Plantâ avolaverint, reficere, ac restaurare, poterit, ut Planta pristinam molem, præsertim verò humoris, fluidæque substantiæ quantitatem conservet.

V. Neque id tamen dissimulem ægrè intelligi, vel explicari posse quomodo ex uniformi, vel homogeneâ nutritivi succi, vel humoris substantiâ dissimiles adeo Plantarum partes produci possint, quomodo solâ partium

texturâ, humorisque circuita, humor ille subigi, alterari, perfici, disponique possit, ut in corticem, folium, florem, fructumque convertatur. Immeritò tamen exinde quis inferat vegetativam animam admitti oportere, tum quod nihilo clarior, atque nitidior in illâ sententiâ res fieret; tum etiam, quòd in ipsis quoque inanimatis corporibus effectus aliqui deprehendantur, qui cum Plantarum nutritione comparari faciliè possint. Quis ex. gr. conciperet ex oleo, cerâ, aliisque inter se plurimum diversis corporibus similem, eandemque flammam produci posse, quæ nullam ferè cum cerâ, seu corpore, quod depascatur, similitudinem habeat? Quis ex simplici terræ substantiâ variis humoribus, variisque succis permixtâ varias metallorum, aliorumque fossilium species inter se mirificè dissimiles oriri posse putaret? Quis denique, ex solâ partium texturâ, præsertim verò lapidifici succi qualitate plurima marmorum genera, in quibus mira colorum, aliorumque accidentium varietas observatur, produci intelligat, vel faciliè definiat? Quis, inquam, hæc, aliaque id genus corpora ex dissimillimis corporibus aliis produci, in his scilicet, aliisque innumeris casibus substantiam quandam in substantiam aliam omnino diversam converti intelligeret, nisi id experimento ipso manifestissimè ostenderetur? Si itaque mutationes illæ, ut Peripatetici ipsi norunt, sinè animâ, soloque partium ordine, ac dispositione fieri perfectè possunt, quid prohibet ipsam quoque alimenti substantiam in arboris substantiam converti solâ partium varietate, quam non rudem, & imperfectam, ut in metallis, sed admirabilem esse jam diximus,

fo.

solo nutrititii succi, vel humoris accessione, qui non crassior, & impunior, ut in fossilibus, sed purus admodum tenuis, mirificèque dispositus observatur? Reponere quidem Peripatetici solent ellychnium, metalla, aliaque id genus inanimata corpora per solam *juxta positionem* nutriri, Plantas verò per *intus-sumptionem*; verùm ostendere quoque debuerant hoc insigne discrimen inter fossilia corpora, & Plantas reperiri; siue nitidè ostendere quid hæc *intus susceptio*, aut substantialis hæc alimenti conversio sit, quoque principio, vel lege peragatur. Interim nobis hæc alia explicandi ratio, quæ longè simplicior, adeoque Naturæ legibus accommodatior videtur, magis arrideat, ut amissas Plantæ partes nutrititii humoris circuitu, qui a solâ fibrarum texturâ, aërisque elaterio dependeat, reparari arbitremur.

VI. Sed non veteres solùm, & amissas Plantarum partes reparari, vel restaurari, verùm etiam novas insuper addi, siue produci conspiciamus. Sic appetente verè singula Plantarum genera, quæ hyemis tempore floribus, foliis, fructibusque spoliatæ squallidæ, rudes, ac indecoræ videbantur, floribus, foliis novisque fructibus vestiuntur; quemadmodum etiam si teneriores sint, nondumque debitam molem assequutæ, non modò vere, sed æstate quoque, & autumnò adolescunt, majoremque molem acquirunt. Id verò quâ lege fiat, ingenuè dicam quid sentio, hætenus, ut opinor, definiri, vel explicari certè vix potest; & qui liberius hac in parte, vel præfidentiùs loquuntur, ea conjiciunt, quæ concipi, siue probari vix possint. Illud unum certò, constanterque defendi posse videtur, uberiorem esse
tunc

tunc temporis humoris copiam, quæ per radices ascendit, uberiolem, aptiolemque aëris calorem, quo rarior illè, leviorque reddatur, & intra fibras impellatur; ideoque non veteres solùm, siue deperditas Plantæ partes reparare debet, sed veteribus etiam, solidioribusque Plantæ partibus adhærens, eodemque ordine, vel texturâ, quæ in illis conspicitur, juxtapositus, singulas Plantæ partes, præsertim verò teneriores, minusque resistentes ampliores efficiat, atque per quosdam ramorum poros erumpens flores ibi, folia, fructusque producat: quod rudiùs, & obscurius certè, sed aliquà tamen ratione in accensâ flammâ conspicitur, quæ, si uberior cera, vel oleum affundatur, vividius effulget, majorique mole asurgens majorem lucem emittit. Quis verò, non exponere dicam, sed intelligere possit cur humor ille, qui e ramorum poris erumpit, in folia, flores, aut fructus disponi, conformarique debeat, præsertim verò tantâ constantiâ, ut in hac Plantâ nonnisi hi flores, fructusque produci soleant? Conjicere solùm, aut suspicari nos possumus, quod nutritivus humor in Plantæ fibris, præsertim verò in loco ubi erumpit, motum illum, illamque directionem acquirat, quâ hæc folia componantur. Neque id mira solum Plantæ organizatio, & varia in variis Plantis partium textura suadere videtur, sed illustriùs etiam ostendit Plantarum insitio, quæ inferiùs explicabitur. Compertum est enim, quod si unius arboris, ex. gr. *pyri*, ramo cortex detrahatur, ejusque loco alterius arboris, ut pomi, cortex apponatur, ramus ille non *pyri*, sed pomi fructus, & folia producet; non alia certè de causâ, nisi quoddã va-

ria

ria sit in variis Plantarum corticibus fibrarum textura, ideoque succus, qui per illas excurrit, & ab illis erumpit, variam figuram, motum, ac ordinem variis floribus, foliisque componendis aptum acquirat. Quod si rudis aliqua hujus admirabilis effectus imago desideretur, in artefactis fontibus haberi fortasse poterit. Celebre est enim quod ubi aqua ex aliquo foramine violenter erumpit, si foramini ferrum infigatur, cujus longitudo, ac veluti truncus, & vertex etiam variè excavatus, curvatusque sit, aqua sursum erumpens ferri superficiei adhæret, & circumvolvitur, ac juxta variam ferri figuram, varias & ipsa figuras acquirit, ut aliquando cyathum retortis marginibus, aliquando lilium, aliquando globum, alia aliquando corpora imitetur, quod illa sursum erumpens, & a ferri, quas excurrit, fibris variam directionem acquirens, in varias etiam figuras erumpat, aut conformetur.

Addi postremò poterit Plantas illas uberiùs nutriri, faciliùs augeri, vel adolescere, quæ laxiores, ampliòresque fibras, & poros habeant; ut ex. gr. *salix*, *persica*, & *populus* brevi adoleſcunt, quod ampliòres in illis pori observentur, & hac ratione dispositi, ut succus per fibras ascendens per easdem relabi non possit, sed altiùs semper a succedente impellatur. *Mespilus* autem, *buxus*, *pinus*, aliæque lentè adoleſcunt, quod angustiores poros habeant, eâque ratione dispositos, ut agrè succus ascendat; aut, si fortasse ascenderit, relabatur. Ex his itaque satis ostendi posse videtur Plantarum nutritionem, augmentationemque ex succo variè in variis fibris disposito produci.


VII. Ceterum, etsi Plantæ omnes quandiu spirant, ac vivunt nutriantur, non omnes tamen æqualiter adolefcunt. Ut enim omittam inæqualem esse in Plantis molem, illas nimirum ad inæqualem altitudinem assurgere, compertum est etiam illarum aliquas citius, aut ferius ad certam molem, certosque magnitudinis terminos, quos egredi, vel superare non poterunt, pervenire. Maxima verò Plantarum proceritas, & amplitudo in iis arboribus memoratur, quæ in Fortunatis insulis ad 144. pedes assurgunt; quemadmodum aliæ nascuntur in India, quæ sagittis superari non possint; amplitudo verò, sive crassities tanta in quibusdam arboribus observatur, ut vix a quatuor (a), septem (b) octo, quindecim (c), septemdecim (d) hominibus extensa brachia mutuo conferentibus ambiri, sive circumdari posse a variis Scriptoribus memorentur; ut insignem Lyciæ plantanum præteream, intra quam domicilii instar excavatam undeviginti homines epulatos esse testatur Plinius (e) sed hæc, aliæque id genus plurimæ, quæ ad nutritionem Plantarum aliquâ ratione spectare possunt, ut aëris temperies, soli fecunditas, hominum cultura, &c. partim superius exposita, partim inferius explicanda supersunt ubi de Plantarum morbis, ac interitu differemus.

CAP. V.

[a] *Diod. xvii.* [b] *Scalig. Exerc. 104.* [c] *Hist. Ind.*
[d] *Cadamyssus Relat.* [e] *Plin. xii. c. 1.*

CAP. V.

*De productione, & insitioae
Plantarum.*

- I.  Ulcherrima, & incredibilis illa Plantarum varietas, quæ in ipsâ Telluris superficie veluti viridario, vel horto quodam conspicitur, brevi desineret, nisi vis illa Plantis indita foret; quâ Plantas alias, sibi que similes procrearent. Neque enim herba solum, & fœnum, quod *priusquam evellatur, exaruit*, (a) brevi intereunt, sed ipsæ quoque proceriores arbores, ut annosæ quercus, tandem fatiscunt, aut humanis certè usibus insumuntur. Admirabili ergo, sapientissimoque Naturæ consilio factum est, ut Planta, quælibet semen produceret, ex quo nova Planta veterique, similis oriretur. Antequam tamen uberius id explicetur, exponenda, vel dirimenda videtur Peripateticorum opinio de Plantarum origine, vel productione.
- II. Aristoteles itaque, alique Peripatetici existimant plurimas quidem Plantas ex certis seminibus produci, aliquas tamen ex solâ Telluris virtute, vel putrescente materiâ, sinè ullo semine, oriri; ut duplicem proinde Plantarum originem, vel productionem illi distinguant, quarum altera sit a Plantis, altera ab ipsâ Terrâ repetenda.

Tom. IV.

D

r. Ac

(a) *Psal.* 128. v. 5.

1. Ac primò quidem inesse Telluri vim *plasticam*, seu *formatricem*, quâ nova germina, novasque Plantas illa producat, ex ipso divini Artificis imperio satis apertè colligitur, cum dixerit *Germinet Terra herbam virentem, & facientem semen; & lignum pomiferum faciens fructum, juxta genus suum, cujus sit semen super Terram*(a); quod innumeris etiam Patrum auctoritatibus ostendi posset.

2. Deinde verò quis nesciat plurimas, & innumeras etiam Plantas, aut herbas in iis locis oriri, in quibus nullum semen reperiatur? Quis etenim semen in amplissimas regiones, silvas, camposque intulit, ut ibi frutices, arbores, herbæ orirentur? Quis in tectis ipsis domorum, arborumque verticibus semina posuit, ut exinde flores, herbæ, viscumque præsertim nascerentur? Certè ab accuratissimis, magnisque viris memoratur, quod si terra ex profundo loco effodiatur, testèisque vasibus, ut assolet, aëri exponatur, herbæ, vel frutices in illâ sponte oriuntur, præsertim verò *pulegium, portulaca, &c.*

3. Ejusmodi verò spontaneam Plantarum productionem is negare certè non poterit, qui animalia ipsa, ut *muscas, lacertas, & insecta* omnia ex solâ putrescenti materiâ produci concesserit. Si etenim animalia, quæ longè sunt Plantis nobiliora, sponte quadam Naturæ sinè ullo semine oriri possunt, quantò facilius herbæ, vel arbores, in quibus minor, aut rudior partium textura conspicitur?

4. Neque id sinè maximo Naturæ consilio factum videtur, ut nempe eadem semper in
Uni-

(a) *Genes. cap. 1. vers. 11.*

Universo Plantarum varietas conservaretur. Cum etenim illarum plurimæ brevi intereant, neque ab hominibus illarum semina colligi, Terræque committi commodè possint, par fuerat, ut illæ sponte quadam ab ipsâ Terrâ producerentur.

5. Quod si nobilior adhuc illarum Plantarum, quæ spontè oriuntur, causa inquiratur, aderit Sol, & alia coelestia corpora, quæ sive calore, sive occultis aliis virtutibus effectus illos producant (a).

III. Hæc, aliaque id genus Peripatetici, ut spontaneam hanc Plantarum originem tueantur. Accuratior tamen Philosophi, quibus præsertim admirabilis Plantarum varietas, & organizatio perspectissima est, nullâ ratione fieri, inteligi, vel explicari posse arbitrantur, quomodo ex solâ terrâ calore solis, & humore perfusâ Planta oriatur.

Quis etenim inquit, intelligat quâ ratione Planta, in quâ incredibilis, & infinita ferè partium varietas, elegantissima fibrarum textura, pulcherrimus ordo conspicitur, ex solâ terrestri materiâ temere agitâ, sive dispositâ producat? Longè facilius certè foret ex ferri ramentis temere agitatis horologium, aut ex typicis characteribus in terram projectis, sive fortuitâ concursione unitis integros Ennii Annales, itaut legi possent, componere, quàm ex terrâ fortuitò madefacta, calidâque plantam educere; aut qui plantas hac ipsa ratione produci posse opinantur, parum certè absunt, ut Epicuro Mundum fortuitâ atomorum concursione genitum concedant. Deinde verò,

D 2 si

(a) *Arist. II. c. 3. & Theophr. III. c. 24.*

si Plantæ sponte quadam a terrâ gignerentur, cur hujus potius, quàm alterius generis orirentur? & quemadmodum *pulegium*, & *sedum majus*, non ita *quercus* etiam; & poma produci possent?

Quod si Peripatetici Plantas animatas esse opinantur, atque interdum illas a solâ terrâ ab inanimato nimirum corpore, produci velint, effectum ab imperfectiori causâ produci concederent, quod est impossibile. Perperam verò, atque inutiliter ad occultas solis, siderumque vires illi confugiunt, tum quodd ipsa cœlestia corpora inanimata, animatisque proinde corporibus imperfectiora, sunt; tum etiam quodd sol, atque sidera, si quid efficiunt, solo calore, vel luce operantur; calore verò, vel luce non vivens dixerim, sed organizatum corpus produci posse quis credat?

IV. Argumenta verò, vel auctoritates illæ, quibus opinio Peripateticorum innitur, facillimè dirimi, vel solvi possunt.

1. Et quod ad auctoritates quidem attinet, *germinare* dicitur *Terra herbam virentem*, quodd ex illâ, & illius humore veluti materiâ Plantæ nutriantur, & adolescant; quemadmodum homines ipsi ex terrâ geniti, sive formati dicuntur. Addi etiam poterit initio Mundi plantas ex solâ terrâ divini Artificis operâ, sine ullo semine productas fuisse, quemadmodum animalia quoque perfecta, sinè animalibus aliis, aut ovo prodierunt; cum nempe semina, vel ova a Plantis, vel animalibus aliis producta nondum existerent, ut ait Scripturâ *fecit Dominus Deus omne virgultum agri antequam oriretur in Terrâ, omnemque herbam regionis priusquam*

quam germinaret (a) ; exinde tamen inferri non potest, quod nunc etiam, cum semina, vel ova novis animalibus, novisque plantis producendis apta reperiuntur, eadem vis, eademque rerum origo superfit. Ac nullum certè animal, nullumque Plantæ genus afferri potest, quod plasticâ Terræ vi, sinè ovo, vel semine producat.

2. Quod enim Plantas plurimas in iis locis oriri objiciunt, ubi semina reperiri non possunt, ut in tectis, silvis, amplissimisque regionibus, id facilè solvi poterit. Quamvis enim in locis illis nulla semina videantur, inesse tamen experimento, clarissimâque ratione ostendi potest. Ac si de silvis quidem, latisque campis loquamur, illarum arborum, herbarumque; quibus eadem silva, vel ager ornatur, semina in subjectam terram decidunt, ibique excepta, subjectæque terræ humore nutrita paulatim in germen erumpere, novamque Plantam formare conspiciamus. Illæ verò, quæ in dirutis ædificiorum parietibus, domorumque tectis oriuntur, aut Plantis aliis, ut *viscum*, adnascuntur, ex iis seminibus oriri potuerunt, quæ a proximis, ac remotis etiam arboribus translata fuerint; exigua nimirum, ac tenuissima cum sint, facilè ab aëre, ventoque præsertim ex uno in locum alium transferri possunt; quemadmodum certè terra ipsa, in quâ nascuntur, quæque juxta Peripateticos ipsos, illas producit, licèt seminibus gravior, per aërem a vento rapi, ac super ædificiorum rudera, domorumque tecta deferri potest, ut Anaxagoras ipse docuerit Plantarum semina ex aëre advenire (b). Hinc in locis ejusmodi, su-

D 3

bli-

(a) Gen. c. 2. vers. 4. 5. (b) Theoph. III. c. 2. & I. caus. 5.

sublimioribus herbæ illæ nascuntur, quæ leviora, vel subtiliora semina habent, quæ nimirum facilius evehi, transferrique possunt.

Et certè Plantas etiam illas, quæ sinè semine oriri putantur, a semine plerumque per aërem translato produci probat Malpighius, quòd si terra e profundiori Telluris parte eruta in vase ponatur, idemque vas tenui velo operiatur, supra velum ipsum subtilissima herbarum semina deponantur, numquam verò terra virescere, vel germinare videatur; contra verò si aëri libero, excipiendisque seminibus idoneo terra exponatur, statim virescereprehendatur.

3. Quòd experimentum cum a Redio in carne similiter, caseo, aliisque corporibus accuratissimè peractum fuerit, manifestissimè demonstratur vermes in carne produci non posse nisi ex seminibus, vel ovis animalium, quæ aut ab animalibus ipsis in carne deponuntur, aut per aërem volitantia in carnem decidunt, ibique foventur, & in vermem evadunt.

Perperam itaque ex animalibus, quæ ex putrescente materiâ oriri prorsus immeritò existimantur, spontanea Plantarum origo probari conspicitur; atque ex spontaneâ animalium origine Plantarum productionem deducere nihil est aliud, quàm uno portento portentum aliud, probare, aut ex aliquo errore errorè aliud inferre.

4. Poterit itaque eadem rerum, plantarumque species, idem numerus, atque varietas conservari, etsi ex solis illæ seminibus producantur; cum tanta seminum copia in singulis plantarum generibus observetur, ut plantis aliis producendis longè sufficiant. Triticum certè, ut notissimo exemplo utamur, sæcun-

dum

dum adeo conspicitur, ut in sterilioribus locis 20. in aliis 30. vel 100. in fertilioribus verò 400. etiam grana producat (a). Atque hinc fortasse factum conspicimus, ut herbæ, vel frutices, illi, qui citiùs arescunt, majorem seminum copiam emittant, ut in illorum saltem aliquibus ipsorum species conservetur; quemadmodum ferè pisces, insecta, vel animalia, quæ ocyùs intereunt, & quorum ova faciliùs dissipantur, plura ova producant, ut ceteris ob loci intemperie, temporisque injuriam fatiscentibus, atque corruptis, saltem illorum aliquod conservetur, novumque sætum producat; quæ certè major fœcunditas, majorque ovorum, seminumque copia in imperfectioribus animalium, plantarumque generibus prorsus inutilis, Naturæque repugnans videretur, si animalia ipsa, vel plantæ sinè semine, vel ovo conservari, solâque terrâ produci possent.

5. Suos itaque motus in æthere cœlestia corpora liberè peragant; & , si quæ sint intelligentiæ, quæ cœlestibus sphæris contorquendis assideant, illis certâ periodo revolvendis invigilent, nihil de ranis, pulicibus, herbis, plantisque ex putrescenti materiâ in Telluris superficie producendis sollicitæ; lucem solùm, caloremque diffundant, quo solo Plantarum nutritio, & fœcunditas promoveatur: nobisque liceat ratione, experimento, sapientissimorum hominum auctoritate Plantas omnes ex proprio semine, nullam verò ex putrescente materiâ productam asserere.

V. Utinam verò, quemadmodum Plantarum omnium originem ex propriis seminibus, vel,

D 4

ut

(a) *Pljn. XVII. c. 5. XVIII. c. 10.*

ut Empedocles (a) dixisse fertur, ex ovis, repetendam esse, jam diximus, ita perspicuè, nitidèque intelligi, vel explicari posset arcana ratio, quâ semen ipsum in germen, plantamque novam convertitur! Id unum superiori sæculo compertum, & accuratissimè a Malpighio, aliisque innumeris ostensum est in quolibet Plantæ genere novæ Plantæ substantiam contineri; singulas nimirum novæ Plantæ partes tenuissimis veluti filamentis elegantissimo, admirabili, divinoque prorsus artificio, in semine delineatas, dispositas reperiri, ut semen a veteri, vel novâ Plantâ solâ partium mole distinguatur: eâdem ferè ratione, quâ singulas animalis partes in ovo contineri ostendemus. Id in Plantarum seminibus ope microscopii observatur, atque præsertim in fabâ a Grævio, aliisque communiter explicatur. Sit ex. gr. * faba, quæ duas in partes, ABC, DEF, qui *lobi* dicuntur, dissecta fuerit. Pars G *radicula* vocatur, quòd ex illâ plantæ radix formetur; H dicitur *pluma*, quòd veluti plurimis plumæ filis in fasciculum collectis componatur, & hæc plantulæ truncum, ramosque complectitur. Quod verò de fabâ diximus, de singulis etiam Plantarum generibus intelligitur, ut illarum semina duplici parte componantur, *radiculâ* nimirum & *plumâ*; quemadmodum in ipso germine, hoc est in *radiculâ* simul, & *plumâ*, mollior, & spongiosior pars, quæ *parenchyma* dicitur, & crassior alia, sive compactior reperitur. Cùm itaque semen in terram deciderit, ibique mediocri humore perfusum, leni Telluris,

aut

(a) Theophr. I. Caus. 7. & Arist. de Plant. I. c. 2, * Fig. II.

aut Solis calore foveatur, paulatim illius pori dilatantur, excipiendisque nutrititii succi particulis aptiores fiunt, quibus repleti sensim turgescere incipient, tenuesque germinis fibras dilatabunt, ut foliola, vel plantulæ rami prius involuti sensim explicentur, expandanturque interim dum radices ipsæ extendantur, & veluti capillitio quodam per circumpositæ terræ poros serpent, uberius inde alimentum habituræ. Tum verò superiori lege, vel serie singulæ radicum, trunci, foliorumque fibræ majorem semper molem acquirent, ut ex insensibili, tenuissimoque germine non frutex modò, teneriorque planta formetur; sed parvo temporis intervallo durior etiam, atque compactior Planta oriatur. Hæc sunt, quæ de Plantarum origine veluti certa, longèque verisimillima defendi possunt. Qui plura desideret, Grævium, Malpighium, aliosque adire poterit, qui de Plantis uberius scripsere. Nobis ad alia properantibus hæc indicasse sufficiat; tamen illud unum coronidis loco adjungemus non Plantas omnes ex semine modo superius exposito oriri, sed plures etiam arte, vel *inseri*, vel *transferri*, unde Plantarum *insitio*, vel *translatio* deducitur.

VI. *Insitio* Plantarum fieri dicitur cum trunco unius Plantæ truncus, aut furculus, aut cortex alterius Plantæ inseritur, aptèque conjungitur. Pluribus autem modis hæc fieri solet, ut Agricola norunt, quorum tres præcipui memorantur.

Primus insitionis modus fit cum secto transversè, vel horizontaliter arboris trunco, vel ramo, inter corticem, & lignum, sive carnem resectæ arboris, paxillus, sive cuneus ex ligno, vel

vel ferro vi adigitur, atque in ejusmodi vulnus alterius arboris furculus inseritur, ut cum veteris Plantæ ligno, & cortice, circumligato si opus fuerit trunco, arctissimè adhæreat, ac tenaciùs jungatur. Ejusmodi insitionis genus *Infoliatio* a veteribus dicebatur, soletque in iis arboribus adhiberi, quæ crassiorem, humidiorumque corticem habent, ut *ficus, olea, &c.*

Alter insitionis modus est cum resecto, ut priùs, arboris trunco, vel ramo, furculus aliquis, aut ramus alterius arboris probè ex utraque parte resectus assumitur, qui supra resectæ arboris ramum ita coaptetur, ut utriusque cortices, atque medullæ cohereant, superimpositi nempe surculi cortex, & medulla, resecti rami cortici, & medullæ accuratè respondeant, tum utriusque corticis commissura pice liniatur ut aëri, humorique externo aditus prohibeatur. Hic inferendi modus, qui propriè *Insitio* vocatur, usurpari solet in arboribus illis, quæ tenuis corticis fuerint, omnemque ferè humorem intra medullam contineant, ut *vitis, citrum, &c.*

Tertius denique Insitionis modus perficitur cum ex resecto Plantæ ramo cortex circulariter detrahatur, ramoque sic denudato æqualis cortex ex ramo alterius plantæ similiter tractus inseritur, aut circumponitur; ut circumpositi corticis fibræ, & gemmæ cum alterius subjecti corticis fibris, & gemmis aptè respondeant; ut nempe succus ex inferiori cortice in superiorem liberè ascendat, circumductâ præsertim commissura ope ceræ, vel picis, vel musci, ut aëris, humorisque injuria arceatur. Ceteri verò Insitionis modi, qui *emplastratione, terebratione*, aliisque pluribus

ar-

artificiis perficiuntur, apud Plinium, Theophrastum, Virgilium, Columellam, aliosq; , qui de Georgicâ, vel Agrorum culturâ scripserunt, legi poterunt, quos inter elegantia, & nitore laudandus maximè Aloysius Alamannus, qui etruscis carminibus Georgicam illustravit.

VII. Admirabilis autem est hujus insitionis utilitas, & elegantia. Et quòd ad ad utilitatem quidem, finemque pertinet, inseritur arbor, ut si aspera, silvestris, & amara sit, in dulcem, domesticam, & lenem convertatur; dulcioresque fructus producat, ut ait Virgilius

— nec longum tempus, & ingens

Exiit ad cælum ramis falicibus arbor,

Miraturque novas frondes, & non sua poma (a). Elegantia verò in insitione conspicitur, quòd eadem Planta ex eodem trunco per varios ramos, varios, diversosque flores, & fructus emittat, pluriumque Plantarum vires admirabili quodam foedere conjunctas exhibeat. Hinc Plinius (b) se tiliam arborē vidisse memorat, ex quâ nuces, baccæ, uvæ, ficus, pyra, punica pendent, quòd nostris in hortis etiam conspicimus.

Nihil est autem cur id ex solâ fibrarum texturâ, quibus Plantarum cortices componuntur, oriri dicamus. Itaque cum in surculis, sive corticibus Plantarum fibræ, vel pori variâ ratione dispositi sint, singulæque Plantarum species proprium, peculiaremque fibrarum ordinem, sive texturam habeant propriis floribus, fructibusque producendis idoneam, ubi nutritius humor ex veteris trunci, vel corticis

fi-

(a) *Georg. II. ver. 80.* (b) *XVII. c. 16.*

fibris in novas novi corticis, truncive fibrae ascendit, variâ ratione philtratur, digeritur, percolatur, varioque modo dirigitur, ut in flores, fructus, ac folia novo cortici affinia erumpat, qualia nimirum, ex ipso trunco, vel arbore producerentur, ex quâ cortex eductus est. Plurima tamen in insitione juxta varias Plantarum species, loci, vel temporis accidentia observanda sunt, de quibus a Plinio, Theophrasto, aliisque fusè differitur.

VIII. Longè facilior est alia Plantarum propagatio, quam rami *translatione*, vel *infixione* fieri diximus, quando nempe viridis ramus ex arbore virente dissectus infra Terram defigitur. Is etenim nutritivum humorem per poros in infimâ sui parte hiantes, vel apertos exsugit, interimque dum ipso nutritur in parte terræ subjectâ ramulos radicum instar emittit, qui per terram ipsam serpentes uberio-rem succi copiam exsugunt, quæ ramo in Plantulam jam converso uberius adhuc nutriendo, augendoque sensim ascendit. Hæc altera Plantarum propagatio in vite, aliisque Plantarum generibus observatur, iisque præsertim, quæ rara, vel nulla fortasse semina emittant, ut solitâ, communiorique methodo producantur. Idque in ipsâ observari meritò poterit, quod, etsi ramus a veteri Plantâ avulsus, vel excisus inverso ordine, vel situ Terræ insigatur; ut illa nimirum rami pars, quæ subtilior, & superior fuerat, inferius terrâ tegatur; ramus tamen adhuc vivere, novamque Plantam producere deprehenditur; quodd arboris fibræ ita dispositæ sint, ut per illas ex quacumque parte nutritivus humor ascendere, sive descendere possit. Lentiùs tamen, atque lan-

languidiùs, neque in singulis Plantarum generibus ramus ille virere, vel adolescere conspicitur, quòd ea sit in arbore fibrarum dispositio ut in alterâ illarum parte nutritius humor faciliùs ascendere, ægrè descendere videatur: quemadmodum etiam arborum fibræ, vel pori in eâ Plantæ parte, quæ australem Cœli partem respiciat, ampliores videntur iis, quæ ad boream convertuntur; ut cùm alioquin Plantæ pluribus veluti circulis sibi concentricis componantur, circuli tamen eâ parte, quâ australem, calidioremque aërem inspirant, ampliores conspiciantur.

C A P. V I.

De qualitatibus Plantarum, illarumque viribus.

I.



Amplissimus hñc nobis, uberri-
musque campus aperiretur,
maxima nimirum, & infinita
rerum series exponenda sup-
peteret, si de Plantarum viri-
bus, & accidentibus, singula
prosequi mens foret, quæ præsertim accura-
tissimis Chymicorum studiis superiori ætate
sunt illustrata. Quandoquidem verò pressius
hñc agere, ac summa veluti rerum capita com-
plecti volumus, varias illorum accidentium spe-
cies enumerabimus, quæ in singulis Planta-
rum generibus observantur, deinde verò qua-
litates illas, & accidentia exponemus, quæ,
cum admirabiles, nobilioresque sint, in certis
solum Plantarum generibus deprehenduntur.

II. Ac

II. Ac initio quidem enumerandæ, vel explicandæ fortasse viderentur soliditas, flexibilitas, calor, aut frigus, densitas, siccitas, aliæque id genus innumeræ, quæ in Plantis, & herbis omnibus observantur. Sed, cum qualitates ejusmodi corporibus etiam omnibus communes sint, illarumque caussa, & origo in Physica Generali Tract. IV. explicata jam fuerit, hîc meritò omitti poterit. Eodem fortasse jure qualitates illæ omitti possent, quæ, cum sensus afficiant, *sensibiles* appellantur, ut *color, sapor, & odor*; quòd illarum natura, & origo, ibi sit explicanda ubi de colorum, saporum, & odorum origine differetur. Cum tamen hæc ipsa Qualitatum cognitio ex iis, quæ superiori loco sunt explicata, faciliè deducatur, iisque mutuo plurimam lucem afferat, hîc etiam brevissimè subiicietur.

III. Itaque Plantarum omnium color, ex solâ partium texturâ, humorisque nutritii dispositione producitur. Quemadmodum enim quilibet color, ut suo loco ostendetur, ex solâ reflexione, vel refractione lucis oritur, ut nempe pro variâ ratione, quâ radii lucis in objecti corporis superficiem incidunt, atque ex illâ resiliunt, & reflectuntur, varium motum, vibrationemque concipiant, quâ oculi nostri fibras percellant, colorisque sensum in illo imprimant, ita quoque Plantarum colores ex variâ partium figurâ, vel ordine, quo fibrarum, humorisque particula præditæ sunt, ori ri poterit. Cum itaque in variis Plantarum generibus variâ sit hæc fibrarum, tenuissimarumque partium figura, ut ope microscopii deprehenditur, mirum esse non debet, si maxima quoque, & incredibilis est illa colorum

varietas, quæ in Plantis, præsertim verò foliis, fructibus, floribusque conspicitur. Ac folia quidem, & cortex, quemadmodum etiam fructus acerbior adhuc, & immaturus, viridem colorem habent, quòd majori fortasse, nondumque satis percolatâ succi copiâ repleantur. Interim verò dum fructus ipse maturescit, arborum foliis, fructibusque flavus color accedit, quòd impuriori, viridique succo jam probe percolato, vel evaporato, aureum colorem inducant. Nonnullis etiam floribus, ut *violis*, cæruleus color inesse conspicitur, quòd in illis nigrior, crassior, regerendoque lumini ineptior succus reperiatur. Rubens verò color in *tulipa*; *rosa*, aliisque pluribus observatur, quòd illarum partes radiis alternè reflectendis, imbibendisque aptæ sint, ut ex. gr. flammæ apex rubicundus apparet, quòd ibi crassiores, nigrioresque fumi particulæ subtilioribus ignis particulis permixtæ istarum lumen impediunt, ut radii lucis dum alternâ ferè vibratione oculum percellant, rubei coloris sensum efficiant. Plurimum denique Plantarum flores, & fructus, albedinem exhibent, ut *lilium*; sive quòd in ipsis humoris particulæ uberius aëri permiscantur, ideoque spumæ, vel nivis instar alborem concipiunt; sive quòd asperæ, variisque facieculis, & cavitatibus dispositæ sint, ut uberiolem proinde lucem reflectant, & albedinem, quæ ex uberiori luce dependet, acquirant, ut etiam in chylolo dum ex digestis, fermentatis, triturationisque cibis in lacteas venas impellitur, observatur.

IV. Longè clarior, & explicatu facilior est origo saporum, qui variè in variis Plantarum generibus observantur. Itaque corporum sa-
por,

por, ut uberius, & opportuniùs alibi demonstrabitur, ex illis salium particulis oritur, quæ, cum intra corporum substantiam permixtæ reperiuntur, ubi contusis iisdem cibus nervorum fibras, quæ plurimæ, tenuissimæ, delicatissimæque in linguâ, sive palato observantur, percellunt, aut pungunt, spiritus animales intra fibras ipsas, vel nerveas papillas commovent, ac impellunt, ac denique in cerebro variam pro varietate figuræ, molis, aut motûs, quo præditæ fuerint, saporis sensum producunt. Cum itaque in variis Plantarum generibus variæ salium species contineantur, ut ex chymicâ illarum analysi demonstratur, variùs quoque sapor ab illis oriri debet; ac inæqualis etiam, sive subinde varius in eadem Plantâ, vel fructu sentiri, prout humor, aut succus variè dispositus, permixtus, percolatusque fuerit. Hinc sapor alius austerus, acerbus, acris, acidus, & amarus, alter dulcis percipitur. Acerbus, ut in fructibus immaturis, qui linguam asperè confricant, ac veluti aculeis pungunt. Acris in *capa*, *sinape*, *pipere*, quod subtilioribus, aculeatisque particulis, ignis instar, linguam, ejusque fibras percellant. Acidus, in *malis citrinis*, *acetosâ* percipitur, & acri similis est, atque cum illo confunditur, nisi quod acidum tenuis quidam adstringentis frigoris sensus consequitur. Amarus in *pyris* præsertim, aliisque fructibus corruptis, & marcescentibus, in *absinthio*, *aloe* reperitur, quod ab illorum particulis præve-
dispositis linguæ, palatique fibræ duriùs afficiantur; dulcis verò sapor in omnibus ferè fructuum generibus observatur, ubi ad debitam molem, maturitatemque pervenerint. Hic autem

tēm in rotundis, lævibusque particulis positus videtur, quæ linguæ superficiem, nerveasque papillas veluti obliniant, ac æquabili ductu præterfluant. Innumeri denique saporēs alii observantur, qui ex superioribus veluti permixti censerī poterunt, ut ex acido, acerboque compositus videtur ille, qui in acerbis uvis percipitur.

Quo quidem loco notari plurimū debet varios saporēs, non ex fructibus ipsis, illorumque salibus, sed ex variâ plerumque organorum dispositione pendere, ex variâ nimirum nervorum, fibrarumque texturâ, quæ in animalium diversorum palato, seu linguâ reperiatur. Hinc idem sapor, idemque fructus diversus, ut amarus, aut dulcis a diversis animalibus percipitur, ut *collyquintida*, quæ hominibus amara videtur, videtur muribus dulcissima; quinetiam uni, eidemque homini fructus aliquis interdum suavis, & gustui gratus percipitur; insuavis interdum, & ingratus, quod juxta variam organorum dispositionem, ut in ægritudine experimur, variam in illorum fibris salium, ciborumque particulæ impressionem efficiant, variique saporis sensum producant.

V. Posteriori denique loco de Plantarum odoribus loquuturi, illud veluti certum, alioque loco demonstrandum supponimus, odores ipsos in perenni subtilissimarum partium effluvio positos esse, quæ ex odoro corpore erumpentes, atque in circumfusum aërem diffusæ in interiori narium membranâ receptæ nerveas, tenuissimas, delicatissimasque illius fibras percellant, eamque sensationem excitent, quam *odorem* vocamus. Exinde verò facilè apparet, quod juxta variam illarum partium figuram,

molem, & motum, quibus nervorum fibræ afficiuntur, varius etiam odor oriri debet. Cum itaque in floribus, fructibusque, & in quibusdam etiam Plantarum, sed herbarum præsertim, generibus halitus quidam, vapor, tenuissimarumque partium effluvium erumpat, superiorique ratione variū motū fibrillis imprimat, pro diversâ Plantarum, halituumque copiâ, & figurâ varius in floribus, fructibusque odor percipitur. Sic aliquæ Plantæ suavem, gratumque odorem emittunt, ut *rosa*, *viola*, &c. aliæ acutum, ut *nardus*, &c. aliæ ingratum, & graveolentum; ut *genista*, &c. Atque hic quidem florum odor gravior plerumque, & suavior in aliquâ ab arbore, seu flore distantia percipitur, quàm si flos ipse naribus admoveatur, quod uberior halituum, vaporumque copia ex proximiori flore erumpens nervorum fibras, animalesque spiritus acrius percellat, tenerius verò, leviùs, sive remissiùs ex remotiori. Major etiam, & acrior florum odor sentitur, latiusque diffunditur tepente aëre, quàm frigidiori, tum quod leni aëris calore nutritivus humor perfectiùs digeritur, & percolatur, halitibusque odoriferis emittendes aptior efficitur; tum etiam quod vi caloris Plantarum, florumque pori laxiores redduntur, ideoque plures, confertioresque halitus emittunt; tum denique quod aër ipse rarior effectus liberiozem aditum halitibus ipsis in aëre volitantibus, sensimque diffusis aperiat, ut etiam in igne, fumo, aliisque corporibus, quæ per aërem diffunduntur, est observatum. Hinc in Arabia, aliisque calidioribus locis arbores odorem spirant, quem in regiones nostras translata tenuem, nullumque ferè produ-

ducunt. Hæc tamen, aliâquæ id genus plurima, clariùs certè, & uberius deducuntur ubi de coloris, odoris, saporis, aliarumque sensibilibium causâ, & origine tractatum fuerit.

VI. Explicandæ modò supersunt qualitates aliæ, sive virtutes Plantarum, quæ longè admirabiliôres, nobilioresque sùnt, & *occultæ* vocari solent, quodd illarum causâ, & agendi vis intelligi, nitidèque explicari vix possit. Ejusmodi verò sùnt præsertim illæ, quæ a Medicis adhiberi solent, in quibus nimirum aliqua medendi vis, curandorum vulnerum, purgandi corporis, aliave similis facultas reperitur. Illarum aliquas hîc ordine subiiciemus, ostendemusque eas etiam a solâ tenuissimarum partium, præsertim verò salium figurâ pendere. Atque, ut receptam illarum divisionem sequamur, illæ in *purgantes*, *venenatas*, & *antidotæ* satis accommodè distinguuntur.

VII. Purgantes dicuntur illæ, quæ noxios humores ex corpore expellunt; cujusmodi plurimè memorantur; sic *colocynthis* pituitam, *scammonium*, & *rhabarbarus* bilem, *helleborus niger* melancholiam ex toto corpore expellunt, *helleborus* autem *albus* vomitum provocat; *raphanus* urinam solvit; *salsa parilla* sudorem excitat; hoc uno discrimine quod *cassia*, *manna* in cibum, purgatique corporis substantiam convertuntur, ac nisi purgaverint, nihil corpus offendunt; *scammonium* verò dolores, & noxas excitat. Quæ quidem varietas, & facultas ipsa purgandi ex plurimis salinis, acribusque particulis, quæ in senâ, rhabarbaro, aliisque reperiuntur, oriri poterit, quæ dum ventriculi, & intestinorum fibras pungunt, vellicant, & excruciant, efficiunt, ut contra-

Ab ventriculo vomitus excitetur, aut intesti-
 norum contractione cum excrementis protru-
 dantur. *Jalapa* similiter, quæ ex *Mechoacum*
 novæ Hispaniæ provinciâ advehitur, ob acres,
 penetrantesque particulas, lympham excernit;
 unde ab hydropicis, & arthriticis sæliciter
 adhibetur. *Guajacum* verò, vel *Hiacum*, sive,
 ut communiter appellatur, *lignum sanctum* in-
 ter sudorifica remedia numeratur, quodd illius
 cortex, & gummi quoque ex ipso cortice de-
 fluentes in corpore sudorem excitent. Quo stu-
 dio arbor illa apud occidentales Indos excola-
 tur, fusè describitur a Fracastorio (a); quemad-
 modum accuratissimè illius distillationem, &
 præparationem exponit Lemery (a). Guajaco
 affinis est *Quinquina*, vel *cortex Peruvianus*,
 quo febrilis, & acidus humor retunditur, &
 absorbetur. Ex arboris oleæ non dissimilis cor-
 tice *cinnamomum* educitur, oleum nempe ven-
 triculo restaurando, reficiendoque aptissimum;
 quemadmodum ex *nuce moschata*, arboris ni-
 mirum fructu, oleum exprimitur, quo ventri-
 culo robur additur. *Ipecacuana* denique, vel
 Brasiliensis cujusdam arboris radix, profluvio
 sanguinis, sive dissentericiæ, quæ cum visce-
 rum torminibus, aut ulceratione plerumque
 conjungitur, medetur; acidum nempe humo-
 rem intestinis ipsis inclusum, atque vellicatio-
 ne suâ intestinorum fibrillas lancinantem, cruo-
 remque excitantem leniter secum abripit, quod
 etiam de *manna*, *cassia*, aliisque similibus in-
 telligi debet.

VIII. Purgativis etiam accenseri meritò pos-
 sunt tria Plantarum genera, quæ usus celeberrima

(a) *Syphilid. III.* (b) *Chym. par. II. c. 3.*

rima reddidit; *Tabacum* nempe, *Cassè*, & *Tbè*. Et quodd ad *Tabacum* quidem pertinet, ex *Tabaco* insulâ primùm a Lusitanis in Europam delatum, brevique apud omnes usu receptum est; cùmque *Joannes Nicot* Francisci II. Galliarum Regis Orator apud Sebastianum Lusitanæ regem illud in Galliam, ad Catharinam Galliarum reginam miserit, *herba Regina*, *herba Nicotiana* a Gallis communiter appellatur. Quâ ratione, quibusve modis hæc herba, sive in pulverem comminuta naribus excipiat, sive in frustula decerpta ore mandatur, sive ejus accensæ fumus per longiores fistulas attractus ore excipiat, notius est certè, quàm ut hîc uberiùs exponatur. Tabaci utilitas plurima celebratur, atque in hoc præsertim posita videtur, quodd si in pulverem comminutum, naribusque exceptum fuerit, internam narium membranam vellicat, ejusque fibras commovet, contrahit, ut ex illis veluti spongiis compressis mucosus humor exprimatur, sensimque humores alios ex circumpositis, vicinisque glandulis evocet; unde cerebrum purgare, capitis gravedinem levare, hilaritatemque inducere existimatur. Quod si aut combusti tabaci fumus ore excipiat, aut illius frustum dentibus conteratur, acres illius particulæ maxillarum, palatique glandulas penetrant, & ex illis salivam, & humores alios noxiis fluxionibus efformandis idoneas exprimunt, unde non modò dentium dolor, sed catarrhus etiam, tussis, asthma, aliæque pulmonum affectiones, quæ a noxiis humoribus producuntur, curari solent. Quinetiam ulceribus ipsis mederi conspicitur, dum putridis carnibus sensim corrosis, pravisque humoribus sensim consumptis,

cicatricem inducit. Ex quo tamen intelligi facile poterit, quàm grave incommodum ex nimio illius usu timeri debeat. Si etenim corruptas etiam carnes exedit, atque depascitur, & causticâ quadam vi sensim consumit, quid in tenerioribus, delicatioribusque palati, nariumque fibris efficiet? Acrius certè, ac vehementius illas percellet, nervulosque contrahens dolorem, stupiditatem, ac spasmum etiam inducet, ut experimento ipso clarissimè demonstratur. Itaque vereri, vel suspicari facile possumus, ex innumeris, omnibusque ferè, qui tabaci usu plurimum delectantur, paucos admodum fore, qui ejusmodi fructus percipiant, sive quòd modum excedant, sive quòd nimia, diuturnâque consuetudine narium fibræ sic induruerint, ut omnem ferè sensum amiserint.

IX. Eadem ferè, quæ de Tabaco diximus, de fructu quoque alterius herbæ *Cassæ*, qui ex Arabia felice plurimus advehitur, intelligi poterunt. Hic siquidem igne tostus in pulverem comminutus, ac ebulliente aquâ decoctus admixto plerumque saccharo sorbetur; cùmque plurimas salis volatilis partes contineat, spiritus excitat, ac impellit, unde vigilia producit; tum sanguini admixtus celeri, perturbatoque motu illum adigit, neque medio-crem sanguinis partem in serum convertit, quod in renibus percolatum in vesicam illabitur. His itaque hominibus, quibus subtilior est sanguis, aut quibus minor est in corpore humoris copia, noxius erit ejusmodi potus; quemadmodum etiam eos, qui delicatiores nervorum fibras habuerint, acris, salinisque particulis lædi conspiciamus.

X. Longè levior, ac purior est illa potio,
quæ

quæ ex foliis *Tbè*, arbusculi nimirum apud Si-
nenses, Siamenses, & Japonenses celeberrimi,
decoctis paratur. Cum etenim duplici substan-
tiâ componatur, alterâ nimirum crassiori, vel
fixâ, quæ ex amaro sapore percipitur; altera
verò, quæ cum subtili, copiosoque sale præ-
dita sit, suavem etiam odorem emittit, & a-
quæ, cui permixta, sive decocta fuerit, im-
pertitur, hujus particulæ animales spiritus le-
niter excitabunt, vigiliam in cerebro indu-
cent, serenamque mentem efficient; ventricu-
culo sive ob laxiores fibras imbecilliori, sive,
ob ingestos cibos graviore robur adicient,
cholicos dolores lenire, rheumaticos, arthriti-
cosque cruciatus avertere, aliaque id genus
præstare poterunt; si modustamen, temporis-
que opportunitas observetur.

XI. Cæteras tamen potiones omnes, quæ ex
exteris fructibus parari solent, sive suavita-
tem, sive utilitatem consideres, superare di-
citur *Succolata*, vel *Chocolata*, quæ ex *cacao*,
& *vanilla*, arborum nempe, quæ in Americâ
frequentissimæ reperiuntur, fructibus unâ con-
tusis, permixtis, certâque lege dispositis, addi-
tis plerumque sacchari, ambræ, caryophylli,
vel cinnamomi partibus efformatur. Hæc por-
rò non modò cerebri caliginem discutit, &
cor exhilarat, sed vires etiam reparat, ven-
triculum reficit, ac instar cibi mirificè nutrit,
ac recreat, ut a plerisque Helenæ Nepenthi
comparetur.

XII. Quemadmodum verò Plantarum pluri-
mæ sanando coprori, noxiisque humoribus abi-
gendis adhiberi feliciter possunt, ita aliæ ægri-
tudines ipsas inducere solent, ac venenatæ pro-
inde vocari solent. Ejusmodi certè sunt *napel-*

lus qui, nimio calore sanguinem, cui admisce-
tur, extenuat, agit, tenuemque viscerum sub-
stantiam exurit, lancinat, & exedit; *cicuta*
verò nimio frigore sanguinis particulas in sub-
tilioribus, extremisque venis paullatim sistit,
ut ibi veluti congelatus torpeat, tum quiete
sensim ad cor diffusâ, ac ferè serpente sangui-
nem in ipso corde stagnantem reddit, unde
mors consequatur.

XIII. Eadem tamen Natura, quæ Plantas a-
lias noxias, ac venenatas esse voluit, veneni
remedium in Plantis aliis constituit, quæ *an-
tidota* nominantur (a). Sic *portulaca*, quæ ca-
lidior est, tenuesque sanguinis partes vehe-
menter impellit, veneno, quod ex nimio fri-
gore, & sanguinis quiete oriebatur, mederi
solet: quemadmodum quoque vinum merum
veneni frigus reprimat, ac retundit. *Allium* ve-
rò, si contundatur, vulnerisque loco apponatur,
exinde noxii humoris, seu veneni particulas
sensim exsugit: eadem ferè ratione, quâ scor-
pius ipse contusus, vulnerique impositus vene-
num a se diffusum ex vulnere retrahit; sa-
ponis instar, qui cum ex olei particulis com-
ponatur, alias olei partes ex panno paullatim
allicit.

XIV. Sed innumera propemodum sunt, quæ
de Plantarum viribus a Scriptoribus memoran-
tur. Itaque id breviter certò constitui pote-
rit, quod si virtus aliqua in Plantis reperia-
tur, quæ non fabulosa sit, neque solâ vete-
rum auctoritate, sed experimento confirmata
fuerit, hæc aut a salibus, aut oleis, aut sub-
tilioribus aliis particulis, quas varias in va-
riis

(a) Videt *Transf. Philos.* n. 231.

riis arboribus esse diximus, oriri debet; ut ex variâ nimirum partium figurâ, motu, magnitudine humores in corpore contenti, nervorumque fibræ variâ ratione excitentur, premantur, ac percellantur, ut dissolutæ, contractæ, alioque modò dispositæ variis affectibus producendis aptæ reddantur. Quod quidem clarius, & uberius intelligi poterit ubi de corporis animalis structurâ, de nutritione, de qualitatibus sensibilibus differatur.

C A P. VII.

*De morbis, & interitu
Plantarum.*

I.



Legans illa partium varietas, fibrarum ordo, perennis succi circuitus, & innumeræ qualitates aliæ, quas in singulis Plantarum generibus observari jam diximus, satis, ut opinor, ostendunt Plantas ipsas variis ægritudinibus obnoxias esse, ac aliquando interire. Itaque Plantæ animalium instar morbo laborare dicuntur, ubi perturbatâ partium texturâ, corrupto, vel arescente humore, solitos effectus producere, suasque vires exercere vix possunt; mori verò, vel interire cum motus omnis in Plantâ sensim languere, ac postremò extingui conspicitur.

Varias utriusque causas hîc exponemus, ut exinde clariùs, & uberiùs adhuc intelligantur, quæ de nutritione Plantarum paullo superiùs ostendimus.

II. Ac primò *sterilitas*, & *agritudo* Plantarum ex iis locis oriri poterit, in quibus natæ fuerint; sive ob terræ naturam, sive ob humoris inopiam, sive denique ob aëris intemperiem. Ex vitio quidem soli, quodd nutritius humor in illo ritè non percoletur, unde conspiciamus Plantas aliquas terram macrem, & saxosam, alias pinguem, subtilioremque desiderare; et, si aliquo in loco arescere, sive languere videbantur, in locum alium translatae viridiores fieri, meliores, dulcioresque fructus producere observantur. Inæqualis etiam, aut parcior humoris copia, quæ nimirum nutritendæ Plantæ impar sit, steriles, & arescentes illas efficiet, ut populus fluminum ripas amare dicitur quodd uberiori humore nutriatur, longiùs a fluminibus confita arescat. Ipsa denique aëris temperies, & cœli status ad Plantarum sanitatem plurimùm confert cum illarum aliquæ calida, aliæ frigida, aliæ umbrosa, aliæ aprica, aliæ arida, aliæ palustria loca desiderant; ideoque si fortasse locum naturæ, indolique propriæ contrarium sortitæ fuerint, aut in proprio, naturalique loco adversam cœli temperiem experiantur, nimio nempe ardore, vel humiditate, vel frigore torqueantur, languere Plantæ conspiciuntur (*).

III. His universalibus morborum causis accenseri facillè poterunt aliæ particulares, quæ a Plinio, aliisque Scriptoribusque memoran-

(*) Vid. *Virg. Georg.* II. v. 109.

rantur , *rubigo* nempe , *roratio* , *sideratio* , *vermiculatio* .

1. *Rubigo* fit cum roscidus quidam , & acris humor leguminum , & herbarum foliis excipitur , ibique fermentatus interiorum quoque Plantarum substantiam rubiginis instar corrodit , atque consumit . Hac vites ipsæ afficiuntur , sed præsertim frumenta , unde Virgilius

*Mox & frumentis labor additus , ut mala culmos
Esset rubigo . (a)*

2. *Roratio* verò contingit cum teneriores præsertim arbores nimia humoris copia perfunduntur , aut certè effusâ , vehementique pluvia illarum flores in terram excutiuntur , ut fructuum spes omnis evanescat .

3. *Sideratio* vocatur a Plinio morbus ille , vel ægrotudo Plantarum , quæ a Cœlo , sive sideribus pendere credebatur , ut *uredo* , vel *ustulatio* , & *carbunculatio* ; *uredo* nimirum cum roscidus cœli humor gelidæ noctis tempore in ipsâ vitis gemmâ constringitur , sive cum pampini , racemique nimio solis ardore exuruntur ; *carbunculatio* verò cum vites vehementius adhuc existæ carbonis instar nigrescunt . Atque his quidem Plantarum morbis producendis grando , venti , fulminum afflatus , aliæque causæ conferre possunt , sive quodd nutritii humoris circuitum contusis , læsisque fibris impendant , sive quodd noxios halitus eidem humori permisceant , sive denique quodd humorem ipsum depascantur , atque consumant .

4. *Vermiculatio* contingit arboribus cum exterior illarum cortex a vermiculis obducitur , atque corroditur , ut ab ipsis fibrarum textura læda-

(a) Georg. 1, v. 150.

datur, atque humor nutriendæ Plantæ destitutus consumatur; quod in *ficibus* præsertim; *pyris*, aliisque dulcioribus Plantis conspicitur; etsi non desint amaræ quædam, quæ tamen a vermibus offendantur. Tanta verò vermium, aliorumve animalium malignitas est, tantamque Plantis perniciem afferunt, ut si *olea* lambatur a caprâ sterilescat; *amigdalus* ex dulci amarus fiat; *vitis*, aut sterilis evadat, aut prorsus intereat; quodd nempe succus, aut humor, qui ex capræ linguâ exprimitur, humorique plantæ permiscetur, arbori noxius sit, ac ferè veneratus.

5. Plerumque tamen arboribus noxia sunt animalia quodd aut extremos, tenerioresque illarum ramos depascantur, aut corticem ipsum corrodant, unde arboribus *decatuminatio*, & *decorticatio* contingit: detractò verò cortice, exsectisque ramis lædi Planta, vel interire conspicitur, quodd nutritius humor in foliis, & cortice percoletur, purior, nutriendæque Plantæ aptior efficiatur; ideoque detractò cortice exterioris aëris injuriis arbor exponatur, nec ampliùs humor ascendere, & percolari possit.

6. Verùm, etsi cortex minimè detrahatur, sed aliquibus solùm in locis veluti vulneribus incidatur, hac *vulneratione* offenditur Planta, *pinu* tamen, *terebintho*, *abiete*, aliisque viscosioribus Plantæ exceptis, quæ potiùs ex ejusmodi vulneribus fecunditatem, & alacritatem acquirunt, quodd per illa nimius, & superfluous humor egeratur.

IV. Ac interitus quidem, & ægitudines illæ Plantarum, quæ a causis superiùs enumeratis oriuntur, *extrinsecæ*, *violenta* vocari meritiò possunt; quæ proinde Plantarum vitam

mo-

modò breviorē, diuturniorēque efficere fortuitò, nullāque certā lege, sive periodo poterunt. Aliæ verò morborum, ac interitûs causæ veluti *intrinsicæ*, vel *naturales* haberi poterunt, quodd ab ipsâ Plantarum naturâ dependeant. Quemadmodum itaque animalia senio tabescunt, consumptisque sensim corporis partibus tandem intereunt, ita similiter Plantæ corruptis sensim, vel putrefactis fibris, vitiatis utriculis, meatibus noxiis, crassiorique humore occlusis, paulatim laxiores, debilioresque redduntur; unde languidiùs spirare, minùsque feliciter virere, vel germinare videntur, tandemque senio, vel morbo sensim ingravescente arescere, atque corrumpi, ætatemque propriam absolvere.

V. Non eadem porrò in singulis Plantarum generibus ætas, vitæque diuturnitas observatur; sed herbæ singulis annis intereunt, ac renascuntur; arbuta binos, aut ternos annos attingunt; arbores aliæ aliis diuturniores videntur. Vites ad sexagenos annos durare memorat Plinius, oleas ad ducentos; quemadmodum *Iotom* in Lucinæ arâ quadringentis annis stetisse inferiùs ostendit. Arbores etiam aliæ, quæ quadringentesimum annum superaverint, a Gassendo, aliisque Scriptoribus memorantur, quod accuratâ posterorum observatione clariùs aliquando, certiusque definiri fortasse poterit.

VI. Atque hæc de primo Viventium genere, sive de Plantis dicta sufficiant. Qui plura fortasse desideret, Auctores illos adire poterit, qui Botanicam, sive Plantarum scientiam uberrimè illustrarunt; in quibus plurima scitu jucundissima, ab instituti tamen, operisque nostri consilio aliena, reperiet.

PHY-

PHYSICÆ
 PARTICULARIS
 TRACTATUS SECUNDUS



DISPUTATIO III.

*De Animâ Sensitivâ, sive
 de Brutis.*

P R Æ F A T I O.



Ulcherrima terrestrium corporum species, rerumque omnium, quæ nostris oculis obversantur, censeari poterit Animal, quod clariori, communiorique nomine *Brutum* vocamus. Sive etenim elegantissimam partium varietatem, ordinem, texturam consideres; sive incredibilem potiùs in variis motibus peragendis, præsertim verò in objectis corporibus sensuum ope cognoscendis, vim contempleris, id unum facile inferre poteris, nihil esse in amplissimo hoc rerum theatro, in quo maxima, & admirabilis divini Artificii sapientia clariùs, & illustriùs effulgeat. Nutriuntur itaque Plantarum

rum

rum instar, vegetant, adoleſcunt, ſibiſque ſimile generant Bruta; hoc tamen ſingula Plantarum genera ſuperant, vel hoc inſigni diſcrimine a Plantis ipſis accuratiſſimè diſtingui ſolent, quòd objecta corpora ſenſu percipiunt, variis, miriſque motibus corporis partes agitant, plureſque operationes efficiunt, quæ non modò partium texturam Plantis, Brutisſque communem, ſed ipſam quoque corporeæ ſubſtantix naturam, conditionemque excedere videantur. Admirabilem itaque ſentientis, vel cognoſcentis Animæ doctrinam in hac tertia Diſputatione hoc ordine complectemur, ut expoſitâ priùs illius naturâ, & origine, varia Animalium genera; varias, quibus animalia ſingula componuntur, partes; varias denique ſingulaſque vires, & operationes, quæ in ſingulis Animalium generibus, præſertim verò in homine, conſpiciuntur, clariori, melioriſque ordine, quem ipſa ferè rerum diſſerendarum ſeries, atque conditio poſtulat, exponamus.



*De Animæ sensitivæ naturâ, sive
de Animâ Brutorum.*

I.



Uamvis plurima, ac infinita ferè sint illa; quibus occultam esse rerum naturam manifestissimè erudimur, nullibi tamen id clariùs, aut uberiùs apparet, quam cum de Brutorum animâ, sive sentientis animæ naturâ, & origine differatur. Ceteris enim in rebus ita veteres, recentioresque Philosophi inter se dissident, ut nullâ ex parte pulcherrimum veritatis lumen effulgeat, ipsorum quilibet illius inquirendæ amore incensus opinionem suam liberè tueatur; ubi verò de brutorum animâ Philosophi edisserant, oppositas quidem theses, vel opinionones amplectuntur, ut illi Brutis animam sensûs, cognitionisque capacem tribuant, quàm alii acerrimè respuunt, utrique tamen constanter adeo, clarissimèque sententiam propriam defendunt, gravissimis, manifestisque rationibus illustrant; ut si veteres audias, nonnisi temere, ac impudenter brutis animam, cognitionemque negari putes; si recentioribus aures, animumque accommodes, veteres causâ excidisse arbitreris. Fallax itaque rerum natura nobis imponit, dumque alterutrâ ex parte clarissimam veri speciem ostendit, utrâque ex parte nos allicit, utrâque repellit, atque inter utramque ancipites pendere nos cogit. Jue-
rit ergo sacras Academiæ leges severiùs adhuc
tue-

tueri, atque ita singulas Auctorum sententias suis veluti coloribus accuratissimè expressas exponere, ut æquo lectoris judicio opinionem illam, quæ sibi fortasse verisimilior affulserit, amplecti liberrimè concedatur.

II. Quemadmodum verò jam diximus, plurimæ Philosophorum sententiæ ad duo veluti capita revocari commodè poterunt. Alii nimirum brutis animam, cognitionemque concedunt; alii sensum, cognitionemque ipsis adimunt, ut illa a ceteris inanimatis corporibus non alio discrimine, quàm solâ nobiliori, meliorique partium structurâ, distinguantur. Utrique tamen varias in partes, explicandique rationes abierunt, neque eandem animam, eandemve corporis structuram in explicandis animalium viribus usurparunt. Singulas veterum, recentiorumque hypotheses hîc ordine complectemur, additis etiam rationibus, quibus illæ innitantur.

III. Pythagoras itaque, Plato, aliique plurimi ita animam brutis, cognitionemque inesse putarunt, ut illa nihil aliud esset, quàm tenuis quædam divinæ substantiæ particula, quâ bruta vivere, moveri, res, & objecta corpora percipere, aliasque operationes efficere possent. Cum etenim Deum lucis, aut ignis instar per singulas Universi partes ita diffundi putarent, ut ille Universi mens, anima, spiritus diceretur, atque pro variâ, nobiliorique partium structurâ, quam in variis corporibus reperiebat, varias, nobilioresque vires, & effectus produceret, lucis ipsius instar, quæ per varias cryсталlos trajecta varios colores inducit; aut aquæ similis, quæ varias arborum fibras ingressa varios quoque flores, & fructus producit, in admi-

84 PHYS. PART. TRACT. II.

rabili brutorum corpore effectus aliquos, & operationes efficeret, quæ sine sensu fieri, vel explicari non possent. Quæ illorum sententiâ cum superiori Disputatione Cap. 1. fusiùs exposita, atque rejecta fuerit, id unum ex Virgilio repeti hîc poterit, quod Platonici

*Esse apibus partem divina mentis, & haustus
Æthereos dixere; Deum namque ire per omnes
Terrasque, tractusque maris, cælumque pro-
fundum.*

*Inde homines, armenta, viros, genus omne
ferarum*

Quemq; sibi tenues nascentem arcescere vitas (a).

Incorpoream quoque, vel spiritalem animam, sensûs, cognitionisque participem brutis concessit Pythagoras, quod humanas animas ex effæto morientis hominis corpore egressas, aut in alterius hominis corpus, aut in plantam, aut in brutum aliquod migrare cense-
ret (b), ut ab animalium cæde, veluti ab homicidii scelere, tantòque faciliùs ab humano sanguine fundendo feros homines averteret.

IV. Alii postremò, cùm miram, & incredibilem solertiam in brutis conspicerent, incorpoream animam, incorporeæ cognitionis, sive discursûs capacem, neque humanæ menti dissimilem ipsis concessere, ut nullo ferè discrimine ab ipsis hominibus distinguerentur, quos etiam subinde solertiâ, cogitandique vi prorsus excederent, ut pluribus argumentis Plutarchus (c), Empyricus (d), atque nuperrimè Rorarius (e) existimavit.

At-

(a) Georg. IV. v. 219 (b) Vid. Ovid. Meta XV. v. 165.
& Empyr I. adv. Phjs. sect. 127 (c) In Gryllo. (d) Pyrrhon. Hyp. I. c. 14. v. 62. (e) Quod bruta utant. rat.
vid. Voss. de orig. Idol. III.

Atque istæ quidem, & siquæ fuerint aliæ, Philosophorum sententiæ, quæ siue divinam mentem, siue humanos animos, siue incorporeas animas humanæ menti similes brutis concederent, facilè rejici, refellique poterunt: tum quodd divino fidei, rationisque lumine mentem consilii, rationisque compotem, vitii, virtutisque capacem, corpori superstitem solis hominibus concessam erudiamur; tum quodd in brutis nullum incorporeæ cognitionis indicium observetur; tum denique quodd longè obscuriùs, & difficilius est brutorum vires ab incorporeâ mente, quàm a corporeo fonte repetere, ut inferiùs ostendetur.

VI. Itaque sola nunc superest explicanda, suisque rationibus illustranda Peripateticorum opinio, qui corpoream animam, corporeæ cognitionis capacem Brutis concedunt.

1. Quid enim, inquit, clarius, & illustrius esse unquam poterit, quàm Bruta vivere, sentire, res, & objecta corporea percipere, variis affectibus allici, plurimas denique operationes efficere, quæ solâ partium texturâ, fibrarum ordine fieri, vel explicari certè non possunt? Quis in admirabili prorsus industriâ, vel arte, quâ cibos formicæ æstatis tempore inquirunt, in horrea congerunt; ubi frumenti grana humiditate marcescere viderint, ex cryptis illa in apertum aërem siccanda educunt, aut si fortasse germen ex ipsis oriri conspiciant, germen ipsum dentibus corrodunt, aliisque innumeris rebus, incredibilem cognitionem, providentiam, solertiam manifestissimè non intuetur? Quis in ipsis volucrum nidis, eorumque structurâ eximiam prorsus artem non admiretur, quâ primùm alas proximi fontis aquis

ma defaciant, tum ad parietem volantes, in quo nidum construere velint, alas ipsas ita agitant, atque concutiunt, ut paries ipse madescat, ideoque terræ, vel luti particulæ, quas volucres ore translatas sensim admovent, ipsi tenaciùs adhæreant; paleis etiam, ac plerumque plumis mirificè intextis interiorem nidi partem vestiant; deinde verò maximâ, & incredibile sollicitudine, providentiâ, solertiâ ova, natosque pullos foveant; nutriant, ab exterioribus hominum, volucrumque injuriis tueantur, atque alia plurima efficiant, quæ sinè cognitione, vel sensu fieri, vel explicari sanè vix poterunt.

2. Certè, qui miras adeo, & incredibiles brutorum operationes solâ partium texturâ authomatum instar, fieri posse arbitretur, parùm abest, ne hominem ipsum authomati compareret, nullâ cognitionis vi præditum velit, illiusque operationes, quæ subinde a brutis propemodum superantur, a solo nobiliori, puriorique partium ordine, vel corporis texturâ oriri posse arbitretur. Epicurei sanè, qui singula rerum genera ex atomis composita existi marunt, quemadmodum brutorum operationes ex solâ partium texturâ, celeri, vividoque spirituum motu, ac figurâ repetendum esse putabant, ita quoque humanas animas ex lævibus, rotundis, celerique motu agitatæ atomis componebant, quæ flammæ, seu lucis instar singulas corporis partes pervaderet, atque ad varios hominum motus exerendos impelleret. Quò verò humanæ mentis, non dixerim immortalitas, quâ nihil certius, & illustrius haberi unquam poterit, sed ipsa quoque cognitio abiret, quàm nobis inesse intimo quodam, vividoque conscientia sen-

sensu nos ipsi nos experimur, quamque a nullo certè vel subtilissimo, vel igneo corpore oriri posse intelligimus?

3. Neque ex incorporeâ solùm cognitione, quæ vix in homine salvaretur, sed ex alterius quoque cognitionis genere, quod in homine repetitur, brutorum anima; sive cognitio ostendi potest. Illud itaque certum, compertumque est nos oculis cernere, audire auribus, singulisque sensibus res, & objecta corporea percipere, imaginari, recordari, quorum imagines in somniis excitentur, seseque iterum internæ cuidam facultati, sive potentiæ percipiendas exhibeant, atque ex ejusmodi cognitione effectus plurimos, operationesque nostras oriri. Cùm itaque in brutis eadem organorum varietas, eadem oculi, aurium, cerebri structura observetur, iidemque motus, & operationes, quas in homine vero sensu, vel cognitione peragi solent, necessariò dicendum est, quod in brutis etiam sensus, atque cognitio repariatur.

Reponere quidem solent Cartesiani nobis naturam ipsam imponere, nosque hoc sensuum, organorumque similitudine plurimùm decipi, quod eandem quoque cognitionem in utrisque peragi existimemus; ceterùm brutis quidem organa, sensusque inesse humanis etiam perfectiores, nullam tamen in ipsis cognitionem admitti posse, quodd hæc in homine non a corporeâ quadam vi, vel animâ sensitivâ, sed a solâ mente, vel animâ rationali dependeat, quæ si absque ulius corporei phantasmatismatis ope cognoscat, *intelligere*, sive spiritali modo percipere dicatur; sin verò ad corporeum phantasma cerebro impressum convertatur, *sentire*

imaginari, corporeo modo percipere, recordari existimetur.

Verum, ut Peripatetici existimant, incredibilis illa similitudo potius ostenderet, quod si quælibet cognitio, vel sensus, aut motus illi, qui videntur in homine, sine incorporea, mente, vel animâ rationali fieri, & explicari non possent, incorporea quædam vis, mens, & anima rationalis brutis ipsis inesset, in quibus eadem organa, iidemque motus, eadem solertia, atque iudicium observatur.

Deinde verò quis facile intelligat, puerorum motus, insomnia, deliras amentium cognitiones ab incorporeâ vi, ab animâ rationali, mentis, honestatis, malitiæque compote fieri; cum certè nos ipsi experiamur, plurimos in nobis motus fieri, imagines plures excitari, quæ, tantum abest ut ab animâ rationali oriantur, ut ipsa, potius, ubi eas se prorsus invitâ excitari viderit, acerrimè reluctetur, omnem vim in imaginibus ejusmodi abigendis, cohibendisque motibus conferat? Quod si hos etiam dormientium, delirantium, infantium motus ab animâ rationali fieri existimemus, ipsos quoque rationis compotes, virtutis, vitiique capaces, legibusque obnoxios asserere cogimur, quod ne ipsi quidem Cartesiani concedent.

4. Hoc itaque clariori, certiorique discrimine a brutis homines distinguuntur, quod utrisque insit corporea quædam sentiendi, cognoscendique facultas; homines verò incorpoream aliam intelligendi vim habeant, quæ licet in illis semper existat, non tamen in illis operetur, sed quandam corporis, cerebri, sensuumque conditionem exigat, ut operetur. Hinc
pue-

pueri, infanti, dormientes, rationis usu care-
re dicuntur, quod illorum sensibus mirâ qua-
dam arte perturbatis, rationalis anima illorum
ope uti, res, & objecta incorporeo modo per-
cipere non possit; quemadmodum ferè Cartesius
ipse fatetur, quod eadem rationalis anima sub-
inde corporeo modo in infantibus, dormien-
tibusque; subinde incorporeo in vigilantibus,
adultisque operatur; ut illi honestatis impotes,
hi verò vitii, virtutisque capaces existimentur.

5. Atque hic ordo, sive brutorum, hominum-
que discrimen. Universi pulchritudinem maxi-
mè decuit, ut in illo singula rerum genera re-
perirentur; ideoque sicuti substantiæ quædam
in illo observantur, quæ solius incorporeæ co-
gnitionis compotes sunt, ut Angeli; quædam
aliæ, quibus & incorporea, & corporea simul
cognitio convenit, ut homines; quædam ve-
rò, quæ nullâ cognitione præditæ forent,
ut lapides, ita aliæ quoque substantiæ forent,
quibus corporea solum cognitio conveniret,
ut bruta. Quod si brutis anima, sive cog-
nitio negetur, cum ceteris inanimatis corporibus
facile confundi illa possent, ac lapidibus ipsis
accenseri, quod communis hominum sensus,
atque constans opinio a naturâ ipsâ nobis in-
dita certè vix patitur.

6. Quod si rationibus auctoritas adjungi de-
beat, plurimæ ex sacris Literis afferri illæ
possunt, quibus evidentissimè ostendatur, bru-
tis animam; cognitionemque concedi oportere.

Sic in Genesi c. i. expressè dicitur *creavit Deus
cetera grandia, & omnem animam viventem,
qua moventur in terra, et in quibus est ani-
ma vivens; producat aqua reptile anima vi-
ventis*. Ac, ne metaphoricè hæc dicta arbitreris,

ubi de homine ipso res est inquit Scriptura factus est homo in animam viventem, ut quemadmodum homo verè viventem, & sentientem animam habet, ita etiam brutis verè vivens anima inesse debeat; quod Interpretes omnes, & Ecclesiæ Patres intelligunt, ac uberrimè profitentur. Itaque jubetur terra animam viventem producere, ut ostendatur animam vitalem brutis inesse, quæ cum corpore dissolvatur (a). Innumera verò sunt illa Scripturæ loca, quibus expressè dicitur bruta sentire, videre, recordari, variis affectibus impelli, vivere, mori; quæ certè fieri, vel explicari non poterunt, nisi quædam anima sensus, cognitionisque corporeæ capax brutis concedatur.

His itaque experimentis rationibus, & auctoritatibus ostendisse arbitrantur Peripatetici sensitivam animam brutis inesse, neque ullâ ratione fieri, & explicari posse, ut illa authomatum instar, solâ partium texturâ, fibrarum ordine, accuratâ nimirum, vel admirabili corporis organizatione operentur.

VI. Non defuere tamen antiquis temporibus, neque hac ætate defunt sapientissimi viri, qui nullam brutis animam, cognitionisque vim tribuant, sed illa authomata, vel machinas esse arbitrentur. * Atque ex veteribus quidem, si Pythagoricos, Platonicos, aliosque excipias, qui sive divinæ mentis particulam, sive humanas animas huc, aliò commigrantes, sive rationalem spiritum humano similem brutis concessum

(a) D. Basil. in Gen. * Quod autem tibi visum est non esse animam in corpore viventis animalis, quamvis videatur absurdum non tamen doctissimi homines, quibus id placuit, defuerunt, neque nunc arbitror deesse Ang. de quant. an. c. 30.

sum putarunt, ut paullo superius ostendimus; omnes in hoc inirifice consensere nihil aliud in brutis admitti posse, quàm perfectissimam partium texturam, & organorum varietatem, quâ solâ omnes illorum motus fierent. Cum etenim singula rerum genera, quæ in singulis Universi partibus observantur, atomis, tenuissimis nempe corporibus constare putarent, omnem corporum varietatem, motus omnes, & operationes, quæ in variis corporum generibus observantur, ex solâ partium texturâ, atomorum figurâ, corporisque structurâ pendere docuerunt, ut animalia oriri, vel interire dicerentur ubi tenuissimæ partes, quibus illorum corpora componuntur, vario ordine disponerentur, quod elegantissimis Ovidii, atque Lucretii carminibus expressimus in Phys. Gen. Tract. 1. disp. 4. cap. 2.

VII. Ad recentiores verò quod attinet, et si verbis fortasse dissideant, pulcherrimè tamen consentiunt; & quamvis illorum aliqui cognitionem brutis inesse velint, eam tamen animam illis concedunt, a qua cognitio oriri certè non poterit. Gassendus itaque bruta vivere, sentire, cognoscere existimat, sed illorum animam nihil aliud esse opinatur, quàm tenuissimum veluti corporeæ substantiæ florem, purissimam subtiliorum atomorum texturam, quæ lucis, aut ignis instar per totum corpus diffundatur; flammam denique, quæ in corde veluti lare accendatur, per arterias, & venas distribuatur, cibos, et si cibi defuerint, eadem viscera leni calore depascatur, sanguinem fervere, animales spiritus celeri motu ferri compellat; atque ubi subjectus humor, solidioresque corporis partes contrabuerint, extin-

tinguatur, vel evanescat. Idque Aristotelis etiam auctoritate probat Gassendus, qui etsi brutorum animam neque ignem, neque calorem esse alicubi dixerit (a), alibi tamen asserit (b) animam non esse *absque naturali igne*; quem in ipso corde Natura accenderit; aërisque inspirati refrigerationem necessariam esse subdit *ob factam in corde anima inflammationem* (c); quemadmodum Plato (d) jam dixerat in animalium sanguine, veluti perennem *fontem ignis* reperiri. Cartesius verò nullam quidem vitalem flammam, memorat, nullam brutis animam, cognitionemque inesse opinatur, sed incredibilem potius, ac infinitam ferè organorum varietatem in brutis considerans, hac solâ corporis organizatione, celerique spirituum animalium motu omnes illorum operationes fieri, & explicari posse arbitratur; ut illa proinde machinis, authomatibus, plantisque similia videantur. Quæ quidem Cartesii opinio vix a Gassendi sententiâ differt, cum & in hac ipsâ Cartesii opinione facile, & eleganter defendi possit tenuem flammam in brutorum corde accendi, pulmonibus foveri, cibo nutrirî, arteriis, ac venis per totum corpus diffundi, extinguî denique prorsus, ac evanescere, quin ulla cognitio, vel anima brutis concedatur, aut aliquid ipsis præter admirabilem partium texturam, sanguinis, atque spirituum motum, unde calor ille, vel flamma exoriatur, inesse dicatur. Accuratius tamen, longèque felicius hypothesim suam expressit Cartesius, cumque intelligeret cognitionem a nullo corpore, a nullo, vel tenuissimo, purissimoque corporeâ substantiæ flore,

a nul-

(a) *De gen. an. II. c. 3.* (b) *De respir. an. c. 8.* (c) *Ibi c. 16.* (d) *In Timæo.*

a nullâ flammâ oriri posse, hanc quidem flammam, sive, si mavis puriorem, celerio remque sanguinis, & spirituum partem brutis inesse putavit, cognitionem tamen omnem, vitamque rejecit. Ac mirari certè quis poterit Philosophos aliquos esse, qui in Gassendi hypothese cognitionem, animamque brutis concedant; cùmque Cartesium ipsum vituperent, quòd ille brutis animam, cognitionemque negaverit, hanc ipsi in tenui flammâ consistere opinantur; ac si non eadem flamma in Cartesianis ipsis admitti possit, neque perinde sit operationes omnes brutorum vel a corporeæ substantiæ flore, vel a spirituum motu repetere. Illud itaque certò, constantissimèque defendi poterit nullam in brutis animam, vel cognitionem haberi posse, nisi præter incredibilem partium structuram, spirituum, motum, celeremque flammam aliquid aliud in ipsorum corpore admittatur: corporis enim partes, quantumcùmque tenues, rotundæque sint, quacumque demum figurâ, vel ordine concisæ, conjunctæ, dispositæ sint, nunquam sentire, seipsas movere, res, & objecta percipere poterunt, ut inde verum animal sensus, cognitionisque capax oriatur.

VIII. Rejectâ itaque Gassendi hypothese, quippe quæ falsa sit, aut cum hypothese Cartesianâ facilè confundatur, explicanda nunc superest Cartesii, aliorumque opinio, qui nullam brutis animam, cognitionemque concedunt, sed omnes illorum motus nullo sensu, solâque partium structurâ, celerique spirituum motu, juxta Mechanicæ leges, authomatum instar, fieri, & explicari posse arbitrantur.

I. Ac primò, inquiunt illi, a certis, clarissimisque Scriptoribus erudimur machinas plu-

res ab hominibus effectas esse, in quibus solâ partium structurâ, organorumque varietate plurimi motus efficiebantur iis propemodum similes, quos in brutis ipsis conspiciamus. Sic Architas columbam ligneam finxisse fertur, quæ in aëre volaret, Regiomontanus aquilam ligneam, quæ Carolum V. Norimbergam ingressum exciperet, atque ad palatium deduceret alius statuam, quæ ad Principis thronum supplex accederet, atque in genua provoluta supplicem libellum offerret, quo artifici veniam exoraret, eâque concessâ iterum ad carcerem rediret; aurei quoque famuli alibi mensæ adstant, qui statis temporibus dapes apponerent, vacuasque pateras amoverent; quid enim aut volucres variis concentibus modulatos, aut homines obsessam arcem defendentes, aut Tritones variis, aptisque motibus colludentes, aut Galatæ, Samaritanæ mulieris, Adonidis, Panis, famæ, aliasque sexcentas historias commemorem, quæ non sinè maximâ, & incredibili jucunditate in regio Etruscorum Ducum delicio, aliisque regiis hortis conspiciuntur? Si itaque tenuis, & imperfecta hominum sapientia machinas aliquas efformavit, in quibus aliqua operatio, motusque fieret illi propemodum similis, qui in bruto conspicitur, quis apertè non videat, divinam artem, sive sapientiam, quæ infinito discrimine humanam superat, machinas aliquas efficere potuisse, quæ solâ partium texturâ omnes motus, & operationes illas efficerent, quæ in brutis non infinitæ, non perfectissimæ deprehenduntur? Certè si compares machinam ab homine efformatam cum bruto, illa ab hoc pulcritudine, organorum varietate, motuum numero mirificè, longissimè

mè, non infinito tamen discrimine superatur; at si humanam artem cum divinâ conferas, illa ab istâ infinito prorsus discrimine exceditur, longeque difficilius censeri poterit unicam operationem animali similem ab humanâ arte in rudi machinâ peragi, quàm plurimas, ac infinitas etiam in machinis perfectissimis a divino artifice præstari.

2. Atque hoc divinam artem maximè decuit, ne præter admirabilem partium varietatem, quæ in brutis conspicitur, animam insuper adderet, a qua veluti fonte operationes omnes orirentur; atque per plura principia, pluresque causas id efficere videretur, quod solâ partium texturâ præstari poterat. Artificis certè solertia clariùs, & illustriùs effulget ubi paucioribus, simplicioribusque causis eadem præstat, quæ a rudiori nonnisi pluribus præstari poterant.

3. Quod verò singulæ brutorum operationes solâ partium texturâ fieri, & explicari commodè possint, longâ, elegantique ratione ostendunt Cartesiani. Cum etenim motus, & operationes omnes brutorum a muscutorum motu pendere debeant, muscoli verò contrahantur a celeri sanguinis, spirituumque motu, qui per nervos a cerebro ad musculos ipsos excurrunt, spiritus denique e cerebro ad certam corporis partem dirigantur ubi a tenuissimis particulis excitentur, quæ ab externis corporibus per oculos, aliosque sensus ad cerebrum deducuntur, manifestissimè apparet, quod ex variâ externorum corporum specie, quæ sensibus ipsis ingeritur, vario particularum motu, quo sensuum, organa, nervosque percellunt, variâ agitatione, quâ spiritus in cerebro impellunt, atque ad certum musculum contrahendum dirigunt, va-

rii quoque animalium motus finè ullo sensu, vel objecti corporis cognitione peragi debent; ut alibi clariùs intelligi poterit ubi de sensibus, illorumque organis differatur.

4. Neque mirari certè quis poterit plurimos, & omnes etiam brutorum motus finè ullo sensu, vel cognitione fieri, cum nos ipsi nos experiamur plurimos, mirosque motus in nobis fieri, finè ullâ prorsus cognitione, vel animæ ductu. Ut enim præteream animâ vel inconsultâ, vel etiam invitâ cor moveri, cibos digerere, nutriri membra, quis nesciat artifices aliò mente conversos organa rite, vel cytharam pulsare, scribere, loqui? quis corruens manum repente non extendat, ut corpus juxta severiores Mechanicæ leges in æquilibrio conservet, aut jam caducum manibus in terram præmissis a graviore impetu defendat? quis alia innumera finè ullâ prorsus cognitione in se fieri non intelligat, quæ non modò cum variis brutorum motibus conferri possint, sed illos etiam plurimùm superent? Quid nì ergo in brutis eodem ordine, solâ nimirum corporis texturâ, & consuetudine motus omnino similes spirituum appulsu fieri, peragique possint?

5. Quod si ad motus ejusmodi brutorum peragendos anima, sive cognitio requiratur, vereri facilè possumus, ne longè perfectior illis, ac purior cognitio, vel anima, quàm homini, concedatur. Incredibilis enim illa solertia, quæ tantopere a Peripateticis ipsis, atque mirificè extollitur, & quæ judicii acumine, unum ex alio inferendi, resque plurimas inter se conferendi vi humanam non æquare modò, sed etiam excedere videtur, si ab aliquâ

cognitione repetenda sit, nobilior certè, vel perfectior hæc esse debet, quàm quæ in homine reperitur, a qua admirabiles adeo solertiæ, vires oriri non cernimus. Immortalis itaque & incorporea, humanæque similis anima brutis concedi debebit, aut nulla prorsus cognitio, vel anima effingi poterit, quæ corporea, cognitionisque solum corporeæ capax dicatur.

6. Deinde verò quis facilè intelligat inesse brutis corpoream vim corporeæ cognitionis capacem, aut ullo mentis conatu concipere possit in quo corporeæ, simulque cognoscentis animæ natura consistat? Singula certè entium genera, quæ a nobis percipi, deprehendique possunt, sive substantiæ sunt, sive accidentia; corporea quidem si corporeis substantiis, sive corporibus illa convenient; incorporea verò si incorporeis substantiis, sive spiritibus inhæreant; sensitivam verò brutorum animam quonam ejusmodi rerum genere collocandam esse putabimus? non spiritûs, quidem, aut incorporei accidentis, quod nullum brutis inesse potest; non corporis, quod exanime, omnisque cognitionis incapax esse concipitur; non corporei denique accidentis, cum quodlibet accidens, ut mensura, quies, motus, positura, figura, percipiendi vim corpori, sive substantiæ corporeæ largiri non possit; quid ergo erit hæc anima sensitiva simul, atque corporea, corporea non corpus, materialis non materia, substantialis denique, neque tamen substantia? Nihil propemodum esse illa poterit, nisi fortasse putaveris substantiam aliquam, aut aliquod substantiæ genus inter spiritum, & corpus reperiri, quod spiritûs instar cognoscere, corporis tamen lege id corporeo modo præstare

flare possit, secus ac D. Augustino videbatur, qui *nihil est* inquit, *quod sit corpore melius, & animâ deterius*, nihil nimirum, quod corpus inter, & animam reperiatur.

7. Itaque nihil aliud hæc anima censerî poterit, quàm corpus ipsum admirabili partium varietate, fibrarum ordine præditum, aut potius puriores, subtilioresque sanguinis partes, five animales spiritus, aut tenuis flamma, quæ in sanguine reperiatur, ut expressè a Moyse erudimur cum ait, *hoc solùm cave ne sanguinem comedas; sanguis enim eorum pro anima est (a), vel anima omnis carnis in sanguine est (b)*, quod Augustinus, vel Honorius Augustodunensis clariùs explicans *Vita brutorum animalium*, inquit, *est spiritus vitalis constans de aere, & sanguine, animalis, invisibilis, sed sensibilibus, memoriam habens, sed intellectu carens, cum carne moriens, in aera evanescens (c)*.

IX Hæc sunt argumenta, vel auctoritates illæ, quibus Cartesiani ostendi posse arbitrantur nullam animam brutis inesse, sed singulas potius illorum operationes solâ partium textura fieri, & explicari posse. Tantum verò abest, ut superioribus argumentis, quæ a Peripateticis allata sunt, ipsi commoveantur, ut potius illorum singulis liberè, constanterque respondeant.

1. Quod enim, ex. gr. communis sit omnium opinio bruta vivere, sentire, moveri, percipere, affectibus tangi, &c. si de vulgaribus, rudibusque hominibus intelligatur, concedi poterit, cum rudes homines de re maximè obscurâ judi-

(a) Deut. c. 12. v. 23. (b) Lev. cap. 17. v. 14. (c) De cognit. vera Vita c. 4.

dicium ferre nonnisi temere possint; *est enim turba semper argumentum pessimi*; sin verò de sapientibus viris, atque de Philosophis intelligi debeat, negari fortasse poterit: quemadmodum enim paullo superius ostendimus, si solos Peripateticos excipias, nullus unquam Philosophus afferri poterit, qui corpoream solùm, vel sensitivam animam brutis concesserit; sed aut incorpoream, humanæque similem concesserunt, aut organicam solùm partium structuram, quâ solâ motus omnes vitalibus similes peragerentur. Verùm, etsi communis etiam Philosophorum opinio foret, rationibus certè, non auctorum numero certandum esset. Facile nimirum incredibilis illa similitudo, quæ inter humanas operationes, brutorumque motus conspicitur, hominibus ipsis imponere potuit, ut ex eodem fonte utrasque repetendas esse putarent; cùmque se vivere, ac sentire cognoscerent, bruta etiam vivere, sentire opinarentur; quemadmodum ferè magneti, heliotropio, plantis tenuem quendam sensum plurimi concedere quòd in illis motus aliquos humanis similes observarent. Quod si non ex præconceptâ vulgi opinione, sensuum præjudicio, & infantix errore res dirimatur, hæc sensitiva anima prorsus inutilis, ac impossibilis haberi debet.

2. Admirabiles itaque fore Brutorum motus, incredibilem solertiam, prudentiam, percipiendi vim, celeritatemque in illis apparere concedunt Cartesiani, quæ maximam cognitionis vim humanæ similem præferre videantur; hæc tamen omnia solâ partium structurâ fieri, & explicari posse contendunt, tum quòd eadem ferè in nobis ipsis sinè ullâ prorsus cognitione, nobis insciis, ac invitis

etiam peragantur; tum quòd solo spirituum motu, quo ex cerebro ad certos musculos ratione superius exposita dirigantur, musculi contrahi, corpusque moveri possit; tum denique quòd si cognitio ulla in brutis admitti deberet, hæc non modò corporea, sed incorporea quoque, humanæ similis, aut illâ nobilior, atque perfectior videretur, cum plerumque brutorum solertiâ ea peragi videamus, quæ humanâ ratione fieri, sive præstari non possent. Hinc optimè Seneca *muta animalia*, inquit, *humanis affectibus carent, habent autem illis similes quosdam impulsus* (a). 40

3. Neque vereri quis poterit, ne illorum quomotus sine animâ fieri existimetur, etsi brutis animâ, sive cognitio negetur, hominibus quoque vitâ, & cognitio auferatur, adeoque illos etiam automatum intar operari posse arbitremur. Cum etenim intimo quodam conscientia sensu nos vivere, res, & objecta, non corporea modò, sed incorporea quoque, vel insensibilia percipere clarè, distinctissimèque intelligamus, dubitari certè non poterit, quin præter admirabilem partium organizationem, quâ solâ hæc fieri, sive præstari non possent, nobilius aliquod, & incorporeum principium nobis inhæreat, quod mentem, aut rationalem animam apellamus. Bruta verò vivere, sentire, cognoscere incertum adhuc, & occultum censi meriti poterit, cum operationes illæ, vel motus, qui veluti clarius animæ indicium haberi solent, ab alio fonte, à solâ nimirum partium structurâ pendere, vel oriri posse arbitremur. Id profectò noverat, ac ingenuè

(a) *De Ira* I. c. 3.

testatus est Augustinus, qui celebrem Levitici locum sibi opponens numquidnam, inquit, si animam pecoris sanguinem dicimus, etiam anima hominis sanguis putanda est? absit. Si ergo quisquam putat animam pecoris esse sanguinem, non est in ipsa quaestione laborandum; tantum ne anima hominis, qua carnem humanam vivificat, & est rationalis, sanguis putetur, valde cavendum est (a).

Tantum itaque abest ut hæc opinio Cartesii tacitas religioni insidias moliatur, ut paullo liberius, ac impudentius aliqui existimant, aut animæ rationalis dignitati, vel immortalitati quidpiam detrahat, ut opposita potius Peripateticorum opinio humanæ menti plurimum derogat, dumque brutis ipsis cognitionem, quæ nullo certo discrimine ab humanâ distinguatur, concedit, ipsa hominibus comparet. Aristoteles certè, quem in asserendâ brutorum animâ Peripatetici ducem sequuntur, expressè ait *nihil per infantia tempus animam hominis differre belluarum animâ prope dixerim* (b); atque etiam D. Chrysostomus asserit hoc semper egisse diabolum per Philosophos, ut ostenderet nostrum genus nihil a brutis differre (c) illud ipsum fortasse innuens, quod paullo superius ostendimus, Philosophos omnes, qui cognitionem aliquam brutis concessere, humanam quoque mentem in illis admisisse, ut nulla proinde cognitio, vel anima brutis concedi posse videatur, quin incorporea, & immortalis etiam anima concedatur.

4. Argumentum itaque, quod a Peripateti-

G 2

cis

(a) Quæst. 57. in Levit. (b) Hist. an. VIII. cap. 1.
(c) Hom. 4. in Ath.

cis quarto loco allatum est, tum prorsus inutile, ac vitiosum censeretur debet, tum in Peripateticos ipsos retorqueri facile poterit. Inutile quidem, quod ex corporis formâ, sensuum, organorumque similitudine, quæ inter homines ipsos, aut bruta observatur, eadem quoque in utrisque cognitio inferri non potest, cum hæc ipsa cognitio, vel percipiendi vis ab organorum structurâ plurimum differat. Id unum itaque ex hac similitudine inferri potest, quod eadem organa eodem modo in brutis, ac in hominibus operentur, quod a Cartesianis ipsis conceditur; ideoque sicuti in homine corporis objecti speciem ad cerebrum deferunt, sic in brutis etiam in cerebro objecti corporis imago sensuum ope imprimatur; sed quemadmodum Cartesiani arbitrantur in homine neque sensuum ope, neque solius imaginis cerebro impressæ, neque ab ullo corporeo fonte, sed a solâ mente cognitionem oriri, ita quoque ex organorum similitudine inferre poterunt nullam in brutis, quæ mente, vel animâ rationali carent, ex illorum sensibus cognitionem haberi posse, quamdiu Peripatetici clare, distinctèque non ostenderint cognitiones in homine non a mente, sed a corporeo principio pendere. In ipsos etiam retorqueri poterit argumentum, ut si Peripatetici eandem cognitionem brutis, atque hominibus inesse velint, quodd eadem organorum varietas in utrisque observetur, ita quemadmodum in homine cognitio incorporea reperitur, ita hæc eadem in brutis admitti debebit; aut certè, sicuti bruta admirabiles adeo motus solâ corporeâ, vel sentiente animâ peragunt, sic homines ipsi solâ corporeâ vi præditi existimentur.

Sed

Sed, inquiunt Peripatetici, brutorum motus solâ corporeâ cognitione peragi possunt, homines verò corporeâ simul, & incorporeâ cognitione præditi sunt, sive quòd in ipso duplex anima, sensitiva nimirum, & rationalis admitti debeat, sive quòd eadem anima rationalis modò corporea objecta sensitivæ instar cognoscat, modò incorporea contempletur. Verùm quis facilè intelligat solâ corporeâ vi, sinè ullo discursu fieri in brutis operationes illas, quæ, si cum humanis comparentur, has mirificè excellunt? aut quod discrimen corporeas inter, & incorporeas cognitiones afferri unquam poterit, ut illæ brutis, hæ solùm homini concedantur? Illudne quod incorporea cognitio sit reflexa, dumque cognoscit, cognoscat etiam se cognoscere, sive rem cognitam, simulque cognitionem propriam contempletur? corporea verò directâ sit, remque simpliciter sinè ullâ reflexione percipiat, neque sentire se sentiat? Aut illud fortasse quod incorporea hominum cognitio circa objecta incorporea versetur, corporea verò brutorum corporea solùm percipiat? Sed incorporeæ, vel spirituales etiam cognitiones hominum plurimæ censerì debent, etsi reflexæ non sint, atque corporeum objectum percipiant, ut cum nudè, simpliciterque tempus concipio nondum animadvertens utrum tempus considerem, aut cum de corporis essentiâ dissero, neque simul considero me cogitare, sive disserere. Deinde verò quis probeat cognitiones etiam brutorum reflexas non esse, ut dum illa sentiunt se sentire non sentiant, dum colorem vident, hanc ipsam visionem non advertant? Certè D. Thomas asseruit, quod *visus videndo colorem*

videt se videre (a) ; quemadmodum D. Augustinus ait, quod bestia non moveret se aut aliquid appetendo, vel fugiendo, nisi se sentire cognosceret (b).

Vereri certè, vel suspicari quis poterit, quod si homines omnes muti forent, neque sensa colloquendo exprimere possent, homines alios brutorum instar moveri, oculos torquere, flere, gaudere, variisque affectibus perturbari videremus, cùmque in nobis affectus omnes, & motus ejusmodi experiremur, ceteros eadem animâ, quâ nos ipsi vivimus, vivere, putaremus; ideoque, si in miserrimâ illâ hominum conditione mentis nostræ immortalitas, & spiritualitas nobis innotesceret, ceteros quoque immortali, spiritualique animâ præditos arbitramur. Quàm facile est igitur incorpoream quoque, & immortalem animam humanæ similem brutis concedere, si aliqua concedatur? quàm levi, obscuro; incertoque discrimine brutorum cognitio ab humanâ distingueretur? quàm denique præstat cognitionem omnem, vitamque brutis negare, quàm se in ejusmodi angustias, errorisque ambages conjicere?

Erit itaque in homine duplex cognitio corporea simul, & incorporea, quarum utraque eadem animâ rationali veluti fonte oriatur; hac tamen lege, ut si mens a corporeo solum phantasmate excitetur, illudque percipiat, neque incorpoream ideam sibi impressam tranquillè, aut liberè contempletur, corporea dicatur cognitio honestatis incapax, ut in pueris, dormientibus, deliris, &c.; sin verò phantasmatis corporei ope spiritualis idea excitetur,

(a) *Lib. III. de Anim.* (b) *Lib. XI. de Trin. c. 2.*

tur, quam liberè, & tranquillè anima consideret, incorporea, sive spiritualis vocatur cognitio, qualis in homine sano, vigilante reperitur. Brutis verò, quæ mente carent, nulla prorsus corporea, vel incorporea cognitio concedatur.

5. Neque tamen exinde pulcherrima rerum varietas, aut Universi splendor minuetur. Primò quidem quòd hæc Universi pulchritudo ex animæ sensitivæ naturâ repetenda certè non sit, quæ inutilis, absurda, impossibilis, plurimisque erroribus, & argumentis obnoxia demonstratur; deinde verò quòd eadem rerum varietas, & effectuum pulchritudo salvabitur sive ex animâ, sive potius ex solâ corporis texturâ oriatur; perinde enim est ad effectuum numerum, ac pulchritudinem an illi ex isto, vel ex alio fonte deducantur. Et certè Cartesiani quoque bruta vivere, sentire dicunt, & ipsa animalia, novumque substantiæ genus a Plantis, inanimatisque corporibus distinctum vocant, non quòd animam illis inesse arbitrentur, sed quòd communis, & vulgaris hominum opinio, & affinitas ipsa, sive similitudo cum homine, id innuere existimetur.

6. Sic etiam diviniæ Literæ *vivere* bruta, brutis *viventem animam*, cognitionemque inesse ex communi, receptâque hominum consuetudine testantur, illud interim incertum, occultum, atque Philosophis disputandum relinquentes, quid communi vitæ, vel animæ nomine intelligi debeat. Quod si eâdem voce, vel phrasi hominis, brutorumque vitam exprimit Scriptura, inquiens *in quibus est anima vivens*, & *factus est homo in animam viventem*, non de animâ rationali hominis intelligi id pote-

rit, quæ brutis etiam communis esse non potest, sed de illâ solùm vitâ, vel animâ; quæ sublatâ homini mente, vel animâ rationali superesset; ideoque sicuti hæc anima nihil aliud foret, quàm vivida corporis organizatio, spirituum motus, cui metaphoricè vitæ, vel animæ nomen tribueretur, ita brutorum anima nihil aliud esse, vel existimari nunquam poterit, quàm hæc ipsa partium structura, quam metaphoricè vitam vocari posse Cartesiani quoque concedunt. Quod si Patres aliqui, vel Interpretes corpoream, & sensitivam animam admiserunt, id non ex divinâ Scripturarum autoritate, sed ex præconceptis opinionibus, sapienter, & eleganter, non certò tamen, invictissimèque ostenderunt; cùm præsertim alia Scripturæ loca, aliæque Patrum autoritates afferri possint, quibus brutorum anima in solo sanguine, corporisque structurâ consistere demonstratur.

X. Quemadmodum verò Cartesiani opposita Peripateticorum argumenta diluere satagunt, illorumque vim prorsus evertere, ita quoque Peripatetici singulis Cartesianorum argumentis num. VIII. expositis respondere solent.

1. Ac primò, quod Deus potuerit bruta veluti machinas efformare, in quibus ex solâ partium structurâ motus fierent, cùm homines ipsi plures ejusmodi machinas efformasse memorentur, nihil concludit, cùm non de possibili, ut inquirunt, sed de facto inquiratur; neque de modo, quo Deus bruta efficere poterat, differatur, sed de illo potiùs, quem ex infinitis possibilibus, elegit; ejusmodi verò modus ex effectibus, & brutorum motibus inquiri debet; ideoque, si brutorum motus cogni-

tio-

tionem præferunt, vitam, cognitionisque vim illis inditam fateri cogemur. Deinde verò negari facillè poterit, quod ab infinità Dei potentià machina fieri possit, in quâ solâ partium texturâ motus omnes peragi possint, qui observantur in brutis; id enim divinæ potentiæ concedi non debet, in quo repugnantia, vel contradictio reperiatur; repugnat autem quod operationes illæ, quæ videntur in brutis, illæ nimirum, quæ humanis similes, ideoque vitales sunt, quæque cognitionem aliquam admixtam habent, omnemque partium texturam superant, a solâ hac partium texturâ producantur; unde quemadmodum Deus efficere quidem potest machinam, in quâ operationes illæ, voces, motusque videantur, qui conspiciuntur in homine, neque tamen operationes illæ vitales, & humanæ forent, ita vitales illæ non forent, quæ viderentur in brutis, aut non a solâ partium texturâ orirentur, sed ab ipso Deo, qui nobis illuderet. Et certè si machinæ ab hominibus artefactæ quidquam de brutis probarent, probarent etiam de hominibus, cùm plurimæ ex illis humanos etiam motus accuratissimè exprimant.

2. Impossibile erat itaque, aut inconueniens, quod a solâ partium organizatione omnes operationes brutorum orirentur; ideoque meritò, non inutiliter sensitivam animam, cognitionemque Deus brutis concessit.

3. Quod verò sola partium textura singulis brutorum operationibus peragendis par esse non possit, non aliâ clariori ratione ostendi poterit, quàm si bruta ipsa consideremus. Facillè est enim spirituum motum, imagines cerebro impressas, ab externis objectis excitatas, alia-

que

que id genus afferre, appositis etiam Mechanicæ legibus, & exemplis probare, idque fortasse concipi, vel aliquâ ratione defendi posset, si in iisdem circumstantiis, eodem objecto movente bruta eodem modo operarentur; videmus autem illa subinde non ex objecti præsentia, aut solâ imaginum ope, sed sponte moveri; ut nimirum pro variâ temporis, loci, aut personarum conditione novo, ac inusitato quodam modo operentur, ut operationes illæ aut a spiritibus, aut ab imaginibus antea impressis repeti non possint.

Deinde verò, quæ unquam affinitas, atque connexio esse poterit inter objecti corporis imaginem, & effectum illum, quem bruta producere conspiciuntur? Legitur simiam castaneis inter ardentis prunas latentibus inhiantem fortuito selem conspexisse, quo statim arrepto castaneas ex prunis non sine maximo felis ejulatu, atque inspectantium risu educeret; fertur formicas, quas a cupediis corro dendis circumfuso visco, vel pice diligens cupediorum custos prohibuerat, visco primùm incautas adhæsisse, deinde verò singulas exiguo terræ granulo ore excepto rediisse, quo super viscum longâ, continuâque serie disposito solidam, certamque sibi viam sternerent; volucres omnes arte incredibili nidos contexere conspiciamus, partim ex aquâ, & luto, partim ex tenerioribus plumis, quas in interiori semper nidi parte disponunt; quid ergo inter felis, terræ, plumæque ideam sensibus exceptam, cerebroque impressam commune, vel affine esse poterit cum castaneis, saccaro, visco, pulvisque fovendis, ut ab illâ brutorum spiritus certâ lege, certoque solùm tempore dirigi, con-

contrahendisquē musculis impelli debeant? hæc qui secum ipse consideret, seposito partim studio id certe fieri oportere Peripatetici existimant; ut ille præter spiritus quidpiam aliud in brutis admittat, quod imagines cerebro impressas percipiat, illorumque ope sese modò ad hanc, modò ad operationem illam determinet.

4. Quod si in nobis, & in brutis plurimæ operationes sinè ullâ cognitione peragantur, ut ciborum digestio &c. non tamen inferri poterit, quod omnes sinè hac cognitione fieri possint, ideoque si unica solùm cognitio, unica solùm perceptio in brutis admitti debeat, huic uni peragendæ veram animam admitti oporteret. Ceterùm in nobis plurimæ operationes sinè actuali cognitione sunt, quæ tamen antea maximâ cognitione fieri cœperunt, & ex ipsâ consuetudine facilitas quædam sensim inducta est, quâ nobis invitis, aut inconsultis peragi possint; sic cytharam distracti pulsamus, quoddam seriâ, frequentique consuetudine spiritus, musculos omnes, digitosque ritè moverimus; ideoque operationes illæ, præviâ saltè cognitionem, qua fieri cœperunt, manifestissimè ostendunt.

5. Incorporea verò, spiritualis, humanæque similis brutorum cognitio censeri non poterit, tum quoddam illorum motus eodè semper ordine, ac ratione fieri videamus; in hominibus verò novo semper, nobiliorique modo peragantur; tum quoddam nullum rationis indicium in ipsis conspicitur, ut in pueris sensim adolescentibus rationis usum deprehendimus; tum denique, quoddam si ratione bruta uterentur nobiscum, aut secum colloqui possent, cognitionesque proprias ostendere, quod nobilius, &

accu-

accuratius hominis a bruto discrimen esse inquit Cicero.

Quamvis itaque sensuum vi, aut agendi solertiâ bruta nos superent, ratione tamen ab hominibus superantur, ut egregiè ait Augustinus.

6. Quod si deinde Cartesiani vix a nobis concipi, vel explicari posse arbitrentur quid sit hæc anima sensitiva corporeæ solùm cognitionis capax, responderi facilè poterit plurima esse, quæ fore nos certò scimus, qualia sint ignoramus; ideoque licèt animæ sensitivæ natura vix a nobis concipi, vel definiri possit, dummodo tamen clarè, invictèque ostendatur illam in brutis admitti oportere, temere prorsus, & inconsultò negaretur. Cæterum, occulta licèt, & obscura sit animæ sentientis natura, ex iis tamen uberrimè deduci potest, quæ fusè sunt explicata in Phys. Gen. Tr. I. Disp. IV. c. 2. ubi de formæ substantialis origine loqueremur. Neque corpus itaque, neque spiritus, neque corporeum, neque incorporeum accidens erit anima sensitiva; sed substantialis quædam perfectio, vel substantiale principium, quo corpus vivens, ac sentiens redditur; ut quemadmodum in accidentium gradu, vel ordine *calor* est illa accidentalis perfectio, quâ lignum *calidum* fit, in artificiali ordine *rotunditas* est illa forma, sive perfectio, quâ lignum *rotundum* redditur; ita in substantiali gradu, vel ordine *anima sensitiva* est illa forma, sive perfectio, quæ brutum efficit *vivens*, aut *animal*. Quo certè loco mirari, vel subirascei quis poterit plerosque Philosophos in exponendâ Peripateticorum sententiâ turpissimè labi, seu falli, vel
falle.

fallere, quòd brutorum animam veluti subtile quoddam corporeæ substantiæ genus, sive *semi-substantiam* corpori conjunctam a Peripateticis admitti velint, atque Peripateticis ipsis vitio, ac dedecori vertant, quod sensitivam animam veluti *substantiam materialem*, neque tamen *materiam*; *corpoream substantiam*; neque tamen *corpus* agnoverint. quod longissimè certè ab illorum sententiâ dissidet, in quâ sensitiva anima dicitur esse corporeæ substantiæ, materiæ, vel corporis perfectio, corporeæ quidem, materialis, substantialis; non verò substantia, non materia, neque corpus. Celebris itaque Augustini locus frustra opponitur. Is etenim asserit inter animam, & corpus, incorpoream nempe, & corpoream substantiam nullum aliud substantiæ genus reperiri, quod sit corpore melius, & animâ deterius, quod a Peripateticis ipsis asseritur, qui nullibi sensitivam animam substantiam esse arbitrantur; an verò inter corpoream corporum, & incorpoream spirituum perfectionem, formam nimirum, aut esse, quo spiritus, & corpora substantialiter constituuntur, corporea quædam perfectio, vel forma reperiatur cognitionis corporeæ capax, Augustinus nullibi negavit; longèque verisimilius est hanc agnovisse, cum sentiendi vim brutis concesserit, ut innumeris ipsius auctoritatibus erudimur.

7. Perperam itaque auctoritates aliquæ Augustini asseruntur, quibus ostendatur brutorum animam in solo sanguine positam esse, quod a sacris etiam Literis doceri creditur. Explicans enim Augustinus ipse Scripturæ verba, *aliquid*, inquit, *vitale est in sanguine, quia per ipsum maxime in hac carne vivitur ipsam*
vi-

vitam corporis vocavit animam (a) : quemadmodum alibi dixerat sic dictum est ; anima omnis carnis est sanguis , quomodo dictum est Petrus erat Christus ; scilicet non quia hoc erat ; sed quia hoc significabatur . Non autem frustra lex animam voluit significare per sanguinem , rem scilicet invisibilem per rem visibilem , quia sanguis per venas omnes ab ipso corde diffusus in nostro corpore plus ceteris humoribus principatur (b) . Et certè sive Cartesii , sive Gassendi hypothesim ritè consideres in neutrà illarum brutorum anima in sanguine collocatur , sed in admirabili potius organorum varietate , & ordine , aut in tenui flammâ , quæ per singulas corporis partes diffunditur ; aut in spiritibus animalibus , quorum ope musculos contrahi , motusque omnes peragi demonstrabimus . Quemadmodum itaque Gassendus ipse , sive Cartesius Scripturæ verba non literaliter , sed allegoricè intelligunt , ita meliori etiam jure Peripateticis hoc liceat , qui plurimis aliis , clarissimisque locis ostendunt , viventem animam brutis inesse .

Atque ista quidem sunt , quæ inter utramque partem a Peripateticis , & Cartesianis de brutorum animâ disputantur . Quis alteri palmam præripiat viderit ingenuus , ac diligens veritatis amator ; nisi fortasse verisimilius hac etiam in parte aureum illud effatum cum Cicerone repeti posse putaverit , harum sententiarum , quæ vera sit Deus aliquis viderit , quæ verisimillima magna quaestio est .

CAP.

(a) In levit. qua. 57. (b) Lib. II. cont. Adv. legis. c. 2.

CAPUT II.

De variis Animalium generibus.

I.



Incredibilis illa varietas, quæ non sine maximâ admiratione, jucundissimoque spectaculo in animalibus brutis conspicitur, veteres, recentioresque Philosophos impulit, ut in variis

illorum generibus enumerandis, atque ad certa quædam veluti capita redigendis, plurimum differrent. Plerique enim animalium divisionem ab illorum moribus derivarunt, ut aliqua *fera*, *mansueta*, *solitaria*, *domeſtica*, *ſtolidâ*, *ſolertia*, *muta*, *canora* dicerentur; alii ex locis iſtis, quæ incolunt, ut *aerea*, *terreſtria*, *aquatilia*, *amphibia*; alii ex motu, ut *volatilia*, *reptilia*, *greſſilia*; alii ex illorum partibus, ac ornatu, ut *pennata*, *ſquamigera*; alii ex ortu, ſive ratione, quâ producuntur, ut *ovipara*, *vivipara*; alii denique ex eſcâ, ſeu cibo, quo nutriuntur, ut *granivora*, *herbivora*, *carnivora*, &c. Quæcumque tamen animalium diviſio, illorumque ſeries adhibeatur, plurima ſemper in ipſâ optari poterunt, ſive quod illa non omnes animalium ſpecies accuratè contineat; ſive potiùs quod animalia quædam ad plures ſimul, variasque claſſes, itâ pertineant, ut quod in aliquo genere collocaveris, meliori fortasſe jure ad genus aliud revocari poſſe videatur. Juverit ergo veterem, communique omnium conſenſu receptam animalium diviſionem, quæ ex illo-
ruin

rum loco, vel habitatione deducitur, veluti clariorem, accuratioremque amplecti; interim verò dum singulæ illorum species enumerantur, si quidpiam observandum occurrerit, obiter admonere.

II. Animalium itaque, sive brutorum (neque enim de homine modò rem esse, jam diximus) tria veluti-suprema genera satis accommodè distingui possunt, ut alia *terrestria*, alia *actes*, *volucris*, seu *volatilia*; alia denique *aquatilia* dicantur. Terrestria dicuntur illa, quæ solo insistentia super ipsum moventur; unde in *gressilia*, atque *reptilia* dividuntur. Gressilia verò, vel *quadrupedia* sunt; vel *bipedia*, si fortasse *simiam* bipedem, non verò potius *quadrupedem* esse arbitreris. Porro *quadrupedia* aut *solipedia* sunt, ut *equus*, *asinus*, *mulus*, & *elephas*, quòd unguam indivisam habeant, aut *bisulca*, quòd unguam, divisam gerant, ut *bos*, *ovis*, *lupus*; *cornigera* quidem, ut *bos*, *caper*, *aries*; alia verò *cornibus carentia*, ut *camelus*; aut denique *multifida* sunt, quæ veluti *digitata* dixeris, ut *canis*, *lepus*, *ursus*, *tigris*, *mus*; quorum quidem alia *vivipara* sunt, ut *canis*, *leo*, &c. alia vero *ovipara*, ut *crocodilus*, *lacerta*, *salamandra*, *rana*; nisi fortasse *ranam* cum *cafloribus*, aliisque inter *amphibia* numerandos existimes, quòd nempe partim in terrâ, partim etiam in aquâ vivere, moverique possint.

III. Reptilia quoque animalia in plures species distinguuntur, ut quædam *vivipara* sint, ut *coluber*, *cerasta*, *amphysbana*, *aspis*, quæ sive pedibus omninò careant, sive pedes etiam per breves habeant, ventre potius repere, sive subjectam terram radere videntur. Atque ista

qui-

quidem *perfecta* animalia censi solent; alia verò *reptilium* species *imperfecta*, vel *insecta* animalia communiter vocantur, quòd in plures etiam partes divisa adhuc in illarum singulis vivere conspiciantur;

Ex ejusmodi verò insectis alia *pedibus* *ca-*
rent, ut *lumbrici*, & *vermes* omnes, qui in homine, caseo, plantis, vestibus, leguminibus, & fructibus oriuntur; alia *pedes* *habent*, ut *eruca*, *bombyx*, *scolopendra*, *cimex*, &c. alia denique *pedes*, & *alas* *habent*, ut *lampyris*, sive *cicendula*, *pyrausta*, &c.

IV. Alterum animalium genus *volucris*, seu *volatilia* complectitur, quæ in *terrestria*, & *aquatilia* distingui possunt, cum inter illa quædam in terrâ, quædam in aquâ victitent; fabulosum est enim id, quod de *manucodiata*, vel *ave Paradisi* fertur, quod pedibus carens semper in aëre vivat, & rore nutriatur. Ex terrestribus verò speciebus quædam *curvis unguibus*, *rostroque* sunt, & si *psittacum* excipias, *carnivoræ*, ut *aquila*, *ossifraga*, *vultur*, *accipiter*, *asterias*, *falco*, quæ interdum *aviculas*, *carnesque* aucupantur; quemadmodum noctu venantur *nycticorax*, *bubo*, &c. alia verò directius, ac mucronis instar *rostrum* habent; quas inter *carvivora* sunt *corvus*, *cornix*, *pica*; aliqua *vermivora*, ut *lusciniæ*, *hirundo*, *upupa*; aliqua *baccivora*, ut *turdus*, *sturnus*; aliqua denique *granivora*, ut *varia galinarum*, & *columbarum* species, *pavo*, *perdix*, *hortulanus*, *passer*. Atque his terrestribus accenseri facile poterunt insecta, quæ aut cibos quoscunque pasci, aut flores sugere videntur, ut *musca*, *apes*, *cicada*, quæ communiter *insecta volucris* vocari solent.

Tom. IV.

H

V. Aqua-

V. Aquatiliū verò , natantium , vel piscium genus superest , qui semper in aquā degere , sive moveri videntur . Hinc ex variis aquis , quas incolunt , in *marinos* , *fluviatiles* , & *lacustres* distingui solent ; quin etiam ex marinis alii *litorales* , alii *saxatiles* , alii *pelagii* dicuntur ; quòd hanc potiùs , quàm illam maris partem ament ; alii *squammosi* , alii *crustacei* , alii *cartilaginei* sunt ; quæ marinorum divisio fluvialibus etiam , atque lacustribus piscibus aptari facilè poterit . Atque ad hanc etiam marinorum speciem revocari posse videntur *conchilia* , *ostrea* , *alektorides* , aliæque plurimæ marinorum corporum species , quæ in *bivalvias* , atque *totivalvias* , quæ rariores tamen sunt , distinguuntur , de quorum generibus accuratissimè scripsit Lister , Valisnerius , Wodwardus , Bonannius , aliique plurimi .

VI. Inter aquatiles denique , & terrestres , sive volucres etiam , & aereas animalium species animalia quædam reperiuntur , quæ *amphibia* vocari solent , quòd in aëre simul , terrâ , vel aquâ degere , seu vivere possint , ut *fulica* , *anser* , *mergulus* , *cycnus* ; atque ita plerumque pedes latiores , sive superinductâ unguibus membranâ extensos habent , ut faciliùs aquam impellere , & natare possint . Ceterùm infinita propemodum foret , ut antea dicebamus , varietas , quæ in animalibus observari , sive describi posset , ut illam uberri-mè ex veteribus Aristoteles , Plinius , ex recentioribus verò Aldrovandus , Villisus , alii-que sunt prosequuti . Qui itaque de his plura desiderat , illos adire poterit ; nobis enim , qui hac in parte summa veluti rerum capita complectimur , hæc ostendisse sufficiat .

CAP.

CAPUT III.

*De corporis humani structurâ,
vel Anatome.*

I.



Hic pulcherrima partium, organorumque varietas, quæ in singulis animalium generibus observatur, digna propemodum sit, quæ accuratissimè consideretur, nullumq; sit animal, in quo plurima, & infinita divini Artificis solertia mirificè non effulgeat, humani tamen corporis structuram præcipuè contemplabimur, tum quòd ab illâ ceterorum animalum structura non plurimum differat, quæque de homine hîc dicta fuerint, ad alia quoque brutorum genera faciliè transferri possint; tum etiam, quòd maximè deceat, longèque facilius sit hominem ipsum cognoscere, quàm cetera corpora contemplari. Aristoteles certè *hominem nobis ex necessitate notissimum animal* (a) expressè docuit; atque Democritus varias hominis definitiones tacitè reprehendens *homo est*, inquit, *quod omnes scimus* (b). Accurata proinde rerum series, & ordo postulat, ut hominem contemplemur, ut inde aliorum cognitio deducatur. Hoc itaque Capite varias humani corporis partes, illarumque compagem inquiremus, non eâ quidem accuratissimâ, subtilique anatome, quæ Medicos decet; sed leviori quadam, ac rudiori, quæque erudito juveni par esse poterit; cùm præsertim plurimæ, no-

H 2

bilio-

(a) *Hist. anim. I. c. 6.* (b) *Empyr. de nat. hom. c. 1.*

bilioresque corporis humani partes in sequentibus Capitibus describendæ sint.

II. Ac primò quidẽ singulæ corporis partes enumerandæ forent, ut *caput*, *collum*, *scapula*, *brachia*, &c. cum tamen illarum series, nomina, locus, & ordo clariùs ipso conspectu, & experimento appareat, id omittimus, quâ etenim sit *firmâ homo præditus fieri non potest, ut quempiam lateat (a)*. Id unum itaque nunc attexemus, quod ex communi Medicorum consensu partes humani corporis in *similares*, atque *diffimilares* distingui solent. Similares, vel homogeneæ dicuntur illæ, quarum substantia est eadem, aut ubique similis; sive quæ semper in partes ejusdem generis, ac substantiæ dividi possunt, ut *caro* in carnem, *sanguis* in sanguinem, *os* in os, &c. *Diffimilares* verò, quæ partibus aliis etherogeneis, vel dissimilibus componuntur, ut *oculus* membranâ, humore, nervis. Similares a Medicis undecim numerantur, & his versiculis exprimuntur.

Os, membrana, cutis, caro, vena, arteria, nervus,

Tendo, ligamentum, cum cartilagine, fibra.

III. 1. Os ob duritiem, firmitatemque suam veluti corporis fulcrum censei poterit, cum ossibus aptè inter se junctis connexisque corporis humani machina sustineatur. *Periossio*, tenui nimirum, sensitivâque membranâ vestiuntur ossa; quemadmodum ipsorum plurima cavitates aliquas tuborum instar habent, ubi *medulla*, quâ eadem ossa nutriantur, aut certè flexibilia, minùsque fragilia reddantur, continetur. Nutriuntur enim ossa, sensimque augentur, si auditûs ossicula exceperis, quæ primam

(a) Democ. ap. Arist. de par. an. l. c. 1.

nam magnitudinem conservant. Porro in humano corpore 249 vel etiam 360. ossa ab Anatomicis numerantur, quorum in solo brachio 31. in capite 60. reperiuntur. Ita verò corporis ossa conjuncta, vel disposita sunt, ut inde motus oriatur, & illa connexio ad motum *arthrosis* dicitur, quemadmodum conjunctio ad quietem *sympphysis* appellatur.

2. Membrana tenuis est, ac expansa, pluresque partes complectitur, unde facile contrahi, diducique potest, ut *pleura* interiorem thoracis cavitatem ambiens, *vesica*, *ventriculus*, &c.

3. Cutis *dermis*, aut *pellis* est illa, quæ membranæ instar variis fibrillis contexta universum corpus circumdat. Ipsa tamen cutis subtiliori membranulâ ubique tegitur, quæ *cuticula*, vel *epidermis* vocatur. Non adipem modò, sive pinguedinem, & innumeras glandulas sudori, aliisque humoribus excernendis idoneas; ex quibus pili erumpunt, subjectas haber; sed nerveas etiam papillas, sive nervorum extremitates, ex quibus sensus omnes oriri dicemus.

4. Caro variis fibrillis carneis inter se connexis, intextisque componitur, in quibus *vesiculæ* plurimæ, limbo limbo turgentes conspiciuntur.

5. 6. Vena, vel arteria est canalis ille, vel tubulus, in quo sanguis perenni circuitu per singulas corporis partes excurrit; hoc tamen discrimine, quod in arteriis, quæ crassiores, & peristaltico motu præditæ sunt, a corde ad exteriores corporis partes diffunditur; in venis autem, quæ tenuiores, cutique proximiores conspiciuntur, ab exterioribus ipsis cor-

poris partibus ad cor reducitur: eâ lege, vel ordine, qui Cap. V. describetur.

7. Nervus est tubulus innumeris fibris inter se intextis compositus, qui a cerebro ad singulas ferè corporis partes extenditur, spiritusque animales, puriorem nempe sanguinis partem in cerebro philtratam, vel a sanguine separatam ad illas celerrimè traducit, ut sequenti Capite demonstrabitur.

8. Tendo ex solidioribus, firmioribusque fibris componitur, estque illa musculi extrema pars, quâ musculus ipse ossi connectitur, ut os, contracto musculo, moveri possit.

9. Ligamentum, tendinis instar, solidius est, unumque os cum alio connectit, ne in corporis motu unum ab alio disjungatur.

10. Cartilago ad ossis naturam, soliditatemque proximè accedit, quinetiam interdum in os convertitur, ut illa, quæ os *sacrum* cum ischio conjungit.

11. Fibra est veluti exiguum, ac tenue filamentum, quod vario subinde ordine, variâque serie directè, transversèque contextitur.

IV. Dissimilares verò corporis partes dicuntur illæ, quæ variis, ac dissimilibus partibus constant; sive quæ variis similaribus partibus componuntur. Septem verò præcipuè numerantur, quæ cum majores sint, plurimas alias continent,

Crura, caput, thorax, venter, duo brachia, collum.

1. Capitis forma, ejusque divisio clarior est, quàm ut hic exponi debeat; *cerebrum* nempe *oculos, aures, linguam, naresque* continet, de quibus alibi.

2. Capiti subiicitur collum septem *vertebris*, ossi-

ossibus nimirum, annulorum instar flexibilibus, vertendoque, sive circumducendo capiti aptissimis sustinetur, in quo *asperarteria*, & *asophagus* reperiuntur.

3. Thorax est illa superior humani trunci pars, aut cavitas, in quâ pulmones, & cor continentur. Integra enim trunci cavitas *diaphragmate*, crassiori nimirum, fortiorique membranâ horizontaliter ferè extensâ dividitur; unde superior cavitas *venter superior*, *pectus*, aut *thorax*; inferior verò cavitas *venter inferior*, *venter infimus*, aut absolutè *venter* vocatur.

4. Venter, aut infima pars *abdomine* continetur. In dexterâ illius parte infra diaphragma est *jecur*, aut *hepas*; in sinistrâ verò *lien*, sive *splen*; atque inter utrumque jacet *ventriculus* cibis excipiendis destinatus, cujus orificium, per quod cibus ingreditur, *æsophagus* appellatur; aliud verò, per quod cibus ipse in ventriculo concoctus in intestina illabitur, *pylorus* vocatur. Intestinum verò, sive flexibilis, & membranaceus ille tubus, per quem cibus egeritur, in varios gyros, sive mæandros sinuatur, qui tamen omnes *omento*, vel *adipe* vestiuntur, & membranæ cuidam, quæ *mesenterium* dicitur, adhærent. Illius longitudo corporis humani longitudinem septies superat, atque ita variis nominibus distingui solet, ut prima illius pars ventriculo contigua *duodenum* vocetur, tum sequitur *jejunum*, tum *ileon*, deinde *colon*, ac postremò *rectum*, quamvis alii etiam *cæcum* inter ileon, & colon positum enumerent. In infimo quoque ventre, dorsoque annexi sunt *renes*, in quibus a sanguine per emulgentium arteriarum ramos ex corde delato se-

paratur urina, atque per uretheres in subiectam vesicam illabitur.

V. Porro integra ventris extensio tres in partes distingui solet, quarum superior, quæ ventriculo adjacet, *epigastrium* vocatur; media ventriculo subiecta, & umbilico proxima *hypogastrium*; infima *peritonæum*; epigastrii latera dicuntur *hypocondria*, atque ibi melancholicus humor ex liene colligitur, qui cerebrum offundere, & melancholiam, mæstitiamque excitare solet; mediæ latera dicuntur *ilia*, quodd *ileo* intestino proximè adhæreant; infimæ demum latera *inguina* vocantur, ejusque medium *pubes*.


Quemadmodum verò brachia humerum, cubitum, manum, digitosque continent; ita etiam crura *femora*, vel *coxendices*, *tibias*, *pedesque* complectuntur, in quorum singulis, *ossa*, *musculi*, *nervi*, aliæque simplices partes continentur.

V. Atque hætenus quidem rudem, levemque corporis humani descriptionem expressimus. De singulis verò partibus, illarumque usibus in sequentibus Capitibus differemus, a cerebro superiori, nobiliorique partè exordientes. Interim faciliè, manifestissimèque cognosci poterit quàm temere, stultissimèque dixerit Epicurus admirabilem organorum varietatem, fortuitò, neque ullius operationis causâ in animalium corporibus productam esse, ut neque oculi videndi gratiâ, neque aures audiendi formatæ fuerint; sed id potiùs ex fortuito illorum usu, & applicatione dependeat: quem Epicuri hac in parte insanientis errorem a Luctetio mirificè confirmatum, Cicero, Galenus, Lactantius, aliique plurimi invictissimè confutarunt.

C A P.

CAP. IV.

De cerebri substantiâ, atque nervorum origine.

I.  Quandoquidē motus omnes a cerebro, spiritibus nempe, qui per nervos a cerebro diffunduntur, oriri debent, atque ipsa cognitio in cerebro veluti animæ sede potissimum peragitur, cerebri structuram, nervorumque originem prior loco describendam aggredimur. Atque optandum sanè, ingenuoque Naturæ studioso curandum maximè foret, ut hæc ipsa, quæ de cerebro, aliisque corporis humani partibus dicturi sumus, ipse per se se in dissecto cadavere sæpius accuratissimè intueretur; sic enim clariùs, & illustriùs illa intelligere, & altiùs memoriæ mandare posset, quàm si nos eadem longâ, vel accuratissimâ oratione complectemur. Varias itaque cerebri partes, & usum, subiecto etiam schemate nunc exponemus, quod iis quidem erudiendis par esse poterit; quibus cadaveris inspiciendi copia non suppetat; iis verò, qui dissectum cadaver inspexerint, veterem cognitionem excitabit, longèque iucundiorē efficiet.

II. Cerebrum itaque non modò aliorum membrorum instar, *cute*, *cuticulâ*, *adipe*, *carnosoque panniculo*, quæ quatuor corporis *intègumenta* vocari solent, exterius circumdatur, sed ossèa quoque, solidâque capsulâ continetur, quæ *cranium* vocatur. Duplici quoque membranâ, sive

sive *meninge* ambitur, quarum exterior, quæque interiori cranii superficiei fibrillis quibusdam adhæret, quodd crassior, duriorque sit, dicitur *dura mater*; interior verò, quæ subtilior est, variosque sinus, ambages, & anfractus omnes, in quos flexibilis cerebri substantia intestinorum instar disponitur, accuratè sequitur, *pia mater* appellatur. Cerebrum ipsum in dexteram, sinistramque partem, ac *cerebellum* dividitur; ita enim dura mater in cerebri medio duplicatur, ut ejusmodi duplicatura, quæ a fronte in occiput, posteriorem nempe capitis partem, extenditur, dextram cerebri partem a sinistrâ separet; cùmque exilior in fronte, latior, sive profundior sit in occipite, falcis messoriæ figuram exhibet, unde *falx*, vel *septum lucidum* appellatur, quo in occipite extrema cerebri pars, aut cerebellum, a reliquis separatur. In septo lucido plurimi sinus, aut canales conspicui sunt, quos inter insignis est ille, qui totam septi longitudinem excurrens sanguinem, quem arteriæ *carotides*, & *cervicales* ad cerebrum detulerant, in venas *jugulares*, quibus ad cor reducatur, revehit.

III. Clariùs id in fig. VIII. conspicitur, ubi cerebrum exhibetur quale ex resecto cranio educitur, dum utrâque membranâ spoliatur, inverso tamen situ, ut illa nimirum pars conspicua sit, quæ inferior est, ac versùs palatum respicit. Hæc itaque cerebri moles, sive substantia duas in partes, *callosam* nempe, atque *cineream* distinguitur. Cinerea dicitur illa, quæ exterior est, detractâque durâ matre, sive *meninge* statim conspicitur, ut X, X, X; cinereum verò, vel subobscurum colorem, quem exhibet, & a quo nomen sortitur, fortasse contrahit

trahit ab innumeris arteriis, venulisque, quibus ope microscopii ita referta conspicitur, ut nullibi secari, vel pungi possit, quin aliquæ sanguinis stillæ erumpant. Callosa verò dicitur interior, inferiorque cerebri pars M, N, O, P, Q, quæ albicantior, atque solidior est; unde etiam cerebri *medulla* vocari solet. Plures in illâ partes distingui solent, ut infundibulum M N O, venter O P, medulla oblongata P Q; quemadmodum in oppositâ cerebri parte, quæ nempe superiorem capitis partem occupat, reperitur *glandula pinealis*, sive *conarium*, quam mentis humanæ sedem putavit, ideoque celebrem reddidit Cartesius: hinc inde glandulam circumstant duæ protuberantiæ, quæ *nates* dicuntur, illisque proximè subjecti sunt *testes*, geminique ductus, quorum alter ad glandulam pituitariam, alter ad quartum cerebri ventriculum extenditur.

IV. Porro quis harum cerebri partium usus censeretur, inter veteres, recentioresque Anatomicos, adhuc differitur. Plerique tamen existimant in cinereâ cerebri parte sanguinem percolari, atque ab illo spiritus animales, puriores, nempe, subtilioresque partes separari, quæ deinde ad callosam, mediamque cerebri partem deferantur. Cum etenim in cinereâ cerebri parte, ut antea dicebamus, innumerae sint arteriolæ, quibus sanguis per ipsam diffunditur, innumeri anfractus, & gyri, quibus idem sanguis traici, philtrari, percolarique facillè potest, non alio commodiori loco spirituum a sanguine separatio, fieri poterit, quàm in ipsâ cinereâ cerebri substantiâ; quod illustrari, confirmarique maximè poterit ex nuperrimis Malpighii, aliorumque ob-

serva-

servationibus, quibus ostenditur cineream cerebri substantiam innumeris propemodum glandulis compositam esse, tenuissimisque ductibus, qui in callosam denique partem desinant, illoque spiritus a sanguine secretos deferant, qui deinde per nervos ad singulas corporis partes aberrimè diffundantur.

V. Expositis itaque cerebri partibus exponenda jam superest nervorum origo, quam non a corde, ut Aristoteles existimavit (a), sed ab ipso cerebro repetendam esse experimento manifestissimè erudimur. Est autem nervus, ut antea dicebamus, teres, oblongum, albidumque corpus, varis fibrillis, seu filamentis contextum, tubuli, vel canalis instar excavatum, ut in ejusmodi cavitatibus, quæ tamen exiguae adeo, tenuissimæque sunt, ut resecto nervo omnem oculorum vim fugiant, animales spiritus celerrimè deferantur. Utrum verò per nervos non modò spiritus, sed humor etiam, *succusque nervæus* movendis, nutriendisque corporis partibus deferatur, incertum est; cum tamen illa corporis membra, quæ paralyti affecta fuerint, in quibus nimirum interior nervorum cavitas obstructa fuerit, nutrirî, vel augeri non soleant, longè verisimilius cum Glissonio, aliisque compluribus censerî poterit, hunc quoque succum ex arterioso sanguine in cerebro secretum, per nervos ipsos deferri, ut inde corporis partes nutriantur, tenuissimique spiritus animales, qui facillè evanescerent, coerceantur.

VI. Quandoquidem verò spiritus animales in singulis corporum partibus sive movendis, sive

(a) *Hij. Anim. III. c. 3. 5.*

nutriendis reperiuntur, incredibile est certè quanta nervorum, divisio, subtilitas, atque in plurimos veluti ramos diffusio admitti debeat. Plerumque tamen ad decem paria, sive conjugationes revocari solent, quarum omnium origo in eàdem quidem callosæ, candidæque substantiæ parte facilè reperitur, sed ob incredibilem, ac infinitam ferè subtilitatem nondum observari, deprehendique potuit. Itaque nervorum paria non ex primo veluti fonte, ex quo disperguntur, sed in illâ, potiùs cerebri parte describuntur, in quâ conspicui, insignesque sunt, ut clariùs fig. VIII. exhibetur.

Prima nervorum conjugatio continet olfactorios A, A. etsi plurimi ex Anatomicis id nervis quinti paris concedant.

Secunda opticos B, B. qui in oculos desinunt, visionique inserviunt.

Tertia oculorum motores C, C. a quibus oculi sursum, deorsum, atque in laterales partes impelluntur.

Quarta patheticos D, D, quibus oculi patheticè varias in partes variis affectibus exprimendis torquentur, quod meliùs tamen quinto pari conceditur, cum pathetici, vel quarti paris ad solos trochleares musculos dirigantur.

Quinta conjugatio E, E varias in partes, variosque ramos dividitur, quæ ad gustum, olfactum, oculorumque motum deserviant, atque ad ipsa quoque præcordia dirigantur, unde mira sensuum, & affectuum connexio, vel consensus exoritur.

Sexta conjugatio F, F. duas in partes dividitur, quarum altera *intercostalis* vocatur quòd thoracis musculis contrahendis inserviant; altera patheticos in oculo motus efficiat, varios nempe affectus exprimat. Sc.

Septima duplici parte componitur, quarum mollior G, G, ad auditus organum tendit, durior verò H, H. per linguam, labia, & palatum dispergitur.

Octava conjugatio I, I per varias præcordiorum partes dividitur, unde *par vagum* vocatur.

Nona conjugatio K K. quemadmodum etiam decima L, L. ad varios musculos diriguntur, ut illorum ope varios in corpore motus producant, ut inferius ostendetur. Quemadmodum etiam 30. nervorum conjugationes, qui *vertebrales* dicuntur, quod ex vertebrais, sive dorsali medullâ vertebrais inclusâ oriantur, variis ejusmodi spontaneis motibus peragendis inserviunt; neque inter cætera nervorum paria enumerantur, quod a nervis aliis, non verò proximè à cerebro deriventur.

VII. Porro singula nervorum paria his verbis continentur.

*Olfaciunt primi, videt altera copula; motum
Tertia fert oculis; quarta est pathetica; quinta
Olfacit, & gustat, faciemque, & viscera
jungit*

*Communi affectu; has imitatur sexta, oculisque
Affectus animi prodit, ramumque ministrat
Intercostalem; sed septima fertur ad aures,
Faucesque, & linguam, perque os dispergitur
omne.*

*Octava invadit variis præcordia fibris;
Par nonum, & decimum cum vertebralibus
omnes,*

Quos ultra expetimus, peragunt in corpore motus.

Ubi observasse juverit septem solum ex superioribus nervorum paribus innotuisse Veteribus, II. nempe III. V. VI. VII. ut ex his versibus intelligitur.

Op-


Optica prima; oculos movet altera; tertia gustat,

Quartaque; quinta audit; sexta est vaga; septima lingua est

uberior autem, & accuratior nervorum divisio superius exposita ex diligentissimis Villisii observationibus nuper innotuit.

C A P. V.

De structurâ, & motu Cordis, & Sanguinis circulatione.

I.  Dmirabilis modò cordis structura, perennisque motus, quo cor contrahitur, dilataturque, sanguinem in singulas corporis partes celerrimè diffundendo, explicanda nobis occurrit.

Tanta nimirum est cordis utilitas, præstantia, & pulchritudo, ut illud a veteribus primum vivens, & ultimum moriens censi consueverit, ipsique tota corporis vita, motusque singuli veluti fonti concederentur.

II. Cor itaque, cujus acuminata, conica, vel pyramidalis figura omnibus constat, in medio pectoris loco appensum conspicitur, nisi quod cuspide, vertice, acumine, vel inferiori sui parte in lævam corporis partem nonnihil deflectat. Membranâ quadam, veluti bursâ, sacculo, vel capsulâ continetur, quæ *pericardium* vocatur, quæque non proximè quidem cor ipsum tangit, aut illi adhæret, sed ab illo nonnihil distans, humorem quendam continet

tinet. urinæ similem, quo nimius innatantis cordis calor temperetur. Cor ipsum verò duplici fibrarum serie ita contextitur, ut exteriores fibræ, quæ nimirum exteriorem cordis partem componunt, in modum spiræ contortæ, intextæque in cordis cuspidem definant; interiores verò recto ductu ex basi, vel superiori parte in cuspidem intextæ dirigantur; unde cor musculus, & quidem duplex, ob duplicem fibrarum ordinem, quemadmodum ex validâ fibrarum texturâ, fortis admodum, & constans censeari poterit.

III Duplex deinde cavitas, duplexque sinus, aut ventriculus in corde reperitur, quorum, qui dexteram pectoris, cordisque partem occupat, *dexter* vocatur, manifestèque gravior, brevior, & angustior est illo, qui sinistram latum respicit, atque *sinister* vocatur; ejusmodi verò sinus membranâ transversè ductâ, dirimuntur, quæ *septum* dicitur.

Uterque porro cordis ventriculus duplex orificium habet, cum ex utroque sinu duplex canalis oriri conspiciatur: ex dextro nimirum sinu *vena cava* egreditur, quæ vix ab ipso corde recedens in duplicem venam, veluti ramum dividitur, quarum alia superiores corporis partes alluit, unde *ascendens* vocatur, alia inferiores, unde *descendens* dicitur; atque insuper *vena arteriosa*, quæ, cum a corde in pulmones diffundatur, potius arteria vocari debuit; vena tamen vocatur, quod antiqui venas omnes a dextro cordis sinu, arterias autem a sinistro oriri putarent. Ex altero similiter cordis sinu oritur *arteria magna*, vel *aorta*, quæ ex corde egrediens in plurimos ramos, totumque corpus diffunditur; & *arteria*

ria venosa, quæ e pulmonibus sanguinem in cor revehit, unde potius vena putari debebat. In singulis autem his cordis canalibus conspicuæ, insignesque sunt valvulæ, *tricuspidæ* nempe, mitratæque membranulæ, quæ exitum sanguini, ingressumque prohibent.

Sic in dextero cordis ventriculo venæ arteriosæ tres adsunt valvulæ, quibus non ingressus quidem, sed exitus sanguini conceditur; venæ cavæ tres adsunt valvulæ, quibus non exitus, sed solum ingressus sanguini permittitur; quemadmodum in sinistro cordis ventriculo arteriæ magnæ, vel aortæ tres valvulæ adhærent exitum prohibentes, arteria verò venosa, quæ est ovalis figuræ, duas tantummodo valvulas habet, quibus sanguini liberè cor ingredienti regressus impeditur. In fig. IX. cor exhibetur a pericardio eductum cum arteriis, ac venis a corde erumpentibus. AA est vena cava, BB vena arteriosa. CC arteria venosa. DD arteria magna, vel aorta.

IV. Antequam tamen ejusmodi valvularum usus ostendatur, observari plurimum debet, quod supra cordis basim, utrique sinui correspondentes duo sacculi adhærent, qui, cum cartilagineas canis aures imitentur, *auricula* vocari solent, Illæ sanguinem ex corde expressum excipiunt, ac per arterias deinde distribuunt, quemadmodum a venis receptum in cor reducunt; hinc alternâ serie, vel tempore, ac ipsi cordis ventriculi, quibus adhærent, comprimuntur, dilatanturque; ut ubi nimirum cor contrahitur, sanguinemque expellit, illæ turgescant; ubi cor dilatatur, sanguinemque recipit, illæ decrescant.

V. Alternis itaque vicibus cor ipsum con-

trahitur, dilataturque, ut in contractione nimirum, vel systole sanguinem exprimat, in dilatatione verò, vel diastole recipiat. Ita verò contrahi, systolemque cor efficere conspicitur, ut cuspis tunc elevetur, ascendat, vel ad basim accedat, cordis nempe longitudo, vel altitudo decrescat, auctâ latitudine; quod fieri certè non poterit, nisi intra fibras, quibus intertextis cor ipsum componi diximus, tenuissimæ, vividæque substantiæ partes insinuentur, quæ fibras ipsas distrahere, dilatare, simulque contrahere possint, quæ deinde, motu, vel distractione cessante, iterum relaxentur, pristinam cordi figuram, cavitatemque restituant, ut sanguinem rursus excipiat, & diastolem subire dicatur.

Aristoteles quidem, atque Cartesius hanc sanguinis dilatationem, cordisque diastolem fieri putant ex nimio calore, vel igne quodam vitali, qui in corde resideat, ac veluti perenniter ardeat, quo sanguis in cor delapsus calefieri, rarior, vividiorque fieri, ideoque cor dilatare, atque ex corde erumpere debeat; unde sanguinem diastoles, sive dilatationis tempore effundi arbitrantur. Verùm hæc opinio accuratissimis observationibus refelli potest, quibus manifestissimè ostenditur, sanguinem systoles, vel contractionis tempore e corde erumpere; atque ipsa in primis cordis structura, & fibrarum plexus apertè innuit non solo cordis calore, sed fibrarum distractione subtilis, fluidæque substantiæ appulsu aliorum muscutorum instar contrahi cor, sanguinemque violenter expressum in arterias ejaculari. Id verò non aliâ clariori, meliorique ratione fieri, vel explicari poterit, quàm si concipiantur, inte-

interiores cordis fibræ, quas in longum extensas esse jam diximus, tenuissimæ substantiæ, vel spirituum affluxu dilatari, ut cuspide ad basim accedente ipsa proinde cordis longitudo decreseat, atque sanguis ex ipso corde exprimatur; deinde verò exteriores fibræ, quæ spiraliter circumductæ sunt, tenuissimæ substantiæ affluxu similiter dilatentur, unde auctâ cordis longitudine ipsius latitudo, vel cavitas augeatur; ideoque sanguis in ipsum cor relabatur. Maximam porro, & incredibilem esse vim, quâ cor contrahitur, is experiri facillè poterit, qui trajectâ costâ cor ipsum cultro feriat, atque in hujusmodi cordis vulnus digitum inserat; a discissis enim, sejunctisque cordis partibus digitum ipsum violenter adeo premi sentiet, ac si furentis canis ore, vel constrictis forcipibus stringeretur.

IV. Neque minori certè vi cor ipsum contrahi, sive constringi debuerat, sanguinemque in auriculas, & arterias exprimere, ut sanguis ipse non modò per arterias ad extrema corporis membra diffundi, sed per venas etiam perenni circuitu ad cor ipsum revehi posset; hunc etenim sanguis circuitum veteribus prorsus incognitum, atque Columbo primùm observatum, a Sarpio demonstratum, ab Harvæo deinde Henrici VII. Anglæ Regis Medico confirmatum, ac uberius illustratum admitti oportere clarissimis, certissimisque rationibus erudimur.

1. Ac primò quidem, argumento esse poterunt undecim valvulæ, quæ cordis auriculis ita proximè adhærent, ut sex illarum exitum sanguini per arterias ex ipso corde systoles tempore erumpenti liberè permittant, reductum

prohibentes; qui liberè tamen in aliis quinque valvulis, quæ venis adhærent, haberi potest, etsi sanguinis exitus in illis omnino prohibeatur; quid enim in arteriis exitus, reditusque in venis, valvularum ope, impediretur, nisi sanguis in arteriis a corde fluere, refluerè in venis, sive ad cor redire deberet?

2. Deinde verò, nisi sanguis perenni hoc circuitu per venas, & arterias moveretur, in variis corporis partibus, præsertim verò subtilioribus, atque a corde dissitis sensim torperet, nutriendisque membris par esse non posset; perenni verò itu, redituque subtilior, rarior, vividiorque redditur, in angustissimis etiam arteriis novis semper sanguinis succedentis idibus impellitur, promovetur, nutriendisque corporis partibus ubique dispergitur.

3. Similiter etiam nisi sanguis a corde per arterias diffusus ad cor ipsum per venas rediret, neque frequenter adeo cor, & arteriæ pulsarent, neque nova semper sanguinis pars ex ipso corde in arterias erumperet. Si etenim supponatur, quod in humano corpore, vix viginti sanguinis libræ reperiuntur, cor verò singulis horæ minutis sexagies contractus unicam semper sanguinis unciam in arterias effundat, necessariò fieret, ut tota sanguinis massa, integra nempe 20. librarum, sive 240. unciarum moles, 240. arteriæ pulsibus, sive 4. minutis horæ a corde in arterias effunderetur; ideoque aut cor moveri desineret, aut nihil certè sanguinis ampliùs in arterias impelleret, nisi sanguis ipse semel ex corde in arterias impulsus iterum per venas ad cor rediret.

4. Sed illustriùs adhuc perennis ille sanguinis circuitus apparet, si vena circumligatur, ut

ut in phlebotomiâ, vel sanguinis emissione, fieri conspiciamus, cum nempe a Chirurgo ex brachio, vel pede sanguis educitur; tunc etenim vena in inferiori, hoc est a corde remotiori parte turgere conspicitur; quod fieri certè non posset, nisi sanguis jam per arterias ad manum ex. gr. delatus per venas ad cor rediret, obstructoque aditu ibi intumesceret. Quod si brachium fortiùs constringatur, ut non modò venæ, quæ cuti proximiores, gracilioresque sunt, sed arteriæ quoque a cute remotiores, firmioresque obstruantur, tunc sanguis per arterias fluere, aut per venas refluerè non poterit, ideoque ex apertâ venæ parte erumpere non deprehendetur.

5. Id experiri postremò quis poterit, si in arteriam aliquam liquor aliquis infundatur, qui colore differat, ac facilè distinguatur a sanguine; hic etenim per varios arteriæ ramos diffundi, atque iterum per venas ad cor redire manifestissimè demonstratur, ut nihil proinde clariùs, felicius inventum censi possit, quàm perennis iste sanguinis circuitus.

VII. Quo verò temporis spatio integra sanguinis circulatio peragatur definiri vix potest; cùm ex puriori, subtiliori, vividiori, tardiorive sanguine, aut etiam ex variâ corporis habitudine celerior, seu tardior motus pendeat. Superiori tamen hypothefi, & calculo inferri poterit, quod si integra sanguinis massa per cor transit 4. minorum spatio perfecta sanguinis circulatio, eo temporis spatio peragetur; ideoque unius horæ spatio sanguis in corde circuitus quindecim efficiat, sive quindecim vicibus omnis sanguinis moles per cor effundatur; quod si non 10. sanguinis li-

bræ, sed solum 10. in humano corpore supponantur, ut plurimis videtur (a), inito calculo totus sanguis 140. vicibus unius horæ spatio per cor transiret, ideoque bis intra minutum quodlibet integra sanguinis circulatio perageretur.

VIII. Difficilius adhuc definiri, vel explicari poterit modus, quo sanguis in arteriis fluere desinat, ac per venas refluerе incipiat; sive quomodo ex arteriis in venas illabatur. Atque in pluribus quidem arteriis *anastomoses*, sive insertiones, vel communicationes arteriarum cum venis videntur; in aliis verò ob incredibilem tenuitatem, quæ extremæ arteriolarum partes, primaque venarum capita omnem oculorum vim fugiunt, observari non possunt. Credibile est tamen in his etiam arteriis, venisque easdem *anastomoses* reperiri; tum etiam subtiliores sanguinis particulas per ipsam arteriæ membranam trajici, ut per circumfusas carnis fibras traductæ venarum poros subeant; ut in sudore, aliisque humoribus fieri observamus.




CAP.

(a) *Robaut. par. IV. c. 14.*

C A P. VI.

De Structurâ, motu pulmonum, respiratione, & voce.

I.  Ræcipuis, nobilioribusque corporis humani partibus accenseri meritò poterunt pulmones aëri inspirando, expirandoque destinati; cum vel ipsum *anima* nomen, ab animâ, vel aëre inspirato deductum videatur, nullumque clarius indicium vitæ soleat haberi, quàm eadem respiratio, vel alterna pulmonum contractio, ut eximiam vocis præstantiam, quæ exinde oritur, prætermittam. De mirâ itaque pulmonum structurâ, respirationis, & vocis origine differemus, & quidquid illustrius hac in parte possit afferri breviter exponemus.

II. Pulmones itaque in superiori ventre, nimirum pectore, sive thorace continentur, atque cor ipsum circumdant; unde duas in partes, sive *lobos* dividuntur, in quorum medio cor reperitur. Illorum substantia spongiosa plurimis arteriis, venis, præsertim verò vesiculis conferta conspicitur, quamvis Villisius carneas quoque, vel musculosas fibras illis inesse arbitretur, ut sola ferè vesicularum congeries videatur, quæ cum aëre inspirato repleta, distentaque fuerit, uvæ racemum exhibent. Pulmones ipsi cum faucibus *asperâ arteriâ*, sive *trachæâ* conjunguntur, canali nimirum, per quem aër ore exceptus in pulmones

nes ingreditur, egrediturque. Superior asperæ arteriæ pars *larynx* vocatur, cui *epiglossis*, seu *epiglottis* ad linguæ radices adhæret, non modò, ut aëris e pulmonibus erumpentis motum temperet; verùm etiam, ut trachææ orificium, cui imminet, valvulæ, & pontis instar, claudat, interim dum potum, aut cibum deglutimus, ne cibis ipse e linguâ in æsophagum translatus, trachæam ingrediatur, violentosque motus, ac tussim in illâ excitet, ut fieri interdum solet.

III. Illud autem in asperâ arteriâ mirum conspicitur, quod nec ossea sit, alioquin variis vocibus modulandis, inflectendoque collo resisteret; nec membranæ instar flexibilis, ne faciliè compressa aëris aditum prohiberet; sed potiùs cartilaginea; pluribus nimirum veluti circulis, mutuò connexis, variisque venis, arteriis, vasibusque lymphaticis ubique intertextis componitur, qui tamen posteriori parte, quâ trachæa æsophago adhæret, ne deglutendo cibo resisteret, in membranam desinunt. Cumque plures in illâ fibræ, nervulique, partim rectæ, partim circulares reperiantur, non modò maximum in illâ sensum efficiunt, sed etiam ipsius cavitati deducendæ, contrahendæque plurimùm inserviunt, quod in tussi, excretionem, vocumque varietate mirificè demonstratur. Trachæa denique in *bronchias* desinit, innumeras nempe vesiculas, ramos, ramorumque ramulos dispergitur, quibus totam pulmonis substantiam repleri, sive componi jam diximus.

IV. Infra pulmones reperitur *diaphragma*, membrana nimirum, quæ transversim ducta superiorem ventris partem, pectus sive thoracem

cem ab inferiori dividit; duplici musculo diaphragma componitur, quorum unus e lumbaribus vertebis; alter verò e costis oritur, simulque intertexti mediam præsertim diaphragmatis partem occupant; unde contractis hujusmodi musculorum fibris, diaphragmatis superficies, quæ alioquin convexa, atque protuberans versùs thoracem, sive pulmones assurgeret, extenditur, & complanatur; diductis verò, relaxatisque iterum assurgit.

V. Exinde verò facilè intelligi, atque explicari poterit, quibus organis, quibusve legibus respiratio peragatur. Si etenim musculosæ diaphragmatis fibræ constringantur, ut convexa diaphragmatis superficies deprimitur, augebitur pectoris, sive thoracis amplitudo; ideoque aër ore, vel naribus exceptus vi suæ gravitatis in subjectam asperæ arteriæ cavitatem illabetur, variosque ejusdem arteriæ ramos, sive vesiculas distrahens, pulmones inflabit, & circumpositas thoracis costas elevabit, unde inspiratio, vel aëris attractio oritur; deinde verò relaxatis iterum diaphragmatis fibris, ipsius superficies attolletur, pulmonesque comprimet; unde aër ipse in pulmonum vesiculis dispersus, repente expressus, per asperam arteriam iterum ad os, vel nares impelletur, unde respiratio, vel aëris expulsio fiet.

VI. Hanc autem esse aëris inspirati, expiratique causam, non modò pulmonum, atque diaphragmatis structura, sed alternus etiam motus, qui in thoracis musculis observatur, clarissimè ostendit; atque id clariùs etiam, & illustriùs observatur in tussi; aliisque motibus, qui cum respiratione mirificè conjunguntur.

Tunc

Tunc enim tussis fieri dicitur, cum violenter, maximâque vi aër a pulmonibus exprimitur, ut cibi, potûsque particulas tracheam ingresses, aut viscosos humores aliquos in interiori asperæ arteriæ superficie sensim concretos expellat. Tunc verò abdominis, & thoracis musculos contrahi, compressis visceribus, ac intestinis diaphragma sursum impelli manifestissimè nos experimur, unde uberior, & violenta aëris exspiratio oriatur.

VII. Id experimur etiam in risu, cum nempe vividâ alicujus festivi objecti imagine spiritus excitantur, & sanguis uberior ex dextro cordis ventriculo undatim ferè in pulmones illabitur, quibus interruptè subjectum diaphragma comprimatur, & elasticâ deinde fibrarum vi resultet, interjectisque icibus ita pulmones comprimat, ut aër ipse undatim, ac interruptè per os erumpat. Cùmque spiritus in cerebro excitati non modò ad cor, sed ad musculos etiam quosdam in facie dispositos dirigantur, risus os diducere, faciem corrugare, jucundâ quadam, festivâ, subjucundiorique imagine vestire conspicitur. Neque modò ille interruptus diaphragmatis ferè subsultantis impetus in risu percipitur, sed abdominis etiam, pectorisque muscoli ita laxantur, ut ex effuso nimioque risu plerumque defatigentur, & inde mors interdum consequuta memoretur.

VIII. Quemadmodum verò in tussi aër ex pulmonibus violenter expellitur, ita quoque in *sternutatione* majorem aëris copiam, quam inspirando recipimus, subitò, violenterque exprimimûs. Cùm etenim spiritus animales in cerebro, siue solis aspectu, solisve radiis, siue acribus tabaci particulis, quibus internæ

marium fibrillæ percellantur, excitari contigerit, illi per nervos ad thoracis, & abdominis musculos deferuntur; ibique diaphragmatis fibras contrahunt; quibus repente laxatis diaphragma elevetur, pulmones comprimat, æremque emittens strepitum edat.

IX. Sernutationi opponitur *singultus*. Illa nimirum fit ubi diaphragma laxatis repente fibris elevatur, æremque ex pulmonibus emittit; hic verò contingit, ubi fibris ejusmodi repente contractis, demissoque diaphragmate ær repente in pulmones illapsus strepitum edit. Hinc si fibrarum contractio, sive convulsio ex acribus, salinisque particulis oriatur, quæ in illâ ventriculi parte reperiantur, in quâ ventriculus ipse diaphragmati adhæret, solo potu, quo acres illæ particulæ abluantur, singultus sanari solet.

X. Singultui denique comparari poterit *anhelitus* ille, vel frequens, & molesta respiratio, quæ fit ubi sollicitiori, concitatorique motu cucurrimus. Nervæ nimirum fibræ acri motu, & calore concitatæ frequentibus ictibus diaphragma contrahunt, unde frequens respiratio, vel anhelitus oriri debet; quemadmodum etiam difficilior, atque molestior anhelitus observatur, ubi supini jacemus, aut arctiori vestitu induimur; tunc enim difficilius thoracis cavitas dilatari, sive thoracis costæ elevari poterunt, ut ær in pulmones liberè ingrediatur.

XI. Cum verò plurimi sint effectus illi, qui in respiratione præstantur, de præcipuo respirationis sine; vel usu inter se Philosophi dissident. Gassendus enim, aliique plurimi existimant perennem veluti flammam in corde ardere, quæ jugiter ab ære pulmonibus inspi-

rato

rato excitetur, foveatur. Alii verò perennem potiùs hanc flammam in corde accensam, aëre mitigari, & temperari arbitrantur. Verùm utraque ex his opinionibus incredibili naturæ studio plurimùm detrahit, ac si aut nimis tenuem, aut nimium calorem, excessivumque illa cordi concesserit, qui aëre deinde excitari, vel mitigari debuerit. Deinde verò ex frigidiori, calidiorique aëre inspirato, calidior, frigidior sanguis non observatur; quemadmodum sanguis ipse, dum expulmonibus ad cor revertitur, eundem ferè calorem exhibet, quo ex corde ad pulmones accesserat.

XII. Nobiliores itaque, & precipui respirationis usus censerì poterunt sanguinem subtiliorem, mobilioremque reddere, rubrum in illo colorem inducere, circulationem sanguinis promovere, pulmones a noxiis halitibus expurgare, vocem denique formare.

Et certè quod sanguinis circulatio respiratione plurimùm promoveatur manifestè apparet, ex iis, quæ paullò superiùs de sanguinis motum jam diximus; sanguis enim e dextro cordis ventriculo in pulmones per venam arteriosam illabitur, eorumque substantiam spongiæ instar tumefacit; deinde verò pulmonibus folliculi, aut torcularis instar alternè compressis, per arteriam venosam in sinistram cordis ventriculum sanguis impellitur, ut inde per aortam in singulas corporis partes uberrimè diffundatur; quod si respiratio cessaret sanguis in pulmonibus stagnaret, novumque sanguinis, e corde erumpentis affluxum prohiberet, unde cor ipsum sanguine turgere, & opprimi deberet.

XIII. Neque hac solum de causâ aëris inspiratio, vel alterna pulmonum contractio sanguini

guini impellendo plurimum confert, verum etiam, quod, ubi venosa sanguinis substantia nitroſis, ac elastiſcis aëris particulis in pulmonibus permiscetur, illa subtilior, mobilior, concisior, fluidior, atque celerior efficitur.

Ex ipsis etiam nitroſis, aëreisque particulis rubescens sanguinis color oritur. Apparet enim, quod sanguis e venâ eductus, & vase exceptus, intenſius in extimâ, vel superiori illius superficie: quæ aëri conjungitur, rubere conspicitur, quod fieri oportere pluribus, clarissimisque experimentis a Chymicis demonstratur.

Halitibus etiam, siue vaporibus, qui inter pulmonis bronchias concreverint, expirandis, simulque cum aëre per asperam arteriam expellendis hæc aëris respiratio conducit; etsi alterâ tamen ex parte simul cum aëre terrestres halitus aëri permixti inspirentur, vel in pulmones ipsos attrahantur, unde epidemici morbi diffundi facile solent, variæ in palustribus locis ægritudines contrahi, quodd graves, noxiique halitus, ex infectis corporibus, palustribusque locis erumpentes inter pulmonis bronchias dispergantur, sanguinique permixtæ ipsum corrumpant.

XIV. Cæteros tamen respirationis usus, quorum quatuordecim Ethmullerus enumerat (a), superare videtur vocis formatio, quâ certè plurima ex animalibus insignia sunt, atque homines ipsi a bratis mirificè distinguuntur. Ut itaque vox formetur aër ex pulmonibus magis, vel minùs compressis expelli debet, qui ex asperâ arteriâ erumpens in epiglottidem illiditur

(a) *Dissert.* 2. c. 10.

ditur, rursusque a palato reflexus, variis linguæ motibus agitatus, dentibus illisus, variisque oris, aut labiorum contractione dispositus, & modificatus ex hominis ore tandem egreditur, atque ad aliorum aures modo inferius explicando deferitur. Atque hinc intelligi poterit, cur demisso capite gravior, arrecto, oblongatoque collo acutior vox fiat; cur ubi interior trachææ superficies viscosis humoribus concretis referta fuerit, rauco oriatur; cur, ubi lingua commodè quæcumque in partem flecti non possit, ubi dentes, aut labia desint, ubi denique aliquod ex his organis læsum, perturbatumque fuerit, distincta, sive perfecta vox formari non possit; variatâ nimirum trachææ amplitudine, superficie, variatâ linguæ dentium, aliorumque organorum structurâ, ipsa quoque vox variari plurimum debet, quod clariùs intelligi poterit, ubi de soni naturâ Cap. XII. differatur (a).

XV. Quæ verò de respirationis usu in homine diximus, de cæteris omnibus animalium generibus intelligi poterunt. Quod enim ipsi etiam pisces, etsi pulmonibus careant, aliquâ ratione respirent (b), exinde manifestissimè apparet, quod bronchiis, pulmonum instar, aquæ, & aëri excipiendo instruantur; quod odorem quoque qui sine halitibus aëri permixtis esse non solet, percipiant (c); quod in illorum vesiculâ, ut inferius ostendemus, modò major, aut minor aëris quantitas reperiatur; præsertim verò, quod pisces in vitreo vase; in quod liberè aëri aditus pateat, diutissimè vivant, &

(a) Vide Keill. *Anat.* c. 3. (b) Plin. *IX.* c. 7. (c) *Arist.* *Hist.* *IV.* c. 8.

occluso vasis orificio repente moriantur: quæ fieri certè non possent, nisi quædam aëris respiratio in piscibus quoque reperiretur.

XVI. Id unum postremò coronidis loco addendum superest, quod, etsi homines, aut animalia piscium instar aërem aquæ permixtum respirare nequeant, ideoque in aquâ positi, respiratione interclusâ, sive absorptâ aquâ celerimè moriantur; animalia tamen quædam, & interdum homines ipsi, aliquandiù sub aquâ vivere sinè ullâ respiratione possunt (a).

Id verò non aliâ ratione fieri potest, nisi quòd in septo, sive membranâ, quæ duos cordis sinus, sive ventriculos dividit, foramen quoddam ovale apertum reperitur, per quod sanguini ex dextero in sinistrum cordis ventriculum transitus pateat; ut proinde sanguinis circulatio, cui promovendæ respiratio destinatur, peragi perfectè possit absque eo quod sanguis e dextero cordis ventriculo in pulmones delatus, ex ipsis exprimatur, atque in sinistrum cordis sinum deferatur inde per singulas corporis partes perenni motu circumferendus. Quemadmodum certè in fœtu, dum adhuc in matris utero continetur, sanguinis circulatio sinè ullâ respiratione, hujus foraminis ovalis ope, peragitur, quod nato jam fœtu, atque aëre, simulque sanguine in pulmones illabente in omnibus ferè animalibus, si amphibia exceperis, sensim obtui ita solet, ut eadem sanguinis circulatio sinè pulmonibus, atque respiratione salvari non possit.

(a) *Penet. de aer. & alimen. defec. c. 10.*

C A P. VII.

*De musculorum structurâ, & motu;
sive de motu animalium,*

I.



Ulcherrimæ, & elegantes illæ corporis humani partes, quas hætenus enumeravimus, prorsus torperent, variisque motibus, & effectibus peragendis impares forent, nisi subinde contrahi, moverique possent; quemadmodum sanè non elegans adeo, & admirabilis animalium vita videretur, nisi variis illa, mirisque motibus partim naturâ ipsâ duce, partim sponte quadam impellerentur. De musculis itaque quos *instrumenta motûs* vocat Galenus, ac de vi musculorum motrice hoc loco dicendum est, ut exinde plurimus iis splendor accedat, quæ de variis motuum generibus paullo inferius explicaturi sumus.

II. Musculus itaque est corpus carneis fibris, nervis, arteriis, venulisque compositum, tenuique membranâ vestitum, quod cum decorati muris speciem exhibeat, *musculi* nomen obtinuit. Tres ab Anatomicis in illo partes distingui solent *caput*, *venter*, & *cauda*. Caput est illa musculi pars, versùs quam musculus ipse contrahitur, sive ad quam os musculo contractum accedit; unicumque in omnibus ferè musculis observatur, nisi quod aliqui duplex, aut triplex caput habent, unde *tricipites*, *bicipites* appellantur. Cauda musculi

cui est altera pars extrema, quæ in os movendum inferitur, ipsique adhæret. Intermedia verò, crassiorque musculi substantia, quæ ex laxioribus, spongiosisque carneis fibris composita, venter, aut caro vocatur; quæ si unicâ membranâ vestiatur, atque in unicum tendinem definat, *simplicem* musculum componere dicitur; compositum verò, si varias in partes divisa, quarum singulæ propriâ membranâ vestiuntur, in plures etiam tendines abeat. Sic BC * est carnea fibra, cujus extremitates A B, C D exiliores sunt. Plures ejusmodi fibræ simul conjunctæ musculum AB * componunt, cujus caput erit in A, cauda in B; sicuti alterius musculi ABC * caput erit in A, venter in B, cauda in C.

III. Ut ejusmodi verò musculorum partes, & usus clariùs intelligatur observasse juverit carneas fibras, quibus musculus ipse veluti filis parallelis componitur, in medio crassiores, spongiosas, plurimisque vesiculis refertas esse, in utrâque tamen extremitate longè graciliores, molliores, ac teneriores; unde si ejusmodi fibræ congerantur, illarum congeries in medio latior, & inflatior, in extremis gracilior esse debet, ut in fig. III. clarè conspiciatur, ubi observari etiam poterit musculorum fibras rhomboidem, sive obliquum parallelogrammum componere, carneas nimirum fibras obliquos angulos cum tendinibus efficere. Omnis itaque musculorum actio, vel in variis corporis motibus peragendis utilitas in hoc uno consistit, quod subinde inflatur musculus, ac intumescit, auctâ nimirum ipsius latitudine,
Tom. IV. K lon-

* Fig. III. * Fig. IV. * Fig. V. & VI.

longitudo decreſcit, unde illud os, cui muſculi cauda inſerta, arctèque connexa fuerit, ad os illud contrahitur, vel accedit, cui muſculi caput adhæret, ut pro variâ muſculorum directione, variisq; tendinibus, quibus oſſi alligantur, varia oſſis contractio, variuſque membrorum motus oriatur. Inquirenda ſolùm eſt cauſa, quâ muſculus inſletur, contrahatur, ac intumeſcat, in quâ definiendâ, vel explicandâ illuſtiores etiam Philoſophi plurimùm diſſident.

IV. Steno, qui omnium primus *Myologiam*, ſive muſculorum cognitionem Florentiæ illuſtravit, exiſtimat inflari muſculos ſolâ fibrarum inflexione, ut in flaccido, laxatoque muſculo carneæ fibræ cum tendinibus acutos angulos efficiunt, ut in fig. IV. conſpicitur, ſed ubi carneæ fibræ majores, aut rectos angulos, cum tendinibus componant, atque muſculus ipſe ex rhomboide rectanguli figuram acquirat, longitudo muſculi contrahatur, ac ipſe intumeſcat. Sed explicandum adhuc eximio Auctori ſupererat, quâ vi, ſive cauſâ fibrarum anguli varientur, cur etiam muſculus, dum contrahitur, durior, atque denſior evadat, quod ſinè ſubtilis cujuſdam ſubſtantiæ affluxu fieri certè non poteſt.

V. Communis eſt itaque opinio muſculos inflari, vel contrahi, quòd inter carneas illorum fibras, fluidæ cujuſdam, tenuiſſimæque ſubſtantiæ partes ingrediantur, quæ fibras iſſas diſtrahant, ſive dilatent, ſimulque contrahant; quemadmodum ferè tenuiſſimæ aquæ partes, inter innumera interſtitia filorum, quibus funis componitur, ſenſim ſubeunt, ejuſdem funis craſſitiem augment, ſimulque longitudinem

dinem contrahunt , ut suspensum etiam pondus attollant .

VI. Cartesius enim existimat solos animales spiritus , quos a puriori sanguinis parte in cerebro separari , tenuissimosque nervorum tubulos subire jam diximus , ad varios musculorum motus sufficere ; non quodd in singulis musculorum motibus uberior spirituum copia a cerebro in musculos deferatur , sed solum , quodd spiritus cerebro contenti spiritus alios nervis inclusos excitent , ac impellant , unde musculorum inflatio , sive contractio , oriatur ; quemadmodum ferè in hydraulicis machinis fieri conspiciamus , ut si illarum tubuli aqua repleti jam fuerint , ubi *epistomium* , orificium nempe , in quo aqua ex conceptaculo , sive *castello* in tubulos ipsos illabitur , aperiatur , in extremis tubi partibus aqua repente exilit ; variosque motus ex variâ machinarum figurâ , vel ordine peragit . Voluntas itaque , seu quidquid id est , quod spontaneis motibus in homine peragendis præest , cum musculus aliquem contrahere , digitumque ex. gr. movere velit , animales spiritus cerebro inclusos ad certum nervorum orificium dirigit , ac impellit , qui repente spiritus illos impellunt , qui in nervo , vel musculo reperiuntur ; unde spirituum in musculis agitatio , distractio , metusque musculi oriatur .

VII. Borellius tamen , Villisus , aliique innumeri præter ejusmodi spiritus , qui a cerebro in nervos celerrimè diffundantur , subtiliorem aliam , tenuissimamque substantiam requirunt , quæ in musculis ipsis perenniter conservetur , ibique spiritibus a cerebro delatis permixta ferveat , agitetur , ac intumescat , un-

de nervorum inflatio, atque contractio deducatur. Quis tamen, qualisque sit ejusmodi liquor, aut nerveus ille succus antea memoratus, an lympa, an aliud fermenti genus, definiri vix potest. Id unum certò conicere, vel arbitrari possumus ad musculorum contractionem sanguinem etiam requiri; quemadmodum enim ligato nervo motus omnis in musculo impeditur, ita quoque, si muscoli arteria constringatur, novique sanguinis in musculum illapsus impediatur, nullus in musculo motus haberi poterit, ideoque ad muscoli contractionem; corporisque motum spiritus animales ex cerebro, simulque sanguis ex arteriis requiretur.

VIII. Hac itaque lege, vel ordine muscoli contractio fieri videtur, ut cum aliquam corporis partem movere volumus, spiritus animales ex cerebro per nervos ad musculum ipsum dirigantur, ubi nerveas fibras inflectant, paululumque distrahant, sanguis autem ex arteriis expressus inter ejusmodi spongiosa fibrarum interstitia insinuatür, quibus magis etiam carneæ musculorum fibræ dilatantur, magisque musculus inflatur; quod cum fieri non possit, nisi musculus ipse modo superius exposito contrahatur, hac ipsâ contractione caudam, partemve mobilem ossi movendo affixam, ad immobilem partem, vel caput adducet, unde motus in corpore producetür.

VIII. Atque in ipsâ quidem muscoli contractione duo sunt, quæ mirari plurimum possumus, incredibilis nempe celeritas, quâ juxta voluntatis arbitrium quâcumque libuerit in partem repente inflectimus; atque infinita prope modum vis illa, quâ tenui, vel exiguo muscu-

tulo gravissimum pondus impellimus, aut sustinemus. Certè Borellius, qui utramque vim juxta Mechanicæ leges accuratissimè exposuit, constanter asserit, quod musculus cordis tantam vim exerit, quæ ponderi 3000. librarum sustinendo par foret (a), quemadmodum maxillares musculi 534. librarum pondus sustinerent (b). Celeritas itaque ex tenuissimâ, fluidissimâque spirituum substantiâ oriri debet, quæ per nervorum tubulos celerrimè ignis instar excurrit; cum præsertim in Cartesii sententiâ spiritus a cerebro ad musculum ipsum ferri non debeant, sed solùm spiritus in nervi orificio positos excitare, & impellere, ut illi motum reliquis spiritibus in nervo dispositis successivè communicent, ut inferiùs explicabitur cum de sensatione, ac luce differemus. Maxima verò spirituum vis igneæ flammæ comparari meritò poterit, quâ vehementi quodam impetu corpora dispelluntur, aut etiam aqueis particulis, quæ funis interstitia subeuntes illius fibras vehementer adeo distrahunt, funemque contrahunt, ut appensum pondus attollant.

X. Non omnes tamen musculi eandem vim exerunt, sed pro variâ fibrarum texturâ, variâ positione, variisque spiritibus, quibus intumescunt, varios, validioresque motus efficiunt; cùmque incredibilis ferè sit in humano corpore musculorum numerus, ut quidam 434. alii 529. musculos enumerent, mirum esse non debet, si tot, variique motus in humano corpore peragantur. Quæ verò de homine dicta sunt, in cæteris etiam animalium generibus

K 3

in-

(a) *De motu an. par. II. pr. 67.* (b) *Ibi p. I. pr. 88.*

intelligi debent, in quibus eadem sanguinis natura, eademque spirituum diffusio, musculorum textura, idemque motus conspicitur. Quin etiam in insectis, & piscibus ipsis eâdem lege, vel ordine motus peragi debent; quamvis etenim verò sanguine careant, humorem tamen habent sanguini analogum, qui sanguinis instar, totum corpus circumbeat, ex quo puriores, subtilioresque partes in aliquâ corporis parte veluti cerebro secernantur, quo carneæ fibræ, quos meritò musculos dixeris, intumescant, & contrahantur. Quandoquidem tamen admirabilis adeo varietas in spontaneis animalium motibus observatur, juverit illam hic uberius exponere, illorumque leges breviter quidem, sed accuratè complecti.

XI. Pro variis itaque animalium generibus, quatuor motuum genera satis accomodè distinguuntur, *incessus* nempe, *natatus*, *volatus*, *reptatus*; quorum primus bipedibus omnibus, & quadrupedibus, alter piscibus, tertius avibus, ultimus denique insectis conveniat, & si plura sint animalia, quæ duplici, & triplici quoque motûs genere moveantur.

Incessus homini, & quadrupedibus convenit, tumque incedere dicuntur, cum alternè ita pedes promoveant, ut spatium aliquod successivè percurrant. Huic motui peragendo non modò cruris, sed pedis etiam, digitorumque flexibilitas plurimùm confert, cum experientiâ ipsâ, clarissimè appareat, quod ubi contracto, inflexoque crure dextrum pedem extendimus, atque in anteriora projicimus, interim planta sinistri pedis inflectitur, totamque corporis machinam ipsius digitis sustinemus. Hac autem clarissimâ, constantique lege in-

nobis incessus efficitur, ut interim linea directionis, quæ nimirum corporis nostri centrum gravitatis pubi finitimum cursu centro Terræ conjungit, siue quæ pubi in Telluris superficiem perpendiculariter incidit, intra pedes, aut intra pedem cadat, alioquin ruina corpori immineret; unde plurima phænomena explicari poterunt, quæ in funambulis, corruentibus, pondus aliquod ferentibus hominibus observantur.

Hæc eadem naturæ lex in quadrupedibus observari debet, unde illa non alternis solum pedibus insistere debent, cum incedunt, ut vulgaris est hominum opinio, ita ut dextro anteriori, sinistroque posteriori pede insistentes, sinistram anteriorem, atque dextram posteriorem promoveant; deinde verò vicissim sinistro anteriori, dextroque posteriori insistentes anteriorem dextrum, atque sinistram posteriorem impellant. Quemadmodum enim accuratissimè demonstravit Borellius, si alternis tantum pedibus insisterent, linea directionis extra filorum angustum nempe tramitem inter alternos pedes Telluri defixos extensum caderet, unde bruta corruerent; quod clariùs intelligi poterit, si ligneus, aut ferreus equus alternis tantum pedibus insistere concipiatur; hic enim facillime alterutram in partem ruet; quanto ergo faciliùs equus corruet, dum pondere, aut instabili, & irrequietâ musculorum actione hinc inde fluctuaret? Quamvis itaque id oculos fugiat, tribus semper pedibus bruta insistant, unumque ex alternis priùs ita promovent; ut alter nullo temporis intervallo sequatur.

XII. Volucres etiam omnes iisdem legibus,

eâdemque de causâ incedere conspiciuntur, possuntque bipedibus, & homini comparari. Proprius tamen, atque frequentior illorum motus *volatus* dicitur, unde etiam *volucres* appellantur. Ad volatum verò non modò alæ pennis instructæ, & lateribus infixæ requiruntur, sed etiam muscoli pectorales agitandis alis idonei; unde in volucris maximos, pro ratione corporis, musculos pectori hærentes conspiciamus, qui cùm pectori humano minimè adhæreant, optimè Borellius ostendit (a), quod, licèt alæ humano pectori adderentur, ipsas tamen agitare, sive volare non posset. Admirabilis porrò est alarum structura, sive varios plumarum, graciliorumque, crassiorumque ordines sibi succedentes, unumque alteri superimpositum; sive excavatos illarum calamos, unde levitas, simulque major resistentia oritur; sive si flexibiles plurimùm lacinias, aptè tamen ansulis quibusdam, hamulisque conjunctas consideres. Cum aves itaque sursum rectà volare velint, elevatis alis subjectum aërem verberant, & comprimunt, qui vim elasticam exercens alas ipsas, volucrisque corpus sursum impellit, tantòque faciliùs, quantò latiores alæ, levius volucris corpus, validiorque aëris pressio fuerit. Quod si horizontaliter excurrere velint, anteriori alarum parte, quæ veluti excavata conspicitur, posteriorem aërem, horizontaliter impellunt, ideoque ab aëre resiliente in oppositam partem, hoc est anteriorem impelluntur. Ubi denique in dexteram, sive sinistram declinare velint, caudâ veluti navis gubernaculo utuntur, quâ nimirum variè inclina-

na-

(a) De motu anim. par. I. pr.

natâ, aërique expositâ, sicuti demissâ, aut elevatâ alâ, directionem acquirunt; hac universalis, constantique lege, ut volucris corpus ubi aliquam aëris partem percusserit, in oppositam semper dirigatur, impellaturque.

XIII. Avium volatui, comparari facile poterit piscium *natatus*, ut quemadmodum pisces in aquâ natant, ita volucres aëri insidere, vel innatare videantur; sive quemadmodum volucres in aëre, ita pisces in aquâ volatu quodam excurrant; cum præsertim, & alas pectori infixas, & caudam habeant, quibus avium instar moveantur. Hoc insigne tamen, sed olim incognitum, discrimen inter avium, pisciumque pennas observatur, quod in istis corpori promovendo minimè inserviunt, unde resectis illis pisces, ut antea, moveri pergunt; sed solum corpori sustinendo, ne hinc inde deflectat.

Perpendicularis itaque motus, quo pisces in aquâ sursum ascendere, sive descendere conspiciuntur, ex vesiculâ quadam pendere demonstratur, quæ in piscium pectore posita, modò inflari, modò detumescere, majorem nempe, minoremque aëris copiam recipere solet; ut si majori aëris copiâ turgescat, ex notissimis gravitatis legibus piscium corpus aquâ levius efficiat; si verò minorem aërem contineat, piscis molem aquâ graviolem, plerumque etiam aquæ prorsus æqualem efficiat. Compresâ itaque, ope fibrarum, muscutorumque, vesicâ, piscis aquâ gravior efficitur, suâque gravitate deorsum ruit; dilatatâ verò, levior aquâ ipsâ redditur, atque superius ascendit, unde
pi.

piscis ille, cui in machinâ pneumaticâ, exhausto aëre, vesica disrupta fuerat, horizontaliter quidem in piscinæ fundo moveri, sursum vero ascendere non poterat, quodd inspirato aëre, vesicam tumefacere, corpus levius efficere, sursumque impellere non posset. Horizontalis verò, vel lateralis piscium motus, non ab alis, aut pennis oritur, ut plures existimant, sed a solâ caudâ repeti debet, quæ veluti remus, vel gubernaculum in navigio, dum hinc inde inflectitur, oppositamque aquam premit, in oppositam partem corpus impellit: hinc fortioribus musculis piscium cauda flectitur, resectâque caudâ ægrè piscis promovetur.

XIIII. Ultima denique motûs species, sive *reptatus*, iis animalium generibus convenit, quæ pedibus carent, humique serpunt, ventre nimirum terram radunt, ut *vipera*, *lumbrici*, & omnia ferè insectorum genera. Eiusmodi verò motus pluribus, variisque modis fieri conspicitur. Quædam nimirum reptilia, ut *viperæ*, capite veluti terræ defixo posteriores corporis partes contrahunt, tortuosèque disponunt, ut cauda capiti opera maxime accedat, ut fig. VII. conspicitur; tum caudâ Tellurem prementes, vel caudâ velut immobili, caput, anterioresque corporis partes extendunt, sive antrorsum impellunt; interdum tamen caudâ terræ oppositâ, corporisque fibris contractis, vel incurvato corpore, dum illæ vim elasticam exercent corpus extendunt, saltuque quodam impellunt. Utrique reptatui affinis est ille motus, quo *equi*, *canes*, &c. celerrimè excurrunt; anterioribus enim pedibus insistentes totum corpus contrahunt, posterioresque pedes ad anteriores adducunt; tum successivè posterioribus ipsis innixi, ante-

anteriores pedes, totamque corporis molem extendunt, atque alternâ veluti corporis contractione, vel extensione spatium peragendum citissimè excurrunt. Affinis est etiam reptatus ille, qui in lumbricis, aliisque vermibus observatur, qui cum anteriori sui parte, vel capite Terræ adhæserint, ita paulatim posteriores corporis partes contrahunt, ut corrugatis, adductisque partibus intumescant, minoremque longitudinem occupent; tum caudæ insistentes paulatim detumescunt anterioribus successivè promotis. Verùm hæc omnia, quæ de variis motuum generibus obiter explicata sunt, clariùs, & illustriùs adhuc intelligi certè poterunt, si motus ipsi in animalibus observentur. Facilius nimirum elegantissima, & admirabilis ars illa deprehendetur, quâ motus ejusmodi peragantur, atque illorum causa, & origo ex legibus antea constitutis inferri faciliè poterit.

C A P. VIII.

De nutritione, augmentatione, fame, & siti Animalium.

I.



Uæ de nutritione, augmentatione, aliisque affectibus animalium hoc Capite dicturi sumus clariora, intellectuque faciliora fore confidimus, non modò quòd nutritionis usus, & organa eo quoque loco exposita fuerint, ubi de Plantarum nutritione loqueremur; verùm, etiam, quòd nutritionis organa superioribus
etiam

etiam Capitibus explicata jam fuerint. Quemadmodum itaque in plantis subtiliores, purioresque partes, quæ aut ex interno partium calore, & motu, aut Solis, & exterioris aëris vi consumuntur, sensimque avolant, succo, vel humore nutritio, qui a radicibus per tenuissimas plantæ fibras ascendat, totamque plantæ substantiam circumeat, separari debuit; itaque quoque corporis humani partes, animales spiritus, sanguis, & humores alii, qui sanguini permiscantur, perenniter avolant, ac in variis motibus peragendis insumuntur, ideoque novarum partium accessu refici, restaurarique debent. Sanctorius (a) certè demonstrat, quod si in ventriculum hominis partim ex cibo, partim ex potu octo libræ ingerantur, quinque saltèm ex ipsis per *insensibilem transpirationem*, per tenuissimos nimirum cutis poros avolant, & consumuntur. Hinc optimo Naturæ consilio factum conspiciamus, ut sicuti plantæ radicibus humorem attrahunt, quem in fibris percolatum, perfectumque in ramos omnes distribuunt; ita animalia cibum ore receptum, in ventriculo digestum in singulas corporis partes diffundunt. Id verò, quæ serie, vel ordine peragatur breviter hîc exponemus.

II. Cibus itaque ore receptus, dentibus primum anterioribus, quos ob acumen *incisores* vocamus, frangitur; tum molaribus, vel maxillaribus, quorum latior, & complanata ferè superficies est, contunditur, ut acri, salivalli humori, qui interim ex glandulis per palatum dispersis exprimitur, permixtus per linguam

(a) *De Stat. Medic. sect. I. aphor. 6. Vid. Borrell. de motu anim. par. II. pr. 188.*

guam in æsophagum, ipsique subjectum ventriculum deglutiatur. Ibi in minutiores adhuc partes conciditur, permiscetur, alteratur, atque digeritur, partim quidem ex interno viscerum calore, partim ex peristaltico ventriculi motu, partim denique ex acribus, acidisque fermentis, quæ ex interioribus ventriculi glandulis exprimuntur. Ex calore quidem, quo variæ ciborum partes ita agitantur, ac permiscantur, ut hoc perenni motu subtiliores, minutioresque reddantur; unde calidi potus cibus facilius digerendis adhibentur. Alternus etiam motus, quo ventriculi fibræ contrahuntur, ciborum substantiæ ipsi ventriculo inclusæ facilius triturandæ, comminuendæque plurimum conducit, ut in volucris illis observatur, quæ integra, neque concisa tritici, fabarumque grana deglutiunt. Cum tamen in plerisque animalibus, neque perennis ille ventriculi motus, neque sensibilis calor observetur, neque tandem hoc solo calore cibi digeri, in novamque substantiam facessere possent, videantur, præcipua digestionis causa, & origo ab acidis, acribusque particulis, quæ in interiori ventriculi membranâ exoriuntur, repeti solet, quibus fluidæ ciborum substantiæ permixtis illæ fervere, concidi, agitarique debent. Ubi verò cibus ita digestus fuerit, ex ventriculo per orificium, quod *pylorum* vocant, in intestina illabitur, ubi non solum succo pancreatico, qui nimirum in *pancreatis* glandulâ ventriculo subjectâ a sanguine secernitur, & per *Voirtzangi* canalem ingreditur, sed etiam *bili*, quæ in hepate secreta a sanguine, & in cistulam felleam collecta per porum biliosum in duodenum penetrat, conversus per-

mi-

miscetur, atque in chilum, albicantem nempe, lacteumque succum convertitur, cùmque eadem intestinorum membrana peristaltico, vel alterno motu contrahatur, dilateturque, succus, aut humor ille ex ventriculo egressus ita comprimetur, ut. puriores, subtilioresque illius partes per poros quosdam, seu foraminula, quæ in interiori intestinorum, præsertim verò jejuni, superficie reperiuntur, vi adigitur, & illabatur, atque per venulas quasdam, quæ cum albicanti chylo trajiciendo deserviant, *lactea* vocantur, primumque a Gaspare Asellio sunt observatæ, ad mesenterium deducitur, inde per alium canalem ad *Pecqueti receptaculum*, inde per thoraccium ductum ad collum, ascendit, ubi in *jugularem*, vel *subclaviam*, sensimque in cavam venam illabatur, a quâ sanguini permixtus in dextrum cordis ventriculum defertur, unde per venam arteriosam, ad pulmones delatus, ex pulmonibus ipsis per arteriam venosam ad sinistram cordis sinum revertitur, ut inde per aortam ad singulas corporis partes unâ cum venis, & arteriis uberimè diffundatur. Crassior itaque cibi pars in intestinis relicta, ubi varias ambages, intestinorumque gyros emensa fuerit, per alvum egeritur. Purior vero, atque subtilior post varias circulationes, in sanguinem demum conversa nutriendis, reficiendisque corporis partibus destinatur.

III. Id verò, quâ lege, vel arte fiat definiri vix poterit. Hoc unum conjici, vel existimari poterit, quod ubi sanguis celeri motu per arterias diffundatur, ac alternâ, seu peristalticâ ipsorum contractione comprimatur, puriores illius partes arteriarum porulos penetrent,

trent, & ex arteriis inter carneas fibras arteriis circumpositas ingrediantur, ipsisque adhæreant, unde fibrarum ipsarum longitudinem augeant, sive illarum partes reparent, quæ prope cutim in fibrarum extremitatibus avolverint. Quod si purior, & uberior sit ille sanguis, qui ex arteriis in carneas fibras penetrat, ipsisque adhæret, tum non pristinæ solum, amissæque partes reparari poterunt, sed novæ etiam partes acquiri, ut animal non modò nutrirî, sed augeri quoque, vel augmentari dicatur. Huic partium nutritioni, vel sanguini in novas corporis partes convertendo plurimum conferre videntur serosæ particulæ, quæ in sanguine continentur; illæ nimirum facîle concrecere, sive conglutinari videntur, ideoque cum ab aliis sanguinis partibus secernuntur, facîle fibris carneis adhærere, concrecere, carnemque formare poterunt. Quandoquidem verò plurimas, dissimilesque partes in sanguine reperiri jam diximus, & ex variâ illarum figurâ, texturâ, vel ordine, varias etiam substantiæ corporeæ partes formari posse putandum est, quædam sanguinis particulæ nervis non ossibus, aliæ tendinibus, aliæ carni, aliæ aliis partibus componendis aptiores erunt, ideoque dum per ossa, nervos, & carnes ex arteriis diffunduntur, sive dum ex arteriarum poris in os, tendinem, carnem accefferint, pro variâ illarum figurâ, vel aptitudine congruæ parti adhærebunt, nutriendoque nervo, vel carni applicabuntur.

IV. Exinde verò facîle intelligi, vel explicari poterit unde *fames*, aut *sitis* oriatur. Cùm etenim ex mediâ ventriculi membranâ acidus, & acris ille succus exprimatur, quo cibos ven-

tri-

triculo ingressos alterari, comminui, sac fermentari jam diximus, ubi nulla, aut exigua, cibi copia in ventriculo reperiatur, acres illæ humoris particulæ fibras ipsas ventriculi continuè vellicant, gravemque doloris sensum in illis excitant, qui *fames* vocatur, eò gravio-rem, quò acriores sint, uberioresque succi particulæ, minorque cibi substantia, quæ in ventriculo reperiatur, ut in canibus, lupis, aliisque Animalium generibus observatur. Quin etiam motus ipse, quo intestinorum, atque ventriculi membrana contrahitur, si illorum cavitatem inanem reperiatur, molestam famis sensationem, sive dolorem efficiet; cùmque similiter perennis ferè sit ille calor, qui in ventriculo, aliisque partibus reperitur, quo humidiores partes sensim avolant, & consumuntur, cùmque plurimæ salium particulæ tum in palato, & faucibus, tum etiam in ventriculo reperiuntur, si illæ uberiori aquæ, vel alterius liquoris copiâ dilutæ, permixtæ fuerint, nullum in ventriculo, faucibusque sensum efficient; at si liquor ille, vel potus antea receptus perenni calore consumptus fuerit, tunc acres, penetrantesque salis particulæ ventriculi fibras vellicant, unde dolor ille, vel sensus excitatur, quem *sitim* dicimus. Hinc illa ciborum, potuumque genera, in quibus uberior est salium copia, vehementiorem sitim excitant, quæ uberiori aquæ potu extinguatur, dum partes illæ salis aquâ dilutæ dissipentur. Parum verò interest, atque perinde est, an cibus calidus, aut frigidus; siccus, aut humidus sit, potusque frigidus an calidus hauriatur; extinguendæ enim siti, famique sedandæ utrumque cibi, potusque genus par esse experimur; unde prorsus immerito

ritò Aristoteles ait *famem esse appetentiam calidi, & sicci, sitim verò appetentiam frigidi, & humidi (a).*

V. Quemadmodum verò fames, & sitis ex acidis, acris, salinisque particulis oriuntur, quæ carneas ventriculi fibras percellunt, ita etiam plurimæ ægritudines aliæ ex variis humoribus, qui in humano corpore reperiuntur, oriri solent. Sic nimia, pravæque bilis, pituitæ, melancholiæ substantiâ affectus aliqui, vel ægritudines excitantur, quemadmodum ex sanguinis temperie universi ferè corporis temperies, aut sanitas dependet.

Sic in *delirio* humana cognitio prorsus turbatur, ut varia, totoque cœlo dissidentia vel imaginando, vel loquendo simul conjungat, quod in ebrietate quoque fieri conspiciamus. Id autem oritur ex vehementiori, turbidiori-que sanguinis motu, quo cerebrum comprimitur, ut inde spiritus animales ad varias, dissidentesque imagines simul excitandas impellantur.

Apoplexia a lentiori, pinguiori, tenaciorique sanguine oritur, quo ita cerebrum comprimitur, ut nervorum orificia obstruat, ideoque spiritibus animalibus per nervos ipsos celerrimè diffundendis ingressum prohibeat; cùmque nervorum paria, sive conjugationes hinc inde ad dextram, sinistramque cerebri partem dividantur, poterit alterutra corporis pars ita lædi, ut nullus motus in illâ supersit, sicuti contractis aliquando nervulis nasus, & os diducitur, cùm altera tamen pars incolumis perseveret. Quod si spiritus animales in cerebro temerè,

Tom. IV.

L

per-

perturbatèque, ac in gyrum ferè agitentur, ita nervulos oculis destinatos afficient, ac si objectis in gyrum circumactis afficerentur.

Huic affinis est *epilepsia*, vel *morbis caducus*, cum nempe depravato sanguine torpentes habitus ex illo separantur, qui nervorum orificia obstruant, motumque in musculis, vel corpore impediunt: cùmque vel vitiosa, vel torpens illa materia sensim separetur, ac fermentetur, epilepsia quoque certâ veluti periodo post aliquod temporis spatium redit.

Cephalalgia, vel capitis dolor a spiritibus oritur, qui in oppositas partes temere impulsæ cerebri partes disiciunt; unde etiam ventriculi repletio, sive nimia ciborum ingestio capiti gravedinem, obtusumque veluti dolorem conciliat.

Pleuritis est inflammatio *pleura*, membranæ nimirum, quæ interiorem thoracis superficiem vestit, cum nempe sanguis in illius arteriolas effusus per venulas ob prævium frigus violenter contractas rite exsugit, vel traduci non possit, ibi incalescit, & inflammatur.

VI. Communior tamen, atque frequentior ægritudo est *febris*, quæ ab humore quodam producitur, qui cùm sensim in mesenterio, vel in aliâ hætenus occultâ corporis parte collectus, exinde per venas sanguini permiscetur, atque ad cor defertur, ejus fibras acerbis, mordacibusque particulis vellicat, unde frequentior, & gravior motus in corde, arteriâ, vel sanguine, vigilia in cerebro, dolor in renibus oritur. Quod si fortasse humoris illius particulæ crassiores, ramosioresque sint, aut minùs aptæ ad motum, sanguinis celeritatem, & calorem impediunt, unde lentior, sive debilior

biliior pulsus, tremor, & frigus in corpore percipietur; deinde verò, ubi motu comminutæ fuerint, celerius fluent, unde frequentior, & gravior pulsus, majorque calor, & plerumque sudor orietur. Quemadmodum si hoc turbato sanguinis motu cerebrum diu concutiat, sequetur *delirium*. Porro cùm humor ille pro variâ corporis temperie, vel sanguinis conditione citius, aut serius intra unicum, tres, vel quatuor dies reparatur, ac fermentetur, *quotidianam* febrim, sive *tertianam*, aut *quartanam* efficiet.

VII Ejusmodi verò morbis medemur, ubi noxium humorem oppositis medicamentis temperamus, aut ex corpore educimus, quod Medici Norunt, & uberrimè declarant. Id unum nobis addere hic liceat, conservandæ, reparandæque salutis plurimùm conferre aëris salubritatem, sanguini nimirum subtiliori, crassiorique accommodatam aëris crassitiem, aut raritatem; cibi delectum, ac temperantiam; quietem, aut somnum, quo spiritus vigiliæ tempore absumpti reparentur; affectuum denique moderationem, quâ animus tranquillâ, & jucundâ quadam hilaritate motus suos, operationesque peragat; quæ certè singula non potius ex Medicorum consiliis, quàm seriâ quâdam observatione, vel curâ eligenda, vel adhibenda sunt, ut præclare inquit Cicero, *Sustentatur valetudo notitiâ sui corporis, & observatione eorum, qua aut prodesse, aut obesse solent, continentiam in omni vitâ, atque cultus corporis tuendi causa (a).*

VII. Hæc ipsa tamen corporis tuendi ratio,

L 2

vitæ-

(a) *Offic. IV.*


vitæque conservandæ sollicitudo veluti continua quædam ægritudo censerî poterit, quâ plures in ciborum delectu, aëris inspirandi temperie, aliisque sexcentis ejusmodi remediis religiosè inquirendis miserrimè torquentur. Mediocre[m] itaque horum curam adhibendam esse crediderim; etenim si aut studiorum diligentia, aut honesta humanæ vitæ officia aliquod temporis spatium, ætati nostræ fortasse detrahant, non erit cur morientes duorum, vel quinque annorum jacturam doleamus; nobisque gravior fortasse senectus, & mors obreperet, si diutiùs, & anxie vitam egissemus, quàm si nos liberiori, jucundiorique vitâ communi, nec evitando fato comparassemus; quemadmodum certè, ut opinor, Theophrastus ille, qui octogenario major moriens Naturam quærebatur cornicibus tercentos, paucos hominibus vitæ annos concessisse (a), si vel centesimum, atque millesimum annum attigisset, graviùs tamen, conqueri potuisset. Verùm hæc alias in Morali, cum de beatitudine differetur.



(a) *Latr. V. seg. 40.*

CAP. IX.

*De ortu, sive generatione
animalium.*

I.  A communis est omnium animalium conditio, ut variis egritudinibus affecta modò citius, modò serius intereant, illorumque anima effàto jam corpore in auras, flammæ languentis intar, evanescat. Hinc admirabili Naturæ consilio factum conspiciamus, ut nova semper ex veteribus animalibus series oriatur, eademque illorum varietas conservetur. Illud itaque hoc loco explicandum nobis occurrit quâ lege, vel ordine novum animal producat; cùmque Peripatetici existiment animalia quædam ex solâ putrescentis corporis substantiâ sponte oriri, cùm cætera ex ovo, atque a parentibus producantur, exponenda primùm ac refellenda detur illorum opinio, ut admirabilis deinde, ac divina fere generationis causa, series, & origo ostendatur.

II. Vulgaris est itaque opinio, quod animalia quædam, atque illa præsertim, quæ minori organorum numero, graciliori corpore obscuriori, debiliorique motu, vel animâ prædita sunt, non ab animalibus aliis, non a semine, aut ovo, sed a solâ materiæ, cui fortasse adhæserint, corruptione, vel putrefactione oriuntur; ut aliquæ nimirum putrescentis materiæ partes in novum animal convertantur. Sic vermes a caseo, muscas, & formicas a

terrâ , fucos ex asino , vespas ex equo apes ex tauro , tineas , sive teredines ex panno , ex aliis alia insecta prodire plurimi existimant , ut aliqua proinde generatio ex putri sit admit-tenda .

1. Et certè , inquiunt ipsi , quid clarius , aut illustrius esse unquam poterit , quàm animalia quædam ex putri oriri , cùm animalia pluri-ma iis in locis nasci manifestissimè videamus , ubi nulla semina , aut ova , sed sola putrescens materia reperitur ? Ex corrupto nimirum ca-seo , vel carne incredibilis vermium numerus erumpere solet , cùm tamen alii vermes in ca-seo minimè reperirentur . Sic ex corruptis , pu-trefactisque tauri visceribus apium examen pro-dire conspicitur , atque in exesis navium li-gnis marinam anatem oriri ferunt , quod in-numeris aliis exemplis probari posset .

2. Quid verò quod vermes , & animalia plu-rima in iis etiam locis oriuntur , in quibus nullus ovulis , aut vermibus aliis locus esse po-terat ? Sanguis e venâ nuperrimè eductus plu-rimis aliquando vermiculis refertus conspici-tur ; quemadmodum in hepate , aliisque visce-ribus aliquandò vermes reperiuntur , qui cùm viscerum membranam pervadere minimè pos-sint , in ipsis geniti ex corruptis sanguinis , viscerumque partibus censerì debent . Idque , ex vermibus etiam illis asserere oporteat , qui fructibus , plantisque infra corticem , atque in ipso ferè meditullio nascuntur , cùm neque ani-malia , neque illorum ova solidam plantæ sub-stantiam pervadere posse videantur .

3. Neque temere , & inconsultò hæc ani-malium , vel insectorum origo admitti , atque in rerum naturâ cognosci debet ; etenim non di-

divinæ modò artis præstantia sic effulget, quæ variis legibus animalia varia producit; verùm etiam providum Naturæ consilium conspicitur, quo insectorum generi conservando consuluit. Insecta nimirum, cùm plerumque humi serpant, aut in aëre evagentur, nimiam caloris, aut frigoris vi, sive pluviarum, hominum, aliorumque animalium injuriâ facile corrumpuntur, ac intereunt; ideoque, ne illorum fortasse genus interiret, nova insecta ex solâ putrescente materiâ oriri voluit: sicuti eadem ferè de causâ plantas, fruticesque plurimos ex solâ putrescentis terræ substantiâ produci jussit.

4. Quemadmodum itaque divinus Artifex in ipsâ creationis, vel Mundi origine hanc plasticam, seu formatricem vim terræ concessit, ut *germinaret herbam juxta genus suum*, ita quoque terræ, vel aquæ tribuit, ut animalia producerent; ait enim *producant aqua reptila, &c. producat Terra animam viventem in genere suo, & reptilia, & bestias terra secundum species suas* (a); hac itaque terræ virtute, solis calore, siderumque influxibus nova animalium productio promovetur, ac admirabilis illorum varietas veteribus sensim corruptis mirificè conservatur.

III. Hæc Aristoteles, & qui Aristotele, vel potiùs Arabibus, & Galenistis ducibus spontaneam ex putrescente materiâ generationem admittunt. Quorum quidem pace ego dixerim non absurdiorē aliam in totâ Peripateticorum doctrinâ, portentoque simillimam opinionem videri posse. Quemadmodum itaque o-

L 4

sten-

(a) *Gen. c. 1. vers. ...*

stendimus plantas omnes ex semine, nullam verò ex putrescente materiâ oriri posse, itaque quoque nunc dicimus nullum omnino animal ex putri, sed animalia singula ex ovo, vel semine oriri debere.

1. Quis etenim incredibilem, ac admirabilem illam partium varietatem, structuram, & ordinem, quo inter se mirè connectuntur, variosque motus peragunt, ut paullo superiùs ostendimus, ex solâ putrescentis materiæ agitatione temere, nullo consilio, nullâque lege, vel ordine oriri posse crediderit? Certè qui horologium aliquod variis rotis instructum ex solâ ramentorum ferri agitatione, sive ex ferreis particulis temere projectis, caloris vi, fiderumque viribus alteratis formari posse putaret, hunc delirum, mentisque impotem crederemus; quo itaque loco habendum esse censebimus, qui non horologium, quod longè facilius foret, sed animalculum, culicem, apem, formicam, in quibus immensa organorum varietas, & ordo conspicitur, ex perturbatâ, vel putrescentis materiæ motu produci posse putaret?

2. Quod si formica, vel apis ex putri oriri posset, singula quoque animalium genera produci possent; eadem quippe organorum varietas, admirabilis partium structura in apibus, quæ in volucris; eadem in pulice, quæ in elephante observatur; eò tamen nobilior, atque perfectior in pulice, quodd ipsa partium, corporisque tenuitas meliorem, sapientioremq; artificis industriam mirificè ostendat. Itaque, si insecta singula, ranas, lacertas, serpentes, pisces ex putrescenti materiâ generari Peripatetici existiment, quid non & canes,

OVES,

oves, tauros, & homines ipsos oriri posse arbitrentur?

3. Igitur, qui animalculum aliquod ex putrescente materiâ oriri posse crediderit, parum certè abest quin Mundum ipsum, singulasque corporum species ex fortuitâ, & perturbatâ, atomorum concursione fieri potuisse cum Epicuro concedat; cùm longè nimirum facilius sit atomos unâ complexas, atque conjunctas montem, aut templum, & Urbem, quàm plantam aliquam, aut animalculum efformare.

4. Deinde verò quis animam, motûsque principium, quod ab ipsâ corporis structurâ distinctum esse Peripatetici existimant, ejusmodi infectis concedet? non terra certè, quæ omni animâ caret, effectumque seipsâ nobiliorem producere non potest; non Cœli, vel cœlestium corporum motus, ut Aristoteles existimavit; non ipsorum lumen, ut Alberto Magno videtur; non occultæ illorum virtutes, ut a plerisque Peripateticis affirmatur, cùm cœlestia corpora, nullâ verâ animâ donentur, soloque calore, vel luce, non influxibus aliis sublunaria corpora respiciant; non Angeli Cœlorum motibus assidentes, quos nullos esse jam diximus, aut ab hoc certè munere removendos ipsorum dignitas, & incorporea, vel immortalis natura demonstrat; ut illud etiam omitam nobiliora, & perfectiora animalcula ejusmodi videri opertere, si a Cœlo, vel ab Angelis, nobilioribus nimirum causis producerentur; nullâque ratione explicari posse cur ex putrescente materiâ nova semper ab antiquis diversa animalium genera minimè producantur, atque in ranis sponte productis eadem prorsus organorum varietas observetur, quæ in genitis reperitur?

IV. Quamvis itaque nullâ ratione intelligi, vel explicari posset quomodo pluribus in locis animalcula producerentur, nunquam tamen sponte, vel ex putrescentis materiæ substantiâ oriri illa posse putandum foret. Verum nihil est certè, quod in hac parte Peripateticos in absurdam adeo sententiam impellere potuerit.

1. Quod enim inquirunt animalcula pluribus in locis oriri, ubi ova, vel animalcula penetrare non possunt, ut in caseo, carnibusque, facillimè respondetur in iis quidem locis animalcula vetera non reperiri, observari tamen ova, quæ ab animalculis ipsis ibi reposita fuerint, quæ tenui calore excitata sensim augentur, atque in novum animal, modo inferius explicando, erumpunt. Malpighius certè, nuperrimèque Reditus insectorum originem inquirens innumeris experimentis ostendit, quod animalia singula ex ovis in carne, caseo, depositis oriuntur. Accepto siquidem carnis frustulo illud in duas partes divisit, quarum unam aëri expositam reliquit, ut super illam muscæ, & insecta varia liberè volitarent, suæque ova, microscopio presertim conspicua, relinquerent; aliam verò partem vasi repente inclusam ferico velo superextenso operuit. Utraque carnis pars alterari, seu putrescere visa est; hoc insigni tamen discrimine, quod in carne vasi inclusâ, veloque coopertâ nulli vermes oriri videbantur, muscarumque ova velo imposita conspiciebantur; plurimi tamen vermes in illâ carne producti sunt, quæ aëri exposita muscarum ova receperat. Id ipsum in caseo quoque, aliisque corporibus observatur, in quibus putrescentibus vermes, & animalcula produci solent.

2. Ne-

2. Neque in iis solùm locis, quæ aëri libero exposita sunt, ex depositis muscarum ovulis insecta oriuntur, sed in illis etiam, quæ recondita, vel impervia censerì solent. Ac primò, quod ad sanguinem, & viscera pertinet, experimento manifestissimè ostenditur, quod ore simul cum cibo plurima animalculorum ova in carne, fructibus, herbisque deposita, aut in aëre volitantia excipere, in ventriculū, pulmonesque traducere possumus, quæ si fortasse acribus ventriculi succis, aut agitatione corrupta non fuerint, in alia viscera transire, sanguini permisceri, interno calore foveri, in vermes denique converti poterunt. In fructibus verò, vel plantis infra corticem, ac fere in meditullio vermes oriuntur, quòd animalia quædam conservando generi intenta, ore, vel proposcidulâ, veluti terèbrâ quadam, corticem plantæ, cum tenerior fuerit, pervadant, atque in excavato alveolo ova recondant, quæ post aliquod tempotis spatium in vermem abeunt crescente paulatim plantæ substantiâ circumdatum. Eiusmodi verò animalculorum industria, & vermium origo variis, atque clarissimis experimentis exponitur, & illustratur a Valisnerio; ut inde dubitari non possit, quin animalia singula ex ovis oriantur: non omnia tamen illi similia, ex cujus ovo producta fuerint, cùm aliquando insecta, seu vermes unius generis, ab alterius generis vermibus producantur, quod oriri maximè potuit ex eo quod non omnes omnino partes in vermibus solo calore genitis explicentur, ut alæ, pedes &c. unde imperfecta, suisque causis dissimilia relinquantur. Certè qui *aureolas*, sive *chrysalides*, *lampyrides*, *erucas*, *bombyces*, vel

vel *sericeos* vermes consideret, varias illi, ac dissidentes adeo formas induunt, nobisque exhibent, ut diversa prorsus, diversique generis animalia videantur, cum non modò ejusdem generis, sed idem quoque animal, variis tamen partibus subinde præditum observetur.

3. Neque timendum est certè ne insectorum genera destruantur, nisi spontaneâ hac generatione reparentur. Cum etenim ejusmodi insecta ova plurima parere, atque aptis in locis deponere consueverint, impossibile est sanè, quod illorum aliquod non sæcundetur, atque in novum animal convertatur. Quin etiam incredibilis ille ovulorum numerus argumento esse poterit, animalcula ex putrescente materiâ oriri non posse; si etenim fieri id posset, inutilis prorsus hic ovulorum numerus videretur. Perperam quoque novum hoc, distinctumque generationis genus ad divinæ Sapientiæ gloriam conferre dicitur, cum admirabilem potiùs simplicitatem, quâ Deus, & Natura gloriari dicitur, plurimùm deceat, ut unâ, eâdemque lege animalia singula producantur.

4. Quod si in ipsâ Mundi origine, cum ova, vel semina deerant, ex aquæ, vel Terræ substantiâ, peculiari divini Artificis imperio, vel operâ, animalia genita sunt, ut a sacris Literis erudimur, non inde tamen inferri poterit, hac ipsâ lege nunc quoque animalia produci; alioquin, sicuti tunc omnia ex Terrâ, nullum ex ovo, omnia adultâ jam, perfectâque corporis mole producta sunt, ita nunc omnia ex Terrâ, & perfectâ corporis mole genita asserere cogeremur. Ceterùm nec in ipsâ quidem Mundi origine a Terrâ producta sunt,
sed

sed ab ipso Deo, qui ex variis elementorum partibus unâ compositis animal efformavit; ideoque Peripatetici, qui *plasticam* vim Telluri concedunt, Terram ipsam Artifici, vel Creatori hac in parte parem esse arbitrantur.

V. Nunc adeunda nobis, & explicanda est ratio, quâ animalia singula ex ovo, vel semine producantur, vel exponenda series, & ordo, quo novum animal generetur; quod occultum adeo censerî poterit, ut inde maximâ verecundia, ac modestia in omnium animis ingeratur. Juerit ergo in canibus exemplum fingere, quod facilè ad singula animalium genera transferri poterit.

Hippocrates itaque, aliique plurimi ex commixto utriusque parentis semine, ritèque in utero matris fermentato novi animalis organa, vel membra sensim produci arbitrantur, ut ex Epicuri quoque sententiâ ait Lucretius

Semper enim duplici partus de semine constat (a).

Ejusmodi verò semen, aut ex puriori sanguinis parte compositum arbitrantur, aut ex tenuissimis particulis, quæ ex singulis corporis partibus abrafæ, excerptæ, atque in utero ita conjunctæ, permixtæ connexæque fuerint, ut quæ ex cerebro, cerebrum; quæ ex oculo oculum; quæ ex corde cor; quæ denique, ex aliquâ corporis parte defluerint, similem corpusculi partem componant: idque ostendi posse arbitrantur, quòd canis, quæ priùs integros, perfectosque catulos edere consueverat, postquam illi crus fortuitò resectum fuerat, nonnisi resecto, vel deficiente crure catulos genuit.

VI. Sed

(a) *Lib. IV. vtr. 22.*

VI. Sed hæc Hippocratis, aliorumque sententia, quæ communi quoque veterum Theologorum consensu recepta fuerat, vix, ac ne vix quidem defendi posse videtur. Quis enim fieri potest, ut ex singulis corporum partibus variæ particulæ secernantur, quæ deinde in sanguinis massâ simul permixtæ, atque ex renibus per *deferentia vasa* in uterum translatae hac admirabili lege disponantur, ut particulæ quælibet ad homogineam, sibi que similem partem accedat, ipsique arctissimè adhæreat; cum præsertim ex variis corporis partibus, ut unguibus, capillis, ossibus nulla ferè cum sanguine, vel renibus conjunctio reperiatur? Quis innumeras illas partes temere agitas in utero componat, ut inde novum animal coherentibus, sibi que mutuo connexis partibus efformetur? Certè qui id solo Naturæ motu, innato calore fieri posse arbitretur, parum abest quin variis Græcis, Arabibus, Latinisque characteribus in terram temere projectis, simulque agitatibus illorum singulos a reliquis ita sejungi posse concedat, ut inde græca oratio, arabicum carmen, latina historia componatur; qui verò vim plasticam, seu formatricem utero, sive animalibus concessam velit, quâ partium unio peragatur, eleganti quidem, vulgarique voce imaginariam causam afferet, quæ cordatioribus tamen viris probari certè non poterit.

VII. Longè itaque simplicior, longèque verisimilior videtur opinio, quæ a plerisque Philosophis defendi solet, seminis nempe substantiam ex purioribus, vividioribusque sanguinis particulis componi; ut quemadmodum variæ, plurimæque particulæ in sanguine continentur, quibus os, cerebrum, caro producat, ut cum

de

de nutritione jam diximus, ita quoque in semine, puriori nempe ejusdem sanguinis substantiâ, subtiliores aliæ particulæ contineantur, ex quibus os, caro, cerebrum foetus oriatur. Hæc ipsa tamen opinio, variis, gravissimisque difficultatibus obnoxia conspicitur, iisque præsertim, quæ paullo superiùs contra Peripateticos, & Hippocratem ipsum attulimus. Hinc illustriores ætatis nostræ Philosophi, qui mirâ, & incredibili solertiâ animalium generum investigarunt, animalia singula ex ovo, aut ex animalculis aliis oriri putarunt.

VIII. Posterior hæc opinio ab Harfoecheo, & Levenochio defenditur, qui cum plurimos, innumerosque vermiculos in ipso animalium semine, veluti innatantes conspexissent, opinati sunt illorum aliquem, sive etiam plures uteri membranis adhærescere, sive in ovarium pervadentes ovulo cuidam inferi, liquorem exsurgere, quo sensim nutriantur, augeantur, donec evolutis, vel explicatis partibus in novum animal convertantur.

IX. Sed longè communior, & verisimilior est altera opinio, quæ in singulis animalium generibus ovaria, & ovula ineisse arbitratur, quibus singulæ novi animalis partes tenuissimis veluti filamentis delineatæ, accuratissimèque depictæ continentur, quod & antiquissimis olim temporibus Empedocli videbatur (a). Itaque cum aliquod ex his ovulis masculi seminis spiritu fecundatur, cor nimirum, aliæque partes ovulo inclusæ motum acquirunt, sensim turgescit, ex ovario per tubas Fallopianas, a Fallopio nimirum observatas, in uterum delabi-

(a) *Ap. Arist. I. de gen. anim. c. 23.*

bitur, ubi variis humoribus enutritum, singulas partes explicat, ac evolvit, ut illæ sensim liberæ, ac evolutæ integrum, perfectumque animal efficiant, quod exacto jam novem, decemque mensium spatio in lucis auras egredia-
tur. Id verò hac lege fieri, non modò illu-
striorum Scriptorum consensu, incredibili ovo-
rum, tubarumque apparatu, sed inde quoque
mirificè ostendi potest, quod a Malpighio, a-
liisque foetus humani in tubis, aut in ovariis
reperi sunt, qui nimirum ex ovulo geniti,
formatique fuerant, quod cùm ab ovariis avel-
li, aut tubas pervadere, aut in uterum dela-
bi non posset, in tubis ipsis, aut ovario nutri-
ri, augeri, foetumque excludere debuit. Simi-
liter etiam in mulierum ovariis tot calyculi,
vel ovorum ex ovario delapsorum vestigia sunt
observata, quot illæ foetus enixæ fuerant: ut
dubitari proinde non possit hanc hypothesim
ceteris omnibus clariorem, melioremque esse,
in quâ plurima phænomena feliciter, atque
mirificè declarantur.

X. Quâ verò serie, quo rerum discrimine,
temporisque intervallo variæ corporis partes
in ovulo, aut foetu explicentur, sive formen-
tur, definiri vix potest. Experimentis tamen
a Malpighio, Valisnerio, aliisque pluribus, fa-
ctis erudimur in ovuli medio punctum quod-
dam micare, peristaltico nimirum motu agita-
ri, quod proinde *punctum saliens* vocatur, &
animalculi cor videtur. Ceteræ tamen partes
omnes unâ cum ipso corde formantur, sed a-
liquæ seriùs, ociùs aliquæ perficiuntur, debi-
tamque figuram, & ordinem assequuntur, ut
Hippocrates etiam asseruit *membra simul om-
nia discerni, & augeri, non unum alio priùs,*
aut

aut posterius ; tametsi , quæ sunt naturâ majora , prius , quàm minora appareant , cum nihilo priora sint (a) .

XI. Explicanda demum superesset affinitas illa , sive similitudo , quæ inter filiorum , parentumque vultus reperitur , quæ tantò obscurior , vel difficilior videtur , quantò jam singulas corporis partes in ovulo delineatas esse jam diximus . Id unum itaque conjicere , vel suspicari nos possumus , quod animales spiritus a cerebro in ovum delabi , ac juxta varium motum , quem ab imaginibus in cerebro excitatis receperint , varias quoque corporis partes in ovulo conformare , sive disponere fortasse possint . Ac maximam quidem esse in fœtibus conformandis imaginationis vim innumeris experimentis ostendi potest , quibus pro variâ imagine , quæ in matris phantasiâ excitata fuerit , variâ quoque legē infantis membra conformari conspiciamus . Sic ubi gravida mater vehementi timore , vel alicujus rei cupiditate exarscrit , illius imaginem corpori infantis impressam videmus . Atque inde fieri etiam potuit , ut clauda mater claudum puerum enixa fuerit , quod ab aliis ita explicari solet , ut semen particulis a singulis corporis partibus abrais componi velint . Cæterum hæc omnia , quæ de admirabili animalium generatione dicta sunt , gravibus adeo circumfusa tenebris videntur , ut nonnisi conjecturis locus supersit ; & si , in reliquis omnibus rerum generibus maximam , divinamque Artificis sapientiam admiramur . in hoc opere meliori quadam , arcana , & inexplicabili lege operantem illum veneramur .

Tom. IV.

M

CAP.

(a) *De Diet. I.*

C A P. X.

De sensibus in communi.

I.



Italem hætenus animalium partem contemplati jam sumus, variosque motus, qui in corde, pulmonibus, corporisque musculis hac ipsâ vitali animæ parte, quæ proinde cordi insidere dicitur, peragi solent. Nobilior verò, longèque utilior est illa, quæ nunc explicanda, vel illustranda nobis occurrit, quæ nempe in variis sensibus operatur, variasque rerum imagines, & objecta percipit, unde etiam in cerebro veluti sede, nobiliorique corporis parte residere concipitur. Itaque primum de *sensatione*, sive de *sensibus in communi* differemus, ostendemusque, quâ lege, vel ordine in sensibus rerum perceptio peragatur; deinde verò de singulis sensibus, organis, objectis, illorumque viribus dicemus.

II. Nihil itaque est sensus, nisi potentia, quædam, vis, & facultas, quâ corporeum aliquod objectum percipimus, sive cognoscimus; cùmque perceptio ejusmodi alicujus organi, vel certæ corporis partis ope peragatur, hæc *sensus organum*, sive *sensorium* vocatur. Sic ex. gr. nos experimur oculis videre colores, sonos audire auribus; ideoque tunc anima *sensire* dicitur, & aures ipsæ, vel oculi *sensoria*, colores verò, vel soni *objecta* sensuum, vel *sensibilia objecta* dicuntur; unde nulla sensatio fieri in nobis potest, nisi in nobis ipsis sentien-

di

di vis, sensorium ritè dispositum, & exterius aliquod objectum sensibile reperiatur. Quandoquidem verò sensus ipse, vel sentiendi vis a corpore nostro, sive sensorio egredi, atque sensibile objectum attingere non potest, neque tamen objectum ipsum percipi, sive sentiri potest, nisi cum sensorio, vel sentiendi vi conjungatur, illudque afficiat, necessariò requiritur, ut ex objecto sensibili aliquid egrediat, & ad sensorium perveniat, quod animæ objectum ipsum imaginis instar exhibeat. Id experiri, vel intelligere faciliè possumus in speculo, in quo rosæ, quæ speculo objectæ fuerit, accuratissima imago, figura, vel species imprimitur; experimur etiam in oculo nostro, quem si quis propè, & accuratè inspexerit, in posteriori illius parte, veluti speculo quodam, sui imaginem impressam intuebitur, quod faciliè ad sensus alios, & sensibilia corpora transferri poterit. Quæritur itaque, atque inter Philosophos adhuc differitur quid sit illa species, imago, similitudo, quæ ab objecto venit ad organum, organo imprimitur, & sic impressa a sensu percipitur.

III. Peripatetici nostri, vel Arabes a sensibilibus objectis imagines quasdam prodire arbitrantur, atque ad sensûs organa deferri, quæ corporeæ quidem sint, non tamen corpora, quæque per aërem celerrimè, ac momento, nullâ confusione, diffundantur; ut ex. gr. si rosa speculo objectæ fuerit, tenuissimam, corporeamque imaginem ab illâ exire opinantur, quæ per aërem delata in speculi superficiem incidat, ipsique adhæreat. Hinc ejusmodi imagines, sive phantasmata *species* vocare illi solent, quodd objecti corporis speciem exhibeant,

intentionales verò, sive quòd sensus objectis *intentos* reddant, sive quòd illæ, cùm novum quiddam rerum genus inter corporeas, & incorporeas ambiguum sint, unde Aristoteles (a) *formas materia expertes* illas appellat, novo quodam, distinctoque nomine appellare debuerint. Has itaque rerum species sensuum organisi imprimi docent, indeque ad cerebrum ipsum transferri, a quo diutiùs conservatæ excitari subinde possint, ideoque memoriam, imaginationisque vim in nobis efficiant. Neque cerebro solùm, aut organo, sed ipsi quoque sensitivæ animæ species illæ imprimuntur, unde *impressa* vocari possint; deinde verò cum anima easdem percipit, sibi que impressas imagines contemplatur, illas exprimere, novamque ferè imaginis imaginem elicere dicitur, quæ species *expressa* dicitur, ut accuratiùs ostendetur, ubi de humanæ cognitionis origine differatur.

IV. Hæc tamen specierum origo, diffusio, & energia a ceteris omnibus Philosophis, ut inane commentum haberi, refellique solet. Quis etenim species illas a corporibus educit, & ad organa sensum plurimùm dissita deducit? quis illas in aëre etiam celerrimè agitato ita conservat, ut neque turbari, neque distrahi, neque dissipari possint? quis species illas, quæ, accidentium instar, alteri substantiæ inhærere debent, in aëre, pariete, crystallo, aliisque innumeris, diversisque corporibus repente, sine ullâ subjecti corporis alteratione producat? Quod si species, ex. gr. soni, murum pervadere potest, quidni non aures modò, sed quam-

(a) II. de Ani.

quamlibet etiam membranam, vel duriores quascunque capitis partes subire possit, ut animam toti corpori diffusam, vel certè capiti insidentem admoneat? cur luminis species in aquâ, crystallo, oculique humoribus refrangi, reflecti, colligi, condensari, rarefieri solet, quæ tamen omnia corporis, sive corporeæ substantiæ accidentia esse solent? Postremò quâ ratione ejusmodi species corporis organa vehementer afficere, impellere, atque, si uberior lux, sonus, odorve fuerit, lædere possit, motusque plurimos in corpore excitare, nisi lux ipsa, sonus, & odor corpora forrent? Certè corpus aliud impellere, perturbare nonnisi corpori concedi potest, vel ut Luctetius inquit,

Tangere enim, & tangi, nisi corpus, nulla potest res (a).

V. Itaque si solos Arabes, recentioresque Peripateticos exceperis, veteres omnes, recentioresque Philosophi, quemadmodum omnia corpora ex tenuissimis particulis composita existimarunt, ut accuratè in Phys. Gen. Tract. I. Disp. IV. Cap. II. ostendimus, ita quoque a tenuissimis, subtilissimisq; particulis sensationem omnem oriri, omnesque corporis motus peragi arbitrantur. Existimant ergo a corporibus, vel sensibilibus objectis tenuissimas particulas, sive potiùs perenne particularum effluvium erumpere, quæ per aërem celerrimè diffundantur, in sensuum organa incidant, pro variâ figurâ, motû, texturâ, vel ordine, quo præditæ fuerint, variâ, diversâque ratione nervorum fibras organis superextensas afficiant,

M 3

per-

(a) Lib. I. ver. 305.

percellant, spiritusque animales nervis inclusos excitent, ac impellant; ut tandem anima in cerebro, vel prope nervorum originem, propriâ veluti sede, collocata ejusmodi nervorum motus considerans objecti sensibilis præsentiam percipiat, sive sensationem producat.

Quod autem hac lege, vel ordine corporum cognitio, sive sensatio peragatur, uberrimè demonstrabitur cum de singulis sensibus, illorumque organis, & objectis differetur. Interim illud unum afferri poterit, innumeris experimentis ostendi posse perenne particularum effluvium ex corporibus ipsis crumpere, atque ex variâ illarum figurâ, nervorumque dispositione, vel organorum texturâ, varias in nobis sensationes oriri; ac proinde sensationem non ab intentionali specie, quæ semper eadem foret, eodemque modo operaretur, sed a particulis ipsis repetendam esse. Et certè, si nervi obstructi fuerint, neque animales spiritus per illos liberè, celerrimèque fluere, vel excurrere possint, omnis in corpore sensus extinguitur; quod etiam fieri experimur, si nervus ipse ligetur, & constringatur, ut spirituum diffusio prohibeatur; quod argumento sanè esse debet, ab ipso spirituum motu, qui a particulis excitatur, sensationem omnem oriri.

VI. Hinc etiam facillè inferri poterit, quod, quamvis sensatio in exteriori aliquâ corporis parte incipiat, ex. gr. in manu, vel pede, propriè tamen, ac rigorosè in solo cerebro perficitur, ita ut, si accuratè loqui velimus, non oculum videre, aut aurem audire, sive non animam in oculo videre, in aure audire dicendum est, sed animam potiùs in cerebro audire, videre. Tunc enim objectum aliquod percipi,

pi, sive sentiri dicimus cum illius imago organo sensûs impressa, motus nimirum, qui a sensibilis objecti particulis in spiritibus animalibus excitatus fuerit, ab animâ ipsâ percipitur; hoc autem non in oculo, aut aliâ corporis parte fieri, sed solùm in cerebro manifestissimè demonstratur, quod ubi nulli sunt nervi, nulla sensatio reperitur, atque ubi spirituum ab affectâ corporis parte ad cerebrum diffusio impediatur, etsi eadem corporis objecti, vel motûs impressio facta fuerit, nulla tamen perceptio, nulla sensatio sequatur. Sic ex gr. somni, vigiliæque tempore eadem prorsus impressio, idemque motus a pulicis morso in manu excitatur, nulla tamen somni tempore doloris sensatio percipitur, quodd tunc spirituum motus ad cerebrum pervenire, sive diffundi non possit, quod obstructis etiam in apoplexi nervis conspiciamus. Quod si animâ cuilibet corporis parti inhæreret, sive per singulas corporis partes diffunderetur, ubique perciperet, cumque manus a pulice læditur, animæ pars manui infusâ dolorem perciperet; neque enim concipi potest animam somni tempore ab exterioribus corporis partibus recedere, vel externi corporis impressionem percipere non posse. Excitatur itaque in carne spirituum motus, sed quia obstructis nervis ad cerebrum ipsum, vel animæ sedem non propagatur, objectum percipi, sive sentiri non potest. Hinc optimè ait Cicero, *Nos enim ne nunc quidem oculis cernimus ea, quæ videmus: neque enim est ullus sensus in corpore; sed, ut non solùm Phisici docent, verùm etiam Medici, qui ista aperta, & patefacta viderunt, via quasi quadam sunt ad oculos, ad aures, ad nares a sede animi*

perforata. Itaque saepe aut cogitatione, aut aliqua vi morbi impediti, apertis, atque integris & oculis, & auribus, nec videmus, nec audimus: ut facillè intelligi possit, animum & videre, & audire, non eas partes, quæ quasi fenestrae sunt Animi, quibus tamen sentire nihil queat mens, nisi id agat, & adsit (a), & ex Platoniorum sententiâ Augustinus Dolores, qui dicuntur carnis, anima sunt in carne, & ex carne dolor carnis tantummodo offensio est anima ex carne, & quadam ab ejus passione dissensio: sicut anima dolor, quæ tristitia nuncupatur, dissensio est ab iis rebus, quæ nobis nolentibus acciderunt (b), quod Restituti Calamentis Ecclesiæ Præsbiteri exemplo ipse probat, qui quando ei placebat, ad imitatas quasi lamentantis cujuslibet hominis voces, ita se auferebat a sensibus, & jacebat simillimus mortuo, ut non solum vellicantes, atque pungentes minimè sentiret, sed aliquando etiam igne ureretur admoto sine ullo doloris sensu, nisi postmodum ex vulnere (c).

Quamvis autem vulneris dolor non in manu, sed in cerebro sentiatur, repente tamen percipitur statim, ac vulnus inflictum fuerit, sive quoddam spiritus a manu ad cerebrum celerimè diffundatur; sive potius, quoddam cum continuâ quadam serie a manu ad cerebrum dirigantur, ubi illorum ultimi in manu excitati fuerint, primos etiam in cerebro desinentes impellunt, nervorumque fibræ chordarum instar tensæ vix in extremâ parte concutiuntur, quin repente motum, tremoremque alteri parti in cerebro, cui veluti appensæ fuerint, communicent.

VII.

(a) *Tusc. I.* (b) *de Civ. lib. XIV. c. 15.* (c) *ibi, c. 25.*

VII. Hæc ipsa nervorum, spirituumque diffusio efficit, ut anima in cerebro collocata distinctè percipiat dolorem in pede, vel alterâ corporis parte excitatum, quodd nervi nimirum, qui ad distinctas corporis partes a cerebro diffunduntur; aut a distincto quoque cerebri loco oriantur, aut certè spiritus certâ lege, distinctoque tremore compulsos ad cerebrum deferant; unde anima longâ jam consuetudine erudita ubi hunc potiùs, quàm alium nervum, hac potiùs, quàm aliâ vibratione tremere adverterit, in hac potiùs, quàm alterâ corporis parte dolorem, voluptatemque excitari percipiat. Atque hinc fieri plerumque solet, ut ille, cui manus, aut aliud corporis membrum resectum fuerit, in resecto membro dolorem percipere videatur, quodd nimirum spiritus animales in illo nervo, qui priùs ad manum ipsam, nunc ad resecti brachii extremum definit, excitentur, ideoque eundem ferè motum ad cerebrum deferant, eandemque doloris speciem exhibeant, quæ priùs ad cerebrum deferebatur; eadem ferè lege, quâ somni tempore eundem sonum, dolorem, voluptatemque percipimus, quam vigiles experti jam sumus, quodd animales spiritus somni tempore eâdem lege excitentur in cerebro, quâ priùs ex objecti corporis præsentia excitabantur.

VIII. Illud etiam hîc obiter intelligi, vel inferri poterit, quodd fusiùs sequenti Capite ostendemus, accidentia nimirum, sive qualitates illas, quæ *sensibiles* dicuntur, non corporibus ipsis inesse, sed in animâ solùm, sentiendique facultatibus reperiri. Qualitates enim, & accidentia corporum non aliâ ratione per-

percipimus, quàm ex vario motu, quo tenuissimæ particulæ ex corporibus erumpentes nerveas fibras percellunt, spiritusque nervis inclusos ad cerebrum impellunt; ejusmodi verò motûs, vibrationisque varietas a solâ partium figurâ, texturâ, vel ordine oriri potest, unde qualitates omnes, & accidentia ab ejusmodi fontibus repeti debent. Itaque calor ex. gr. non veluti entitas quædam ignis substantiæ, vel tenuissimis ignis particulis superaddita, concipi debet; sed potius veluti quædam animæ affectio, sive perceptio, quæ in animâ ipsâ ex celerî spirituum motu excitatur dum spiritus ipsi ab ignis particulis celerrimè agitati concutuntur: unde in igne non calor ipse *formaliter*, ut inquit, sed *effectivè* solum reperitur, particulæ nimirum ignis eâ figurâ, motuque præditæ sunt, quæ caloris sensum in animâ excitare, sive producere possit. Hinc optimè, sapientissimèque Democritus ait *in rebus externis non esse aliquid dulce, nec amarum, aut calidum, aut frigidum, nec aliquid aliud ex iis, quæ apparent sensibus, hæc enim esse nomina nostrarum affectionum* (a); quemadmodum Aristoteles ipse *neque alborem esse, neque nigrorem sine visu, vel anima* (b); *neque ullum sine gustu saporem* (c); quod æquali certè ratione de Philosophis omnibus, sive veteribus, sive recentioribus intelligi debet, qui accidentium, vel qualitatum omnium originem ex solâ partium figurâ, texturâ, vel motu repetendam esse arbitrantur, ut in Physicâ Gen. Disp. IV. demonstravimus.


IX.

(a) *Ap. Empyr. const. Math. II.* (b) *De Gener. III. c. 2.* (c) *Ibid. lib. II. t. 142.*

IX. Quemadmodum verò sensationes omnes certis quibusdam corporis partibus, velut organis peraguntur, quibus externi corporis imago, tenuissimarum nempe particularum, quæ ex corporibus advenerint, motus, imprimatur; sic ex ipsâ organorum varietate, vel numero, sensuum varietas a Philosophis desumi solet. Itaque cum auribus sonum audiri, oculis videri colores, sapes gustari linguâ, odores naribus percipi, plurimas alias qualitates tactu sentiri conspicerent, quinque sensus in animalium corpore distinxere *auditum*, nempe, *visum*, *gustum*, *olfactum*, & *tactum*. Quæ quidem sensuum divisio, etsi fortasse corrigi possit, cum præsertim reliqui sensus omnes ad tactum veluti commune quoddam genus referri debeant, ut Aristoteles proinde dixerit *alios sensus tactu sentire* (a), communiter tamen ab omnibus adhibetur, atque a nobis etiam usurpari merito poterit. In hac itaque hypothese, vel externorum sensuum divisione de illorum singulis hic ordine differemus, ut ipsorum organa, & objecta, qualitates nimirum, & accidentia, quæ sensibus percipiuntur, meliori, quo poterit ordine, complectamur.

C A P. XI.

*De sensu tactûs, illius organo,
& objecto.*

I.  Eteros inter sensus princeps ferè locus tactui conceditur, non quòd ille nobilior aliis haberi fortasse debeat, aut elegantiori, vel pulchriori corporis parte illius operatio peragatur, cùm ille potius a visu, vel auditu mirificè superetur; sed quòd omnium maximè conservandæ animalium vitæ conferat: unde cùm animalia plurima aut visu, aut olfactu carere videamus, nullum tamen tactu destitui conspiciamus (a), atq; ut Aristoteli videbatur, *sine tactu impossibile est animal esse* (b); aut certè *quod toto corpore aquabiliter fusus sit* (c); ideoque cum reliqui sensus omnes in certâ quadam capitis parte, velut organo resideant, ac operentur, objecti nimirum corporis imaginem percipiant, tactus per singulas corporis partes uberrimè diffunditur; aut denique quòd sensus omnes veluti nobiliores quædam tactûs species haberi possint.

II. Tactus itaque est illa vis, aut facultas per totum corpus diffusa, quâ accidentia, vel qualitates illas percipimus, quas in Phys. Gen. Disp. IV.

(a) *D: An. III. 1. 68.* (b) *Plin. X. c. 71.* (c) *Cic. Nat. II.*

Disp. IV. explicavimus, atque *tangibiles*, vel *tactiles* vocari solent, ut sunt *frigus*, *calor*, &c. De illius organo, sive corporis parte, quâ tangibilis qualitatis species, & imago percipitur, inter Philosophos convenit. Quamvis enim Aristoteli (a), atque plerisque Peripateticis videatur tangibilia objecta carne sentiri, ideoque carnem veluti tactûs organum esse velint, fortasse quod carnem ipsam cuti spoliata sentire videant; meliores tamen, & illustriores omnes Philosophi (b) verum tactûs organum esse arbitrantur nerveas papillas, extremas nempe nervorum partes, quæ cuti subjectæ ab externis objecti particulis facillimè percelli, agitarique possunt, ut altera nervorum extremitas in cerebro existens celerimè concutiat, sive spiritus animales nervis ipsis inclusi cum tremore quadam ad cerebrum diffundi possint. Id invictissimè ostendi potest quod in illâ corporis parte, vel carne, ubi nullæ papillæ nerveæ reperiuntur, nulla quoque sensatio producat; ubi plures, delicatioresque sint nerveæ papillæ, ut in pedis, manûs palmâ, acrior etiam tactus observetur; ubi nerveæ papillæ vehementi frigore constrictæ, noxio humore obstructæ, aut violentâ aliâ causâ perturbatæ fuerint, tactus ipse languidior, sensimque obtusior reddatur, sive etiam penitus destruat.

III. Quod verò ad tangibiles qualitates pertinet, Arabes entitates quasdam, modos, aut accidentia illas esse arbitrantur, quæ corporum substantiæ superaddita eadem corpora

tangi-

(a) *I. de Anim. c. 9. & Hist. anim. I. c. 4.* (b) *Malp. de ext. Tactûs org.*

tangibilia reddant, ut humida, frigida; ceteri verò veteres omnes, recentioresque Philosophi novas ejusmodi, vel superadditas entitates temere effingi opinantur, atque illarum qualitatum vim in solo perenni tenuissimarum partium effluvio positam esse arbitrantur, quæ ex tangibili, calido, frigido corpore erumpentes, certoque motu in nerveas papillas incidentes, illarum fibras irritant, agitant, percellunt, spiritusque nervis inclusos commovent, ut anima cerebro insidens varium hunc motum, vibrationemque advertens, hanc frigoris, potius, quam caloris, doloris non voluptatis sensum. juxta præconceptas imagines, vel nomina vibrationibus illis imposita appellare consueverit. Itaque sapius a sensibus ipsis illudimur, atq; infantiae præjudiciis in errorem abripimur, cum igneis particulis calorem veluti entitatem nempe aliquam a particulis ipsis, illarumque motu, sive figurâ distinctam inesse concipimus, cum certè caloris sensui in nobis excitando nihil propemodum requiratur, nisi certa particularum figura, celeritas, & agitatio; quemadmodum ferè aciculæ acumen in manu dolorem excitat, neque tamen aciculæ ipsi dolorem inesse quis arbitrabitur, sed aciculæ solum figuram nerveis fibris avellendis, insuavique affectioni excitandæ idoneam concedet, dolorem verò carni, vel animæ inesse opinabitur. Hinc variatâ corporis figurâ, vel exteriori superficie sensationem ipsam variari conspiciamus, ut ex. gr. in ligno, cujus aspera sit superficies, partesque inæqualiter promineant, *asperitas* inesse, atque in animâ asperitatis perceptio, vel doloris quidam sensus excitari dicetur; quod si dolabrâ, vel pumice inæquales
illæ

illæ partes abradantur, *lavitas* in ligno produci, atque in animâ levis quidam voluptatis sensus oriri putabitur, cùm tamen sola partem figura, sive textura variata fuerit. Sic etiam *humiditas* in aëre produci, atque a nobis sentiri dicetur ubi tenuissimæ aquæ partes per aërem dispergantur, atque sese in cutim nostram insinuent, nerveasque papillas afficiant; siccarum verò aër putabitur, vel *siccitatem* acquirere cum dissipatis ejusmodi aquæ vaporibus, nerveas papillas afficere desinat; *fluiditatem* in corporibus esse arbitramur, cum illorum partes a mutuo contactu faciliè separentur, manuique circumactæ faciliè cedant; quod si manui prementi vix cedant, nerveasque potius papillas comprimant, tunc illa corpora *dura*, vel *solida* vocabimus, sive *duritiem*, aut *soliditatem* illis inesse dicemus. Quin etiam varia corporum durities hac ipsâ lege cognoscitur, ut ex. gr. si cæcus manu, vel baculo subjectum corpus tangat, faciliè percipit an marmor, an terram, an arenam, vel lutum, an lignum tetigerit, quod ex variâ corporum duritie ligneæ baculi fibræ diverso modo concutiantur, varioque modo nerveas papillas per manum diffusas percellant, ideoque variam in cerebro sensationem excitent, quam ex consuetudine, marmoris, aut ligni duritiem dicemus; quemadmodum ferè vir ille, qui cæcus ab ipso ortu numquam colores viderat, nullamque illarum imaginem cerebro impressam habebat, ipso tamen tactu in variis serici villosi frustis varium colorem distinguere consueverat, quòd variam in serici partibus, vel superficie texturam ex variis coloribus, quo imbutæ fuerant, productam distinguens, texturam hanc, aut sensa-

senfationem viridi ex. gr. colori conjunctam edoctus viridem laciniam ex texturæ, vel senfationis varietate scrutabatur.


IV. Hinc facile apparet in judicandis corporum qualitatibus plerumque nos falli, quòd de ipsis judicare consueverimus ex variâ impressione, quam in nerveis papillis efficiunt, varioque motu, quo nerveas fibras, spiritusque percellunt; ejusmodi verò impressio modò fortior, atque languidior esse conspicitur juxta corporis nostri dispositionem, sive texturam, & ordinem, quo nerveæ fibræ dispositæ fuerint; ut ex. gr. si manus calida tepentem aquam tetigerit, hæc frigida videbitur, frigorisque dolorem imprimet, sin verò frigidâ manu tepentem aquam tangamus, illa calida ferè censebitur, ut in Phys. Gener. jam diximus.

V. Incredibile est porrò quàm acris, delicatusque sit in quibusdam animalibus Tactus, quàm facile ex. gr. aëris circumpositi temperiem præsentiant, ut de formicis, ovibus alibi diximus: incredibile est etiam qualis voluptas, quantusque dolor est tactu, veluti ex eodem fonte oriatur, ut calor ille, qui initio voluptatem excitat, in dolorem denique convertatur; lenis manûs contrectatio, sive compressio voluptatem, gravior compressio dolorem inducat; quæ faciliora certè videntur, quàm ut hîc uberius explicentur.

CAP.

C A P. XII.

*De gustûs, & olfactûs organis, &
objectis; sive de sapore,
& odore.*

I.  Uæ de gustûs, & olfactûs organo, vel objecto dicenda fuerint, uno, eodemque Capite simul complectimur, tam quod clariora sint, quàm ut uberius exponi debeant, tum etiam quod inter ejusmodi sensus maxima, affinitas, atque conjunctio reperiatur.

II. Gustus itaque, ut ab illo exordiamur, qui nobilior, utiliorque censeretur, est illa facultas, quâ varios corporum sapes percipimus; neque aliâ de causâ hæc animalibus concessa videtur, nisi ut cibos utiles ab inutilibus, noxios ab innoxiiis distinguerent, atque ad corporis vires alimento reparandas non modò fame, sed ipsâ quoque saporis voluptate allicerentur. De gustûs organo mira est veterum, recentiorumque Philosophorum dissentio. Veslingius enim, Bartholinus, alique plures flaccidas linguæ fibras gustûs organum esse arbitrantur; Laurentius id subtili membranæ, quâ lingua ambitur, concedit. Malpighius (a) tamen, atque Bellinius (b) nerveas papillas, quæ in linguâ reperiuntur, gustûs organum esse definiunt. Clarissimis itaque, & accuratissimis

Tom. IV.

N

ob-

(a) Oper. Tom. II. de lingua. (b) De gust. org.

observationibus erudimur tres in linguâ partes, sive membranas reperiri, exteriorem nempe, quæ cuticulæ, vel epidermidis instar linguam obducit; alteram ipsi subjectam, quæ foraminulis variis pertusa, ac retis instar perforata videtur; aliam denique interiorem, ac mediam plurimis nervis contextam, quorum extremitates, sive papillæ per secundæ membranæ poros trajectæ sub cutim, exterioremque linguæ membranam desinant. Non alia igitur linguæ pars veluti proprium gustûs organum haberi poterit, quàm nerveæ papillæ, quæ ex interiori linguæ parte diffusæ carneam membranam trajiciunt, atque epidermide vestiuntur. Hinc in extremâ linguæ parte, ubi plures, confertioresque papillæ conspiciuntur, acrior, delicatiorque sensus percipitur; atque, ubi papillæ, vel spongiosa linguæ substantia aliquo humore perfusa, vel læsa fuerit, languidior, obtusiorque gustus efficitur; ex variâ denique fibrarum texturâ, quæ in variis animalibus, aut in ipso, eodemque homine sanitatis, vel ægritudinis tempore reperitur, varius quoque ejusdem corporis sapor percipitur, quod fieri certè non posset, nisi impressio saporum in nerveis papillis, velut organo, perageretur.

III. Hinc Aristoteles, ubi plura de gustu, atque saporibus differuisset optimè concludit: *quapropter & gustum necesse est tactum esse quendam, quia tangibilis, & nutritivi sensus est (a);* quemadmodum nempe nerveis papillis, quas in singulis corporis partibus cuticulæ, vel epidermidi subjectas esse jam diximus, calorem,

(a) *De Anim. III. c. 9. t. 64. & de Sens. c. 7.*

rem, aut frigus percipimus, ita quoque nerveis papillis, quæ in linguâ tenui cuticulâ, vel epidermide conteguntur, varios sapes, quin etiam calorem ipsum, frigus, aliasque tangibiles qualitates percipiamus.

IV. Unde verò corporum sapor oriatur, aut quâ lege in nobis saporis sensatio peragatur, ex iis, quæ paullo superius attigimus, nullo negotio deduci potest. Neque enim, ut Aristotelici existimarunt, sapes ipsi concipi debent ut entitates aliquæ ciborum substantiæ inhærentes, ut amaror aliquis, sive dulcedo melli, vel absinthio inesse videatur; sed ut affectio solùm, sive sensatio, quæ ex quorundam corpusculorum appulsu in organo producat. Si etenim sapes ipsi cibus inessent, cur non eadem sensatio, idemque sapor ab animalibus omnibus perciperetur? cur *coliquintida* muribus suavis, amara hominibus videretur? cur homines aliqui cibum veluti amarum, ac insuavem averfarentur, quem tamen alii veluti dulcem, gratumque appetunt? cur unus, idemque cibus homini sano dulcis videtur, quem veluti amarum ægrotus despiciet? non alia certè de causâ, nisi quodd in animalibus variis, in variis hominibus, atque in uno, eodemque homine, pro variâ ætate, corporisque temperie, varia quoque textura in linguæ fibris deprehendatur, ideoque papillæ nerveæ diverso modo ab ejusdem cibi particulis affici, sive percelli debeant. Sapor itaque a tenuissimis ciborum particulis oritur, quæ linguæ cuticulam pervadentes nerveas papillas afficiunt, certumque motum in spiritibus nervo inclusis excitant, qui ad cerebrum delatus ab animâ percipitur, *saporisque* nomen fortitur.

V. Quandoquidem verò in singulis ciborum generibus plurimæ, ac infinitæ ferè salium, particulæ reperiuntur, ex ipsis salium particulis saporès omnes repetendos esse accuratiores omnes Philosophi, vel Anatomici (a) existimaverunt. Varias certè salium species ex ciborum substantiâ educi manifestissimis experimentis erudimur, eundemque saporem in iis corporibus observari, quæ easdem salis particulas contingant; atque, ubi ex corporibus sales omnes arte chymicâ educti fuerint, insipidus humor superesse videtur. Varius denique ex variis salium generibus sapor orietur, quòd varia sit in illis partium figura (b), ut ope microscopii clarissimè demonstratur. Sales itaque, quibus acutior est figura, acriùsque linguæ fibras vellicare, sive percellere possunt, acriorem saporis sensum excitare, ut in *pipere*, *sinapi*, &c. experimur; it verò, qui octahedricam, obtusiorēque figuram habent, ut *saccharum*, leviùs linguam percellent, ac oblinient, quendamque, dulcedinis sensum producent: quod Democritus ipse coniecerat existimans *dulcem esse saporē, qui rotundus, acerbum, qui figurâ magnâ, asperum, qui multis angulis* (c).

VI. Qua quidem in re satis mirari non possumus saporis varietatem, quæ in eodem fructu percipitur, ubi acerbus adhuc, maturescens, perfectus, evanidus, coctus sit, sive marcescens putrescat; id unum repeti hic poterit, quod uberius est explicatum ubi de fructuum saporibus ageretur, fructum varios ejusmodi gradus subire, dum illius humor, aut partes va-

(a) Vid. Cler. Phys. V. c. 12. (b) Vid. Boyl. de product. sap. (c) Theopb. de caus. Plan. VI. c. 2.

riâ ratione permixtæ, alteratæ, subactæ; dispositæ sint, adeoque varium saporem a variâ solùm partium figurâ, texturâ, vel motu pendere. Ceterùm quot saporum genera admitti debeant, definiri vix poterit; quamvis enim Theophrastus (a) octo solùm enumeret, *dulcem, pinguem, austerum, acerbum, acrem, salsum, amarum, acidum* juxta hos versiculos

Sunt *salsus, pinguis, dulcisque, acidusque* sapores,
Acer, & insipidus, austerus, acerbus, amarus;

aliæ tamen species distingui poterunt, ut a Grævio (b), Villisio (c), aliique accuratissimè demonstratur. Verùm id experimento potius, quàm variis rationibus ostendi potest.

VII. De olfactu, vel odoratu posteriori loco dicturi, maximam ipsi cum gustu affinitatem esse observamus, ut illa nimirum, quæ sapida, gustuique suavia, vel grata experimur, odora quoque, vel olfactui jucunda videri consueverint; quæ gustui ingrata, graveolentia quoque sæpissimè deprehendantur. Maxima verò hæc affinitas oritur, non modò, quòd eadem particulæ nerveis linguæ, vel narium papillis exceptæ odoris, saporisque sensum efficere possint, verùm etiam, quod nervi, quibus saporis, odorumque perceptio, sive sensatio peragitur, ab eadem cerebri parte diffusi ad saporis, odorisque sensorium dirigantur. Olfactûs itaque, vel odoratûs nomine facultas illa intelligitur, quæ odores percipit; quæque in animalibus quibusdam acerrima, in aliis lan-

N. 3

gui-

(a) *De caus. Plant. VI. c. 1.* (b) *Leß. VI.* (c) *De an. Brut. c. 11.*

guidior, in aliquibus etiam quandoque nulla observatur.

VIII. Quod hujus facultatis organum, sive sensorium putari debeat, Medicos inter differitur. Plurimis enim videtur, ut Gassendo, Peripateticis, &c. olfactûs organum esse carunculas illas, quæ ab anteriori cerebri parte diffusæ prope narium radices ossi *ethmoidi* inhærentes observantur, quas etiam *processus*, sive *carunculas mammillares*, vel, ut Galeno placuit, *productiones oblongas*, primumque nervorum par appellari jam diximus cum de cerebro loqueremur. Neque enim utilitas ulla, vel illarum usus intelligi potest, nisi variis odoribus percipiendis supra narium radices appositæ fuerint, ut odores ipsi naribus collecti *ethmoidis* ossis poros pervaderent, atque carunculas ipsas afficerent.

IX. Ceteri verò longè verisimiliùs existimant olfactûs organum esse membranam illam, quæ interiorem narium superficiem vestit, nerveas nimirum papillas, quæ per quintum, primumque par a cerebro diffusæ, atque per varios ossis cribrosi poros trajectæ infra membranæ cuticulam, vel epidermidem reperiantur. Id ostendi faciliè poterit ex innumeris nervorum fibris, quibus per ossis cribriformis foramina trajectis eadem membrana veluti intertexta conspicitur, quæ certè prorsus inutiles viderentur, si narium cavitas colligendis solum halitibus destinaretur; accuratissimis etiam observationibus erudimur iis animalibus, quibus acrior est odora vis, aut fortior olfactus, subtiliorem etiam, delicatior, ac longiorem, in varios nimirum plexus corrugatam esse narium membranam pluribus nervorum fibris intextam; læsâ
dein-

deinde , vel perturbatâ membranâ , ut cûm violentè avulsa , vel igne exsiccata , sive cûm nimio humore perfusa fuerit , tunc odoris sensus languidior in nobis efficitur , aut prorsus etiam amittitur , quòd tunc odor ipse nerveas fibras percellere , vellicare , spiritusque commovere non possit ; quod si nares ipsæ odores solûm per aërem diffusos colligere , atque ad carunculas mamillares deferre deberent , eodem prorsus modo odor a naribus colligi , atque a carunculis percipi deberet . Accedit etiam , quod a naribus ad carunculas ipsas nullus aditus haberi potest , naribus siquidem os æthmoides superimponitur , quod etsi cribrosum , variisque poris pervium sit , utrâque tamen meninge , vel cerebri membranâ vestitur , ejusque pori nerveis fibris primi , & quinti paris ad nares usque trajectis obstruuntur , unde nullus odor a naribus ad carunculas pervadere posset , multòque minùs tabaci , pulveris , alteriusve corporis partes , quod vulgo proditum , creditumque est .

X. Explicato verò olfactûs organo , odoris etiam originem explicasse videmur . Quamvis enim Arabes hunc entitatem esse arbitrentur odoris corporibus inditam , quæ intentionalem sui speciem ad carunculas emittat , Aristoteles tamen , aliique omnes longè verisimiliùs existimant odorem ipsum in tenui partium effluvio positum esse , quæ ex odoris corporibus perenni quadam serie erumpant , vel , ut Aristoteles inquit , esse *fumosum balitum* , *evaporationem* (a) , quæ naribus excepta , ab animâ percipiatur ; quemadmodum Plinius inquit , odo-

(a) *De sensu* c. 2.

rem non aliud quàm infectum aëra intelligi posse (a). Odor itaque ab animâ percipitur, cùm tenues quædam particulæ ab odori corporis substantiâ egressæ, per aërem diffusæ unâ cum aëre in naribus excipiantur, nerveasque fibras, sive papillas in interiori narium membranâ diffusas leni quodam motu, seu vibratione percellant, quâ spiritus nervulis illis inclusi ad cerebrum deferantur, eumque ibi motum, seu agitationem exhibeant, vel in animâ excitent, quam anima odoris sensum vocare consuevit. Cùmque ex variis corporibus halitus varii pro variâ corporum texturâ, variisque succis, & oleis, quibus eadem componuntur, erumpere soleant, in variis corporibus odores varii percipientur; quemadmodum etiam pro variâ fibrarum texturâ, pro variâ corporis temperie, pro vario corporis odori calore, vel frigore, varius odor in eodem corpore a variis animalibus percipietur, ut de sapore jam diximus, atque uberrimè demonstravit accuratissimus Boyle (b).

XI. Quemadmodum denique ex amaro, ingratoque sapore plurimi motus in linguâ, ac ventriculo excitantur, ita quoque ex odoribus plurimos effectus in corpore excitari conspiciamus. Sic odores aliqui, acutiores præsertim, languentes spiritus excitant, alii capiti torporem, sive gravedinem inducunt, alii potius exhilarant, alii denique effectus alios producunt; quæ singula ex cerebri structurâ superiùs expositâ, spirituum motu, variisque ægritudinum causis ante explicatis intelligi possunt. Illud etiam intelligi poterit, cur si narium membrana,

acri

(a) Lib. IX, c. 7. (b) De product. odor.

acri humore perfusa, festucis irritata, vel attracto tabaci pulvere vellicata fuerit, sternutatio, totiusque ferè corporis concussio oritur; cum etenim nervorum fibræ, quas ex quinto pari in narium membranâ plurimas, ac intertextas esse jam diximus, acrius irritantur, irritant etiam, eademque violentâ, ac perturbatâ agitatione percellunt fibras, quæ ex eodem quinto pari ad diaphragmatis musculos diffunduntur, unde musculorum contractio, ac violenta diaphragmatis elevatio, pulmonum compressio oriri debet, quâ sternutationem, violentum nempe aëris e pulmonibus egressum fieri oportere jam diximus, cum de respiratione, ejusque effectibus loqueremur.

C A P. XIII.

*De auditu, ejusque organo,
& objecto.*

I.



Admirabilis illa partium structura, organorumque series, quæ sonis percipiendis disposita, vel destinata conspicitur, non modò veteres, sed recentiores Philosophos, ac Anatomicos impulit, ut illorum singula accuratissimè exponerent, quos inter excellere, ceterisque palmam præripere videri poterunt Schelamerus (a), atque Valsalva in eximio tractatu, quem *de Au-*

re

(a) *De Auditu,*

re Humana nuperrimè edidit. Quandoquidem tamen auris structura neque verbis, neque æreis etiam figuris exprimi perfectè potest, juverit potius Anatomicos ipsos consulere, subjectoque humano capite, ossium figuram, locumque contemplari, ut inde clariùs illorum usus, & auditus origo cognoscatur. Suprema nos solum capita, levemque illarum partium descriptionem, quod nostri muneris est, brevissimè complectemur.

II. Nihil est autem cur auditus nomine facultatem illam intelligi dicamus, quâ sonos percipimus, id enim omnes norunt, ac experimento clarissimè demonstratur vim illam in variis animalibus variam esse, quippe cum alia acutiorẽ auditum habeant, quo levem, tenuemque sonum percipiant; alia obtusiorẽ, hebetiorẽque; alia denique nullum, ut apes, quibus nec aures, nec auditum inesse Plinius, aliique plurimi existimarunt. Exponenda potius est organorum series, quibus hæc soni perceptio, vel auditus ipse peragitur, quandoquidem auditus organum non, ut in ceteris sensibus, simplex est, sed pluribus, diversisque partibus mirè componitur, *auriculâ* nimirum, *aure*, *timpano*, *ossibus*, *nervisque*.

III. Auricula dicitur illa cartilago, sive membrana, quæ capitis cuti firmiter annexa hinc inde prominet, vel assurgit; cùmque illa facilè flecti possit, extensa tamen, vel erecta plerumque sustinetur, ut aërem commotum, sive sonum excipiat, variusq; sinibus, & anfractibus, quibus corrugatur, elidat; unde levem, demissiorẽque sonum audituri aures arrigimus, manumque excavatam auriculæ apponimus; &

cani-

canibus ipsius, vel hominibus, quibus auriculæ resectæ fuerint, hebetior auditus efficitur. In exteriorem ejusmodi auriculam definit *concha*, sive *meatus auditorius*, qui ex exteriori capitis parte in interiorem per varios gyros, ac spiras, quibus vehementior aëris impetus eliditur, extenditur. Interior illius superficies non modò pilis, sed innumeris etiam glandulis referta conspicitur, ex quibus viscosus quidam, flavus, biliosus, amarusque succus exsudat, quo animalcula, si quæ fortasse hunc ingredi contigerit, irretiantur. Meatus tandem ipse ad *tympanum* definit, tenuem nimirum membranam, quæ osseo circulo superextensa ab exterioris aëris, qui auriculâ collectus, variofque meatûs auditorii gyros pervadens, ingreditur, facile impelli, concutique possit. Quandoquidem verò variis aëris motibus excipendis, hæc eadem tympani, membrana modò laxari, modò tendi debuerat, ut inferiùs ostendetur, huic operi tria ossicula a sapientissimo, divinoque Artifice destinata conspiciuntur, *malleolus* nempe, *incus*, & *stapes*, quæ nimirum stapedis, incudis, & mallei figuram exhibent, atque invicem tenuissimis fibris, ac veluti filamentis connectuntur. Itaque cum extrema stapedis pars contrahitur, annexa illi incus impelli debet, eademque contractio in malleolum diffundi, qui, cùm alterâ sui parte tympano adhæreat, tympanum ipsum contrahere, ejusque membranam tensiorem, durioraque reddere debet. Post tympanum, sive membranam hætenus memoratam cavitas quædam, sive spelunca reperitur, quæ aërem innatum continet, ut veteres existimarunt, qui nimirum cum externo communicare, aut ab illo reno-

renovari non posset. Interior hæc spelunca , seu cavitas duas fenestras habet , quarum altera *ovalis* per Eustachii tubam ad palatum ducit , atque per ipsam non modò aër ex ore ad cavernam , verùm etiam aëris agitatio , fremitusque deducitur , ut strepitus , vel sonus ille , qui stridore , vel collisione dentium efficitur ; altera verò *rotundior* ad labyrinthum dirigitur ; meatum nempe , qui in ipsâ ossis substantiâ excavatum , in varios gyros , sinusque flectitur ; tandemque in cochleam definit , cujus quidem spiræ initio latiores , amplioresque sunt , deinde verò sensim contrahuntur . Cochleæ , vel ossi hac admirabili lege in varias spiras contorto subtiliores , mollioresque nervorum fibræ a septimo pari diffusæ superextensæ conspiciuntur , cùm duriores aliæ , crassioresque ejusdem nervi fibræ ad palatum , & linguam dirigantur.

IV. Itaque auditûs organum in tenuissimis ejusmodi nervorum fibris , quæ super cochleam extensæ , vel distributæ fuerint , positam esse ex communi Philosophorum sententia defendi poterit . Illud enim auditûs organum cense-ri debet , in quo aëris tremor , aut sonus imprimi , per nervos ad cerebrum diffundi , vel animæ exhiberi poterit ; id verò in nervis ipsis cochleæ superextensis peragi manifestissimè demonstratur . Exterior enim auricula , aërem , sonumque colligit , qui per meatum ad tympanum deferatur ; neque tamen adhuc sonus ullus percipitur , ut experimur in surdis , in quibus , incolumi licèt auriculâ , aër ad tympanum deferatur , nulla tamen soni sensatio producitur , quemadmodum , etsi nullus per auriculam aër ad tympanum deferatur , sed ex palato per ovalem fenestram ingrediatur , sonus percipitur .

Non

Non aliâ itaque ratione aëris agitatio percipi poterit, quàm si innatus aër per rotundam fenestram in labyrinthū ingressus ad extremam labyrinthi partem, vel cochleam perveniens nerveas fibras ibi diffusas, vel distributas afficiat, atque percellat, ut spiritus nervis ipsis inclusi, ad cerebrum certo quodam impetu, sive vibratione impellantur, eamque in animâ sensationem excitent, quæ ex institutâ jam consuetudine *sonus* vocatur. Hac itaque serie, vel ordine corporum sonus a nobis percipitur, ut ex collisione corporum tremor, & agitatio quædam in collisi corporis partibus, atque circumposito aëre producat, aër agitat, auriculâ exceptus meatum ingrediatur, tympanumque levi quodam impetu impellat, a quo malleolus, ab isto incus, ab incude stapes concutitur, idemque tremor innato aëri committitur, qui rotundam fenestram, vel labyrinthum ingressus tremorem ipsum nerveis fibris, atque spiritibus, cerebroque communicet. Hinc ex validiori, languidiorique aëris agitatione, fortiolem, debiliolemque sonum percipi experimur; ubi membrana noxio humore perfusa, aut nimio, vehementique fragore laxata fuerit, auditus hebescit, quod aëris commoti tremor ad labyrinthum, vel cochleam deferri non possit, aliaque plurima phænomena intelligi, vel explicari facile possunt, quæ in auditu observantur.

V. Quod autem ad auditus objectum, vel sonum pertinet, hunc non aliud esse jam diximus, quàm aëris tremorem, qui a collisis corporibus ad nerveas fibras per varia auditus organa transiens deferatur, ut Aristoteles ipse

mitti.

nitidè, sæpiissimèque definit (a); etsi Peripatetici nostri hac in parte ab illo dissentiant, atque ad *intentionalem* quandam speciem ab aëris motu distinctam confugiant. Incredibilis verò varietas, quæ in sonis, aut vocibus observatur, quæque a Musicis accuratissimè distinguui solet, aliunde repeti, vel oriri certè non potest, quàm a vario tremore, variisque vibrationibus, quibus modò tardiùs, modò celerius; modò fortiùs, modò debiliùs aër ipse impellitur, tympanumque commovet; tardior verò, celerior, fortior, sive debilior agitatio in aëre ex variâ collisi corporis figurâ, texturâ, soliditate, distantia repeti debet, ut a variis corporibus varios etiam sonos oriri videamus. Id experiri licet, atque uberrimè, accuratissimèque demonstrat D. Savveur (b) in fidium chordis, quæ pro variâ illorum crassitie, longitudine, tensione varias, ac inæquales vibrationes, vel itus, reditusque in aëre efficiunt, aquibus varii quoque soni, varique, ac admirabiles in corporibus humanis affectus oriuntur, ut accuratè, eruditèque Boyle, & Kircherius ipse commemorat.

VI. Quandoquidem verò alternis ferè collisi corporis vibrationibus (c) alternè concussus aër, aut aëris agitati tremor [d] non in instanti, sed sensim successivè, & motu prorsus æquabili diffunditur varios nimirum, sensimque ampliores circulos describit, lapidis instar, qui in stagnantis aquæ superficiem inciderit, sonus etiam successivè diffundi, vel propagari.

(a) *De Anim. II. c. 8.* (b) *Hist. Acad. Ann. 1701.*
(c) *Vid. Neut. Prin. Math. II. pr. 43.* (d) *Vid. Mariot. de mot. aquar.*

pagari debet, ut minuto secundo temporis, vel arteriæ pulsu mille saltē pedes percurrat (a). Hinc fulgur discissâ nube conspicimus, tonitru tamen, vel discissæ nubis fragorem nonnisi post aliquod spatium temporis aure percipimus. Hinc ad inæqualem distantiam sonus diffunditur, ut ex-gr. tormenti bellici fragor modò in 60. modò 100. modò etiam 200. miliarium distantia audiatur. Sic agitated aër, aut sonus, non celerior quidem, sed fortior in partem illam diffunditur, in quam spiret ventus; quod si adversum ventum spirare contigerit, sonus languidior, sed non lentior videbitur (b). Languidior etiam, atque debilior est sonus, ubi crassorem aërem, vel aquam subire debeat; quemadmodum etiam si tenuis admodum, rariorque sit aër, ut in machinâ pneumaticâ, vel altissimorum montium verticibus experimur (c), nullus ibi sonus producit, quòd ille certam aëris crassitiem requirat; quæ a collis corporebus circulariter diffusa ad aures perveniat.

VII. Atque ex hoc celeri motu, vel aëris agitati diffusionem oriri debet, quod ubi agitated aër in solidum, durumque corpus incidit, resiliat, vel in oppositam partem reflecti debeat. Hinc in specubus, cavernis aër fremere, boare, sive mugire percipitur, quòd sæpius agitated resiliens, atque ex unâ in partem aliam reflexus varios in aure sonos efficiat. Nihil tamen admirabilius in hac soni reflexione censei debet, quàm *Echo*. Fieri verò, vel audiri dicitur *Echo*, cum aër variè agitated; aut ipsa

(a) Vid. *Trans Phil. n. 113. & Mariott. de mot. aquar.*
 (b) ex obser. *Acad. Flor.* (c) Vid. *Varen. Géogr. lib. I. c. 19. prop. ult.*

ipsa vox in oppositam collis, vel ædificii superficiem incidens, eadem celeritate, sive modificatione reflectitur, ut auribus eundem ferè sonum, eandemque vocem exhibeat; cùmque ex variis reflexionis legibus, quas in *Physica Gen. Tract. III. cap. 9.* ostendimus, reflexus aër, *radit* nimirum *phonici*, sive sonori ad certum locum dirigantur, in ipso loco clariùs percipitur Echo, obscuriùs verò, vel rudiùs si ab eodem loco veluti centro discedamus;

Quod si eadem vox, idemque sonus in plura ædificia, vel plura loca variis intervallis dissita inciderit, eadem vox successivè pluries reflectetur, atque ad aures perveniet, ut prope Carentonium eandem vocem terdecies repetitam esse commemorant; quemadmodum apud Parisios, nuncquè apud Mediolanum trigesies vocem repeti erudimur (a).

VIII. Eadem quoque aëris reflexio in tubis illis, quæ *marina*, sive etiam *loquentes* dicuntur, & a Kircherio primùm inventæ, deinde verò a Morlando, Schotto, Montanario, aliisque compluribus illustratæ, vocis vim vehementer adeo augere conspicitur, ut ad quinque miliaria diffundatur (b). Cùm enim in tubæ orificium vox illabitur statim, in concavam tubæ superficiem incidens in oppositam partem reflectitur, indeque rursus reflexa plurimas alias reflexiones subire debet; cùmque initio quidem angustior, sed sensim deinde latior sit tubæ cavitas, initio exiguum aëris molem vox impellere debet, ideoque levem tremorem, levemque sonum producere; deinde verò repercussus aër


ma-

(a) Vid. Kircher. *Phonur. lib. II.* & Sturm. *Phys. lib. III.*
 (b) Loc. cit. & Schot. *Magia*, & Gasen. 14. 21

maïorem aëris molem agitare debet, gravio-
remque sonum efficere, ut post plurimas refle-
xiones intensior in aëre fremitus, graviorque
vox erumpat e tubâ, quæ ad maximum quo-
que intervallum celerrimè diffundatur. Idque
non modò de Alexandri Macedonis cornu, quo
a 100. stadiorum distantia milites evocabat, ve-
rùm etiam de celeberrimo illo carcere intel-
ligi debet, quem cochleæ instar a Dionysio Sy-
racusarum tyranno constructum ferunt, in quo,
vel submissæ captivorum querelæ nitidè, di-
stinctèque audirentur, de Claudii aquæductu, per
quem vox ad 16. milliaria deferebatur; de
Glocestriensi templo, de mirâ testudine, quæ
in D. Pauli Ecclesiâ Londini invisitur, in qui-
bus portatilis horologii oscillantis sonitus ex
unâ in partem aliam oppositam accuratè per-
cipitur.

C A P. XIV.

*De visus organo, sive de oculi
structurâ.*

1.  Icèt in singulis sensuum orga-
nis mira quædam, & incredi-
bilis partium varietas, atque
structura observetur, ut supe-
rioribus Capitibus demonstra-
vimus, omnium tamen præ-
stantiam, si partium varietatem, ordinem, u-
sumque consideres, longissimè superat oculi
structura, quâ visio, jucundissima nempe colo-
rum omnium perceptio peragitur. Hinc meri-

tò Galenus (a) oculum *Creatoris miraculum* appellavit, quòd in illo maxima divini Artificis sapientia illustriùs, & uberiùs effulgeret; quemadmodum Plinius vocavit *oculos partem corporis pretiosissimam, qua lucis usu vitam distinguat a morte* (b). Admirabilem itaque primum oculi structuram exponemus, tum varias, constantesque leges, quibus in nobis visio peragatur, eaque omnia, quæ ad visionem pertinent, complectemur.

II. Exterior oculi figura, locus, & magnitudo satis experimento cognoscitur, unde posterior solùm illius pars, quæ cranio tegitur, interioresque partes hìc describentur. Palpebris tegitur oculus, ne pulvere, vel fumo lædatur, atque ut demissis palpebris quieti, vel somno faciliùs conciliando lux arceatur; quemadmodum etiam in interiori palpebrarum superficie glandulæ plurimæ, veluti vesiculæ reperiuntur, quæ demissis palpebris oculi superficiem detergunt, ipsamque humentem, facillèque mobilem reddunt.

Oculorum orbitæ, sive globo (*lubricos enim oculos fecit Natura, & mobiles, ut & declinarent, si quid noceret, & aspectum, quo vellet facillè converterent*) (c) varias in partes dirigendo, vel convertendo sex muscoli destinantur, qui in oculi medio ipsi adhærent, variumque nomen a motu, quem oculo imprimunt, sortiuntur. *Elevator* itaque, sive *superbus* dicitur musculus ille, qui oculum attollit; *depressor*, aut *humilis*, qui oculum deprimit; qui oculum versùs nasum adducit, ut in bibendo fieri conspiciatur, *bibitorius*; qui denique oculum versùs aures.

(a) *De usu part.* (b) *Lib. XI. c. 37.* (c) *Cic. Nat. II.*

res convertit, quod indignantium est, *indignatorius* vocatur. Aque isti quidem muscoli, cum oculum in quatuor oppositas partes subinde dirigant, *recti* vocantur. Alii nimirum, qui oculo adnexi, oculum ipsum obliquè varias in partes trahunt, ut in variis affectibus exprimendis fieri conspiciamus, *amatorii*, sive *pathetici* nominantur.

III. Detractis musculis plures in oculo membranæ occurrunt, quæ veluti optici nervi expansiones quædam videntur, tunicarum nempe, quæ ab utrâque meninge diductæ nerveas fibras circumdant. Exterior oculi membrana ab exteriori nervi ipsius membranâ, vel durâ matre oritur, ejusque posterior pars *sclerotica*, vel *dura* vocatur; anterior vero *cornea*, quodd cornu instar dura quidem, sed pellucida sit. Interior deinde, sive secunda oculi membrana, quæ mollior, atque subtilior est, a piâ matre deducitur; in posteriori sui parte *choroides*; in anteriori verò, ubi perforata conspicitur *rhagoides*, vel *uveæ* vocatur, quodd membranam illam exhibeat, quæ granulum uvæ circumdat, detractoque pediculo perforata est. Ejusmodi uveæ foramen *pupilla* appellatur, cui proximè adhærent circulares fibræ, quæ juxta variam lucis copiam modò contractæ, modò expansæ foramen ipsum, sive pupillam modò ampliorem, modò angustiolem efficiunt; cumque variis coloribus præditæ sint, *iridis* nomen sortiuntur. Ultima denique oculi membrana, quæ ex nerveis fibrillis in retis morem intextis componitur, *amphiblestroides*, vel *retiformis*, aut *retina* vocatur, posterioremque solum oculi partem circumdat, cum aliæ membranæ ad anteriorem etiam oculi partem extendantur.

IV. Tres etiam liquores, aut humores in oculo distinguuntur, *aqueus* nimirum, *crystallinus*, & *vitreus*. Aqueus humor est ille, qui in anteriori oculi parte inter uveam, corneamque membranam reperitur. Crystallinus humor, qui paullo densior, atque solidior est aqueo, crystallinæ lentis, rotundæ nimirum crystalli, qualis in telescopiis, vel microscopiis adhibetur, figuram habet. Post uveam, iridemque, inter aqueum, & vitreum, veluti in oculi medio crystallinus collocatur; fibris quibusdam, veluti ligamentis intertextis, undique ambitur, quæ *processus ciliares* vocantur, eandemque iridis originem, atque colores habere dicuntur. Tenuissimâ denique, simulque pellucidâ membranâ crystallinus ipse vestitur, quæ *arachnoides*, vel *arana* vocatur; quæque, cùm vitreum etiam humorem circumdare, atque a crystallino dirimere debeat, *hyaloides*, vel *vitriiformis* appellatur. Vitreus itaque humor in posteriori sui parte retinâ, sive, si mavis, choroide continetur; in anteriori, quâ crystallino jungitur, hyaloide, vel arachnoide. Vitreus humor densior est aqueo, crystallino tamen rarior, unde a crystallino interdum comprimitur; mole tamen reliquos humores superat, ut clariùs exprimitur in fig. X. quæ oculum transversim sectum, sive divisum exhibet, variosque humores, aut membranas, quas in illo descripsimus, repræsentat.

Membrana exterior A B C D in anteriori sui parte B C est *cornea*, in posteriori B A D C *sclerotica*. Secundæ membranæ pars anterior E F est *uvea*, in cuius medio est pupillæ foramen G H; posterior autem E I K F *choroides*; membrana denique L M N O est *retina*. Humor B E

G H

G H F C, qui nimirum corneâ, & uveâ membranâ continetur, est *aqueus*; crySTALLINUS autem est L P O Q, qui crySTALLINÆ lentis instar conformatus in mediâ ferè oculi parte reperitur. Reliquus denique humor L M N O P est *uveus*, qui tenui membranâ, vel *araneâ*, sive *arachnoide* L P O dirimitur a crySTALLINO.

V. Qui verò sit humorum hujusmodi, vel membranarum usus intelligi facilè poterit ex iis, quæ alibi de refractione, ejusque legibus explicavimus. Illi nimirum radiis refrangendis, atque ad oculi fundum deducendis inferviunt.

Sit ex. gr. * radius R S, qui in oculi superficiem incidat in puncto S; hic, nisi *cornea*, vel exterior oculi membrana pellucida foret, in aërem resiliret in Y; aut, nisi aqueus humor illi subjectus aëre densior foret, liberè extra oculum transiret in Z; verùm, cùm pellucidam corneæ membranam ingrediatur, atque humorem aqueum aëre densiorem inveniatur, ita refringetur accedendo ad perpendicularem, ut pupillam ingrediatur in 1; inde ex aqueo rariore in crySTALLINUM densiorem ingressus iterum refrangetur accedendo ad perpendicularem, & perveniet in Q. Exinde verò in vitreum humorem, qui crySTALLINO rarior est, ingressus ita refrangitur, ut a perpendiculari recedat tandemq; perveniat in retinæ punctum X. Id observatur etiam fig. XI. ubi radius quidem B D, qui perpendiculariter in oculi superficiem incidit, atque omnes oculi humores penetrat, non refraangitur; radii verò A O F. C O E oculum oblique ingressi post trinam refractionem

O 3

per-

* Fig. X.

perveniant in F, E. Ex notissimis verò Opticæ legibus, atque experimento ipso manifestissime demonstratur, quod omnes illi radii, qui a puncto B egrediuntur, atque divisi, vel *divergentes* ad oculi superficiem perveniunt, ita refranguntur, ut refractionis ope sensim collecti, vel *convergentes* in eodem retinæ puncto D conjungantur; quemadmodum etiam radii, qui ex puncto A diserguntur, iterum colliguntur in F, atque illi, qui diffunduntur ex C, conjungi debent in E.

VI. Verùm, ut accuratiùs, atque faciliùs, hæc omnia intelligantur, juverit varios Opticæ terminos, voces, vel definitiones exponere; deinde verò singula, aut illustriora certè visus phænomena explicare; quod syntheticâ ferè, vel geometricâ methodo præstabimus.

1. Opticus radius est illa recta linea, quæ ex aliquo objecti corporis puncto egrediens, oculi pupillam ingreditur, & humores omnes penetrat, ut rectæ A F, B D, C E. *

2. Axis opticus est ille radius, qui per pupillæ, & humorum omnium centrum transit, ut B D, ideoque sinè ullâ refractione ad retinæ punctum D pervenit.

3. Pyramis etiam, aut conus opticus dicitur ille, qui formatur a radiis omnibus; qui ex aliquo objecti puncto, ex. gr. B, diffunduntur, atque pupillam ingrediuntur; unde pyramidis hujus, aut coni B G H vertex erit in objecti puncto B, basis autem in pupillâ G H.

4. Huic pyramidi, vel cono pyramis, vel conus alter opponitur, qui ex radiis ipsis pupillam ingressis, atque ob refractionem in unum reti-

retinæ punctum collectis componitur ; unde illius basis erit pupilla GH , vertex autem retinæ punctum D .

5. Porro ex utroque cono simul conjuncto, ex exteriori nimirum, qui fit a radiis divergentibus, & interiori, qui a convergentibus radiis efficitur, componitur *penicillus* opticus $BGDHB$, qui apicem unum in aliquo objecti puncto B , & alterum in D puncto retinæ sibi correspondente habet.

6. Tot itaque coni, vel penicilli formari debent, quot sunt in objecto puncta, ex quorum singulis radii divergentes ad pupillam feruntur.

VII. Exinde verò facile intelligi poterit admirabilis illa ratio, vel ordo, quo in nobis *visio*, sive lucidi, coloratique corporis cognitio perficiatur. Cum etenim ex singulis objecti punctis radii plurimi sic ad oculum dirigantur, ut pupillam ingressi, atque in humoribus refracti, simulque collecti ad aliquod retinæ punctum ferantur, accuratissima objecti imago ab ejusmodi radiis in oculi fundo, vel retinâ describetur: eadem ferè ratione, quâ a radiis illis, qui e singulis rosæ, seu vultûs nostri punctis egrediuntur, atque in speculi superficiem incidunt, accuratissima rosæ, seu vultûs imago in speculi superficie describitur, ac ferè depingitur. Clariùs hoc, & illustriùs etiam, nec sinè maximâ certè jucunditate, observatur in camerâ, sive cubiculo optico. Si etenim cubiculi fores, atque fenestræ ita occlusæ fuerint, ut omnis ingressus luci prohibeatur, tum in fenestrâ sive pariete foramen aliquod aperiatur, per quod radii lucis ingredi, atque in oppositum parietem incidere possint, ab ejusmodi radiis in hoc ipso pariete veluti in speculo ac-

curatissima corporum omnium imago delineabitur, quæ extra cubiculum reperiantur; inverso tamen situ, vel ordine, ut illa nimirum, quæ sinistra sunt, dextera appareant; quæ superiora sunt, inferiora, &c.

Quod si oculum ipsum fig. X. & XI. delineatum cum optico cubiculo comparaveris, interior, & obscura oculi cavitas cubiculum repræsentabit, in quod per solum pupillæ foramen G H radii ingredientur; posterior oculi membrana E D F erit oppositus ille paries, in quem singuli radii incident, ideoque accuratissimam exterioris objecti imaginem delineabunt, ordine tamen, aut situ inverso, ut dextera nimirum objecti pars A in sinistrâ oculi parte F depingatur, sinistra C in dexterâ E.

Id verò hac ipsâ ratione fieri non modò superioribus opticæ camerae, & speculi exemplis, verùm etiam clarissimis aliis experimentis evidentissimè demonstratur. Si etenim ad alterius hominis oculum proximè accedas, in ipsius oculis veluti in speculo tui vultûs imaginem contemplaberis, quod certè fieri non posset, nisi radii ex tuo vultu in alterius oculum ratione superiùs expositâ ingrederentur.

Quod si accuratiùs adhuc id contemplari desideres, oculo humano, vel bovino elixato, vel congelato ne humores diffluant, posteriores membranas, scleroticam nimirum, & choroïdem detrahe, atque choroïdis loco albumen ovi, aut tenue velum, foliumve appone; in hoc enim velo, aut albumine elegantissimam objectorum corporum imaginem, ut in optico cubiculo fieri diximus, accuratè delineatam intueberis; quod argumento maximo esse debet exterioris objecti imaginem a radiis illis, qui

qui per oculi pupillam ingressi, post varias refractiones ad oculi fundum perveniunt, accuratissimè delineari.

VIII. Illud etiam postremò observare juverit oculi pupillam pro variâ objectorum distantia, sive lucis copiâ ita variari, ut aliquando angustior, aliquando latior, & amplior videatur. Id experiri facilè possumus in pueris, qui, si in uberiori luce objectum aliquod intueantur, pupillam maximè constringunt; quemadmodum etiam, si oculos in objectum aliquod minutum defigant; experimur etiam in felibus quorum pupillam interdum angustam adeo conspicimus, ut veluti tenuè filum videatur; noctu verò pupilla latior admodum, ac veluti lampas colluceat. Atque hinc etiam oritur, quod ubi, ex clariori loco in obscurum ingredimur, nihil initio videamus; deinde autem sensim objecta corpora distinguamus; at verò, si ex obscuriori loco in magis illuminatum transeamus, aliquis in oculo dolor excitetur. In clariori siquidem loco angustior est pupilla, ne uberiori lucis copiâ offendatur, ideoque dum in obscuriorem locum transfertur, neque repente diduci potest, tenuem solùm radiorum copiam recipit, quæ objectis corporibus in obscuriori loco distinguendis par esse nequeat; dum verò sensim amplior efficitur, clariùs eadem corpora intuetur. Quod si in obscuriori loco maximè dilatata fuerit, atque repente in clariorem locum transeat, vehementiori lucis copiâ offendetur, nihilque distinctè conspiciet, donec sensim contracta, tenuem solùm radiorum copiam excipiet. Hinc animalia quædam, ut noctuæ, talpæ noctu solùm, non interdum conspiciunt, quòd ampliorem oculi pupillam ha-

habeant, ideoque uberiori diei luce illarum oculi veluti perstringantur. Ejusmodi verò pupillæ contractio, vel dilatatio fit ope fibrarum, quæ crystallino humori circumpositæ sunt, quæ cum extenduntur pupillæ foramen angustius efficiunt, apertius verò dum ipsæ constriunguntur. Quo certè fieri debet, ut extensis ejusmodi fibris, atque contractâ pupillâ crystallinus constriungatur, ideoque convexior, radiisque facilius unniendis aptior efficiatur. Contractis verò fibris, ac dilatatâ pupillâ crystallinus humor depressior fiat, ideoque minùs refrangat, ac uniat radios.

IX Hinc etiam intelligi, vel explicari poterunt varia phænomena, quæ circa visum, non sinè maximâ certè jucunditate, ac admiratione, conspiciamus, quæque nos hîc ordine subiiciemus.

1. Ac primò intelligi poterit, quod objecta corpora, quò remotiora fuerint, minora nobis apparent; ut ex. gr. majus apparet objectum $A C$, quàm $a c$. Quò etiam corpus oculo proximius fuerit, radii $A F$, $C E$ majorem angulum opticum $A O C$ in pupillæ centro constituent, ideoque majus quoque spatium in oculi fundo occupabunt, sive majorem objecti imaginem in retinâ, sive choroide delineabunt; quò verò remotius fuerit objectum, minor erit angulus opticus $a O c$, ideoque radii $e f$ minus oculi spatium occupantes, minorem in retinâ objecti imaginem depingent; cùm itaque ex imaginis illius amplitudine, quæ in retinâ imprimitur, major, aut minor objecti amplitudo ab animâ concipiatur. majus apparebit objectum in proximiori, quàm remotiori loco.

2. Quod si maxima sit objecti distantia, aut mi-

minima corporis moles, ut angulus opticus A O C minimus, ac insensibilis sit, ideoque minimam, ac insensibilem objecti imaginem in retinâ depingat, objectum erit insensibile, sive percipi, aut distingui non poterit.

3. Hinc, licet arbores in ambulacris, columnæ, sive parietes in porticu æquidistantes, vel paralleli sint, sensim tamen inter se accedere, sive conjungi videntur, quòd angulus ille, quo remotiorum arborum, sive columnarum distantia videtur, sensim minor fiat, ideoque distantia minor ab animâ concipi debeat.

4. Atque hinc etiam aliqui oriri putant, quod Sol, & alia sidera majora nobis appareant dum in horizonte versantur, quàm ubi ad meridianum pervenerint, quòd nempe illorum radii sic in aëre interposito, plurimisque vaporibus permixto refringantur, ut majorem in oculi fundo solis imaginem imprimant; major etiam imago imprimi debet in oculo, dum Sol in horizonte reperitur quia tunc aër, & oculus ipse minori luce perfunditur, ideoque amplior est pupilla, & imago, quæ a radiis pupillam ingressis efformatur in retinâ. Verùm effectus ille, neque a refractione, neque a minori aëris luce, sive majori dilatatione pupillæ oriri potest. Non a refractione quidem, quia si telescopio Sol observetur, æqualis ubique molis conspicitur, etsi telescopium ipsum refractiones minimè tollat. Non a dilatatione pupillæ, quia si carta acu perforetur, & ipse Sol per ejusmodi foramen, quod semper æquale sit, & ab amplitudine pupillæ maximè superetur, Sol conspiciatur, inæqualis adhuc Solis magnitudo apparebit. Verisimilius est itaque quod hæc apparens major Solis magnitudo ex præjudicio,
vcl

vel præconceptâ opinione oriatur, quodd illa corpora majora nobis videantur, vel certè ut majorâ a nobis concipiantur, quæ veluti remotiora concipimus; ideoque cùm ex longâ, ac interpositâ corporum serie, ut montium, arborum &c. major apprehendatur a nobis distantia Solis in horizonte, quàm in meridiano, tunc etiam major illius magnitudo a nobis concipietur.

5. Hinc etiam figuræ, vel corpora, quæ multilatera, vel irregularia sunt, si ex aliquo remotiori loco spectentur, rotunda apparent,

ut turris, prope qua quadrata surgit,

attritis procul angulis, rotatur,

& ipsa sidera, sive planetæ, etsi scabram, & asperam superficiem habeant, rotunda nobis videntur. Angulus enim ille, quo prominentiæ, vel asperitates ejusmodi videntur, insensibilis est, adeoque montes ipsi, anguli, vel prominentiæ distingui non poterunt.

6. Hinc ille motus, quo remota corpora, ut ex sidera unico minuto temporis feruntur, etsi celerrimus sit, lentus videtur, quodd spatium ipsum peractum, ratione distantia, insensibile appareat, ideoque vix motus ipse, ejusque celeritas distingui possint.

7. Quemadmodum etiam corpora, quæ celerrimè spatium aliquod excurrunt, spatium ipsum, quod peragunt, implere videntur, ut fidium chordæ dum impelluntur ita tremunt, ac vibrantur, ut integrum spatium quod ita, redituque describunt, occupare conspiciantur; & dum funda, vel accensus torris in girum celerrimè circumducitur, circulus integer in aëre ab illis descriptus conspicitur ac si lapis ipse, vel titio vestigium ubique post se relin-

relinqueret ; quia nimium vibratio , quâ retinæ fibræ percelluntur , non repente cessat , sed per aliquod spatium temporis perseverat , ideoque ex hac continuâ fibrarum vibratione continua objecti præsentia , sive perceptio deducitur .

8. Motus itaque corporum a nobis percipitur cum aut oculus ipse paulatim torquetur , ut corporis , vel objecti mobilis motum sequatur ; aut certè cum in tenuissimis retinæ fibris aliqua vibratio , vel motus excitatur , atque deprehenditur . Hinc ebrii , ac deliri circumposita corpora in gyrum agi conspiciunt , duplicemque solem vident , quod retinæ fibræ , vel spiritus ipsi opticis nervis inclusi perturbato hoc motu agitentur , eandemque in animâ impressionem excitent qualis a circumactis corporibus excitaretur .

9. Inde etiam fit , ut dum *provehimur portu , terraque urbesque recedant* , navigantibus nimirum stare navim , ac litora moveri videantur , quod navis imago in eadem semper oculi parte quiescat , sive nulla mutatio ex navi in oculo oriatur ; litorum verò imago semper in oculo varietur , sive diversis oculi partibus correspondeat , ideoque oculus ipse moveri debeat , ut eandem semper litoris partem intueatur .

10. Postremò intelligi , & explicari poterit cur duobus oculis objectum unicum videatur , quod variâ ratione a variis Philosophis explicatur . Villisius enim , Bartholinus , & ex veteribus etiam Galenus , aliique putarunt id fieri , quod optici nervi prope infundibulum conjungantur , atque in nervum unicum confluantur , ideoque duplex objecti imago , quæ

in

in oculis impressa, sive depicta fuerit, in hac ipsâ nervorum conjunctione ita permisceatur, ritèque confundatur, ut in imaginem unicam convertatur. In plurimis enim hæc opti-
corum nervorum conjunctio non est observa-
ta, qui tamen duplex objectum intueri non
solebant. Quamvis etiam nervi jungantur,
intelligi non potest, quomodo objecti imagi-
nes simul conjungi possint, longèque verisimi-
lius est, quod illarum utraque imperturbata, ac
distincta ad cerebrum usque feratur, ut imagines
illæ diversorum corporum, quæ per unum,
idemque pupillæ, vel fenestræ foramen in oculo
ingrediuntur, distinctè in oculi fundo
imprimuntur. Quod si fortasse ritè conjungi
possent, cum optici nervi post conjunctionem
iterum separantur, dividi quoque imago, vel
duplicari deberet. Postremò, si oculum leviter
digito compresseris, geminatum objectum con-
spicies, quod in ebriis etiam fieri diximus;
neque tamen hac levi compressione, vel ebrie-
tate optici nervi separantur. Cartesius, alique
id fieri existimant, quòd utraque objecti ima-
go in oculis impressa per nervos opticos ad
eandem glandulæ pinealis partem feratur, ideo-
que unicam in animâ sensationem, sive per-
ceptionem excitet. Sed hæc explicandi ratio
non modò glandulam pinealem, veluti ani-
mæ sedem gratis, ac immeritò supponit, ut
Disput. IV. Cap. III. ostendemus, sed ner-
vorum originem ex iisdem glandulæ punctis
repetit, quod ambiguum maximè, incertum-
que est. Gassendo, aliisque videtur quod u-
nius objecti visio, non simul utroque oculo,
sed alternis solùm vicibus fiat, ut axes nimi-
rum optici oculorum paralleli sint, neque ad
idem

idem objecti punctum tendere, & conjungi possint, sed ubi axis unius oculi in punctum aliquod objecti dirigitur, axis alterius oculi aliò distractus nonnisi obscurè, & leviter intueatur, unde unica solùm objecti imago, & perceptio oriatur

Certè cùm aliquod objectum præsertim exiguum, acriter intueri volumus, defatigatio quædam sentitur in oculo, laxatis nempe musculorum fibris, quibus oculi in illo situ conservantur; atque ubi digito oculos ita diducimus, ut illa axium conjunctio impediatur, objectum repente duplicatum conspiciamus.

Ceterum an unica objecti imago, vel unica visio ex ejusmodi optidorum axium conjunctione sit repetenda, ut Gassendo videtur, incertum est. Quod enim axes optici in uno, eodemque objecti puncto jungantur, efficit quidem, ut æqualis omnino in utroque oculo objecti imago efformetur, sive quod oculi æqualiter videant, non verò quod duplex in oculo objecti imago non efformetur; atque ex utroque oculo distincta imago ad cerebrum non feratur, ideoque semper explicandum superest cur ex hac duplici imagine, quâ cerebrum, & anima cerebro insidens afficitur, duplicis objecti speciem non concipiat.


Clarius itaque, simplicior, atque fortasse verisimilior opinio est, quod, licet duplex in oculo objecti imago efformetur, cùm utraque tamen æqualis sit, eandemque in animâ, atque in cerebro impressionem efficiat, sive quod ad eandem cerebri partem feratur, sive quod æquali prorsus, & eadem vibratione varias cerebri partes percellat, unicam quoque in illâ sensationem producat, ut unica proinde non
du-

duplex objecti visio oriatur Duplex certè in auribus soni species producitur, cùm utraque auris percipiendo sono par esse possit, unus tamen sonus duplici aure percipitur, sive quòd *acustici*, vel auditorii nervi ad idem cerebri punctum dirigantur; sive quòd æqualis, & eadem utriusque nervi agitatio fiat, quæ æqualem, eandemque soni speciem in cerebro imprimat, ut anima proinde, quæ duabus similibus speciebus simul, eodemque tempore percelli se sentiat, aut unam ab aliâ non distinguant, aut uni acrius intenta aliam distinguere non possit, quod in gustu, olfactu, & cæteris etiam in sensibus confirmatur. Quemadmodum itaque variæ objectorum, vel sensibilibus species, quæ in variis linguæ, vel narium fibris excitantur, unicam solùm odoris, & saporis speciem, vel sensationem producant, ità quoque distinctæ objecti species, quæ in oculis producuntur, unicam solùm visibilis objecti speciem, & sensationem producant in animâ, quod clariùs intelligi poterit, ubi in XVI. Capite de visione dixerimus.



C A. P. XV.

*De visûs perficiendi ratione, sive de
conspicillis, telescopiis, speculis,
ac microscopiis.*

I.  Ptandum quidem maximè fuerat, ut admirabilis illa partium varietas atque textura, quam in oculo reperiri jam diximus, objectis omnibus nitidè, distinctèque conspiciendis par esse posset. Verùm, cùm incredibilis, & infinita ferè partium subtilitas, aut illorum distantia acriores etiam oculorum vires effugiat, id unum quærendum fuerat, ut instrumenta quædam ab arte conficerentur, quibus in remotissimis etiam, ac tenuissimis corporibus nitidè contemplandis feliciter uteremur. Maximo itaque, ac admirabili studio *conspicilia, telescopia, & microscopia, vel enzyscopia* inventa sunt, quibus vel tenuissimorum corporum magnitudo augetetur, vel remotissima corpora veluti proxima redderentur; tantaque rerum seges, & uberrima cognitionum series inde manavit, ut tres eximæ facultates, aut scientiæ, *Optica* nimirum, *Dioptrica, & Catoptrica* sint institutæ. *Optica* visionem ipsam, sive radios directos, qui oculi fibras, & cerebrum ipsum percellunt, considerat; *Dioptrica* radios, qui refranguntur, ac ipsâ refractione visioni perficiendæ plurimùm conferunt; *Catoptrica* denique reflexos radios, va-

Tom. IV.

P

rias-

riasque speculorum species contemplatur. Opticæ leges, atque principia superiori Capite nos exposuimus; Dioptricam igitur, atque Catoptricam hoc complectemur, ut de refractione primum, deinde verò de reflexione, earumque legibus, & usibus differamus.

II. Illud itaque primum veluti certum, exploratissimumque supponi debet, quod radii lucis, dum ex rariori in densius aliquod medium, ut ex aëre in aquam, sive crystallum transeunt, ita refranguntur, ut, si ad punctum illud, in quod inciderint, perpendicularis ducatur, radius ab institutâ lineâ deflectens ad perpendicularem ipsam accedat; sin verò radius ex densiori medio in rarius penetret, ut ex aquâ, sive crystallo in aërem, tunc ab ipsâ perpendiculari recedat. Sic ex. gr. * quicumque radius AB , si moveri pergeret in aëre, rectâ lineâ perveniret in C , sed aquam subiens inflectitur, sive refrangitur in B , atque refractus pervenit in D accedens ad perpendicularitatem EB ; quod si ex puncto D recederet, ac primum per aquam, deinde per aërem moveretur, ab ipsâ perpendiculari BF recederet, ac perveniret in A . Radius tamen ille, qui in densiori medio refrangitur, non accuratè ad punctum unicum tendit, sed in plures veluti partiales radios dividitur, dirimitur, sive spargitur, quæ radii dispersio *diffractio* vocatur, atque a Grimaldo primum observata, ceterisque lucis proprietatibus adjecta est. Unicâ tamen rectâ lineâ refractus etiam radius, claritatis gratiâ, exprimitur, unicumque angulum cum perpendiculari formare concipitur. Angulus ABG dici-

* Fig. XII.

dicitur *angulus incidentiæ*; *angulus A B F* *angulus inclinationis*; *angulus E B D* *angulus refractus*, *angulus* denique *E B C* *vocatur angulus refractionis*.

III. Porro inter ejusmodi quatuor angulos, qui a radiis incidentibus cum perpendicularibus fieri conspiciuntur, nulla certa ratio, sive proportio reperitur, ut proinde veteres Optici, ac Dioptrici singulos angulos refractos, qui pro variâ radii incidentis inclinatione variari debuerant, arcubus, & quadrante metirentur, Nuperrimè verò Cartesius (a), sive, qui Cartesio præluxisse putatur, Snellius accuratissimè comperit, quod servatâ semper eâdem utriusque mediî densitate, inter sinus angulorum *inclinationis*, & *refracti* eadem semper ratio, quicumque fuerit inclinationis angulus, constantissimè conservatur; ut ex. gr. si sinus *A H*, qui nimirum angulo inclinationis *A B F* correspondet, ad sinum *E D*, qui correspondet angulo refracto *E B D*, fuerit ut 4. ad 3. ut in illo radio contingit, qui ex aëre transit in crystallum, etiam sinus cujuslibet alterius anguli inclinationis ex aëre in crystallum erit similiter ad sinum anguli refracti sibi correspondentem, ut 4. ad 3.

IV. Quî verò fieri debeat, ut radius ipse, dum ex rariori medio transit in densius ita lege superiùs expositâ refrangatur, ut ad perpendicularem accedat, definiri vix poterit. Cartesius (b) enim ipse, Neutonus (c), atque Rohaultius (d) existimat id oriri quod celerius, atque facilius moveatur lux in densiori me-

P 2

dio

(a) *Dioptr. dissert. II.* (b) *Ibid.* (c) *Opticq.* (d) *Phys. Part. I. c. 27. vid. Graves. Phys. Par. II.*

dio, quàm in rariori, quòd nempe meatus, aut pori, qui inter aquæ, cryſtalli, ſive denſioris corporis partes reperiuntur, firmiores, ſtabilioresque ſint, quàm illi, qui in aëre, ſive inter rarioris, flexibilioresque corporis partes reperiuntur; ideoque ſi liberiùs, atque celeriùs lux in aquâ, ſive cryſtallo tranſcitur; perpendicularis EB , quæ à luce deſcribi concipitur in aquâ, major erit perpendiculari BH , quam lux æquali tempore deſcribere concipitur in aëre, ideoque angulus refractus EBD minor erit angulo inclinationis ABH , ſive radius BD accedet ad perpendicularem EB . Barovvius (*) tamen, aliquæ plurimi arbitrantur ex oppoſitâ potiùs cauſâ, ſive principio pendere, quòd lucis radii, dum refranguntur, ad perpendicularem accedant, quòd nempe lentiùs, atque debiliùs in denſiori, quàm rariori medio moveantur; ideoque ex duplici motu, quo motus obliquus AB componi concipitur, perpendiculari nimirum HB , & horizontali AH , perpendicularis HB , qui ab intrinſeco, vel innato principio oriri putatur, ſemper idem, & perſeverans concipitur, horizontalis autem AH , qui extrinſecus, ac ſerè violentus eſt, ſenſim minuitur; ideoque radius BD minùs horizontalis eſſe debet, aut magis perpendicularis, hoc eſt ad perpendicularem ipſam accedere. Et ſanè intelligi, vel explicari non poteſt cur in hypothefi Cartefianâ, ſi radius in denſiori medio celeriùs, atque faciliùs movetur, debeat potiùs augeri motus perpendicularis, quàm horizontalis, ideoq; radius potiùs accedere ad perpendi-

cu-

cularem, quàm ab illâ recedere, nisi quòd radius ipse ex naturâ propriâ magis determinatur ad motum perpendicularem, quàm horizontalem. Id unum tamen opponi meritò poterit, quod globulus ex. gr. plumbeus, qualis a sclopeto exploditur, & alia crassiora corpora dum refranguntur, non lucis instar, ad perpendicularem accedant, sed potiùs ab ipsâ recedant; quòd illa fortasse non lucis instar poros in aquâ sibi pervios, ac facilè penetrabiles reperiunt, sed majorem in ipsâ resistantiam offendant, viamque sibi aperire debeant. Ceterùm, quæcumque sit causâ cur hoc potiùs, quàm alio modo radius reflectatur, illud omnino certum est, quod ubi ex rariori medio transit in densius refringi debet accedendo ad perpendicularem.

V. Porro ex hac universali ratione, vel lege refractionis veluti ex uberrimo fonte dimanat quidquid de variis lentium generibus est observatum, ideoq; etiam singulæ conspiciuntur, telescopii, ac engyscopii, vel microscopii utilitates, quas incredibili, ac infinitâ ferè jucunditate experimur. Varias ergo conspiciuntur species, quæ ex variâ figurâ dependent, hîc ordine subiiciemus; variasque leges, aut proprietates, quibus lucis radios illæ dispergunt, aut colligunt, ut variis possint usibus, perficiendæ nimirum visioni adhiberi.

VI. Lentæ itaque, sive crySTALLI, vel *plano-plana*; vel *plano-convexa*, vel *plano-concava*; vel *convexo-convexa*, vel *concavo-concava*, vel *convexo-concava* sunt.

1. Plano-planæ, sive simpliciter planæ dicuntur illæ, quæ ex utrâque parte planæ sunt ut A B. (a). P 3 2. Pla-

2. Plano-convexæ sunt illæ, quæ alterâ ex parte planam, & ex alterâ convexam superficiem habent, ut F B B D G in Fig. XIV.

3. Plano-concavæ, quæ alterâ quidem ex parte planam, ex alterâ verò concavam habent superficiem, ut E B D F in Fig. XV.

4. Convexo-convexa dicitur illa, cujus superficies ex utraque parte convexa sit, ut F B D G in Fig. XVI.

5. Concavo-concava, quæ utramque superficiem concavam habet, ut E B D F Fig. XVII.

6. Denique concavo-convexa, sive *meniscus* vocatur, quæ concavam ex unâ, convexam ex aliâ parte superficiem habeat, ut A B C in Fig. XVIII.

VII. Quandoquidem verò vitra, sive crystallinæ lentes, quæ concavæ, sive convexæ sint, ita plerumque formari solent, ut circula-rem figuram habeant, sive sint portiones, atq; segmenta alicujus crystallinæ sphaeræ, si convexæ sint, ut A B Fig. XIX. sive, si concavæ sint, complementa quædam, quæ crystallinæ sphaeræ applicari, vel aptari possint, ut A B Fig. XX. concipi debet integra sphaera A B C E, cujus crystallinæ lentes segmenta, vel complementa sint. Axis ejusmodi crystallinæ sphaeræ E B dicitur axis *cavitatis*, sive *convexitatis* illius, quæ reperitur in lente concavâ, sive convexâ; quemadmodum ex innumeris radiis, qui crystallinam lentem pervadere, sive traicere possunt, radius ille *lentis axis* vocatur, qui coincidit cum axi sphaeræ; sive perpendicularis est utrique superfici ei lentis crystallinæ, ut radius B D, B D utriusque Fig. XIX. XX.

VIII. Admirabilis ergo varietas, quâ radii lucis in crystallinâ lente colliguntur, aut disper-

perguntur, ex solâ ipsarum figurâ dependet, ut accuratissimis experimentis Cartesius, alii-
que innumeri demonstrarunt.

1. Ac primò, si vitrum, sive crySTALLUS plano-plana foret, hoc est ex utrâque parte plana sit illius superficies, radii, qui paralleli super ipsam inciderint, paralleli quoque ex illâ prodibunt. Cùm etenim ex aëre in crySTALLUM, rariori nempe medio in densius transeant, ita refringi debent, ut ad perpendicularem accedant, deinde verò cum ex crySTALLO rursus in aërem, ex densiori nimirum in rarius medium exhibunt, iterum oppositâ ratione refrangentur, ut a perpendiculari recedant, tantum nempe ad perpendicularem accedant ingrediendo, quantum egrediendo recedunt, ideoque cùm eodem angulo, vel inclinatione in superficiem incidant, & egrediantur, radii inter se paralleli esse debent. Id observatur etiam, atque eadem prorsus ratione demonstratur in *meniscis*, aut lentibus illis, quæ convexo-concavæ sunt, quarum superficies concentricæ, vel parallelæ sint, ut in figurâ XVIII. conspicitur.

2. Quod si lens plano-convexa fuerit, ut A B C (a) planâ nimirum, & convexâ superficie contineatur, quæcumque illius superficies soli, vel corpori lucido obvertatur, radii A B, C D, qui obliquè in ipsam inciderint, ita ingrediendo simul, & egrediendo refringentur, ut in puncto, vel foco E conjungi debeant, qui focus ab ipsâ lente integrâ convexitatis diametro distet; nisi quod radii, qui a lentis axe remotiores fuerint, ad aliquod axis punctum in minori distantia colliguntur; unde radiorum

P 4

aber-

aberratio, & imperfecta foci determinatio exoritur. Postquam verò conjuncti fuerint in puncto E iterum disgregantur, ac in oppositas partes feruntur.

3. Sin verò sit convexo-convexa, vel ex utrâque parte convexam superficiem habeat, ac si duobus segmentis æqualibus ejusdem sphæræ componatur, ut in Fig. XVI. tunc radii magis, sive duplò intensius refringentur, ut in puncto, vel foco E colligantur, qui focus a lente dimidiâ solùm convexitatis diametro recedat, etsi radii a lentis axe remotiores propius uniantur, ut antea dicebamus. Ad dimidiam quoque convexitatis diametrum colliguntur radii si in rotundâ phyalâ aquæ plenâ refringantur; quod si sphæra vitrea assumatur, in illâ radii citius, hoc est in quartâ diametri parte colliguntur, atque universali-ter, quò sphæra, sive crySTALLINA lens convexior sit, hoc est portio minoris sphæræ, eò citius, vel in minori distantia radios colliget, quòd ipsa quoque convexitatis diameter minor esse debeat.

4. Quemadmodum verò convexis lentibus radii, qui paralleli inciderint, conjunguntur; ita in concavis idem radii distrahuntur, ac disperguntur, seu divergentes redduntur. Sic ex. gr. radii A B, C D Fig. XVII. qui paralleli in concavam lentis superficiem incidant, refringuntur, ut ad perpendicularem accedant, ideoque divergentes in crySTALLUM ingrediantur; deinde verò dum ex crySTALLO in aërem egrediuntur, a perpendiculari recedunt, unde magis divergentes fiant, tandemque desinant in G, H, ac si per rectam lineam, sinè ullâ refractione ex puncto I. prodissent. Ejsmo-
di

di verò punctum I., in quo radii producti conjungerentur, vocatur focus *apparens*, vel *imaginarius*, cum revera radii concavæ lentis ope minimè jungantur, sed potiùs dispergantur. Denique punctum illud, vel focus I., si lens crySTALLINA plano-concava sit, ab ipsius superficie integrâ concavitatis diametro distat; sin verò concavo-concava sit, dimidiâ solùm concavitatis diametro recedit, hoc est ita radii disperguntur in primo casu ac si ab integrâ diametro venirent, at in secundo ac si a dimidiâ solùm diametri distantiâ procederent.

IX. Quæ verò in lente plano-convexâ, sive convexo-convexâ dicta sunt, vel explicata de radiis, qui paralleli sunt axi lentis, & inter se, qui nimirum in certo loco, vel foco, certâque distantiâ colliguntur, intelliguntur etiam de radiis illis, qui paralleli sunt inter se, sed obliqui ad lentis axem. Isti nimirum aliorum instar in certo loco, certâque distantiâ uniuntur, quæ modò major, aut minor est, juxta variam inclinationem, quâ obliqui radii in lentem inciderint: ut in Fig. XXI. radii, qui diffunduntur ex A, colliguntur in C; radii, qui egrediuntur ex B, uniuntur in D, unde in spatio, sive lineâ, vel superficie D F E tot radiorum apices, vel penicilli desinunt, quot sunt illi radii, qui ex objecti punctis adveniunt; unde linea D F E, *basis ordinata*, vel *basis distinctionis* vocatur.

Illud postremò observandum est, quod sicuti in lente convexâ radii, qui paralleli ingrediuntur in lentem, colliguntur in E; ita radii, qui prodirent ab ipso puncto E, sive divergentes ingrederentur in lentem, paralleli exirent; sicuti radii, qui paralleli ingrediuntur in lentem

tem concavam ita disperguntur, ac divergentes egrediuntur a lente, ut si prodirent a puncto I., ita radii H F, G E, qui convergentes in lentem inciderent, ac si ad punctum I. tendere, ac uniri deberent, ita disperguntur, ut paralleli exeant a lente in D C, B A.

Quod si radii convexam crystallum * subeuntes non paralleli forent, sed ab aliquo puncto B divergerent, tunc ab ipsa convexâ lente non ad convexitatis semidiametrum, sed in alio puncto O veluti foco conjungerentur, ut quod proximius est punctum illud, a quo discedunt, majorique inclinatione, vel angulo acutiori in lentem inciderint, eo remotius sit punctum illud, aut focus, in quo colliguntur; & e contra quod remotius fuerit punctum, a quo discedunt, in proximiori foco jungantur.

X. Atque ista sunt, quæ de refractione, ejusque miris proprietatibus partim a Veteribus, partim etiam, ac longè quidem uberius, & illustrius a Recentioribus tradita, ac observata sunt. Et certè, quod ab antiquissimis usque temporibus crystallinæ lentis convexæ vis cognita foret apud Aristophanem (a) Strepsiades ille demonstrat, qui, cum æruscator esset, plurimoque ære alieno gravatus, id consilii suscepisse se gloriabatur, ut exhibitas sibi cautiones, cereas nimirum tabellas, quibus æris accepti summa inscripta fuerat, interposito vitro liquefaceret, omnesque syngraphæ characteres oblitteraret. Accuratioris deinde Philosophi cum radiis in aqueâ phyalâ trajectis, atque ad punctum unum collectis clariorem lucem in ipso foco produci conspicerent, ad exiguos

(a) *Nub. Act. II. Scen. I. Vid. Plin. XXVI. + Fig. XXIV.*

guos characteres, vel minutiora corpora nitidiùs distinguenda phyalis ejusmodi inter objectum, & oculum positus utebantur.

XI. Atq; hæcenus quidem Veterum industria in vitris elaborandis, atque perficiendæ visioni fœliciter adhibendis progressa est. Nuperimè verò, nostrisque ferè temporibus *conspicilia*, vel ut vulgo communiter vocari solent, *ocularia*, inventa sunt, quibus debilior, atque languidior juvenum, plerumque tamen senum visio adjuvetur. Quis porrò eximium istud instrumentum invenerit Auctoribus inter se mirificè dissidentibus, incertum foret, nisi Reditus in epistolâ ad Pauli Falconerium plurimis auctoritatibus ostendisset hanc laudem Alexandro Spina Ord. Prædicatorum deberi, qui circa annum 1280. omnium primus ejusmodi *conspicilia* invenerit, aut certè construxerit. Ut autem illorum utilitas, atque structura nitidiùs intelligatur, observandum est id, quod superiori Capite ostendimus cum de oculi structurâ, & humoribus loqueremur; radios nimirum, qui ex variis objecti punctis feruntur ad oculum, in variis oculi humoribus ita refrangi, ut in totidem retinæ punctis colligantur, atque in retinâ veluti *ordinatâ basi*, vel *basi distinctionis* accuratissimam objecti imaginem depingant, quod in oculo etiam mortuo, in optico cubiculo fieri demonstravimus. Cùm tamen ejusmodi radiorum collectio a crySTALLINI humoris figurâ plurimùm pendeat, ex variâ quoque crySTALLINI humoris figurâ fieri debet, ut radii non in ipsâ retinâ, sed citiùs, aut tardiùs, in proximiori nempe, vel remotiori loco a crySTALLINO humore conjungantur. Si itaque crySTALLINUS humor convexior, ac protuberantior sit, radii

dii magis in illo refranguntur, ac citius uni-
entur, antequam ad retinam perveniant; unde
radii, postquam in aliquo vitrei humoris pun-
cto veluti foco collecti fuerint, iterum disper-
gentur, atque ad retinam diffusi, ac dispersi
perveniunt, ideoque confusam in illâ objecti
imaginem delineabunt. Quod si crystallinus
humor depressior sit, minus in illo radii re-
franguntur, minusque colliguntur, unde ad re-
tinam ipsam nondum in punctum unum colle-
cti, sed adhuc dispersi, ac divisi perveniunt,
ideoque in illâ confusam, ac perturbatam obje-
cti imaginem impriment. Homines illi, qui-
bus convexior, rotundior, ac protuberantior
est crystallinus humor, *myopes* appellantur, cu-
jusmodi certè adolescentes plurimi observan-
tur. Ii verò, qui crystallinum depressiorem
habent, dicuntur, *presbites*, sive senes, quòd
in senibus ipsis crystallinus humor languidior,
evanidus, flaccidior, ac depressior conspiciat-
ur; unde plerumque, ac universaliter quidem
in senibus, subinde tamen etiam in juvenibus
languida, confusa, ac perturbata sit visio, ex
oppositâ tamen causâ, convexiori nimirum in
adolescentibus, aut depressiori crystallino in
senibus.

XII. Huic incommodo provida, ac diligens
Natura consuluit, ut quibusdam nimirum mus-
culis oculus ita comprimeretur, ut in *myopibus*,
sive juvenibus crystallinus humor retinæ pro-
ximior fieret, ideoque radii non in vitreo hu-
more, sed in retinâ conjungerentur; in præ-
bitis verò auctâ oculi longitudine, sive crystal-
lini convexitate crystallinus ipse a retinâ remo-
veretur, ut radii in retinâ colligerentur; cum
tamen hæc ipsa levis oculorum compressio, quæ
a cir-

a circumpositis musculis fieri solet, aut crystallini constrictio, quæ a musculosis fibris crystallinum ipsum annuli, vel coronæ instar circumdantibus oritur, radiis omnibus accuratè in retinâ colligendis par esse non posset, crystallinæ lentes convexæ, vel concavæ inventæ sunt, quibus pro variâ crystallini humoris figurâ visio perficeretur.

XIII Cùm itaq; in myopibus crystallinus humor convexior sit, radiosque nimium refractos uniat antequam ad retinam illi perveniant, concavis ipsi lentibus, aut conspiciis uti debent, quibus radii pupillam subeuntes dispergantur; unde, quod major est oculi, sive crystallini humoris convexitas, quâ radii colligantur, major lentis concavitas esse debet, quâ radii disgregentur.

Præbitæ verò, qui depressiorem oculum, sive crystallinum habent, in quo radii minus refringuntur, ut adhuc dispersi, ac disjuncti ad retinam incidant, convexis lentibus adjuvantur, quibus radii pupillam ingressuri magis conjungantur; unde quod major est oculi, vel crystallini humoris depressio, quâ radii languidiùs, atque remotiùs a crystallino unirentur, eò major esse debet lentis convexitas, quâ radii fortiùs, atque celeriùs colligantur.

Atque hinc intelligi postremò poterit cur myopes proxima solùm, præbitæ verò remota objecta clarè, distinctèque percipiant; ut myopes oculos supra librum ipsum defigere debeant, præbitæ verò librum ab oculis remove, ut nitidè characteres conspiciant; ut enim paullo superiùs ostendimus, quod remotius fuerit objecti punctum a lente convexâ, sive a crystallino humore, eò proximius erit lenti, sive cry-

convexo propinqua majora, sed turbida; si utrumque rectè componere noveris, & longinqua, & proxima majora, & clara videbis. Non parum multis amicis auxilii præstitimus, qui & longinqua obsoleta, proxima turbida conspiciebant, ut omnia perfectissimè contuerentur.

Hæc ipsa tamen Portæ narratio a pluribus in dubium revocatur; non modò, quod *demonstrationem de industriâ sic involvat, ut nescias quid dicat, verùm etiam, quòd misceat manifestè incredibilia probabilibus*; unde Keplerus ait *suprascriptis Porta artificii fidem, ut plurimum, se derogasse*, atque faciliùs optici tubi structuram, & lentium usum ex Kepleri ipsius Opticâ, quàm ex Porta desumi potuisse.

Verùm quæcumque fuerit Portæ cognitio, id solius conjecturæ loco haberi fortasse poterit, quâ ex refractionis legibus ille deduxit râdios hac ratione colligi, sive dispergi oportere, neque tamen telescopium ipsum construxit; alioquin incredibile certè foret, quod eximii, præstantissimique inventi cognitio, vel usus omnino repente excideret, ut nonnisi post 13. annos cum incredibili omnium admiratione inveniri debuerit.

Primus itaque, qui lentes in tubo collocaverit, ideoque primum telescopium construxerit, memoratur. Jacobus Metius Alcmariensis; cùmque Galileus Patavii tunc agens accepisset a Batavo quodam, ita crySTALLINAS lentes in tubo aptatas esse, ut illo clarius, & proximius objectum videretur, acerrimo quo erat ingenii acumine cogitans, quâ arte id fieri potuisset, telescopii fabricam reperit, atque crySTALLINAS lentes

tes tubo apposuit, quem Venetum Duci exhibuit; cùmque Metius telescopia pedis unius cum dimidio construxisset, Galileus ipsa ad 60. pedes extendit, ut proinde veluti primus telescopii inventor haberi consueverit.

XV. Telescopium ejusmodi, quod communiter *Galileanum* vocatur, duplici lente, concavâ nimirum, atque convexâ componitur; quarum quæ versùs objectum dirigitur, & *objectiva* vocatur, convexa sit; altera verò, quæ ad oculum ipsum convertitur, & *ocularis* appellatur, sit concava, ut in fig. XXII. conspicitur.

Concipiatur itaque objectum A B C, & ex singulis objecti punctis A, B, C innumeri radii, qui coni, vel pyramidis instar ad crystallinam, convexam lentem ferantur. Radius, vel axis B D per convexam, simulque concavam lentem sinè ullâ refractione trajectus ad oculi fundum perveniet in M; at radius BE, BF ita refrangentur in E, F, ut a convexâ lente convergentes exeant, atque deinde colligi, vel uniri deberent in puncto P, quod *focus realis* esset crystallinæ convexæ lentis E D F. Quod si concava lens H I F G ita collocetur, ut apparens, vel imaginarius focus illius sit punctum ipsum P, vel O, radii F H, F I, qui ita convergentes in illius superficiem incidat, ut colligendi forent in P, concavæ lentis ope, sic radii dispergentur, ut exeant a lente, & ingrediantur oculum paralleli in G K, F L.

Radii similiter, qui ex A, vel C dispergantur, ita in crystallinâ convexâ lente uniuntur, ut ad totidem puncta, veluti focos dirigantur; sed cùm in concavâ lente refringantur, debent ab illâ paralleli exire, tandemque in oculum pervenire, ibique objecti imaginem delineare,

ac si objectum ipsum reperiretur in P; unde, quò major est angulus QPR, sub quo conspici-
 citur objectum in telescopio, angulo APC, quo sinè telescopio videretur, tantò major ip-
 sius imago in retinâ imprimitur, vel tantò
 magis ipsius magnitudo augetur.

XVI. Cùm tamen concavæ crySTALLINÆ lentes
 difficiliùs poliri possint, atque illarum ope in
 Galileano telescopio radii convexâ lente priùs
 collecti dispergantur, ideoque nonnisi modicam,
 vel exiguam objecti corporis partem oculo con-
 spiciendam exhibeant, sive, ut Optici loquuntur,
 parvum *campum* aperiant, telescopium ejus-
 modi minùs perfectum censerì debuit, ejusque
 loco astronomicum aliud adhiberi, quod utrâ-
 que crySTALLINâ lente convexâ componeretur.

Concipiatur itaq; objectum aliquod ABC,*
 & ex singulis objecti punctis radios prodire,
 qui in crySTALLINAM convexam lentem EDF in-
 cidentes in illâ refrangantur, ut in puncto O
 veluti foco lege superiùs expositâ colligantur;
 deinde verò iterum inverso situ dispergantur,
 ut ille nimirum, qui dexter erat, fiat sinister,
 atque in alteram crySTALLINAM convexam lentem
 QR incidant, quæ ita posita, vel collocata
 fuerit, ut communis utriusque convexæ lentis
 focus sit punctum O, ideoque radii omnes, qui
 ex objectivâ lente colliguntur in O, ad ocula-
 rem lentem dirigantur in illâ nimirum refracti
 paralleli exhibunt a lente, vel ingredientur in
 oculum; ibique refracti vividam objecti imagi-
 nem depingent in retinâ. Itaque cùm plurimi
 radii ab utrâque convexâ lente colligantur,
 atque ad oculum deferantur, clara, & ampla

Tom. IV.

Q

obje-

objecti corporis superficies, five campus videbitur, cumque objectum ipsum veluti in O positum sub angulo Q P R conspiciatur, satis ampla illius imago depingetur in oculo, unde apparens illius magnitudo augebitur, tantòque major videbitur ope telescopii, quàm si sine telescopio conspiceretur, quantò angulus Q P R superat angulum, quo objectum ipsum oculo nudo videretur. Cum tamen hæc objecti imago eodem situ, vel ordine depingatur in oculo, qui reperitur in ipso objecto, ut dextera nempe objecti pars depingatur in dexterâ oculi parte, objectum ab animâ inverso situ concipi debet, ut dextera objecti, veluti sinistra videantur, superiora veluti inferiora, &c. In cœlestibus tamen corporibus contemplandis perinde est, an illa recto, vel inverso situ conspiciantur, ideoque telescopium ejusmodi in cœlestibus observationibus adhiberi feliciter poterit, unde etiam *Astronomicum* vocari solet.

XVII. Ut itaque terrestria etiam corpora, clarè, distinctèque, & naturali situ, vel ordine conspicerentur, aliud telescopii genus inventum est, quod *terrestre* appellatur.

Componitur illud ex crystallinâ objectivâ lente majori, quæ nimirum majoris sphæræ sit portio, simulque tribus aliis lentibus, quæ paullo sint minores objectivâ, sed inter se prorsus similes, & æquales, atque ita collocatæ, sive dispositæ, ut communis sit illarum focus, ut clariùs in fig. XXIV. conspicitur. Colliguntur itaque radii ab objecto A B C exeuntes in crystallinâ objectivâ convexâ lente E D F, ut penicilli ad G O H, veluti ordinatam basim, aut focum, inverso tamen situ dirigantur, atque ibi decussati, vel divergentes

tes in alteram crySTALLINAM lentem Q R ingre-
diantur a quâ sic refranguntur, ut paralleli
deinde incidant in tertiam crySTALLINAM lentem
S T, in quâ refracti colligantur in focus, aut
ordinatâ basi V X Y, iterumque decussati, vel
convergentes in ocularem N Z incidant, a quâ
refrangantur, ut paralleli pupillam subeant in
P, atque in variis oculi humoribus iterum re-
fracti ad retinam ferantur, ibique veluti in
ultimâ ordinatâ basi imaginem imprimant K
M L inverso situ depictam, quæ proinde obje-
ctum ordine, vel situ naturali positum animæ
exhibebit. Terrestris hujus telescopii vis ea-
dem prorsus est, quæ in cœlesti, vel astro-
nomico observatur; quin etiam, ob majorem
lentium numerum, opacitatem quandam indu-
cit; ordine tamen naturali objectum exhibet,
ut antea dicebamus, quod in terrestribus cor-
poribus conspiciendis necessarium fuerat. Plu-
ribus etiam, paucioribusque lentibus hæc te-
lescopia formari solent, ut accuratissimè ex-
ponunt Hugenius (a), aliique plurimi, qui
hanc Dioptricæ partem uberrimè illustrarunt.
Celebre est etiam aliud telescopii genus, quod
a Neutono excogitatum est, in quo partim re-
flexione, partim refractione visus perficitur.
Constat ejusmodi telescopium speculo concavo,
quod in tubi extremitate, vel fundo colloca-
tur, ut radios per alteram tubi extremitatem,
vel orificium liberè ingressos excipiat, atque
reflexos in punctum unum, veluti focum ita
colligat, ut illi in speculum aliud in eodem foco
positum ad angulum semirectum incidant, a
quo versùs latera tubi reflectuntur, atque ite-
rum

Q 2

rum

(a) in *Dioptr. prop. 51.*

rum in exiguâ convexâ lente, veluti microscopio, quæ in eodem tubi latere reperitur, collecti ad oculum deferuntur.

XVIII. Quandoquidem verò microscopii meminimus, ipsius quoque structura, maxima, & incredibilis ferè præstantia, atque utilitas hic exponenda nobis occurrit.

Engyscopium itaque, seu Microscopium est instrumentum illud, quo corporum moles ita augetur, ut tenuissima quoque corpuscula, quæ oculi nudi vires effugiunt, nitidissimè conspiciantur. Microscopium verò, aut *simplex* est, aut *compositum*. Simplex est illud, quod unicâ convexâ crySTALLINâ lente componitur; compositum verò, quod pluribus lentibus constat. Ac de simplicis quidem Mycroscopii inventore dubitari non potest, cum hujus etiam inventi gloriam Galileo deberi manifestissimè demonstratur (a). Compositi verò inventio, etsi eam sibi Franciscus Fontana arroget circa annum 1618. ab Hugenio tamen Drebelio conceditur circa annum 1621. (b), atque fortasse verissimilius illud etiam inventum Galileo adscribi debet. Simplex in fig. XXV. describitur, in quâ objectum A B reperiatur in C foco crySTALLINÆ convexæ lentis E D F. Itaque radii, qui ex singulis objecti punctis in convexæ lentis superficiem divergentes inciderint, ita refranguntur, ut ab illâ paralleli egrediantur, & ab oculo recipiantur, ideoque, cum maximam in retinâ objecti imaginem imprimant, maximam quoque objecti magnitudinem animæ exhibere debent; eâ nimirum proportionem, vel lege, ut si apparens objecti diameter veram diametrum

fu-

(a) *Præf. Oper. Galil.* (b) *Vid. Hugen. in Diapt.*

superet decies, apparens objecti superficies veram superet centies, atque soliditas, sive moles apparens veram millies superare debeat; superficies enim in duplicatâ, soliditas verò augetur in triplicatâ ratione diametrorum. Hinc microscopia quædam inventa, vel elaborata sunt, in quibus apparens objecti magnitudo esset ad veram, ut 4000000. ad 1. sive objectum ipsum 4. millionibus vicium augeretur, quemadmodum Lana commemorat se construxisse, atque in suis observationibus adhibuisse engyscopium, quo corporis moles 27. millionibus vicium augeretur (a); cujusmodi certè augmentû in plurimis engyscopiis compositis observatur.

Compositum verò microscopium duabus, aut pluribus convexis lentibus componitur, poteritque optimè comparari telescopio, cujus objectiva lens ad oculum, & ocularis ad objectum convertatur, ut in fig. XXVI. conspicitur, ubi radii a singulis objecti punctis divergentes colliguntur a lente E F D, atque in focum, vel basim ordinatam G O H diriguntur, ubi decussati, vel iterum divergentes in lentem alteram Q R incidunt, a quâ refracti in oculum paralleli ingrediuntur, vividamque in illo, & amplam objecti imaginem imprimunt, ut uberimè, accuratissimèque exponit Hugenius (b), definiens etiam varias rationes, quibus pro variâ microscopii structurâ objecti corporis magnitudo augeatur.

XIX. Id unum postremò veluti coronidis loco dicendum superest, quâ lege lucis radii reflectantur, ut inde *speculorum* varietas oriatur, quam veluti objectum Catoptrica contemplatur.

Q 3

Tria

(a) *Magist. Nat. & Art. init. lib. 1.* (b) *loc. cit.*

Tria nimirum speculorum genera distingui solent juxta variam superficiem, quam habent, in quam radii lucis incident; alia siquidem *plana*, alia *concava*, alia *convexa* sunt. Communis est autem, & universalissima lex reflexionis, quod angulus incidentiæ semper æqualis est angulo reflexionis, ut in Phys. Gener. Disp. III. Cap. 9, declaravimus, atque exinde oritur varietas illa, quâ radii in variis speculis reflectuntur.

1. In planis itaque speculis radii, qui perpendiculares inciderint, perpendiculares etiam per eandem lineam reflectuntur; qui verò inciderint obliquè ad superficiem, sed inter se paralleli, obliquè, & ad æqualem angulum, vel iterum paralleli resiliunt.

2. In convexis radius, qui perpendicularis inciderit, perpendiculariter per eandem lineam resiliet; cæteri dissiliunt, vel reflectentur non paralleli, sed divergentes.

3. In concavis denique, ex radiis, qui paralleli incident, radius ille, qui perpendicularis est, perpendiculariter reflectetur, & alii dum reflectuntur convergentes fient, & colliguntur in puncto, quod a concavâ speculi sphaerici superficie quartâ circiter cavitatis diametri parte recedat; cùmque plurimi, ac infiniti ferè Solis radii, qui concavo speculo colliguntur in eodem puncto, veluti *foco* conjungantur, maximam ibi caloris vim exerent, ut ligna comburant, liquefaciant metalla, lapides ipsos in pulverem redigant, ut innumeris experimentis ostenditur.


Quod si radii non paralleli, sed divergentes in speculi superficiem incident, ad varium focum dirigentur, ut si lumen in speculi centro col-

collocetur, radii ad centrum ipsum dirigantur, sin lumen propius ad speculi superficiem accedat, focus remotior erit, ut etiam aliquando radii paralleli, ac divergentes deinde fiant; atque vicissim, si luminosi corporis distantia a speculo major fuerit semidiametro speculi, foci distantia a speculo semidiametro minor erit.

XX. Atque ista quidem sunt, quæ de variis ejusmodi instrumentis, quibus oculorum vis mirificè augeri, vel perfici solet, dicenda nobis videbantur. Plurima certè, atque innumera, propemodum sunt, quæ hîc fusiùs, & uberius exponi possent; sed instituta methodus, operisque nostri consilium vix patitur, ut hæc omnia complecteremur. Nobiliora solùm, & quæ clariora fuerant, exposuimus, illosque fontes ostendimus, unde plenam, uberrimamque cognitionem, qui id sibi e re futurum putaverit, haurire possit.

C A P. XVI.

De luce, & coloribus.

1.  Culus ille, cujus elegantissimam, pulcherrimamque partium texturam superiori loco descripsimus, lumini, variisque corporum coloribus percipiendis ab ipsâ Naturâ destinatur; unde mirari certè non possumus, si partium omnium, quæ in animalium corpore conspiciuntur, pulcherrima, omnium pulchritudinum, quibus corpora insignita conspiciamus, formo-

fissimam contempletur. Arcanam itaque lucis originem, ejusque naturam hîc exponemus, variasque Philosophorum hypotheses breviter, & accuratè explicabimus; ut cetera deinde facillè intelligi possint, quæ de variis coloribus exponentur. Omnes verò tum veterum, tum recentiorum Philosophorum sententiæ inter se plurimùm dissidentes ad duo veluti capita satis accommodè referri possunt. Alii nimirum existimant lucem esse qualitatem aliquam, entitatem, vel accidens, quod modò lucido corpore jungatur, aliorumque accidentium instar, inhæreat; modò ab illis separetur. Alii verò arbitrantur lucem esse novum, distinctumque substantiæ corporæ genus, quod objecta corpora illustret, aërem penetret, oculum subeat, nerveasque fibras percellens quendam sensum in illis imprimat.

II. Qui lucem inter accidentia, vel qualitates enumerent, Arabes, sive Peripatetici haberi solent, qui lucem corporibus quibusdam a Deo inditam, sive concessam existimant, quâ *luminosa*, vel *lucida* dicerentur, qualitatem hanc a lucido corpore in aërem, crySTALLUM, vel circumposita corpora momento diffundi, sive potiùs in illis produci arbitrantur, donec ad oculum perveniat, ibique ab animâ percipiatur. Aristoteles certè iis præluxerat, ubi aliorum sententiis antea memoratis, expressè docet lucem neque ignem, neque omnino corpus esse, neque corporis ullius defluxum. Sed lucem esse actum perspicui, quâ perspicuum est; sive esse præsentiam ignis, aut rei cujuspiam hujusmodi in ipso perspicuo (a). Quid verò Aristot-

(a) De Ani. II. c. 7.

stotelem, aliosque impulerit, ut hanc lucis naturam admitterent, definiri vix potest. Credibile est tamen, quod illi, cum maximam, ac infinitam ferè celeritatem adverterent, quâ solidissima etiam corpora, ut crystallum, ac adamantem lux pervadere, vel momento penetrare conspicitur, idque corporibus convenire non posse intelligerent, lucem ipsam caloris instar, pellucidis corporibus, velut accidens, inhærere putaverint; quod an ritè, vel temere potiùs conjecerint, inferiùs ostendetur.

III. Quod si Peripateticos solos exceperis, reliqui omnes veteres, retentioresque Philosophi lucis naturam in tenuissimâ quadam substantiâ positam esse arbitrantur, quæ celerrimè agitata motum, vibrationemque in oculis nostris efficiat. Empedocles (a) certè a lucidis corporibus *effluxionem* fieri censuit, atque in aëre, & aquâ porulos, sive meatus admisit, quos ejusmodi particulæ liberè trajicere, vel penetrare possent. Sic etiam Plato non modò agnovit ea, quæ deferuntur in visum, coloresque *flammulam effluentem* vocavit; verùm etiam porulos, & interstitia posuit, ut est a Proclo (b) observatum. Quid verò Leucippum, Democritum, Epicurum, & qui illos æmulatus est, Lucretium, atque Gassendum commemorem, cum ipsi omnia ad atomos, tenuissima nempe corpuscula, revocaverint? Communis est itaque illorum opinio, quod a Sole, igne, flammâ, aliisque lucidis corporibus perenne particularum effluvium per rectas lineas erumpat, quæ per aëris, aliorumque corporum, quæ *pellucida, diaphana*, vel *transparentia* vocantur, poros in rectam

(a) *ap. Arist. de Sen. 2. & Plat. in Men.* (b) *Com. in Tim.*

rectam lineam dispositos ingressæ ad oculum ipsum ferantur, ejusque fibras ita percellant, spiritusque nervis inclusos agitent, ut inde lucis perceptio, sive sensatio oriatur. Quemadmodum enim, inquit, a quibusdam corporibus perenne particularum effluvium egreditur, quæ per aërem delatæ, atq; in auribus, vel naribus illis, soni, odorisq; sensum in illis excitant, ita quoque sensuum, ac sensibilibus analogia requirit, ut ab aliis corporibus eæ particulæ diffundi possint, quæ in oculo quendam alium lucis sensum efficiant; hoc solo discrimine, quod aliorum corporum particulæ per obliquas etiam, inflexasque lineas delatæ sensum imprimunt, luminis verò particulæ rectâ lineâ moveri debent, ideoque poros in aëre, vel in diaphano corpore per rectam lineam dispositos requirunt; ut inferiùs ostendetur.

IV. Ab ejusmodi Philosophorum omnium sententiâ differre videtur Cartesius (a), qui tenuissimas lucis particulas, non a Sole, lucidisque corporibus, cum Sol ipse conspicitur, repente diffundi arbitratur, sed totam lucis substantiam semper in aëre reperiri opinatur, quæ si a Solis, alteriusve lucidi corporis præsentia, vel motu, motum, vibrationemque conceperit, oculos feriat, lucisque sensum in illis excitet. Innumeros itaque secundi elementi globulos per aërem semper, ipso quoque noctis tempore, diffusos existimat, qui, & nisi certo quodam motu agitentur, ac impellantur, retinæ fibras afficere, sive sentiri non possint. Ubi verò Sol horizontem ascenderit, perennique motu circa proprium axem moveatur, tenuissimæ primi ele-

(a) *Princ. par. III. n. 55.*

elementi particulæ, quibus Sol ipse componitur, centrifugam vim concipient, quâ sensim a centro Solis recedere, atque in singulas Universi partes diffundi nitentur, eâdemque centrifugâ vi, vel hoc impetu primi elementi particulæ globulos secundi in aëre diffusos impellent, ut hoc impulsu, seu vibratione oculos illi percellere, sensumque lucis imprimere possint; cùmque eodem momento, quo primus globulus Soli finitimus premitur, ob globulorum contiguitatem, ultimus etiam oculo proximus premi debeat, lux celerrimè, vel in instanti diffundi poterit.

V. Quamvis itaque in explicandâ, vel definiendâ lucis substantiâ Philosophi differant, omnes tamen in hoc mirificè consentiunt, lucem non accidens, sed corpoream potiùs substantiam esse, quæ certo quodam motu, seu vibratione sensum in nobis efficere, vel excitare possit.

1. Quid enim, inquiunt, clarius, & illustrius esse unquam poterit, quàm lucem inter corpora haberi oportere, cùm singulæ corporum proprietates in illâ observentur? Reflecti siquidem, refrangi, rarefieri, condensari, corpora movere conspicitur, iisdem omnino legibus, eademque vi, quâ corpora consueverunt. Sic ex. gr., si lux Solis in corpus inciderit, ita resilit, sive reflectitur, ut angulus incidentiæ semper æqualis sit angulo reflexionis; ubi ex rariori in densius medium transferit, ita refrangitur, & inclinatur, ut ad perpendicularum accedat; si plurimi radii Solis inter se paralleli lente crystallinâ, vel phyalâ aqua plenâ excipiantur, ita condensari, simulque uniri videntur, ut autâ luce, & calore metalla fundere, lateres in pul-

pulverem comminuere, ligna repente incendere soleant; tanta denique est in radiis lucis uis, ut in vitro collectis agitatio, ut non superiores modò effectus producere, qui finè vehementi motu fieri non possunt, verùm etiam pulverem, aërem dispellere, aliaque corpora movere illi possint. Hæc autem omnia quomodo luci eodem prorsus modo convenire possent, quo in ceteris corporibus observantur, nisi lux ipsa inter corpora habenda foret? aut quomodo qualitas aliqua, modus, & accidens a subiecto in subiectum aliud migrare, variasq; mutationes subire posset?

2. Maximo quoque argumento esse poterit, quod lux per lineam rectam movetur, sive diffunditur; quod in perenni particularum effluvio facilè intelligi, vel explicari poterit, ut inferius ostendetur; at si lux qualitas diceretur, nulla certè ratio afferri posset cur non etiam obliquè diffunderetur.

3. Celebre est etiam lucem non omnia corpora, sed illa solùm pervadere, quæ pellucida sunt, in quibus nimirum pori per rectam lineam dispositi sint, & quò plura, etiam pellucida, corpora transire, vel penetrare debeat, eò languidior videbitur; quod fieri planè debet, si lux veluti corpus habeatur, vix verò, ac ne vix quidem intelligitur, si veluti qualitas defendatur, quæ singulas corporis partes sinè ullo poro, vel vacuo arctissimè inter se mutuò connexas pervadere posse videtur.

4. Addi etiam poterit æqualem omnino, sive clariorem lucem, in machinâ pneumaticâ observari, ubi extractus fuerit aër, quàm in aëre libero, variato nimirum subiecto lucem non variari; quod fieri oporteret, si lux in aëre veluti subiecto reperiretur.

5. Plu-

5. Plurima denique Phosphora, sive corpora lucida sunt observata, a quibus lumen per aliquod temporis spatium emittitur. Nullum tamen illustrius est lapide Bononiensi, sive qui circa *Paternum* montem prope Bononiam effoditur; hic etenim, si calcinatus in aëre Soli exponatur, deinde post aliquod temporis spatium in obscurum locum deferatur, scintillas emitte-
tere, & aliquo temporis intervallo lucere conspicitur; donec languidior sensim lux fiat, ac denique extinguatur; quemadmodum ferè, si linteam igni admotum, calefactumque fuerit, atque in obscurum deinde locum transferatur, ubi manibus affricetur, eas ignis, lucisque particulas, quas igni admotum conceperat, emit-
tet. Si itaque lux qualitas quædam, aut acci- dens foret, cur in ejusmodi solum lapide, non in aliis quoque, reciperetur? cur initio fortior, debilior deinde videretur? cur denique lapis antea calcinari, sulphureæ nimirum, nitrosæ-
que partes in illo inclusæ evolvi deberent, nisi pro variâ corporis structurâ, varios quoque mo-
tus lux ipsa reciperet, quod optimè quidem corpori, nullâ verò ratione qualitati convenire posse videtur?

VI. Quod verò a Peripateticis opponi jam diximus, lucem nimirum instanti, temporisque momento diffundi, quod nulli corpori convenire posse putatur, duplici, clarissimâque ratione salvari poterit. Plurimi siquidem existimant, lucem non in instanti, sed potius suc-
cessivè propagari. Ac certè, licet innumeris ex-
perimentis appareat lucem ipsam celerrimè dif-
fundi, nulla tamen ratio, vel experimentum
afferri poterit, quo clarè, & invictè ostenda-
tur id temporis momento fieri, vel immensa-
ferè

ferè spatia peragi . Quis enim nobis ostendat Solem , aut sidera eodem ipso temporis momento a nobis conspici , vel ipsorum radios in oculos nostros incidere , quo super horizontem ascenderint ; non verò potiùs sidera per aliquod temporis spatium supra horizontem moveri interim dum radios , lucemque dirigunt , eâ lege , ut in ipso horizonte nobis appareant , cum jam aliquot minuta , vel gradus super horizontem peregerint ? Id unum certò compertum est , sidera a nobis videri , cum illorum radii oculos nostros feriant ; an verò eodem momento feriantur oculi solaribus radiis , quo Sol in horizonte reperitur , incertum est . Sic ferè sonus a nobis percipitur cum aëris tremor ad aures pervenerit , an verò tremor ad aures perveniat , cum corpora collisa fuerint , incertum foret , nisi id lucis ope experiremur ; cum enim uno , eodemque temporis momento pulverem pyrium accendi , & tormentum explodi , sive incendi exhalationes , & nubem scindi compertū sit , priùs tamen flammam , aut fulgur conspici , quàm fragorem , aut tonitru audiri deprehendamus , optimè inferimus sonum non in instanti , sed successivè diffundi ; ita ferè non aliter instantaneum lucis motum explorare , vel ostendere possumus , quàm si ipsum cum alio celeriori , vel instantaneo motu comparare possemus .

Quin etiam plurima experimenta afferri solent , quibus ejusmodi successiva lucis propagatio ostendatur , atque illud in primis est celebre , quod immersiones , vel emersiones satellitum ex umbrâ Jovis citiùs , aut tardiùs fieri solent pro variâ Telluris a Jove distantia , ut quò nimirum Tellus remotior fuerit a Jove tardiùs satellitum eclipsis , sive periodus complea-

pleatur, citiùs ubi propinquior; quod oriri certè videtur ab ipsâ Telluris distantia; unde inito calculo Picartus, & Roemerus existimant Solis radios nonnisi 10., vel 14. minutis ad Terram descendere; ideoque lucis celeritatem, celeritatem soni sexcenties millies superare, ut ab Hugenio (a) demonstratur.

Sed etiam si liberrimè concedatur lumen, in instanti, sive momento diffundi, non inde tamen inferri poterit illius naturam in tenuissimæ substantiæ motu, vel vibratione positam non esse. Quemadmodum enim paullo superius ostendimus, ut Solis splendor oculis nostris appareat, non requiritur, ut tenuissimæ Solis particulæ ab ipso Sole ad oculos nostros per immensum aëris spatium deferantur, sed solum, ut motus ille, vel agitatio, quæ lucis corpusculis Soli finitimis impressa fuerit, ceteris quoque sequentibus, atque per aërem semper diffusis imprimatur, quod ob arctissimam partium contiguitatem celerrimè, vel in instanti fieri posse jam diximus.

VII. Neque obscurior certè, vel difficilior est altera Peripateticorum oppositio, quod lux alia corpora penetret, atque in aëre, crystallo, aliisque pellucidis corporibus liberrimè diffundatur. Primò siquidem, si lux accidens aliquod foret, intelligi, vel explicari non posset cur ipsa aliqua solum, non omnia corpora aliorum accidentium instar penetraret; cur, si plures fuerint crystallo laminæ, vel major aëris moles, difficilior a luce penetrentur, & opacitatem acquirant, quod in recentiorum hypothese claris-

(a) *Traité de lumin. vid. Hist. Acad. Par. 1707. & Nouv. Optic. II. par. 3. pr. 11.*

rissimè demonstratur. Itaque in aëre, crystallo, aliisque corporibus omnibus plurimi, ac infiniti ferè sunt poruli solidis partibus interspersi, qui vel omnino inanes sunt, ut Atomistæ opinantur, vel certè tenuissimâ, facillimèque mobili, vel æthereâ substantiâ replentur, ut Cartesiani arbitrantur; sed hoc insigne discrimen inter aërem, crystallum, lignum, sive pellucida, & opaca corpora reperitur, quod in pellucidis poruli per rectam lineam dispositi sunt, ideoque a luce pervadi possunt; opaca, verò meatus obliquos habeant, quos radii lucis subire, vel pervadere non possint. Cùm ergo lux aërem, crystallum, aliaque id genus pellucida corpora penetrat, non solidam illorum substantiam pervadit, sed poros illos ingreditur, quos inanes reperit, aut æthereâ certè substantiâ repletos, quæ celerrimè expelli, subeuntique luci cedere compellatur. Hinc, ubi radios per crystallum trajectos candidâ chartâ excipias, puncta quædam obscura, ac nigricantes veluti maculas in ipsâ conspicias, quæ velut umbræ cenferi debent illarum partium crystalli, quæ radios trajicere, vel a radiis ipsi pervadi non possunt.

VIII. Quæcumque ergo hypothesis eligatur, sive nimirum tenuissimæ quædam particulæ a Sole, lucidisque corporibus erumpant, quæ per aërem, & pellucida corpora ad oculum deferantur, sive potius lucidorum corporum partes, tenuissimas lucis particulas per aërem ubique diffusas ita premant, ut illæ repente oculum ingressæ ipsius fibras percellant, faciliè semper intelligi, & explicari poterit, quomodo lucis sensatio in nobis oriatur. Tenuissimæ nimirum lucis particulæ per oculi humores trajectæ ad
reti-

retinam pervenient, variasque fibrillas, quibus illa contextitur, ita percellent, ut in spiritibus animalibus agitatio quædam excitetur, quæ ad cerebrum usque per nervos opticos diffusa ab animâ percipiatur, atque ex consuetudine lucis sensatio vocetur; hinc quod celerior, fortior, ac vehementior ejusmodi motus fuerit, eò vivacior lux videbitur; atque ubi Solem intentis oculis conspexeris, clausis etiam oculis fulgor quidam percipietur, quod agitatio quædam, sive vibratio in nervis, spiritibusque supersit.

IX. Explicatâ verò lucis naturâ, & origine clariùs intelligi poterit origo colorum, quorum varietas admirabilis, & infinita ferè conspicitur. Quid porrò hac in parte Aristoteles senserit divinari vix potest, cum obscurè admodum sententiam ille suam expresse, atque ab Interpretibus varias in partes trahatur. Colorem certè definivit *motivum ejus, quod actu perspicuum est*, ac si color ipse, qui in corporis superficie reperitur, aërem lucidum sibi proximum moveat, ut motus ipse per aërem successivè diffusus ad oculum perveniat, ibique coloris speciem imprimat.

Arabes verò, ac Peripatetici nostri quemadmodum ceteras sensibiles corporum qualitates, ita quoque colores omnes accidentia quædam, & qualitates esse arbitrantur, quæ variis corporibus impressæ fuerint, ipsisque inhæreant, atque in oculis nostris imaginem, vel speciem illi similem imprimant, quæ in coloratis corporibus reperitur. Ii verò, qui rem clariùs, & illustriùs definire voluerunt, addidere varios colores ex humidi, frigidique mixturâ oriri; quemadmodum Chymici ex variis

olei generibus, varios colores repetendos esse arbitrantur. Quàm verò feliciter id arbitrentur, intelligi poterit ex iis, quæ sæpius alibi dicta sunt. Id unum repeti hîc poterit, quod ut in nobis coloris perceptio, sive sensatio producat, non requiritur, ut in corpore ullus color inhæreat; quemadmodum, ut in cibo sapor, & ex acu dolor percipiatur, dolor ipse, vel sapor in cibo, vel acu non reperitur; ut illud omittam nullâ ratione concipi, vel explicari posse quomodo ex colorato corpore coloris species, aut color ipse ex humiditate, vel frigiditate, aliisque corporum qualitatibus oriatur.

X. Communis est itaq; Philosophorum omnium opinio colores esse non entitates aliquas verè corporibus inhærentes, sed solùm quasdam lucis modificationes, quæ juxta varium modum, quò ab obiectis corporibus illa resilit, refrangitur, atque reflectitur, varias in oculis vibrationes, variumque coloris sensum imprimunt. Id expressè docuit Epicurus cum ait *non esse colores coherentes corporibus, sed juxta quosdam, respectu visûs, ordines, positusque gigni* (a); quemadmodum Aristarchus Samius ex Epicuri sententiâ dixit *incidentem in subiectas res lucem colorem esse, & constituta in tenebris corpora colore destitui* (b); quod apud Plutarchum Epicurus ipse jam dixerat; atque Aristoteles existimavit *neque alborem esse, neque nigrorè sine visu, vel Animâ*; (c) quod clariùs ex iis intelligi poterit, quæ fusè explicavimus, cum de sensibus in communi loqueremur.

Et

(a) *Plut. adv. Colur. I.* (b) *Apud Stob. Ecl. Phys. 19.*
 (c) *III. de Gener. c. 2.*

XI. Et certè quod ex solâ luminis refractione, vel reflexione varii colores oriri possint, innumeris, clarissimisque experimentis ostendi solet, ut de Iridis coloribus explicavimus; neque enim colores illi in phialâ, in aëre reperiuntur, sed ex solâ radiorum refractione in oculo nostro producuntur. Celebre est etiam quod si ex crystallo triangulare prisma efformetur, atque oculis admoveatur, plures in illo colores, ii nimirum, qui in Iride conspiciuntur, nitidissimè apparent. Atque ex ejusmodi quidem coloribus flavus, rubeus, cæruleus *primigenii*, vel *primitivi* censei meritiò solent, quòd illi ex coloribus aliis inter se permixtis minimè producantur, sed ex ipsis potius colores alii efformentur. Ex flavo nimirum, atque cæruleo, ut Pictores norunt, fit viridis; ex flavo, & rubro fit croceus; ex rubro denique, & cæruleo purpureus oritur; unde colores omnes, sive *primigenii*, sive *secundarii* fuerint, ex solâ radiorum lucis refractione oriri posse compertum est. Quâ verò lege, sive ratione varia lucis refractione variis coloribus producendis par esse possit definiri vix potest, atque illustriores etiam Philosophos hac in parte mirificè dissidere conspiciamus.

XII. Cartesius enim varios colores ex recto, vel circulari motu substantiæ ætheræ, sive globulorum secundi elementi repetendos esse arbitratur; ut si globuli celerius circa sui centrum, vel proprium axim, quàm in rectam lineam moveantur, rubrum colorem concipiant; si æquali celeritate circa se ipsos, atque in directum ferantur, flavescent; si denique celerior sit ille motus, quo in rectam lineam impelluntur, quàm quo circa seipsos convertuntur, cæruleus

inde color orietur; atque ex variâ circularis, rectique motûs combinatione intermediî colores, ut antea diximus, producantur.

Verûm ejusmodi globorum motus, quo modò celerius, modò lentiùs circa proprium axem torqueantur, prorsus immeritò effingitur; nullâque ratione concipi poterit, quomodo radii crystallinum prisma subeuntes circula rem hunc motum eâ lege variare possint, ut inde variî colores orientur, aut in maximâ distantiâ idem omnino color ab omnibus videatur.

XIII. Hookius existimat ex variâ, vel inæquali obliquitate, quâ subtilis, ac ætherea materia impellitur, colorum varietatem repetendam esse. Verûm, sive obliquè, sive directè radii excipiantur, aut in corpus incidant, idem omnino color percipitur.

XIV. Neutoni hypothesis lucem ex dissimilibus partibus, vel etherogeneis radiis compositam esse opinatur, quorum alii magis, alii minùs refringi possint. Itaque radii, qui minùs refringuntur, rubrum colorem inducent, qui omnium maximè refringuntur, violacei; qui mediocrem, vel intermediam refractionem subeant, flavi, virides, atque cærulei videbuntur.

Inæqualis autem hæc radiorum, sive lucis *refrangibilitas* non modò ab etherogeneâ, sive dissimili radiorum substantiâ, sed ab ipsâ quoq; corporum illorum texturâ, vel conditione dependet, in quâ radii lucis inciderint. Concipi nimirum possunt corpora variis veluti stratis, atque laminulis parallelis composita, a quibus radii variâ ratione reflectantur; ut hi nimirum radii ab his laminulis, vel corporis partibus, alii radii ab aliis laminulis reflectantur. Sic ex. gr. si corporis partes, aut laminæ contextæ

textæ fuerint, ut radiis omnibus, siue singulis radii partibus aditum liberè concedant, nullus radius, vel nulla radii pars reflectetur, sed liberè corpus pervadet, ideoque nullus in illo corpore color deprehendetur, sed pellucidum erit; at si partes illæ radii reflectantur, quæ rubrum coloris sensum in nobis efficiunt, ceteris radii partibus liberè prætergressis, rubrus in corpore color percipietur, atque ita de singulis corporum coloribus intelligatur, donec nulli ferè lucis radii, vel nullæ radii partes per corporis poros transire possint, sed omnes fere ad oculos reflectantur, atque ita candidus color in corpore producat; sicuti, si nullæ ferè radii partes reflectantur, sed liberè corpus pervadant, tunc niger in corpore color videatur. Incredibile est autem quàm facile in hac hypothese plurima phænomena explicentur, quæ in colorum origine, mutatione, ordine deprehenduntur, ut fusè Newtonus (a) ipse Clarke (b), aliique plurimi prosequuntur.

Ægrè tamen intelligi, vel explicari fortasse poterit cur radius etherogeneis, vel dissimilibus partibus componatur, quæ variâ ratione reflecti possint; non verò potiùs hæc ipsa varia radii reflexio a corporibus illis oriatur, in quæ radii lucis inciderint. Hinc alii doctissimi viri aliam coloris originem, vel alias hypotheses excogitarunt, in quibus eadem prorsus phænomena nitidè deducantur, quæ in Newtoni hypothese explicantur, ut paullò inferiùs ostendetur.

XV. Alii postremò arbitrantur colorum varie-

R 3

ta-

(a) In *Opt.* (b) In *Annot. ad Robaut. par. I. c. 27.*

tatem ex solâ majori, sive minori plurium, sive pauciorum radiorum vibratione, quâ nervæ fibræ percelluntur, oriri posse; ut ex forti multorum radiorum pressione *albedo*; ex tenuissimo, debilioriq; radiorum numero *nigredo*; ex intermediis, paullo nimirum validioribus, debilioribusque vibrationibus intermedios colores produci. Et certè quod ad albedinem pertinet, illam ex confertiori, vehementiorique radiorum numero repetendam esse manifestissimè demonstratur, quod ubi corporis superficies asperior fuerit, pluribusque radiis reflectendis idonea, uberior inde lux, vividiorque albedo oriatur, ut in argento conspiciamus, quod si scabrum fuerit albicantius est, ubi poliatur nigredinem quandam inducit; nix, saccharum, aliaque candida corpora plurimis, ac innumeris ferè angulis, acuminatisque particulis aspera sunt; ut etiam vitrum, aut marmor, quod si in pulverem comminutum fuerit, albedinem contrahit, quodd tunc in plurimas, ac infinitas ferè facieculas, aut superficies disponatur. Candida etiam corpora oculos offendunt, quodd uberiolem lucis copiam ad oculos regerant; quemadmodum etiam debilius, ac tardius calorem concipiunt, cum nigra corpora celerius, ac fortius incallescant quodd plurimos radios imbibant, paucosque reflectant. Hinc illi, qui nigro colore lanam inficere velint, alumen, vitriolum, aliosque corrosivos sales adhibent, quibus lanæ particulæ corrodantur, ampliores, uberioresque meatus in ipsâ aperiantur radiis ebibendis idonei; ideoque albedo ad lucem ipsam proximè accedit, sive ex uberiori, confertiorique radiorum copiâ oritur, quemadmodum nigredinem umbræ

bræ, five tenebris affinem in exili, tenuiſſimoque radiorum, numero reponendam eſſe videtur. Intermedii verò colores, qui nempe albedinem inter, ac nigredinem interjecti videntur, ex vario, vel inæquali radiorum numero, & vibratione, five lucis, & umbræ, ideſt albedinis, atque nigredinis mixturâ oriri poſſe videntur; ut ſi plures lucis quàm umbræ partes appareant, flavus, rubeusque color formetur; ſi par umbræ, luminisque portio ex corpore reflectatur, viridis erit; ſi denique tenebrarum; aut umbræ partes luminis partes ſuperent, cæruleus, aut violaceus color prodibit.

Quæ colorum ſeries experimento ipſo clariſſimè demoſtratur. Compertum eſt enim rubrum, ac flavum colorem cæteris clariorem eſſe, vel ad albedinem propiùs accedere, unde in accenſis prunis ille conſpicitur; hunc ſequitur viridis, qui inter cæruleum & rubrum medius videtur, atque ex illis mutuò permixtis efficitur; cæruleus denique, aut violaceus obſcurior eſt, atque ad nigredinem proximè accedit. Id eleganti, clariſſimoque experimento oſtendit Malebranchius, qui cùm vitrum fædatum inter oculum, & varia colorata corpora collocaret, primò candidum colorem conſpexit; ubi verò vitrum ipſum paullatim expoliſſet, flavum quoque, ac rubrum colorem percepit; viridis autem apparere cœpit, ubi magis adhuc vitrum deterſum erat; cæruleus denique, ac violaceus, ubi perfectè, vel exquisitè politum, deterſumque foret: ut uberior nimirum lux in flavo, & rubro, quàm viridi, in viridi, quàm cæruleo colore reperiatur, quæ proinde faciliùs vitrum pervadere, oculoque colorem exhibere poſſit.

XVI. Id unum in singulis opinionibus explicandum adhuc superest cur una, eademque lux, iidemque radii in variegatum marmor, aut pictam imaginem incidentes, variâ vibratione reflecti debeant, ut in oculo variam impressionem, variamque coloris sensationem efficere possint, quod obscurum adeo censeripotest, ut ulla vix inveniendâ, vel explicandâ illius causâ spes nobis superesse videatur. Gassendus certè hanc esse lucis naturam ait, ut hac certâ lege reflexi radii, hunc certum colorem induant, cetera humani ingenii viribus impervia existimans; quemadmodum Newtonus ipse radios quidem, sive luminis partes variè inflecti, sive refrangi dixit, quâ verò causâ, vel lege id fieri debeat, prorsus omisit. Quandoquidem itaque in obscurissimâ, difficilimâque re, conjecturis solùm agendum est, in explicandâ coloris origine, sive causâ cur luminis radii variè reflectantur, ut varium colorem exhibeant, illa nobis opinio verisimilior videtur, quæ ex varia corporum texturâ, vel superficie varias lucis modificatione, sive colores oriri arbitratur.

XVII. Itaque concipi, sive supponi debet illorum corporum, quæ variis coloribus inficiuntur, superficies non eodem modò dispositas esse, sed inæqualiter asperas, regerendo, vel reflectendo luminis aptas esse, ut in candido, vel nigro corpore manifestissimè demonstravimus. Cum ergo luminis radii æquali celeritate, vel impetu a Sole diffusi, in variegati corporis, ut ex. gr. pictæ telæ superficiem inciderint, singuli radii ad oculum reflectentur, sed eâ tamen lege, ut plures, vividiores, confertioresque sint illi, qui ex albâ imaginis parte reflectuntur, sive in illam telæ partem, quæ candida
appa-

apparet, inciderant; debiliores, ac rariores illi, qui ex nigrâ imaginis parte, atque ita porrò, ut singulæ imaginis partes certo colore perfusæ, certâ quadam lege, seu vibratione radios reflectant.

Ejusmodi verò radii, qui variâ, vel inæquali vibratione a coloratis corporibus reflectuntur, oculum subeunt, atque hac ipsâ inæquali celeritate, vel impetu nerveas fibras vellicant, atque percellunt, ut inæqualis etiam vibratio, vel spirituum agitatio ad cerebrum deferatur, ibique ab animâ percipiatur, quæ ex institutâ jam consuetudine vibrationem illam albedinis, hanc cærulei, hanc viridis coloris esse dijudicat. Id explicari faciliè poterit exemplo tactûs, vel auditûs. Si etenim subiectum pavementum manu, vel baculo contrectetur, faciliè intelligi posse experimur, an pavementum ipsum ex marmore, lateribus, arenâ, ligno vel luto componatur; quòd nempe ex variâ illorum corporum duritie, sive soliditate baculi fibræ variâ agitatione concutiantur, nerveisque manûs fibris variam vibrationem communicent; quæ ad cerebrum usque delata, animam excitat, ut ex præconceptis imaginibus, & ex inæquali vibratione variam corporis soliditatem, atque naturam cognoscat; unde si pavementum ipsum partim ligno, partim arenâ, partim luto, partim lateribus componeretur, illorum corporum varietas faciliè baculo deprehendi posset, quòd illorum singula propriam, ac peculiarem vim habeant, quâ baculi, brachiique fibras percellant, sive peculiari vibratione spiritus commoveant. Ita oculi varium in corporibus colorem percipient, quòd lucis radii ex variis colorati corporis partibus


variè reflectantur, variamque in oculo vibrationem producant. Clarius hoc etiam apparet in sono. Quamvis enim quilibet sonus in solâ aëris agitatione consistat, atque aëris agitatio ex collisione corporum oriatur, cum tamen varia corpora juxta variam duritiem, tensionem, aliasque leges variè collidantur, aërique tremorem communicent, varius inde sonus oriri debet; ut ex. gr. in cytharâ, in quâ plurimæ chordæ reperiuntur, aut in organo, in quo idem aër plurimas fistulas ingreditur, varium singulæ sonum producant, quod non æqualiter tensæ sint chordæ, nec æquali lege fistularum orificium dispositum fuerit; ideoque aër, qui ab unâ subtiliori, tensiorique chordâ agitatur, hac ipsâ agitatione ad aurem pervenit, nerveisque fibris agitationem imprimit, quæ acutus sonus vocatur; cum altera aëris portio, quæ a crassiori chordâ agitatur, certum, distinctumque tremorem ad aurem deferat, ut in cerebro gravis soni species oriatur. Quemadmodum itaque si in eodem cubiculo plurima musices organa pulsata fuerit, varii ab animâ soni percipientur, quod variæ aëris partes a variis chordis, vel fistulis agitatæ variâ vibratione nerveas auditûs fibras percellant, ita prorsus, si plures imagines reperiantur, varii colores ab animâ percipientur, quod variæ lucis partes, aut radii a variis colorati corporis partibus variè reflexi, variam in nerveis oculi fibris, sive spiritibus vibrationem efficiant, quæ variam denique coloris sensationem in animâ excitent.

XVIII. Atque ista quidem sunt, quæ de miraculis, & coloris origine dicenda nobis videbantur. Quamvis enim plurima, jucundissima, admiranda.

rabilia phænomena sint, quæ a sapientissimis viris hac in parte observata, ac prodita sunt, singula tamen uberius, atque pro rei dignitate prosequi vix liceat. Itaque qui plura desiderat, Auctores ipsos superius memoratos adire poterit; hanc etenim nobis veniam concedi posse speramus, ut suprema solum capita, quæque faciem ceteris præferant, complectamur.

C A P. XVII.

De sensibus internis.

I.  E variis externorum sensuum organis, obiectis, viribus superiori loco jam diximus; nunc instituta rerum series, & ordo postulat, ut aliqua de internis etiam sensibus complectamur, quorum cognitio, etsi plurimam certè lucem ex iis, quæ explicata sunt, sortitur, longè tamen obscurior, & occultior est, quàm ut accuratè, vel nitidè definiri possit. Conjecturis itaque locus supererit, quæ tantò clariores, melioresque haberi fortasse poterunt, quantò variis sensuum phænomenis explicandis feliciùs adhiberi posse videbuntur.

II. Ac primò, quod ad illorum numerum pertinet, non modò veteres, recentioresque Philosophos, sed etiam Peripateticos ipsos hac in parte mirificè dissidentes conspiciamus. Plerique tamen tres internos sensus enumerant, *Imaginationem*, seu *Phantasiam*, *Æstimatoriam*, sive *Judicium*, aut *Sensum communem*, atque
Me.

Memoriam; atque ejusmodi sensus distinctos esse variis argumentis ostendi posse arbitrantur. Quî enim fieri posset, ut aliqui celerem, vividamque imaginandi vim haberent, pessimè tamen de conceptis, cognitisque rebus judicarent; aut alii de rebus optimè judicarent, sed levi adeo, caducâque memoriâ forent, ut repente rerum obliviscerentur, nisi judicium ab imaginatione, sive memoriâ distinguantur? Quosdam etiam ita vel apoplexi, vel alio ægritudinis genere affectos conspiciamus, ut incolumi Phantasiâ, Memoriam omnem amiserint; cumque sui quoque nominis obliti jam fuerint, optimè tamen de rebus omnibus judicant, miseramque sui conditionem cognoscunt. Cùmque ita fieri plerumque videamus, ut quibus occiput. vulnere, aut noxio humore læsum fuerit, ipsis memoria aut omnino defuerit, aut debilior certè, sive languidior evaserit, quemadmodum turbatur Imaginatio si anterior cerebri pars offendatur, hinc optimè inferri poterit, variis, diversisque sensibus, varium quoque, distinctumque locum concedi oportere; ut Imaginatio in anteriori cerebri parte; in mediâ Sensus communis; in posteriori denique Memoria collocetur. Illud etiam observari meritò poterit, quod ad varios ejusmodi sensus variæ corporis, aut cerebri habitudines requiruntur; sic memoriæ juvandæ, sive sensuum imaginibus altiùs, atque tenaciùs conservandis mediocris quædam cerebri humiditas conferre videtur; ignea quædam, vividaque spirituum celeritas in Phantasiâ; siccitas autem, & quies in judicio, vel sensu communi; unde ex variis ejusmodi dispositionibus varios quoque sensus in variis hominibus excellere

con-

conspicimus; vix vero, ac ne vix quidem omnes in uno, eodemque simul conjunctas. Tres itaq; distincti sensus in cerebro admitti debent, Imaginatio, cui externorum corporum imagines per oculos, aliosque sensus ingressæ imprimantur; Sensus communis, aut Æstimatoria, quæ varias ejusmodi imagines inter se conferat, ac de iis judicet; Memoria denique, quæ præterita, aut longè dissita objecta, quæ semel cognita, sive percepta fuerint, excitet, iterumque percipiat.

III. Sed hæc argumenta, vel potius conjecturæ tanti certè non sunt, ut ille sensuum numerus, ordo, ac distributio nitidè, certissimèque ostendatur. Quod enim varios homines, variis ejusmodi sensibus pollere videamus, vividiorum esse, feliciorumque in uno memoriam, in alio judicium, &c. id unum probat, quod certa quædam celeritas, subtilitas, & habitudo, vel in cerebri substantiâ, vel in spiritibus ipsis requiritur, ut Memoriam, vel Phantasiam functiones peragantur; non verò quod ejusmodi sensus in variis cerebri partibus collocentur. Ab ingenuis certè, doctissimisque viris (a) memoratur, varias cerebri partes, ita noxiis humoribus vitiatas putruisse, ut ad superiores etiam ventriculos morbi vis serperet, neque tamen ullam in Judicio, vel Phantasiam ægritudinem observatam esse. Vulneribus quoque vel hæc in anteriori, seu posteriori capitis parte inflicta fuerint, varii subinde sensus, sine ullâ certâ lege impediuntur: quemadmodum apoplexis modò Judicii vim, modò Phantasiam, plerumque tamen oblitteratis fortasse

(a) Diembr. Anat. III.

se rerum imaginibus Memoriam offendit. Denique sensus omnes, cum a solâ spirituum vibratione, vel affluxu dependeant, in illâ cerebri parte collocari debent, in quâ nervorum origo reperitur, sive quò spiritus animales in externorum sensuum organis excitati, celerimè per nervos ipsos deferuntur; ideoque, sicuti prima nervorum origo, sive diffusio definiri, vel ostendi certè non potest, longèque verisimilius censi poterit, ab unâ, eademque cerebri parte nervos omnes diffundi, ita quoque distincta sensuum sedes definiri non poterit, longèque verisimilius in unâ, eademque cerebri parte omnium sensuum sedes collocatur.

IV. Sed, quicumq; demum internorum sensuum numerus habeatur, an simplici, & unicâ, sive distinctâ sede, vel cerebri parte operentur, tres animæ vires satis accommodè distingui possunt *Imaginatio*, *Judicium*, atque *Memoria*, quæ, cum in occultâ, interiorique cerebri parte, vel organo operentur, *Sensus interni* vocari merito poterunt. Illorum itaque singulos hîc ordine complectemur.

Imaginatio, vel Phantasia.

V. Quid imaginationis nomine intelligi debeat non modò paullo superiùs ostendimus, sed etiam initio Logicæ variis exemplis declaravimus cum de variis idearum, & Perceptionum generibus loqueremur. Diximus enim, atque experimento ipso clariùs, & uberiùs id intelligitur, quod ubi res aliqua exteriori sensu percepta fuerit, illius imago, species, idea, idolum, spectrum, phantasma, in nobis ipsis imprimitur, quod ubi certâ quadam lege excita-

citatum fortasse fuerit, rem ipsam antea cognitam suis veluti coloribus accuratissimè depictam animæ exhibet, ut illa non obiecti imaginem, sed obiectum ipsum percipere videatur. Quod cùm in admirabili, ac divinâ prorsus memoriæ vi clarissimè appareat, illustrius etiam in insomniis observatur, cum ludicrâ quadam, ac admirabili serie varias rerum imagines in nobis excitari sentimus, nec sinè maximâ voluptate experimur. Hæc itaque vis, aut facultas, quæ externarum rerum imagines exteriorum sensuum ope ad cerebrum usque delatas, impressas, sibi que ferè depictas retinet, *Imaginatio*, vel *Phantasia* vocatur, eamque vim sibi inesse, vel rudiores homines optimè norunt; quid verò imagines illæ cerebro impressæ censerì debeant, occultum adeo videri meritò poterit, ut vix hac in parte tenuissimis conjecturis locus supersit.

VI. Videmus quidem a Philosophis rem pulcherrimis, elegantissimisque vocibus declarari, tenuissimas nimirum imagines ab obiectis corporibus avolare, quæ in oculos, aliosque sensus ingressæ ad cerebrum deferantur, ibique, non secus ac rosæ imago, vel species in speculo, aut sigilli species in cerâ, aut denique innumeri characteres in paginâ, insculptæ, ac veluti depictæ conserventur; sed, ut optimè est a Boethio observatum,

*Quondam Porticus attulit
Obscuros nimium senes,
Qui sensus, & imagines
E corporibus extimis
Credant mentibus imprimi,
Ut quondam celeri stylo
Mos est aquore pagina,*

Quæ

*Quæ nullas habeant notas,**Pressas figere literas (a).*

Quæ etenim soni, saporis, coloris imago esse poterit, aut quâ specie color ipse, sonus, & sapor exprimi, sive depingi poterit, qui non sit sapor, aut color? quâ fieri poterit, ut innumerabiles, ac infinitæ ferè rerum imagines sic exiguæ cerebri parti accuratissimè describantur, ut ab infinitis aliis rerum imaginibus minimè obliterentur, aut confundantur? quis denique intelligat mollem, flexibilemque cerebri substantiam, quæ perenni sanguinis circuitu, ac peristaltico motu concutitur, & agitur, innumeris imaginibus constanti, diuturnâque serie, vel ordine conservandis parem esse? Quid verò quod nullæ prorsus imagines ab objectis corporibus avolant, nullæ exteriorum sensuum organis imprimuntur, nullæ denique ad cerebrum deferuntur, sed, ut alibi ostendimus, sensationes omnes, vel perceptiones solo spirituum animalium motu, nervearum fibrarum vibratione peraguntur? Si itaque motus ille, sive vibratio tandiu durat, quandiu nervi ab ingruentibus particulis percelluntur, deinde verò prorsus extinguitur, quænam peractæ sensationis species oriri, sive relinqui poterit, ut iterum excitetur?

VII. Gassendo videtur imaginem, sive vestigium, quod cerebro imprimitur, veluti plicaturam quandam haberi posse, ideoque cerebri partem, cui phantasmata inhæreant, veluti papyri tenuissimæ folium concipi, vel carta plicarum innumerabilium, inconfusarumque, & juxta suas ordines, suasque series repetenda-

darum, scilicet ubi una series inducta fuerit, superinducere licet alias, quæ primam quidem retegant transversum, & in omnem obliquitatem, sed ita tamen ut dum novæ plicæ, plicarumque series superinducuntur, priores omnes non modò remaneant, verùm etiam possint facili negotio excitari, redire, apparere, quatenus unâ plicâ arreptâ, ceteræ, quæ in eadem serie sunt, quadam quasi sponte sequantur. Deinde verò longâ, & accuratissimâ, plicarum comparatione, & exemplo declarat quomodo plures rerum imagines successivè excitari, ex unâ in imaginem aliam transiri, vestigia quandoque perturbari, deleri, vitarique possint, quod faciliè quilibet intelligere per sese poterit.

VIII. Ceterùm, etsi Gassendus id maximâ ingenii laude præstiterit, innumerabilis tamen hæc plicarum superintextarum series vix, ac ne vix quidem concipi, vel admitti poterit, quantacumque cerebri, vel spirituum subtilitas effingatur. Deinde verò quâ vi tenuissimæ spirituum particulæ plicas illas efficere poterunt, aut ejusmodi plicæ in flexibili cerebri substantiâ conservari? quod si formentur etiam, ac perenniter conserventur, quid illæ rerum cognitioni in nobis iterum excitandæ conferre poterunt? spiritus quidem in sensuum organis ab iteratâ corporis præsentia excitati per plicas, aut canaliculos illos ita deferri poterunt, ut ad animæ sedem deducti eandem vibrationem, eundemque motum imprimant, quem semel, atque iterum fortasse impresserint; cur verò eundem motum impriment si a nullo corpore excitentur, aut quomodo anima hunc motum, vibrationemque sibi jam

semel antea, iterumque perceptam cognoscat. Certè, si plicæ, quæ ab excitatis spiritibus fieri dicuntur, omnino similes fuerint, nulloque discrimine distinguantur, variam rerum cognitionem imprimere, vel excitare non poterunt; sin verò plicæ a variis corporibus variæ producantur, unde ea varietas oriri, aut ex unâ in plicam aliam varietas, atque connexio produci poterit?

IX. Paullo subtilior est Cartesii hypothesi, qui, cum animam in conario, vel pineali glandulâ collocaverit, nervos omnes ad glandulam ipsam in medio cerebri pensilem, & a quolibet, vel tenuissimo impetu facilè mobilem desinere existimat, ut illa a quolibet vel levissimo spirituum motu excitetur, & in unam potius, quàm in alteram partem inclinetur. Exinde verò fieri oportuit, ut cum spiritus aliquâ vibratione in glandulam inciderint, hoc ipso motu, sive tremore sensationem aliquam in mente excitent; cumq; iterum eadem prorsus vibratio glandulam impulerit, eadem cognitio iterum producat, sive pristina sensatio renovetur, & excitetur. Itaq; causa cur imago, vestigium, sive rei cognitæ species, nobis imprimi dicatur, atque subinde excitari, sunt meatus illi, vel canaliculi, qui a spiritibus partim in cerebro, partim in glandulâ ipsâ reperiuntur, qui cum aperti, hiantesque relinquuntur, a spiritibus iterum excitatis faciliùs pervaduntur, ideoque mens percipit meatus illos olim apertos esse, sive ejusdem rei cognitionem in se olim excitatam, vel productam fuisse.

X. Plurima tamen huic ingeniosæ Cartesii sententiæ opponi possunt. Ac primò quidem pre-

perperam prorsus animam in pineali glandulâ collocari; glandulam ipsam non pensilem, ac facilè mobilem, sed potiùs arterius, fibrisque constrictam esse; nervorum originem nullâ certâ ratione in pineali glandulâ collocari; spiritus in sensibus excitatos meatus illos, aut canaliculos perennes, constantesque aperire, non posse; aut si id liberè concedatur, adhuc intelligi non posse cur spiritus a nullo objecto corpore excitati, canaliculos ipsos iterum subeant; aut anima, quæ eandem iterum impulsione, seu vibrationem perciperet, nullâ tamen ratione adverteret se eâdem ipsâ vibratione antea percussam esse, ideoque non novam, sed veterem in se cognitione excitari.

XI. Quid itaque erunt imagines illæ, quæ cerebro impressæ remanent, atque in nobis etiam subinde excitantur, animamque ipsam in objecti jam pridem cogniti perceptionem deducunt? Accuratioribus fortasse Philosophi id viderint, aut si quæ spes inveniendi veri iis affulgeat, acerrimè inquirent. Mihi certè rem obscurissimam cogitanti id longè verisimilius haberi posse videtur, nullam prorsus imaginem, nullumque vestigium in cerebro imprimi, vel excitari nullum in cerebro, vel in imaginatione phantasma reperiri, omnemque imaginum seriem, & naturam a solo infantie errore, pravæque consuetudinis præiudicio pendere; quemadmodum enim cum manus igni admoveatur caloris sensus, & dolor in manu percipitur; atque, ut iterum idem caloris sensus in ipsâ manum post aliquod temporis spatium excitetur, nullâ ratione requiritur, ut motus ille spirituum, sive doloris imago, aut vesti-

gium superfuerit, sed solum sufficit, ut idem omnino motus, qui antea fuerat excitatus, & animæ exhibitus, iterum excitetur, & exhibeatur, ita prorsus, ut aliqua res ab animâ in cerebro cognita iterum cognoscatur, non planè requiretur ipsius vestigium, & imaginem in cerebro superesse, sed potius motum eundem, qui semel in spiritibus fuerat excitatus, iterum excitari. Itaque existimo, quod ex. gr. dum aliquid cernimus spiritus in retinâ excitati certâ quadam vibratione, certoque motu ad cerebrum deferantur, ibique occasione ejusmodi motûs excitetur, vel producat in animâ cognitio coloris; cumq; hæc obiecti corporis præsentia, spirituumque motus in cerebro, atque vibratio cessaverit, ipsa quoque animæ cognitio cessare debet, nullusque motus, imago nulla, nullum vestigium, vel cognitæ rei, vel cognitionis ipsius in cerebro relinquatur; ubi verò fortuitâ quadam occasione in spiritibus animalibus idem omnino motus, atque vibratio excitata fuerit, eadem quoque sensatio, quæ prius producta fuerat, producat, neque solum anima occasione illius novi motûs rem antea perceptam iterum percipiat, verum etiam pristinam cognitionem advertat, aut recordatur.

XII. Et certè, quocumque demum Cartesius, & Gassendus se vertant, quæcumq; demum species, phantasmata, plicæ, canaliculi in cerebro concipiantur, nulla tamen perceptio, nulla memoria haberetur, nisi spiritus animales eodem prorsus, similique motu agitentur, atque animam impellerent, quo jam pridem impulerant. Plicæ nimirum, & canaliculi semper in cerebro reperiuntur, neque tamen perceptio
sem.

semper in animâ efficitur, quoddâ spiritus ipsi non eandem semper plicam percurrant, eundemque canaliculum subeant; itaque perceptio, prima, vel iterata quoque cognitio a spiritibus excitatur, ideoque spiritus ipsi veluti proximum perceptionis instrumentum haberi debent; quid verò plicæ, vel canaliculi, vel quidquid aliud cerebro impressum concipiatur, movendis spiritibus conferre poterit, ut ope illius imaginis anima cognoscat, seque illud ipsum antea cognovisse memoretur? Non aliud certè, nisi quod spiritus ipsi per nervulos illos liberiùs, faciliùs, atque celeriùs excurrant, quos semel, atque iterum subiere: quemadmodum ferè canendi, sonandi, saltandique habitus acquiritur, vel in hoc uno consistit, ut spiritus animales per nervos quosdam quibusdam musculis movendis destinatos celeriùs excurrant; sed, sicuti in nervis ipsis nulla prorsus saltûs imago, aut vestigium relinquitur, ita quoque in cerebro nulla rei cognitæ species inesse debet.

XIII. Difficile est quidem exponere cur plurimæ res, quæ simul perceptæ fuerant, simul etiam, atque eodem ordine excitentur, ut in memoriâ fieri conspiciamus; verùm neque id faciliùs, aut clariùs explicari poterit si plicæ in cerebro ponantur, quarum una cum alterâ sibi proximâ non communicat, & quarum nulla hos potius, quàm alios spiritus excitare poterit. Veterem tamen, communemque loquendi modum, imaginum, specierum, phantasmatum nomina usurpare per nos liceat, dummodo hypotheses illas, quæ fortasse liberiùs inventæ, vel effictæ fuerint, temere non amplectamur.

Memoria.

XIV. Exinde verò facilè inferri poterit, quid *Memoriæ* nomine intelligi debeat, aut quâ ratione in nobis illa operetur. *Memoria* itaq; est illa vis, potentia, sive facultas, quæ rem aliquam antea nobis cognitam animæ iterum exhibet, eandemque rursus sensationem in illâ producit, quæ jam pridem objecti corporis præsentia producta fuerat. Plurimi nimirum existimant, ut antea dicebamus, quod ubi res aliqua sensibus externis cognoscitur, pulcherrima illius imago, sive vestigium in cerebro imprimatur, quod ab *Imaginatione*, vel *Phantasiâ* conservatur; si itaque imaginem illam, sive vestigium a spiritibus excitari contigerit, tunc in nobis pristinam cognitionem produci, nos recordari, vel memorare arbitrantur.

XV. Quandoquidem tamen imagines illæ, sive vestigia vix, ac ne vix quidem intelligi, & admitti possunt, ut paullo superiùs ostendimus, illud unum hic meritò coniici posse videtur nullam in nobis memoriam ab animâ ipsâ distinctam reperiri, sed animam ipsam tunc reminisci, vel recordari, quando rem antea cognitam iterum cognoscit, pristinamque cognitionem ipsam advertit, sive cognoscit se cognovisse; quod quidem *advertentia*, & *reflexionis* genus, quod in memoriâ necessariò reperitur, neque ab imaginibus ullis, neque a spiritibus produci potest, sed solùm a Deo, vel ab animâ producitur, quæ, cum iteratâ spiritum vibratione percellatur, rem antea cognitam iterum cognoscit, simulque advertit se non primò rem ipsam, sed iteratò cognoscere.

scere. Ut itaque anima cognitæ rei recorderetur, sive ut in nobis cognitionis alicujus memoria excitetur, necessariò requiritur, ut animales spiritus certo quodam motu, seu vibratione agitentur, illâ nimirum, vel simili, quâ animam ipsam perculerant, ubi primam rei cognitæ sensationem produserant. Hinc memoria, rerumque iterum percipiendarum facultas ab animæ voluntate, vel arbitrio non pendet, atque innumerabilium rerum, quas antea cognovimus, nullam prorsus cogitare mens poterit, nisi priùs illius imago, hoc est certus ille spirituum motus in cerebro fortuitò excitatus fuerit. Sic ex. gr. si ex veteribus Philosophis aliquem cogitare velim, requiritur, ut illius imago in me priùs excitetur, neque priùs anima, quamcumque decum vim, sive conatum efficiat, ad Pythagoram, potiùs, quàm Socratem memorandum determinari, vel applicari poterit, quàm illi Pythagoræ potiùs, quàm Socratis imago sese obtulerit. Hinc etiam plurimâ, vel invitâ, recordamur, quòd illorum imagines, sive phantasmata vel nobis invitâs excitentur; quemadmodum etiam iidem spiritus in cerebro excitati per nervos diffusi motus aliquos in corpore interdum excitant, quos anima averfatur.

*Sensus communis, Judicium, aut
Æstimativa.*

XVI. Quod si Memoria, & Imaginatio ab animâ non distinguuntur, nihilque propemodum censerî debent, quàm varia nomina, quibus insignitur anima dum ex eodem, similique spirituum motu rem aliquam antea cognitam

iterum cognoscit, multò certè minùs ab animâ distinguetur Judicium, *Æstimativa*, vel *Sensus communis*, facultas illa nimirum, quâ variorum sensuum imagines interse mutuò conferuntur, atque de rerum magnitudine, motu judicatur. Si etenim quælibet, etiam rudis, ac tenuissima, perceptio, quodlibet judicium, ad animam ipsam referri debet, anima profectò erit illa, quæ judicat, æstimat, aut communes Sensuum imagines sentit; unde *Sensus communis*, *Æstimativa*, *Judicium* in ipsâ collocatur. An verò facultates illæ, sive potentiæ distinguantur ab animâ, vel potius sint eadem entitas animæ, quæ juxta varias operationes, vel perceptiones, quibus afficitur, varium nomen sortiatur, in sequenti Disputatione fusiùs inquiretur. Interim longè verisimiliùs assumi poterit animam in cerebro residere, varios ibi spirituum motus ab externis objectis excitatos percipere, eâ lege, ut dum spirituum motuin primò excitatum percipiat *Sensus communis*, *Æstimativa*, *Judicium* vocetur; dum ita indifferens, & apta est, ut eandem rursus rem percipere possit, ejusdem rei cognitæ imaginem, ac phantasma conservare dicitur, unde *Phantasia*, vel *Imaginatio* appellatur; dum verò rem antea perceptam iterum percipit *Memoria* nominetur. Sed hæc, ut antea professi fuimus, coniiciendo solùm, divinando, balbutiendo, atque errando fortasse dicta sint, gravis enim obscuritas, quæ hac in parte reperitur, vix patitur, ut aliquid certi, exploratique afferri posse videatur.

XVI. Quæ de internis sensibus, atque imaginibus illis, sive phantasmatis, quæ cerebro imprimuntur, stasique temporibus excitantur,
jam

jam diximus, nos admonent, ut aliqua demum de vigiliâ, somno, atque insomniis, quibus somni tempore afficimur, exponamus: quod tantò clariùs, & uberius fieri posse videtur, quantò uberior lux in somniorum phænomena ex iis, quæ explicata jam fuerunt, oriri potest.

XVII. Communis est itaque Philosophorum omnium opinio tunc in animalibus somnum contingere, cum nervorum orificia ita obstrueta, vel clausa fortasse fuerint, ut spiritus animales a cerebro ad exteriorum sensuum organa, aut inde ad cerebrum celerrimè diffundi nequeant. Cùm etenim sensationes, & motus omnes, qui in vigilantibus observantur, ut alibi diximus, solo spirituum motu in animalium corpore peragantur, manifestissimè apparet, quod ubi sensationes illæ, vel motus intermittantur, ut somni tempore fieri conspiciamus, id ab interrupto, vel impedito spirituum motu oriri debet, quando nimirum spiritus animales in externis organis excitati ad cerebrum usque diffundi, nerveasque ibi fibras, vel animam percellere non possunt, aut perennî quadam, & irrequietâ agitatione in cerebro commoti ad exteriores corporis partes erumpere nequeunt. Quâ verò lege, sive quâ de causâ spirituum motus impediri, vel orificia nervorum obstrui possint, intelligi poterit, si nervos ipsos ex tenuissimis fibrillis compositos, & excavatos esse concipiamus. Fieri enim potest, ut ejusmodi fibræ nimio labore laxatæ, diuturnaque vigiliâ debilitatæ flaccescant, languidiorefque factæ ita jungantur, ut spiritibus aditum, motumque prohibeant; unde post longum laborem, vigiliamque somnum nobis, vel invitis, obrepere experimur. Fieri etiam potest,

ut

ut hausto vino, crassioribusque vaporibus inde ad cerebrum usque elevatis arteriæ, ac venæ turgescant, ideoque circumpositos, proximofque nervos ita obsideant, sive constringant, ut in illis spiritus excurrere prohibeantur; unde vino conciliari somnum, graviolemque soporem induci conspiciamus.

XVIII. Hinc illi, qui subtiliorem sanguinem, subtilioresque, mobiliore, ac igneos ferè spiritus habent, minùs somno indulgent, impensius verò, qui pinguioris, hebetiorisque sanguinis fuerint; opio, vino, papavere, aliisque *narcoticis* potionibus somnus conciliatur, quòd ipsis sanguinis, spirituumque motus mitior, lentior, atque languidior efficiatur; at potione *caffè*, sive *thè* somnus expellitur, quòd plurimæ in corporibus illis particulæ, spiritus, tenuissimique sales reperiantur, qui acri, celeri, perturbatæque agitatione nervorum cavitatem pervadant, spiritusque animales percellant, ac irrequietâ vibratione impellant, quod etiam in effusâ nimium lætitiâ, aut mœnore, aut aliis ejusmodi affectibus fieri experimur.

XIX. Quandoquidem verò motus aliqui somni tempore in animalium corpore adhuc peragi, vel superesse videntur, ut motus cordis, pulmonumque, &c., non omnes omnino nervi tunc obstrui debent, sed orificia nervorum, quæ cordi, pulmonibusque movendis inserviunt, perenniter aperta, vel hiantia concipi debent. Unde verò discrimen ejusmodi, sive varietas oriatur, intelligi poterit, si nervorum illorum fibræ crassiores, fortioresque sint, ideoque minùs, aut nihil a circumpositis arteriis comprimì possint; aut si illorum origo in eâ pu-
rio-

fiori, altiorique cerebri parte collocetur, ad quam ciborum halitus, sive vapores non perveniant, ideoque ab externis corpusculis minime perturbetur, ut Borellius existimavit.

XX. Interdum etiam in dormientibus varii alii motus observantur, quibus non modò spirituum diffusio, sed etiam eadem ferè sensatio peragi videatur, quæ vigiliæ tempore observatur; sic ubi dormienti manus acu puncta fuerit, digitusve contractus, ille dolorem percipit, manumq; contrahit; plurimi prolatas voces ita sentiunt, ut appositè etiam, non aliter, ac si vigilarent, interroganti subinde respondeant; plurimi denique dormiendo non modò voces edunt, sed etiam e lectò surgunt, vestiuntur, plurimum itineris conficiunt, variasque, ac miras operationes efficiunt, quæ vigiliæ tempore meliores, accuratioresque fieri non possent, neque tamen expergiscuntur. Quorum quidem effectuum non alia certè ratio reddi poterit, nisi quod in iis hominibus nervorum illorum tubuli, vel orificia minùs ingruente somno obstruuntur, ideoq; spiritus in externis, internisque corporis partibus excitati faciliè hinc inde excurrere, sensumque in animà producere possint. Apertis tamen oculis dormire, sive dormiendo videre nemini prorsus conceditur, quòd acrior, fortior, ac vehementior sit illa spirituum agitatio, quæ a luce, sive a visis corporibus in cerebro excitatur, ideoque spiritus animales, qui ab oculis ad cerebrum impelluntur, ceteros omnes commovent, ut obstructa nervorum orificia faciliè aperiant, spiritusque ad singula sensuum organa impellant. Quemadmodum ferè, si aut nimia, vehementique lux clausis, dormientibusque oculis admo-

veatur, aut fortiori sono, siue dolore nervæ fibræ percellantur, statim expergiscimur, quia tunc spiritus vehementiori motu agitantur, quàm ut aliqua nervorum orificia obstrui patiantur. Hinc palpebras arcendo lumini, claudendisque oculis, & tenebras etiam concessas conspiciamus, ut alternâ quietis, laborisque successione miserrima animalium vita leviùs traduci posset; & quemadmodum in vigilantibus mira, & incredibile rerum varietate, quæ sensibus nostris obijciuntur, maxima jucunditas excitatur, ita quoque in dormientibus ex admirabili phantasmatum, & imaginum, quæ excitantur in cerebro, varietate, & ludicrà quadam combinatione humanissima voluptas oriatur.

XXI. Ut itaque de insomniis, illorumque causâ, & origine quidpiam dicamus, experimento ipso clarissimè apparet, vividam illarum rerum imaginem, siue potius sensationem in animâ insomnii tempore excitari, quæ jampridem cognitæ, siue perceptæ fuerant, ac si illas iterum oculis, aut auribus subjectas intueremur. Id verò, quâ de causâ, vel lege fiat intelligi poterit ex iis, quæ de imaginatione jam diximus. Epicurus itaque existimat, quod

Non ratione aliâ, cùm somnus membra fatigat,

Mens animi vigilat, nisi quod simulacra lacerant

Hæc eadem, nostros animos, quæ cum vigilamus,

Usque adeo certè, ut videamur cernere eum, quem

Reddita vitæ jam mors, & terra potita est (a).

omnium nempe corporum, quæ sunt, aut fuerint, imagines, spectra, phantasmata per aërem volitare, clausos etiam oculos, & aures subire, animumque nostrum eâ ratione percellere, quâ eadem ipsa corpora oculis subiecta, vigiliæ tempore perculerant. Quæ quidem Epicuri phantasmata per aërem volitantia, sensusque moventia prorsus immeritò, atque inutiliter effinguntur, ut alibi ostendimus.

XXII. Peripatetici ad imagines illas, siue phantasmata, quæ per sensus ingressa cerebro impressa, ac veluti delineata fuerint, ita confugiunt, ut velint illa insomni tempore excitari, atque ab animâ percipi; cùmque imagines illæ vividius imprimi, aut facilius excitari possint, quæ nuperrimè in cerebrum apulerunt, aut nuperrimè colloquendo, cogitandoque sunt excitatæ, inde fieri existimant, ut ea præsertim somniando imaginemur, quæ pridie vidimus, aut cogitavimus; sed cùm spiritus animales ex unâ in imaginem aliam longè distitam excurrere, vel transilire possint, plures, ac disparatæ imagines in somno ita excitabuntur, ut nulla ferè connexio, & affinitas inter illas reperiat.

XXIII. Ita Gassendus, qui perceptarum rerum imagines, siue phantasmata non aliud esse opinatur, quàm tenuissimas plicas in cerebro inductas, per quas animales spiritus liberiùs excurrant, somnia tunc fieri existimat, cum spiritus ipsi per plicam aliquam excurrentes ad animæ sedem perveniant, eandemque in illâ affectionem excitent, quæ olim impressa fuerat, ut ejusdem rei recordetur; cùmque plicæ eadem serie dispositæ sint, quâ res olim perceptæ fuerunt, plicas ipsas eadem serie evolvi, aut

aut explicari, sive spiritus per plicas eâdem serie moveri, animamque percellere observat, quâ res antea cognitæ fuerunt; sed cum ex unâ in plicam aliam spiritus temere proflire possint, varias, dissitasque imagines, aut sensationes excitare etiam poterunt. Quod in Cartesianâ quoque hypothese superius explicatâ intelligi poterit.

XXIV. Quod si nullæ in cerebro imagines, sive phantasinata, nullæ plicæ, nulli meatus, aut canaliculi admittantur, adhuc somniorum origo intelligi poterit ex iis, quæ de memoriâ jam diximus. Quemadmodum enim tunc animam recordari, vel rem antea perceptam iterum percipere diximus, ubi motus idem, eademque agitatio in spiritibus excitata fuerit, cujus occasione anima eâdem sensatione se affici advertat, ita quoque, si clausis nervorum orificiis, spiritus omnes cerebro inclusi huc illuc temere discurrentes ad animæ sedem eodem motu, seu vibratione perveniant, quâ jam semel a sensibus advenientes animam perculere, eandem sensationem in illâ excitabunt, eademque res iterum percipi, somniumque fieri poterit. Cumque facilius spiritus ipsi motum illum, vibrationemque concipere possint, quem nuperrimè vigiliæ tempore habuere, facilius de objectis nuperrimè visis, aut cogitatis somniamus, ita tamen, ut spiritibus temere hac illac concursantibus, variæ, dissitæque imagines, & sensationes excitentur, unde illa somniorum irregularitas, & perturbatio oriri poterit.

XXV. Atque hinc intelligi facile potest somnia in singulis animalibus fieri, ut in equis, canibus subinde conspiciamus, qui dormiendo

ejulare, latrare, moveri videntur; quemadmodum tamen imaginandi vis maxima in homine reperitur, frequentiora, & pulciora in hominibus ipsis contingere debent. Quod si homines aliqui ab Aristotele (a). Plutarcho (b), Gassendo (c) memorantur, qui nunquam somniaverint, hoc ita intelligi debet, ut illi somniaverint quidem aliorum instar, sed ob variam cerebri, corporisque dispositionem, somniorum deinde immemores fuerint; quemadmodum his accidere experimur, qui somniando loquuti, aut moti fuerint, neque tamen vocum, aut motuum illorum recordantur. Intelligi etiam poterit, vanam prorsus, inutilem, ac nullam esse in insomniis divinandi, sive præsignificandi vim, cum insomnia ab imaginibus illis, sive spiritibus oriantur, qui nullâ lege, nulloque consilio in cerebro excitantur. Quod si quandoque aliqua res futura insomnii tempore prævisa fuerit, id fortuito solum contigisse putandum est; nisi fortasse ad divinam vim, quod raro tamen, cautissimèque fieri debet, confugiamus.



PHY-

(a) *De insomn.* c. ult. (b) *de def. Orac.* (c) *de Som.*

PHYSICÆ
 PARTICULARIS
 TRACTATUS SECUNDUS



DISPUTATIO IV.

*De Animâ rationali , sive de
 Homine .*




Varia corporum animatorum genera , quæ circa nos adolescere , sive moveri videntur , admirabilem quoq; corporis nostri structuram , easque vires contemplati jam sumus , quas Plantis , vel Brutis ipsi communes esse conspiciamus ; supremo denique hoc loco purior , nobilior , atque divina propemodum hominis pars , Animus nempe , inquirenda , vel exponenda nobis occurrit , quâ cetera rerum genera cognoscimus , quâ Deo ipsi , sapientissimoque rerum Artifici similes sumus , cujus denique gratiâ , & amore cetera omnia sic effecta videntur , ut præclare Chrysippus cetera nata esse hominum causâ [a] dixerit ; quemadmodum Tullius ea parata , & inventa ad fructum hominum (b) existit.

(a) Ap. Cic. III. Fin. (b) Cic. Nat. II. & Plin. præc. lib. VII.

firmavit. Quæ quidem cognitio non homines modò plurimùm decet, ut illi celebri Oraculo moneri debuerint seipsos cognoscere; ac planè dedecet animum, qui cætera cognoverit, seipsum non intelligere; verùm etiam ceteris omnibus jucundior haberi debet, ut præclare, & elegantissimè demonstrat Cicerò in lib. I. Tuscul. Itaque de Mente, vel Animâ rationali in hac ultimâ Disputatione differemus, eamque non ab humano corpore sejunctam, quod ad Metaphysicam pleno jure pertineret, sed ipsi potius corpori conjunctam contemplabimur, variasque vires, & operationes omnes, quæ ab illâ in humano corpore peragantur, exponemus. Quandoquidem tamen hæc ritè intelligi, vel explicari non possunt, nisi spiritualis etiam, & incorporea ipsius natura, & vires expositæ fuerint, hæc etiam breviter explicabimus; ut uno, eodemque conspectu singula Animæ rationalis munera intelligantur. Quod si hæc non ad Physicam, sed Metaphysicam potius pertinere subtiliori, severiorique viro fortasse videbuntur, hinc Metaphysicam ipsam incipere is arbitretur, ut quadam nimirum serie, vel ordine ex brutis ad homines, deinde ad Angelos, tum ad Deum ipsum ascendatur.

CAPUT I.

De Animi naturâ , & origine .

I.  E Animi, vel humanæ mentis naturâ , & origine loquuturi, illud ingenuè præfari posse videremur, quod olim Cicero variis Philosophorum opinionibus, hac in parte mirificè dissidentium accuratè enumeratis asseruit, *harum sententiarum, qua vera sit Deus aliquis viderit, qua verisimillima magnâ quæstio est (a)*. Si etenim Animi natura ex veterum Philosophorum placitis repeti debeat, incredibile est certè quanta in iis varietas, atque dissidium observetur, quanta etiam in inquirendis, vel exponendis illius viribus obscuritas reperiatur; ut non immeritò prorsus dixerit Heraclitus Animi naturam adeo obscuram esse, ut vix illius inveniendæ, vel explicandæ spes aliqua nobis affulgeat.

II Ac quidem quoad Philosophorum placita pertinet, illorum plurima initio hujus Tractatûs, cum de Animâ in genere loqueremur, enumeravimus. Diximus enim Democritum, Zenonem, Leucippum, & Epicurum putasse ignitum quiddam ex lavibus, rotundisque particulis animam esse (b); quemadmodum Stoici fervidum spiritum (c); vaporem mobilem Heraclitus, aërem Diogenes, & Anaxagoras (d), aqua substan-

(a) Nat. II. (b) Cic. Tusc. I. (c) Plut. IV. c. 5. & Arist. III. de An. c. 32. (d) Arist. I. An. c. 25.

stantiam, Hippocrates (a), Empedocles, & Dicaarchus ex singulis elementis compositam (b) animam existimarunt. Ex iis verò, qui puriorem esse, nobilioremque animi naturam putarunt, Thales omnium primus animam censuit naturam irrequietam esse, & suâ vi citabilem; Pythagoras numerum se moventem, Plato substantiam intellectualem per sese agitabilem, numerum se moventem harmonicè modulatum (c); ut Aristoxenus Musicus harmoniam (d), & Alcmaeo mobile quiddam, quod immortale sit, simile nempe celestibus mobilibus, & immortalibus (e).

III. Quas inter veterum Philosophorum opiniones illæ absurdæ prorsus, atque ineptissimæ censerì debent, quæ corpoream animam, ex tenuissimis nimirum, mobilibusque particulis contextam existimarunt. Quemadmodum enim inferiùs ostendetur, animæ substantia incorporea, & incorruptibilis admitti debet, cùmque cognitionis capax esse manifestissimè demonstretur, nullâ, vel tenuissimâ corporeâ substantiâ componi potest. Illud itaque in tanto Philosophorum discrimine observari meritò poterit, quod illustriora sapientiæ lumina Plato, Pythagoras, Thales, Aristoteles (f) (quamvis ejus opinio ambigua, vel incerta videatur) licet obscuriùs, & allegoricè mentis humanæ naturam expresserint, in hoc tamen mirificè consensere, illius substantiam incorpoream, ac spiritalem esse. Ex hoc itaque Philosophorum consensu, clarissimisque sacrarum Literarum testimoniis, atque Conciliorum Decretis com-

T 2

per-

(a) *Arist. I. Ani. 1. 25.* (b) *Plat. IV 2.* (c) *Plat. ibi.*
 (d) *Cic. Tusc.* (e) *Arist. I. Ani. 1. 32.* (f) *De Anim. II. c. 1.*

pertum est Animam rationalem esse substantiam spiritalem, & incorpoream, cogitandi capacem, quæ deinde corpori conjuncta, operationes illas efficiat, quæ in homine observantur, ut inferiùs ostendetur.

Quod si Tertullianus (a), Irenæus (b), Tatianus (c), Origenes (d), Ambrosius (e), Hilarius (f), Cassianus (g), aliique plures Ecclesiæ Patres rationalem animam corpoream esse dixerunt, aut hac in parte in errorem abrepti sunt; aut illam solùm *spiritualitatem* animæ negarunt, quæ Deo, vel Angelis convenit, ut illa respectu Dei corporea videretur; aut certè, quod cùm nihil creatum simul, & incorporeum concipere possent, ne animam nihil esse asserere viderentur, eam corpus esse dixerunt.

IV. Id accuratissimè inter innumeros Recentiores probat Cartesius, sed hac in parte a ceteris differt, quod ille non modò spirituales quandam substantiam, cogitandique capacem animam esse, sed etiam mentis humanæ, vel animæ rationalis essentiam in actuali cogitatione constitutam esse arbitratur. Quemadmodum enim Plato, atque Pythagoras, animam *numerum se moventem*, & Thales irrequietam illam esse putavit, ita Cartesius existimat animam semper aliquid cogitare, ab hac cogitatione cessare non posse, atque animam ab hac ipsâ perenni cogitatione non distingui, ut proinde actualis ipsa cogitatio veluti mentis essentia, natura, constitutivum haberi possit; non secus ac extensio actualis veluti corporis essentiam,

(a) *De Anim. c. 7. 9.* (b) *Lib. II. c. 34.* (c) *Ort. ad Græc.* (d) *Periarch. proem.* (e) *de Abrab. II. c.* (f) *in Math.* (g) *Collat. VII. c. 13.*

tiam, naturam, constitutivum a Cartesio haberi jam diximus. Hinc animam rationalem ipso quoque infantia, vel somni tempore cogitare arbitratur; ebrios, amentes, pueros, infantes, antequam etiam nascantur, incorporeâ quadam, & spirituali cogitatione præditos asserit, ut si fortasse aliquo temporis momento in humanâ mente cogitatio cessaret, eadem quoque mens, aut anima destrueretur.

V. Sed hæc opinio Cartesii plurimis, sapientissimisque Theologis, atque Philosophis improbatur, quod exinde plurima absurda facili, ac necessarîo deduci possent.

1. Si etenim, inquiunt, semper anima somni, vel infantia tempore cogitaret, cogitationis illius recordari deberet, impossibile est enim animam aliquid percipere, vel cogitare, nisi cogitationis hujus sibi conscia sit, ideoque nisi cogitationis speciem sibi imprimat; cùm itaque pueri illarum cogitationum, quas aut in matris sinu, aut infantia tempore habuerunt, nullam, vel tenuissimam, rudemque imaginem, aut ideam habeant, nulla prorsus in hominibus cognitio, vel cogitatio infantia tempore admitti debet.

2. Quod si in pueris, ebriis, dormientibus cogitationes aliquæ, aut voluntatis actus fieri, vel excitari possunt, ii certè honesti, praviq; esse poterunt, ideoque virtutis, ac præmii, sive vitii, ac poenæ capaces erunt, quod ab ipsis Ethicæ, vel Theologiæ legibus longissimè abhorret.

3. Deinde verò, cùm inæqualis, & varia sit animi, vel mentis humanæ cognitio, varia quoque, dissimilis, & inæqualis esset animi natura, & essentia, quod effingi certè non poterit,

terit, cum rerum essentia simplices, & invariables esse debeant, ut in Metaphysicâ ostendetur.

4. Ipsa deinde mentis substantia, a propriâ operatione minimè distingueretur, ideoque, sicuti cogitatio veluti quædam proprietas, & affectio, vel fortuita, & contingens operatio videtur, ipsa quoque animi substantia, & essentia fortuita, & contingens foret.

5. Quid verò, quod Angeli, & Deus ipse cogitat, ideoque si cogitatio mentis humanæ natura, & essentia foret, communis, & eadem foret hominis, Angelorum, Deique natura? Quod si Deus, & Angeli diverso, nobiliori-que modo, ac homines cogitent, diversa nempe sit in Deo, & in hominibus cogitatio, semper tamen idem cogitationis genus in omnibus reperiretur, vel in eodem cogitationis, & essentia genere convenirent; sicuti diversæ quidem sunt in hominibus cogitationes, sed omnes tamen uno, eodemque cogitationis genere continentur, neque proinde juxta Cartesium hominis essentiam variare possunt.

6. Commune denique, & celebre est effatum illud, quod *operari sequitur ad esse*, ideoque cogitatio, quæ est aliqua operatio, supponit esse, quod cogitat, sive mens ipsa cogitandi capax supponi debet antequam actualiter hanc vim exerat, vel actualiter cogitet; cum præsertim id solius Dei proprium sit, ut infinitè simplex cum sit, ab operatione propriâ non distinguatur; res verò creatæ, quæ imperfectæ, imparioresque sunt, partim *actu*, partim *potentiâ* componantur, ideoque actualis cogitatio non mentis essentia, sed solum proprietas, & affectio habeatur.

VI. Quæ cum ita sint, id facile Cartesio concedi poterit, quod unum fortasse Cartesius ipse voluit, proprium veluti characterem, quo mens, aut animus, a rebus omnibus distinguitur, esse cogitationem; siue nobiliorem, purioremque potentiam, quæ in homine reperitur, esse cogitandi vim; divinam hominis naturam clariùs, & illustriùs in actuali cogitatione effulgere; non verò quod ad hominis essentiam actualis cogitatio requiratur, aut ipsa non perinde sit anima, etiamsi per aliquod temporis momentum a cogitatione cessaverit; aut etiamsi semper, somni quoque, ebrietatis, & infantia tempore cogitet, ejusmodi cogitatio non veluti proprietas, & affectio concipi debeat, sed veluti essentia, natura, siue constitutivum haberi. Mentis itaque, vel humanæ, aut rationalis animæ essentia erit, ut illa sit incorporea, vel spiritualis substantia, cogitandi capax, regendoque corpori destinata, ut illam proinde optimè definivit D. Augustinus cum ait: *Si definiri tibi animum vis, & ideo quaeris quid sit animus, facilè respondeo; nam mihi videtur esse substantia quadam rationis particeps regendo corpori accommodata (a).*

Quâ verò lege, siue ratione, mens cogitandi capax, atque ad omnem prorsus cogitationem indifferens, ad hanc potiùs, quàm aliam cogitationem determinetur, inferiùs ostendemus cum de animæ rationalis viribus disseremus.

VII. Interim animæ rationalis, vel humanæ mentis origo breviter exponenda nobis occurrit, de quâ tamen alibi plura jam diximus,

T 4

cum

(a) *De quant. Anim. n. 22. ali. c. 13.*

cum universaliter in Disp. I. de animæ naturâ, & origine loqueremur. Pythagoras itaque rationales animas quasdam veluti divinæ substantiæ particulas esse docuit, quæ ex ipsâ divinâ substantiâ decerptæ humanis corporibus conjungerentur, ut ex uno in corpus aliud transfirent, unde *metempsychosis*, vel *animi transmigratio* ab Ægyptiis tradita (a) ad Græcos etiam pervenit (b). Plato verò Deum ipsum per singulas Universi partes ita diffusum, atque permixtum putavit, ut inde homines, & armenta vitam, animamque acciperent, quibus proinde inesse

partem divinam mentis, & haustus

Æthereos dixere (c) ;

hinc animum ipsum Dei non solum opus esse, verum etiam partem; neque solum ab ipso, sed de ipso, & ex ipso factum existimarunt (d). Neque alia certè mentis humanæ origo a sacris Literis expressa videri poterit, quibus asseritur Deum inspirasse Adamo *spiraculum vite*, ac si tunc ille aliquid divinæ substantiæ in Adami corpus infuderit. Sed hæc opinio, quæ Deum ipsum corporibus permixtum, corporum partem, omniumque operationum, quæ peraguntur in homine, principium, & fontem asserit, alibi rejecta fuit; cùm manifestissimis etiam Scripturæ locis ostendatur humanas animas ab ipso Deo creatas, hominique concessas esse.

VIII. Pluribus olim Ecclesiæ Patribus, atque præsertim Origeni (e), & Tertulliano (f) videbatur animas rationales ex parentibus in filios

(a) *Laert. proe. seg. 11. & Arist. de Anim. I. text. 53.*

(b) *Virg. Æneid. VI. v. 743. & Ovid. Meta. XV. v. 153.*

(c) *Virg. Georg. IV v.* (d) *Plur. qu. Plat.* (e) *vid.*

Orig. Periarch. proem. (f) de Anima c. 19.

filios traduci; ut, quemadmodum ex accensâ face plures aliæ faces accendi possunt, ut ignis ille, vel splendor, qui in primâ, aut veteri face reperitur, in faces alias diffunditur, ita ferè parentis animâ in filii corpus sui partem inserat, vel in filios diffundatur. Neque enim aliter fieri, intelligi, vel explicari posse putabant, quomodo originis labes, vel Adamî peccatum, quod *originale* vocatur, in posteros omnes transferit, omniumque animas infecerit, nisi animæ ipsæ ex Adamo in posteros traductæ fuerint, aut aliquâ ratione in animâ Adamî continerentur; quemadmodum ferè ægritudines corporis non aliâ ratione a parentibus in filios, atque nepotes traduci, diffundique possunt, nisi quia humores ipsi, tenuissimæque partes a parentum corpore, in filii corpus transferantur.

IX. Verùm iis facilè opponi potuit, humanas animas incorporeas esse, nullisque partibus constare; ideoque dividi, discerpi non posse, aut in corporibus recenter genitis, flammæ instar excitari, sive produci. Quod si originalis peccati diffusionem in illâ hypothese clariùs intelligi, vel explicari posse putarunt, ipsæ quoque virtutes, aut justitia, quæ in parentum animâ reperitur, eodem jure in filios traduci posset; aut, qui ex justis, sanctisque parentibus orirentur, nullum originale peccatum, nullamque labem contraherent, quod a Pelagio quidem inventum, sed a Conciliis acerrimè, atque uberrimè, & invictissimè ab Augustino clarissimis Scripturæ auctoritatibus confutatum est.

Quamvis tamen hunc Pelagii errorem rejecerit Augustinus, animorum tamen originem obscuram adeo, & occultam existimavit, ut

ne-


neque ab ullo nitidè explicatam, neque fortasse ab ullo feliciter explicandam esse dixerit, ideoque potius in medio eam reliquerit, ut innumeris in locis ostenditur (a).

X. Superest itaque, ut rationales animæ, Angelorum instar, a Deo creatæ fuerint; cùmque animæ regendo corpori sint destinatæ, idem prorsus animarum numerus admittatur, atque hominum, in quibus animæ corporibus coniungi debeant. Quin etiam plurimi existimarunt omnes humanas animas, Angelorum instar, initio Mundi creatas esse, atque in sideribus, aut aliâ Mundi regione collocatas donec illæ organizato jam corpori conjungerentur, ut de Platone jam diximus. Rabbinî certè omnium hominum, qui futuri fuerant, animas in Sinai Montis vertice adfuisse commemorant, legemque in Tabulis Moysi datis audivisse, neque enim nos aliter observandæ legi obnoxios esse oportere conjiciunt, nisi nobis eadem lex promulgata fuisset. Quæ quidem Platonis, aliorumque hypothesis, quàm falsa, & absurda sit, inferius ostendetur; quemadmodum in Morali ubi de legibus disseratur, Rabbinorum opinio clarissimè confutabitur. Interim verò veluti certum haberi debet rationalem animam tunc temporis a Deo creari, vel e nihilo educi, quo corpori jam organizato coniungitur; cùmque obscurum admodum, occultumque sit tempus, quo anima corpori coniungatur, ut Cap. III. declarabitur, occultum etiam, obscurumque censeri poterit tempus, quo anima a divino, sapientissimoque Opifice producat.

— — — — — CAP.

(a) De lib. arb. lib. III. c. 21. de Gen. ad lit. lib. X. cap. 20.

De animi spiritualitate, & immortalitate.

I.  Oelestis illa, ac divina ferè natura, & origo, quam nostris animis inesse jam diximus, vix, ac ne vix quidem intelligi, probèque ostendi posset, nisi incorruptibilis simul, & incorporeus animus ostenderetur: quibus veluti characteribus a corporeis rerum generibus ille distinguitur, ut inde perceptionum omnium fons, & origo repeti soleant. Utramque porrò animi dotem hic unà conjunximus, quòd una ex alterà nitidissimè deducatur, vel plurima certè lux ex unà in alteram diffundatur; vix etenim animus incorporeus admitti poterit, quin incorruptibilis etiam, & immortalis certissimè cognoscatur; aut vix incorruptibilis censi poterit, quin simul incorporeus supponatur.

II. Humanam itaque mentem, aut rationalem animam incorpoream, & spiritualement esse, ut inde exordiamur, ex illius operationibus manifestissimè demonstratur. Cùm etenim mens ipsa cognoscere, innumeras propemodum res, & objecta percipere soleat, corpus esse non poterit, cùm perceptio nulli corpori concedatur. Quis enim intelligat, aut ullà ratione concipiat, corpus aliquod vario motu, figurâ, sive texturâ præditum, aut motum ipsum figuram, & texturam, aut aliquid aliud a se, vel ab iis distinctum percipere? quis in ideâ corporis, quæ nonnisi extensionem, figuram, mo-

motum continet, perceptionem ipsam contineri posse putaverit, cujus idea ab extensionis, motûs, figuræ ideâ mirificè diffidet?

III. Hinc non falsa modò, & absurda, sed portento ferè simillima videtur esse Epicuri sententia, qui cognitionem nostram a tenuissimis, rotundisque corpusculis oriri posse arbitratur, animumque ex lævibus, mobilibusque atomis componi; quodque admirabiliùs etiam censeferi poterit, Lokium, aliosque, sapientissimosque viros, qui maximâ, ac divinâ ferè ingenii præstantiâ, & acumine merito celebrantur, existimasse corporis particulas subtiliter adeò, perfectissimèque concidi, misceri, disponique posse, ut cognitionis capaces reddantur?

Quantumcumque enim corpus subtiliùs concidatur variis, innumerisque modis disponatur, novam quidem, variamque semper figuram, motum acquireret, nunquam tamen percipiendi vim, quæ ab ipso motu plurimùm diffidet, consequetur. Faciliùs itaque fuerat cognitionem omnem, vel reluctantem conscientiâ nostrâ, homini negare, hominesque stipitum instar concipere, quàm cognitionem illam solo corpori tribuere; ideoque si cognitio animæ concedatur, hæc certè corpus esse non poterit.

IV. Quandoquidem verò Peripatetici existimant cognitionem aliquam brutis ipsis inesse, quæ non a corpore, sed a corporeâ perfectione, vel corporeâ formâ, animâ nimirùm sensitivâ producat, in hac etiam hypothesi animæ rationalis spiritualitas ostendi poterit, cum illius cognitio non modò ab ullo corpore, sed nec ab ullo quoque principio forma,

vel

vel perfectione corporeâ oriri possit. Comper-
tum itaque, manifestissimèq; perspectum est ani-
mam non corporeas modò res, & objecta per-
cipere, sed spirituales etiam, & incorporeas,
quæ nullâ ratione sensibus cognosci possunt;
quemadmodum enim diximus cum de Idearum
origine loqueremur, animus *veritatis, temporis,*
existentia, negationis, unitatis, justitia, pul-
chritudinis, Dei, aliasque plurimas imagines
continent, & nitidè contemplatur, quæ prorsus
incorporeæ sunt; Solis magnitudinem, an-
tipodum situm, chiliagoni proprietates, infi-
nitum ipsum acerrimè percipit, quæ nullo
phantasmate exhibentur; geometricas omnes
veritates, quæ a corporeis circumstantiis om-
nibus longissimè abhorrent, longâ, & admi-
rabili serie deducit, quod omnem prorsus in-
genii vim excedere videtur, ut dubitari certè
non possit ab intellectu nostro incorporeas quo-
que res, & objecta cognosci. Quod verò de
mente, vel cognitione jam diximus, de volun-
tate ipsâ, vel amore intelligi poterit; verita-
tem enim ipsam, justitiam, Deum diligimus,
quæ nullo sensu percepta jam fuerint, quin
etiam illa diligimus, quæ sensuum judicio
contemni potius, ac despici posse viderentur.

Si itaque operationes omnes humanæ mentis,
perceptio nimirum, & *amor*, incorporeæ sunt,
& in objecta prorsus incorporea diriguntur,
quis non intelligat mentem ipsam, a quâ ve-
luti principio, fonte, & origine operationes
illæ deducuntur, incorpoream esse oportere?
Si tanta celeritas est animorum, tanta memoria
præteritorum, futurorumque providentia, tot ar-
tes, tanta scientia, tot inventa, non posse tam
naturam, quæ res eas contineat, mortalem esse;
Et cum

Et cum simplex animi natura sit, neque habeat in se quidquam admixtum, dispar sui, atque dissimile, non posse eum dividi, quod si non possit, non posse interire (a)

V. Quod si rationales animæ spirituales, & incorporeæ sint, ut hætenus demonstravimus, quis non intelligat, quod incorruptibiles simul, & immortales admitti debeant? Si quid enim est, quod clariùs, & illustriùs appareat, nostrisque animis sui cognitionem ingerat, id certè est immortalitas animorum; quam uberrimè, & elegantissimè Cicero demonstravit Lib. I. *Tusc.* & in Catone, ubi maximam Platonici Phædonis partem expressit.

I. Quod itaque incorruptibiles, & immortales sint animi, primum, atque, ut Ciceroni videtur, *maximum argumentum est naturam ipsam de immortalitate animarum tacitam judicare, quod omnibus cura sunt, & maximè quidem, qua post mortem futura sint (b)*, ut ibi Cicero fusè demonstrat; quod si omnium consensus naturæ vox est, omnesque, qui ubique sunt, consentiunt esse aliquid, quod ad eos pertineat, qui e vitâ cesserunt, nobis quoque idem existimandum est. Levius tamen est argumentum ejusmodi, quàm ut sapientissimo viro maximum videretur; ostenderet enim non animos modò, sed corpora quoque immortalia fore, cùm hominum cura, sollicitudo ad corpora quoq; fovenda, nutriendaq; dirigatur; deinde verò quid ex inanis gloriolæ, aut immortalis, æternique nominis comparandi cupiditate, quâ tantopere plerique miserrimè cruciantur, immortalitas animi inferri poterit? cùm fama illa, si qua foret, nihil

(a) *Cic. de Senect.* (b) *Tusc. I.*

hil ad nos, animorumq; beatitatem conferat, nihilque aliud sit, ut in Morali ostendetur, quàm popularis error, qui ex nimio sui amore, veluti ex fonte deducitur. *Non enim eris memoria sapientis similiter ut stulti in perpetuum, & futura tempora oblivione cuncta pariter operient; moritur doctus similiter, ut indoctus (a).*

2. Melius itaque hæc immortalitas animorum ex Philosophorum, & nationum omnium consensu probari posse videtur. Quamvis enim Phærecidem Syrum hanc omnium primum docuisse referat Cicero (b), idque Thaleti Laertius concedat (c), compertum tamen est Ægyptios quoque Sacerdotes (d), Druidas (e), Brachmanes, Cascos, quos omnium antiquissimos appellat Ennius (f), Magos (g), Judæos (h), qui longè antè Phærecidis, aliorumque Græciæ sapientum tempora florere, incorruptibiles, ac immortales animos agnovisse, ut ex iis Phærecides ipse, ejusque auditor Pythagoras, & Empedocles opinionem illam acceperit. Quid verò commemorem Platonem, Stoicos, Pythagoricos, & Peripateticos in hac opinione fuisse, cum evidentissimis illorum autoritatibus. & argumentis ostendatur, illustriores omnes, nobilioresque Philosophos, ac insuper nationes omnes, barbarasque etiam Gentes in hoc asserendo mirificè consensisse (b)? si itaque, ut inquit Seneca *Multum dare solemus presumptioni omnium hominum, & apud nos veritatis argumentum est aliquid omnibus videri, cum*
de ani.

(a) Eccl. c. 2. vers. 15. (b) Tusc. I. (c) I seg. 24.
(d) Herod. II. (e) Cæs. Bell. Gall. VI. & Strab. XV.
(f) Laërt. pro m. seg. 9 (g) Joseph. Bell. Jud. II. c. 7.
(h) Vid. Hist. Philos. Esbn. par. II. c. 14.

de animorum aternitate differimus, non leve momentum apud nos habet consensus hominum, aut timentium inferos, aut colentium (a).

3. Non aliunde tamen clariùs, & uberius animi immortalitas quàm ex illius spiritualitate superius demonstratâ, deduci potest. Quid enim aliud corruptionis nomine intelligi potest, aut quomodo aliquid abrumpi, vel interire poterit, nisi cum varias in partes dividi, discerpi conspicitur? Si itaque animus incorporeus, indivisibilis est, ac partibus omnibus caret, dividi certè, discerpi, vel interire non poterit. Hinc optimè ait Cicero, quod *in animi cognitione dubitare non possumus, nisi in physicis planè plumbei sumus, quin nihil sit animis admixtum, nihil concretum, nihil coagmentatum, nihil duplex, quod cum ita sit certè nec secerni, nec dividi, nec discrepi, nec distrabi potest, nec interire igitur (b).*

4. Hoc itaque insigne discrimen inter corpora, & spiritum, corporeas nempe, vel incorporeas substantias reperitur, quod nulla quidem substantia, sive corporea, sive incorporea sit, prorsus interire, vel in nihilum converti potest; corporeæ tamen substantiæ, cum variis partibus componantur, in partes ipsas dividi, sive discepi possint, ut illæ vario, novoque ordine dispositæ, sive contextæ novam substantiam componant; incorporeæ verò, vel spiritus dividi, sejungique nequeant, ideoque prorsus incorruptibiles perseverent.

5. His argumentis, quæ ex Physicâ desumuntur, plurima quoque ex Morali, vel Ethicâ adjungi solent. Atque inter illa celebre est, quod

(a) *Sen. epist. 117.* (b) *Tusc. I. & de Sen.*

quod a Lactantio mirificè commendatur; quod nempe, nisi animis incorruptibilis esset, ac immortalis, Deus non esset justus. Justitiæ enim est pœnas iniquis, justis præmia conferre; sed, in hoc vitæ corruptibilis, & mortalis statu hæc pœnarum, præmiorumque distributio non salvatur, cum plerumque justī calumniis, inopiâ, ægritudinibus miserrimè torqueantur, injusti verò sælices, beatique sint, ergo alter vitæ status post hominis mortem admitti debet, in quo præmia justis, injustis pœnæ conferantur; ut uberius alibi ostendimus cum de Providentiâ Dei loqueremur.

VI. Incredibile est tamen quàm acriter in hanc animi immortalitatem exarserit Epicurus, quàm fusè, luculenterque Lucretius (a) argumenta congesserit, quibus ostenderet animos corporeos esse, simulque cum corpore interituros.

1. Opponit itaque primò animos simul cum corpore oriri, sensim adolescere, languere languente corpore, vigere vigente, ergo etiam moriente corpore mori debere.

2. Et sanè si corporis affectus, & ægritudines non modò corpus, sed animum ipsum afficiunt, atque miserrimè excruciant, ut in delirio, ebrietate, apoplexi, epilepsiâ conspiciuntur, atque eadem medicinæ vis non corporis solùm, sed animi quoque ægritudinibus medetur, quemadmodum corpus ab iis sensim consumitur, & interimitur, ita quoque animus ipse interimi, vel occidi debet.

3. Id verò fieri manifestissimè demonstratur in hominis morte; animus nimirum per sin-

Tom. IV.

V

gula

(a) *Lib. III. v. 223. &c.*

gula corporis membra diffusus sensim in extremis corporis partibus cum calore extinguitur, ac evanescit, donec tenuis ille calor, qui in corde supererat, exhalatur, atque animus, & homo moritur, crassiorque corporis pars, sive cadaver tenuiori flammâ jam exhalatâ putrescit.

4. Quod si animus immortalis foret, hac ipsâ immortalitatis spe, & desiderio mortem libens aspiceret, cum tamen illi potius invito mors obrepât.

5. Neque id certè mirum videri debet, cum tanta sit corporis, animique affinitas, ut ab invicem sejungi, sive divelli minimè possint, ideoque pereunte corpore, animus quoque interire debet; alioquin, si animus corpori superesset, in statu prorsus violento, sine ullo motu, vel cognitione reperiretur; aut certè incorruptibilis, & immortalis animus corruptibili, mortaliq; corpori minimè conjungeretur.

6. Immortalitas itaque soli Deo convenit, ut expressè docet Apostolus *Deus solus habet immortalitatem* (a). Ceteræ verò creaturæ singulæ, & si perfectiores, imperfectioresque sint, omnes tamen variabiles, & corruptibiles esse debent; unde Salomon asserit, *unus interitus est hominis, & jumentorum, & aqua utriusque conditio; sicut moritur homo, sic & illa moriuntur, similiter spirant omnia, & nihil habet homo jumento amplius* (b).

7. Postremò si immortalitas animorum a pluribus Philosophis defendi solet, a pluribus etiam aliis negatur, ut æquale proinde rationum robur in utramque partem agnosci debeat,

(a) *Ad Timoth. I. c. 6.* (b) *Eccles. c. 3. v. 19.*

beat; aut si immortalitas potius admittenda sit, non ex rationibus, & argumentis, sed solo divinæ fidei lumine ostendi poterit, unde Cremoninus, Pomponatius, aliique plurimi, qui in Lateranenſi Concilio damnati sunt, etſi divino Fidei lumine animi immortalitatem agnoſcerent, ac faterentur, in Philoſophiâ tamen, hoc eſt in hypotheſi, ſive doctrinâ Ariſtotelis, quam illi unicè ſequebantur, hanc oſtendi non poſſe dicebant.

VII. Sed hæc, aliaque id genus augmenta facile dilui, ſolvique poſſunt. Ac primò quod oppoſitum fuerat animum cum corpore naſci, vigere, ſeneſcere, ideoque mori cum corpore, reſponderi poteſt quod *quamvis corpus & anima inter ſe conjuncta, & ſociata naſcantur, utrumque tamen in naturam ſuam redit, & quod ex terrâ fuit, in terrâ ſolvitur, quod ex cœleſti ſpiritu, id conſtat, ac viget ſemper, quoniam Divinus Spiritus ſempiternus ſit (a)*, ut Lucretius ipſe cecinit

*Cedit enim retro, de terrâ quod fuit ante,
In terram, ſed quod miſſum eſt ab ætheris oris,
Id ruſus cœli fulgentia templa receptant.*

Quod verò vigeat animus vigente corpore, ſeneſcente ſeneſcat, explicari, clariffimèque intelligi poterit ex iis, quæ dicemus Capite ſequenti, ubi de corpore, animique uniione loquemur. Oſtendemus enim mutationes illas ægritudines, & accidentia non eſſe animi, ſed corporis, & ex admirabili ſœdere, quod ex arcano Dei conſilio corpus inter, & animam ſancitum eſt, fieri, ut juxta varias imagines, motus, affectus, & accidentia, quæ producuntur

(a) *Laſſant. lib. VII. c. 12, (b) Lib. II. v.*

tur in corpore, similes illis, & incorporei excitentur in animâ. Id optimè noverat, & exemplo confirmat Aristoteles asserens, quod *innasce autem videtur intellectus, & substantia quædam esse, nec corrumpi; nam si corrumpereetur quidem, id maximè fieret ab hebetatione illâ, qua in senectute contingit; nunc autem res perinde fit, ac in ipsismet sensuum instrumentis. Si enim senex oculum juvenilem reciperet, non secus ac juvenis videret; unde, & senectus non ex eo est, quod quidquam passa anima sit, sed quodd simile aliquid, ac in ebrietate, morbisque eveniat; ipsaque intelligendi, & contemplandi functio, propter aliquid aliud interius corruptum, marcescit, cum ipsum interim, cujus est, passionis expers maneat (a).*

2. *Ægritudines itaque, quæ producuntur in corpore, non modò corpus, sed animum ipsum afficiunt, non quodd corporeus ille dolor animi substantiam offendat, sed quia ex explicato jam fœdere similis in animâ dolor excitetur. Id verò ita fieri manifestissimè demonstratur, quod animus ipse, dum corpus aliquâ ægitudine perturbatur, oppositum affectum excitare in sese poterit, ut languente corpore animus alacri quadam jucunditate perfundatur, ut innumeris exemplis uberrimè ostendi posset.*

3. *Exinde verò intelligitur cur in morientibus anima sensum deficere, & extinguì videatur, ut priùs illa animæ pars, quæ pedibus inerat, extinguatur, tum sensum partes animæ cordi proximiores deficient, donec tenuissima animæ pars cordi infusæ vanescat.*

Quæ-

(a) *De Anim. c. 4.*

Quemadmodum enim mox ostendemus, hæc animi diffusio per totum corpus nullâ ratione concipi, sive defendi poterit; ideoque non anima in externis corporis partibus sensim deficiet, sed sanguinis solùm, spirituumque motus in ipsis sensim languescet, ideoque nullâ sensatio in illis peragi poterit, unde vulgò censetur animam, inde recedere, sive aliquam animæ partem ibi existentem interire. Quod si cum Peripateticis animæ diffusio defendatur, non animæ partem ibi interire dicendum est, sed eadem animi substantia, quæ per singulas corporis partes vitalibus functionibus peragendis idoneas diffundebatur, cum partem aliquam morbo jam tabescentem, iisdemque functionibus imparem offenderit, illam fovere, vel animare non poterit; quemadmodum ferè Sol, qui lucem, radiosque in singulas partes diffundit, ubi intercepto corpore opaco impeditur, non ampliùs illuminat, neque tamen ipse corrumpitur.

4. Quandoquidem tamen corporis ægritudines animum ipsum afficient, anima corporis dolores, mortemque refugit, quæ non sinè maximo doloris sensu haberi plerumque solet; & quamvis se morti superstitem, ac immortalem futuram certò noverit, mortem tamen ipsam, corporisque interitum refugit. Accedit etiam, quod cum futuræ vitæ, suæque sortis adhuc incerta sit, spemque inter, ac timorem miserimè torqueatur, infælicem futuræ vitæ statum verita, a corpore exire trepidet. Hinc innocentes homines, quos nullus sceleris, & antea vitæ pudor offendit, non alacri modò, serenoque vultu mortem aspicere, sed ipsam quoque veluti laborum fructum, uberemque mercedem, tranquillam sedem, & portum ve-

hementi quodam desiderio, & amore optare, conspiciamus.

6. Tantum itaque abest, ut animus a corpore sejunctus violentiam patiatur, ut potius ab ipso corpore, veluti carcere quodam solutus, liberrimè expatiatur, viresque suas purius, atque nobiliùs exerat. Vim potius in ipso corpore pati diceretur, nisi regendo corpori a divino Artifice destinatus, prorsus indifferens foret, ut corpori conjunctus, vel a corpore sejunctus existeret; quo veluti discrimine ab Angelis ille distinguitur, qui regendo corpori minimè destinantur.

7. Neq; ab Angelis modò, sed etiam ab ipso Deo distingui poterit animus, etsi immortalis, & incorruptibilis concedatur. Primò quidem, quòd Deus neque principium habuit, neque finem habere possit, animus verò, etsi sine carere debeat, aliquando tamen incœperit; deinde verò quòd sicuti Deus habet esse a se, quod a nullo principio recepit, ita quoque naturâ suâ, necessariò, ac independenter ab alio sit immortalis; animus verò, sicuti proprium esse recepit ab ipso Deo, ita quoque divino munere incorruptibilitatem, immortalitatemque recipiat. Deus itaque solus est immortalis immortalitate *essentiali*, animus verò immortalitate *participatâ*; vel ut a VI. Synodo definitum est, *non naturâ, sed gratiâ*; quemadmodum prorsus Deus solus est invisibilis, sapiens, bonus, existens, &c. neque tamen creaturis ipsis existentia, bonitas sapientia tenuis, & participata negari poterit.

Quod verò ex sacris Literis opponebatur, homines brutorum instar spirare, ac interire, ut quemadmodum brutorum anima, si quæ sit, una

unâ cum corpore extinguitur, ita extinguitur in homine, facillè solvi poterit ex iis, quæ de rēspiratione, sensibusque jam diximus. Hæc etenim, aliaque id genus, iisdem organis, eâdemque lege in brutis, & homine peraguntur, ideoque operationes illæ, sive principium, a quo oriuntur, eodem modo corrumpi, vel interire poterit. Itaque vel a solâ corporis, organorumque texturâ, vel ab animâ sensitivâ oriuntur, hæc organorum textura, vel anima sensitiva æqualiter in brutis, & hominibus extinguetur, neque ex corporeis ejusmodi, vel sensitivis hominum operationibus animi incorruptibilitas inferri poterit. Cùm tamen in homine præter ejusmodi corporeas operationes, aliæ plurimæ reperiantur, quæ neque a corporis texturâ, neque a corporeo, sensitivoque principio oriri possunt, hoc insigne, maximum, quæ discrimen homines inter, & bruta reperitur, quod in illis principium illud incorporeum, incorruptibile, & immortale admitti debet. Id non modò ex innumeris Scripturæ locis, sed ex ipso quoque Salomone ostendi poterit qui expressè dicit, quod in hominis morte, *revertitur pulvis, aut corpus, in terram suam unde erat, & spiritus revertitur ad Deum, qui dedit illum (a)*. Unde plerique superiora verba de hominis, ac jumenti interitu, & æquâ utriusque conditione, non veluti ex Salomonis sententiâ dicta arbitrantur, sed potiùs ex impiorum hypothesi, quos ille colloquentes inducit, ac inferiùs confutat.

VIII. Id unum postremò solvendum superest, quod ultimo loco oppositum fuerat, plu-

(a) Cap. 12. v. 7.

rimos nempe de animorum immortalitate dubitasse, aut illam seridè, liberrimèque sustulisse. Quà quidem in re plurimæ, ac dissidentes responsiones afferri solent, quas hic uberius exponere nec juvat, nec decet. Itaque brevissimè respondetur, quod si aliqui animorum immortalitatem non agnoverint, aut negaverint, longè tamen plures, illustrioresque sunt illi, qui immortalitatem illam nitidè, clarissimèque agnoverunt, atque uberrimè demonstrarunt, ut paullò superius ostendimus; ideoque, si ex authorum numero dirimenda res foret, cùm illustriora sapientiæ lumina in asserendâ animorum immortalitate mirificè consenserint, immortales animi admitti deberent. Cæterùm, ut ingenuè, & accuratè loquamur, nullus fortasse effingi poterit, si aliquos solùm rudiores homines exceperis, qui sicuti hanc ipsam animorum immortalitatem, ita quoque plurima, quæ certissima, & perspectissima sunt, ignorant, qui immortales animos non agnoverit; invitâ tamen, ac reluctante conscientia negarunt aliqui, sive ut liberiùs, & impuniùs peccarent, sive ut audaci hac opinione supra reliquum hominum vulgus sapere, clariùs percipere, vividiori-que acumine, & ingenio excellere viderentur.

Quorum quidem quàm perditum, atque imprudens consilium, quàm infelix, & misera conditio sit, facillimè deprehendi potest, quod, etiam si nulla futuræ vitæ, vel immortalitatis spes, aut formido animos nostros impelleret, solo tamen virtutis, & honestatis amore scelera vitare, honestamque vitam traducere deberemus; isque non homini, sed feræ par foret, qui cùm nullâ spe, nullâque formidine teneretur liberè, ac impunè peccaret, ut uberius in Morali ostendetur. Quod

Quod si non virtutis amore, sed solâ potius pœnæ formidine hominis voluntas impelli deberet, miserrima tamen illorum conditio foret, qui animos immortales esse non putent. Si etenim fortasse post mortem animi superessent, ii, qui hanc animi immortalitatem negassent, æternas scelerum, anteaactæ vitæ, atque immortalitatis negatæ pœnas subirent, ideoque levi, tenuissimâq; voluptate illecti, quæ in sceleribus, mortalique vitâ haberi posset, immortalis pœnæ periculo sese exponerent. Ii verò, qui immortales animos esse putant, si immortales revera illi sint, levissimâ temporalium voluptatum jacturâ æternam beatitatem comparassent, aut hac ipsâ certè levi temporalium voluptatum jacturâ, si cum corpore animus extinguatur, æternæ pœnæ periculum effugissent. Hinc optimè, sapientissimèque ait Cicero; *quod si in hoc erro, quod animos hominum immortales esse credam, libenter erro, nec mihi hunc errorem, quo delector, dum vivo, extorqueri volo. Sin mortuus, ut quidam minuti Philosophi censent, nihil sentiam, non vereor, ne hunc errorem meum mortui Philosophi derideant (a).*


IX. Hæc qui seriò, graviter, accuratèque secum ipse perpenderit, nullus dubito quin incorpoream, & immortalem animi sui naturam clarissimè, manifestissimèque non videat; aut si fortasse, quod fieri certè non poterit, mortales animos esse suspicari liceret, perditam tamen, amentem, neque satis unquam deplorandam eorum conditionem esse non intelligat, qui inter utramque opinionem fluctuantes, eam potius levissimæ voluptatis fructu, gra-

(a) In *Corone*.

gravissimo æterni doloris periculo temere amplecterentur, quæ mortales illos esse arbitrantur, quàm levissimæ potiùs voluptatis jacturà, gravissimâ, æternæque gloriæ spe aliam eligere, quæ immortales illos esse defendit.

C A P. III.

*De modo, quo Anima corpori
conjungatur.*

- I.  Tsi animi nostri natura ægrè a nobis intelligi, deprehendique possit, ac illud maximum sit, ut a Cicerone dictum accepimus, animo ipso animum videre, naturam tamen ejusdem animi intuenti multò difficilior occurrit cogitatio, multòque obscurior qualis animus in corpore sit tanquam aliena domi, quàm qualis cum exierit, & in liberum Cælum quasi in domum suam venerit (a). Si etenim animi natura veluti sejuncta a corpore concipiatur, ejusque vires, ac potentiæ accuratissimè perpendantur, exinde faciliè intelligi, ostendique poterit ipsam incorruptibilem, incorpoream, ac immortalem esse oportere. Si verò animus ipse incorruptibilis, incorporeus, & immortalis in corruptibili, mortaliq; corpore reperiatur, quis clarè cognitum, sibiq; satis perspectum esse gloriabitur, quâ vi, quibusque nexibus immortalis illa, ac divina ferè mentis substantia

(a) *Tusc. I.*

tia corpori conjungatur, corporeis ita sensibus illigetur, ut ab illis in operando dependeat, quâ denique corporis parte resideat, operationes plurimas plantis, & brutis communes efficiat? Hæc itaque singula nunc explicanda suscipimus, easque hypotheses, quæ a veteribus, recentioribusque Philosophis inventæ fuerint, ordine complectemur.

II. Ac primò, quod ad animi sedem pertinet, ipsum aliqui per singulas corporis partes, siue universam corporis humani substantiam diffundi putarunt; alii verò in certâ solùm, distinctâque corporis parte collocarunt. Prior sententia Peripateticis tribui solet, qui, cùm rationalem animam tum ex rationibus, tum præsertim ex celebri Viennensis, ac Lateranensis Concilii Decreto *formam substantialem* hominis esse observassent, id aliter fieri non posse putarunt, nisi aliarum formarum instar per singulas materiæ, vel corporis partes anima diffunderetur. Illud etiam argumento maximo videri poterat, atque Peripateticos ipsos in hanc sententiam impulit, quod in quâlibet corporis parte dolor, aliæque sensationes percipiuntur, ideoque rationalis anima, quâ singulæ operationes hominis peraguntur, ideoque etiam dolor ejusmodi percipitur, in quâlibet corporis parte reperitur. Cùmque anima spiritualis, & incorporea sit, ac partibus careat, non poterit aliquâ sui parte in manu, alterâ in pede reperiri, sed tota in toto corpore, simulque tota in qualibet etiam, vel tenuissimâ corporis parte reperiretur; eâ tamen lege, ut non æqualiter singulas corporis partes informet, aëuet, vivificet, perficiat, animet, idest non in singulis corporis partibus easdem operationes peragat, sed
in

in aliquibus vegetet, sentiat in aliis, in aliis denique intelligat; quod variis exemplis, Theologorumque auctoritatibus illi confirmant.

III. Sed nulla tamen auctoritas, aut nulla certa ratio potest afferri, quâ hæc animi diffusio per totum corpus ostendatur. Quod enim asserunt animam rationalem ex Viennensis, ac Lateranensis Concilii Decreto esse *formam substantialem* hominis, ideoq; illam aliarum formarum instar per totum corpus diffundi oportere, reprehendi fortasse poterit, quod animam rationalem, quæ spiritualis, inextensa, indivisibilis, ingenerabilis, & incorruptibilis est, corruptibilibus, genitis, corporeisque formis comparant, ejusdemque conditionis esse arbitrentur.

- Nec certè requiritur ad hoc, ut anima forma substantialis hominis appelletur, ipsam per totum corpus diffundi. Quid enim aliud *forma substantialis* nomine intelligi potest, ut in Phys. Gen. Tract. I. Disp. IV. c. 3. jam diximus, nisi principium illud, sive perfectio, vel actus, a quo operationes hominis oriantur? cùm itaque operationes hominis ab animâ rationali fieri possint, licet illa in solo cerebro veluti sede reperiatur, manifestè apparet hanc animæ diffusionem inutilem, & absurdam esse. Itaque si operationes hominis dicantur esse operationes illæ, quæ ab animâ rationali fiunt, ut *intelligere*, & *velle*, quemadmodum illæ *inorganica* sunt, nullumque corporis organum, seu partem exigunt, in quâ peragantur, ita planè iis ritè peragendis nullâ ratione requiritur, ut anima corpori coëxtendatur. Quod si operationes hominum dicantur esse corporeæ quoque sensationes, aut perceptiones, ideoque,
cùm

cùm in singulis corporis partibus illæ contingant, in singulis etiam corporis partibus sensitiva, simulque rationalis anima sit admittenda, id unum reponi faciliè poterit, quod superius ostendimus, sensationes nempe non in externis corporis partibus, sed in solo cerebro fieri, in illâ nimirum cerebri parte, in quâ nervorum omnium origo reperitur; unde quemadmodum rudis admodum est, ac vulgaris opinio, ab infantia præjudiciis exorta, quod dolor in manu, vel pede sentiatur, ut Disp. III. c. 17. fusè demonstravimus, ita quoque rudis, & vulgaris erit opinio, quod anima sentiens in pede reperiat. .

Quod si postremò inter alias hominis operationes haberi velint ipsum nutriri, adolescere, perenni calore foveri, ipsum denique corpus in ratione, vel esse corporis constituere, tantum abest, ut operationes illæ ab animâ rationali producantur, ut absque ullâ animâ, distinctoq; principio a solo corpore peragantur. Quemadmodum enim ostendimus cum de animâ vegetativâ Plantarum, paulloque superius de animalium vitâ, ac nutritione loqueremur, operationes illæ a solâ corporis organizatione, vel admirabili partium varietate, ac texturâ dependent; ideoque prorsus immeritò, aut animæ rationali, quæ vegetativæ munera obiret, aut alii cuicumque animæ concederentur. Quod verò pertinet ad esse corporis, illud etiam ab animâ repeti certè non poterit, quæ corpus ipsum supponit, atque inutiliter prorsus ab ipso corpore formam, quæ in illo reperitur, expelleret. Plurimi certè ex Peripateticis ipsis, etsi rationalem animam veluti formam substantialem in corpore admittant, nobiliùs tamen
de

de illius naturâ, præstantiâ, ac viribus sentiunt, neque illius dignitatem ad viles adeo functiones deducunt; ideoque aut partiales formas admittunt, quibus nimirum singulæ corporis partes *informentur*, ut oculi a formâ oculi, &c. aut certè formam ipsam *corporis*, vel, ut ipsi vocant, *corporeitatis*, quâ corpus ipsum in esse, genere, conceptu, sive ratione corporis collocetur. Quod hîc obiter dictum volumus, non ut alterutri ex his opinionibus, ac primæ præsertim adhærere videamur, sed ut alii Peripatetici intelligant temere prorsus, & inconsultò Concilii, aliorumque Patrum auctoritatem afferri, quæ si in illorum sententiâ, vel hypothesi, explicandæ foret, opinionem illam veluti fidei dogma proponerent, quod sine gravi, & iniquâ prorsus catholicorum, doctissimorumq; hominum injuriâ dici non potest, cùm præsertim veteres etiam Ecclesiæ Patres, atque in primis Augustinus animam rationalem, veluti hominis formam operandi principium, &c. admiserint; neque tamen formas illas substantiales, quæ ab Arabibus, aut quibusdam certè Peripateticis inventæ sunt, agnoverint, ut in *Physicâ Gener. Disp. IV. Cap. 3.* fusè demonstravimus.

In hoc itaque falli videntur plurimi Peripateticorum, quod unicam formam substantialem, quam ipsi proinde *actum primum* appellant, in homine admittant, atque operationes omnes, quæ fieri videntur in homine, ab ipsâ deducant; ideoque, sicuti *intelligere*, & *velle* fiunt ab animâ rationali, ita quoque eadem anima sentiat, vegetet, corpus constituat, &c. Sed cùm adolescere, nutriri, moveri a solâ corporis structurâ, organorumque texturâ dependant;

deat, & anima rationalis verè, ac propriè det homini intelligere solùm, & velle; aut, si etiam libeat, sentire quoque, vel objecta corporea percipere, operationes autem illæ in nullâ distinctâ corporis parte, istæ verò in solo cerebro peragantur, anima dici meritò poterit forma substantialis hominis, etsi toti corpori non coextendatur.

IV. Veteres certè Philosophi animam rationalem non in toto corpore, singulisque corporis partibus diffusam esse putarunt, sed in certâ quadam, distinctâque corporis parte collocarunt, ut ab Empyrico, Cicerone, & Plutarcho (a) memoratur.

Sic Plato, Pythagoras, atque Democritus illam in capite, Strato in superciliorum interstitio, Diogenes in arterioso cordis ventriculo, Empedocles in sanguinis concreione, quid enim illos commemorem, qui illam in cervice cordis, aut in præcordiis admiserunt? Parmenides denique, & Epicurus in toto pectore posuerunt. Nuperrimè verò Cartesius (b) mentem in conario, vel glandulâ pineali, quæ in superiori cerebri parte reperitur, veluti sede, ac regiâ collocavit. Cum enim ceteras cerebri partes duplices esse observasset, duplicem nempe ventriculum, duplices prominentias, &c. glandulam verò unicam, simplicem, atque in mediâ cerebri parte, unde nervorum origo deducitur, veluti arterioliis suspensam, facillimèque mobilem conspexisset, hanc unam velut animæ sedem elegit, ejusque vires modo superiùs exposito declaravit.

V. Quam-

(a) Vid. Plut. Plat. IV. c. 3. (b) De Affect. par. I. art. 31.

V. Quamvis tamen id ingeniosè Cartesius excogitaverit, suamque hypothesim eleganter explicaverit, experimenta, & argumenta plurima ostendunt, id muneris glandulæ pineali concedi non posse. Experimenta quidem cum glandula hæc aliquando prorsus vitiata, putrefacta in quibusdam inventa fuerit, aut etiam in quibusdam omnino defecerit, cum tamen, illi viverent, omnesque animæ functiones ritè peragerent. Argumenta verò, cum neque ad conarium nervuli deduci, neque glandula arteriolis solùm levissimè sustineri, aut quamcumque in partem facillimè verti possit, neque illa texturæ tam nobilis observetur, quæ animæ recipiendæ par videatur, cum nullus ferè illius usus in cerebro ab Anatomicis hætenus sit definitus, aut vilis certè, & obscurus adeo, sit, ut memorari vix possit (a). Quod illa verò sit ex variis cerebri partibus unica, falsum est, cum unicum etiam sit *infundibulum*, *cerebellum*, &c. aut etiamsi foret unica, & simplex ex illius tamen unitate animæ in illâ sedes, ac veluti regnum nonnisi leviter, & infeliciter deducetur.

VI. Quæcumque tamen hypothesis, aut Philosophorum opinio de rationalis animæ sede veluti verisimilior eligatur, ægrè tamen intelligi, & explicari posse videtur, quâ vi, quibusque nexibus illa corpori conjungatur, atque externorum sensuum ope proprias in illo vires exerceat, ut substantialis proinde illius forma censeretur debeat. Cum etenim imagines illæ, sive vestigia, vel, ut alibi diximus, spirituum motus corporeus sit, quæ poterunt ab ani-

(a) Vid. Diembr. Anat. III. c. 6.

animā, incorporeo nimirum, spiritualique principio cognosci?

VII. Peripatetici quidem id ab ipsā animi naturā ita repetendum esse arbitrantur, ut, cum illa corporis forma censerī debeat, *per informationem*, novo nimirum, distinctoque præsentiæ genere, illi inhæreat, coextendatur, ac in illo aliarum formarum instar operetur. Quod si corporeæ sint imagines illæ, quæ sensibus percipiuntur, atque in phantasiā, vel Imaginatione veluti impressæ conservantur, intellectui tamen vim quandam concessam esse arbitrantur, quā irradiando supra phantasmata, ex iis coelesti hoc lumine perfusus speciem quandam a singularibus conditionibus abstractam, præcisam, ac depuratam eliciat, quæ incorporea sit, atque ab eodem intellectu nitidè percipiatur, ut primo Capite Logicæ innuimus, atque Capite sequenti fusiùs ostendemus. Sed hanc explicandi rationem pluribus, gravissimisque difficultatibus obnoxiam esse jam diximus. Quis enim intelligat ex corporeo phantasmate incorpoream aliquam speciem abstrahi, vel educi posse, cum certè nihil incorporeum, & immateriale, vel nulla species incorporea, in corporeo, materialique phantasmate permixta delitescat? Quod, si incorporea quædam species corporeis circumstantiis, vel affectionibus permixta sit, quomodo abstrahi, vel secer ni illa poterit ab intellectu, nisi priùs corporeæ simul, & incorporeæ phantasmatis circumstantiæ ab ipso concipiantur? quod si corporeæ circumstantiæ cognosci possunt ab intellectu, ut ab ipsis incorporeæ fecernantur, vel incorporea species abstrahatur, cognosci etiam poterit

rit ipsum phantasma, ideoque abstractio prorsus inutilis videretur.

VIII. Communis est itaq, ac etiam longè, ut apparet, verisimillima censerì poterit illorum opinio, qui *phantasmatum depurationem*, *species impressas*, & *expressas*, *intellectum agentem*, & *patientem*, *radios intellectuales*, aliaque id genus Arabum inventa rejiciunt, atque animi cognitionem, corporisque motus ex admirabili, constantique fœdere, quod inter animam, & corpus ipsum a Deo sancitum fuerit, repetendos esse arbitrantur.

Cartesius itaque, atque Leibnitius observant rationalem animam spiritum quendam, sive incorpoream substantiam esse, quæ per sese intelligere, ac velle possit; neque, ut ejusmodi operationes, aut vires exerat, corpori conjungi debeat, sed a corpore quoq; sejuncta intelligere, ac velle possit. Ex alterâ verò parte corpus admirabili partium texturâ præditum absque ullâ mente, vel animâ, sed hac ipsâ solum partium texturâ, vel ordine, plurimos effectus, motus, operationesque corporeas producere potest, ideoque etiam spiritus animales ab externi corporis, vel objecti particulis excitati, certos in cerebro motus producere, vel imagines imprimere, vel impressas excitare subinde poterunt.

Has itaque distinctas, atque inter se mirificè dissidentes corporis, animique substantias, quæ distinctarum, atque mirificè dissidentium operationum fontes, & origines videbantur, occulto prorsus, ac inexplicabili consilio Deus conjunxit, atque hoc admirabili fœdere mentem corpori colligavit, ut dum ex corpo-

rei

rei objecti præsentia corporea quædam imago, sive spirituum motus excitaretur in cerebro, illius occasione similis, sed incorporea tamen species excitaretur in animâ, certa nimirum idea, sive perceptio fieret, aut excitaretur in mente; sicuti vicissim, dum certa quædam idea excitaretur in animâ, similis illi; sed corporea excitaretur in corpore. Hæc est hypothesis illa, quæ Cartesio, Malebranchio probatur, quam uberrimè Leibnitiuss, qui eâ mirificè delectabatur, exposuit, & illustravit, quâ denique nulla fortasse, aut animi dignitati servandæ, aut mutuo operationum consensui explicando accommodatior inveniri posse videtur.


IX. Si etenim ex admirabili, constantique fœdere, quod ab ipso Deo corpus inter, & animam sancitum est, nulla sensatio, vel motus, & imago corporea excitari, sive produci potest in corpore, quin simul, eodemque tempore illius occasione alter similis, sed incorporeus excitetur in animâ, manifestissimè apparet, cur juxta varios corporis status, variasque imagines, vel perceptiones, quæ producuntur in corpore, varii quoque affectus, aut perceptiones producantur in anima; cur juxta variam cerebri naturam, vividiorè, hebetiorèque spirituum motum vividior etiam, puriorque cognitio producat in animâ; cur languente corpore languescat anima, hilari gaudeat, cur in infantibus, ebriis, dormientibus non operetur, cur denique vitiato, tabescente, corruptoque corpore, ut debitos, vitalesque motus peragere non possit, mens ipsa soluto, ac rescisso veluti fœdere ex corpore, veluti

carcere avolet, ac revertatur ad Dominum, qui dedit illam [a].

X. Si quæ verò huic elegantissimæ hypothefi opponi possent, quod anima nimium a corpore dependeret, ideoque libera censerì non posset, &c., aut in Peripateticos ipsos meliori etiam jure retorqueri meritò possunt, cùm ipsi quoque animam a corpore, corporeisque sensibus veluti a causâ, non *occasionalì* solùm, sed etiam *effectivâ* pendere velint; aut certè fusiùs solventur in Morali, ubi de libertate, variisque affectibus disseretur.

C A P. IV.

De potentiis, proprietatibus, & accidentibus animæ rationalis.

I.  Lurimas, ac admirabiles esse mentis humanæ vires, & effectus satis, ut opinor, superiori loco jam diximus. Potentias itaque, facultates, habitus, munera, qualitates, & accidentia habere illa debet, ex quibus operationes ipsæ veluti fonte dependant, quæ tantò nobiliores, purioresque censerì meritò poterunt, quantò nobilior est ipsa mentis substantia, aut effectus illi, qui ab ipsâ producuntur. Plures itaque mentis humanæ, vel animi potentia numerantur, *intellectus* nimirum, *voluntas*, ..

tas, ac *memoria*; ad quas ceteræ referri poterunt, ideoque de illarum singulis agendum erit, ut deinde cetera complectamur, quæ exinde facile deducuntur.

II. Intellectus itaque est facultas illa, sive potentia, quâ res incorporeas percipimus, sive quæ *ens*, & *modum entis* cognoscit. Is ita à Peripateticis distingui solet, ut alter intellectus *agens*, alter *patiens*, *patibilis*, sive *possibilis* dicatur. Intellectus agens est ille, qui cum nihil sibi insculptum, vel impressum habeat, nullâ nimirum cognitione, specie, ideâ, vel imagine præditus sit, ab Aristotele (a) *tabula rasa* comparatur, & ex corporeis phantasmatibus puriori quadam, & incorporeâ sui luce irradiatis, incorpoream, ac intelligibilem quandam speciem abstrahit, ac efformat, quæ deinde non ampliùs in cerebro corporeis circumstantiis permixta, sed ipsi intellectui, veluti rosæ imago in speculo, a circumstantiis ejusmodi separata imprimatur. Passibilis verò, vel *patiens* intellectus, quem corruptibilem, atq; mortalem esse Aristoteles (b) existimavit, est ille, cui species ejusmodi abstractæ imprimuntur. Eadem verò species quatenus intellectui patienti imprimitur, ac veluti inhæret, *impressa* dicitur; quatenus verò cuditur, abstrahitur, percipitur ab intellectu agente, appellatur *expressa*, atque *mentis*, vel *cordis distinctio*, seu *verbum* vocatur; unde celebre effatum illud *omne intelligens intelligendo efformat verbum*, ac si mens ipsa, vel intellectus nihil percipere, sive cognoscere possit, quin priùs accuratam ipsius imaginem, speciem, ideam a se formatam, ex

(a) *De An. III. n. 14.* (b) *de An. III. n. 29.*

326. PHYS. PART. TRACT. II.
corporeo nimirum phantasmate abstractam con-
templetur.

III. Quid verò de hac Peripateticorum hypo-
thesi, vel distinctione censerì debeat, intelligi
poterit ex his, quæ pluribus in locis de intel-
lectu, vel cognitione mentis, sive idearum origine
disputavimus. Si etenim incorporeæ species,
aut spirituales ideæ neque a sensibus acquiri,
neque in corporeo phantasmate delitescere pos-
sunt, ut alibi ostendimus, sed potius intelle-
ctui ab ipso Deo insculptæ, ingenitæ, ac ve-
luti innatæ censerì debent, certè nonnisi teme-
re, & inconsultò hic intellectus agens effinge-
retur, qui illas abstraheret, atque incorporeas,
vel actu intelligibiles redderet. Quamvis ta-
men hanc intellectui vim, quâ ideas producat,
vel intellectus agentis operam admitti non
posse putemus, ab illorum tamen hypothese,
sive sententiâ plurimùm abhorremus, qui cum
intellectum agentem qualis a Peripateticis poni-
tur, rejiciendum esse arbitrentur, atque innatas
esse velint rerum ideas, intellectum ipsum nihil
agere, sed solum recipere, pati, vel passivam po-
tentiam esse opinantur, quòd oculi, vel speculi
instar, solum rerum imagines extrinsecus adve-
nientes, sibi que impressas recipiat. Insigne ni-
mirum discrimen inter oculum, & intellectum
ipsum reperitur, quòd intellectus non modò
imagines sibi impressas, speculi instar, recipiat,
sed ipsas etiam percipiat, intelligat, contem-
pletur; ideoque intellectus agens merità vocari
poterit, non quòd ille imagines intelligendas
efformet, sed quòd efformatas, sibi que impres-
sas, & fortuità quadam causâ, vel occasione
excitatas intelligat.

IV. Quid verò sint imagines illæ, quæ no-
bis

his impressæ fuerint; aut quomodo excitentur, definiri certè vix poterit; unde mirari fortasse liceat, plurimos, & Cartesianos præsertim, qui hæc minutius, & acutiùs pertractarunt, de variis modis, quibus anima intelligit, differeret: ut Deus per seipsum ab intellectu nostro cognoscatur; operationes nostræ per sensum intimum, sive conscientiam; aliqua per ideam claram; alia per conjecturam; alia denique per fidem, aut revelationem. Sive etenim per sensum intimum, sive per conjecturam, sive per fidem cognoscas, semper aliqua idea in mente admitti debet, cujus ope intellectus intelligat; quæ modò quidem clarior, modò obscurior erit; sed unus tamen, idemque percipiendi modus semper in intellectu servabitur.

V. Altera mentis humanæ facultas est *voluntas*, *potentia* nimirum, quâ aliquid appetimus, aut aversamur. Ubi etenim mens objectum aliquod, veluti bonum, sibi que conveniens, cognoverit, potest illud amare, cupere, ac velle; quemadmodum, si illud veluti malum, sibi que adversum percipiat, potest illud aversari, vel fugere. Ipsa communiter potentia *volens* vocari solet, quoddam intellectum, ejusque cognitionem sequatur, nihilque appetere, amare, vel odisse possit, quod intellectus antea non cognoverit; unde celebre effatum illud *nihil volitum, quin præcognitum*.

VI. Quemadmodum verò voluntas ab intellectu dependet, sive *volitio*, & amor, *cognitionem* supponit, ita mutuo intellectus ipse a voluntate dependet, ut plerumque mens ad hoc potius, quàm ad aliud objectum percipiendum applicetur, sive determinetur a voluntate. Hinc experimur ex innumeris objectis, quæ

ab intellectu nostro percepta fuerant; ad hoc potius, quam aliud mentem converti posse, quodd juxta varium voluntatis affectum, vel impulsu, & amorem, varia quoque in intellectu species excitetur. Sic etiam objectum aliquod diutius, vel brevius, leviùs, aut acutiùs contemplamur, quodd mentis acies indifferens, & vaga, quæque perenni, & irrequerat agitatione ex uno in objectum aliud liberrimè excurrere, ac transvolare nititur, voluntatis imperio velut invita adigitur, atque in eodem objecto saepius, uberiùsque contemplando detinetur. Hinc illæ mentis evagationes, quæ nobis orantibus obrepunt, etsi non liberæ, sed necessariae sint, quatenus ex imaginibus fortuitò in cerebro excitatis oriuntur, mentique nostræ, vel invitæ, sensum obrepunt; liberæ tamen, ac voluntariæ sunt, quatenus in ipsis cum advertentiâ, seu voluntatis affectu, detinemur, aut certe cum liberè mentem in Deum convertere, constanterque tenere possemus, voluntas ipsa aliò distracta facilè patitur, ut mens evagetur.

Sed hæc, aliaque id genus plurima in Morali cum de voluntatis arbitrio, sive de libertate, quæ voluntatis proprietas est, uberiùs differetur.

VII. Memoria partim ab intellectu, partim a voluntate dependet, sive utramque completitur; est enim facultas illa, quâ res antea cognitæ iterum cum volumus, contemplamur, ut eadem nimirum in nobis cognitio juxta voluntatis arbitrium excitetur, quæ pridem producta fuerat. Hinc communis est omnium fere sententia Memoriam ab Intellectu non alio discrimine distinguendam esse, quàm quod intel-

tellektus ipse, vel mens ubi aliquid prius cognoverit; *intellectus* vocetur; ubi verò rem antea cognitam, & cuius imaginem sibi impressam, atque jampridem excitatam conservet, semel, atque iterum cognoscat, *memoria* dicatur; in quâ illud etiam necessariò requiritur, ut non modò rem antea cognitam iterum percipiat, sed insuper, ut intellectus rem ipsam sibi jampridem cognitam esse reflectat.

VIII. Exinde verò faciliè inferri poterit, ut antea dicebamus, duas præcipuas esse mentis humanæ vires, sive potentias, ad quas ceteræ referantur; intellectus nimirum, atque voluntas; quarum quidem quænam purior, nobiliorque sit ita a Philosophis disputatur, ut aliæ voluntati, aliæ verisimilius intellectui principem locum deferant. Si etenim purior, atque perfectior potentia dicatur illa, quæ plura molitur, quæ rariùs a proprio fine abducitur, quæ prior in nobis operatur, aliasque dirigit, atque determinat ad operandum, hæc omnia intellectui mirificè convenire jam diximus, ut ille proinde veluti nobilior, atque perfectior hominis potentia censi debet.

IX. Utraque tamen facultas, vel humanæ mentis potentia, incredibili, ac infinita fere virtutum, & accidentium serie exornatur, ac veluti luminibus illustratur, quæ *habitus*, *virtutes*, & *qualitates* animi vocari solent; *intellectuales* quidem, qui intellectum ipsum perficiunt, vel in intellectu recipiuntur; *morales* verò, qui perficiendæ voluntati, componendisquæ moribus inserviunt.

Sic *fides*, *opinio*, *scientia*, *ars*, &c. *intellectuales* habitus appellantur; *iustitia* verò *fortitu-*

virtudo, charitas, &c. morales habitus dicuntur. Nihil aliud verò habitus nomine intelligitur, nisi perfectio quædam, ac dispositio, quæ animi, vel mentis humanæ substantia in operando perficitur, ac adjuvatur, ut facilius, promptius, alacrius, atque delectabilius operetur; unde commune est effatum illud, quod *ex frequentatis actibus fiat habitus*, quod animus nimirum facilius in objectum illud fertur, ac naturali quodam veluti pondere inclinatur, quod sæpius contemplari vel amare consuevit; cumque frequens, ac iterata rerum cognitio, & amor a corporis imaginibus, atque a sensibus oriarur, habitus etiam ipse, siue intellectum, siue voluntatem perficiat, ab ipsâ corporis structura, sensuumq; cognitione plurimum pendet, ut satis, & opportunè ostendetur in Morali, cum de virtutibus, illarumque causâ, & origine differemus.

X. Illud interim veluti coronidis loco hic observasse juverit, virtutes, affectiones, habitus, & qualitates ejusmodi a pluribus, sapientissimis etiam viris, non velut entitates aliquas ab ipsâ animi entitate distinctas haberi; sed solum, ut extrinsecas quasdam denominationes, ut quemadmodum ille, qui laudatur, nihil in se recipit, sed hoc solum nomine afficitur, vel decoratur, ita propemodum, qui justus est, nihil in se prorsus habeat, sed a ceteris solum justus existimetur. Atq; eadem lege de supernaturalibus etiam habitibus aliqui loquebantur, ut ille fidem, justitiam, gratiam habere diceretur, cui a Deo justitia, gratia, charitas imputaretur; ille justificari, vel deleri illi peccata, cui *testa sunt peccata, vel cui non imputavit*

tavit Dominus peccatum; (a) ille Episcopi characterem suscipere, qui velut Episcopus a Deo proponeretur, atque ab hominibus haberetur.

Sed hæc opinio, quod ad supernaturales habitus pertinet, veluti falsa censi debet cum a Tridentinâ Synodo clarissimè definitum fuerit, quod *charitas Dei infunditur in cordibus eorum, qui justificantur, ac ipsis inhæret* (b); Quod ad naturales verò, & acquisitos habitus pertinet, eadem fortasse lege, quâ supernaturales quidam habitus agnosci debent, naturales etiam admitti poterunt, qui menti non veluti entitates aliquæ ab ipsâ separabiles existimentur, sed solùm veluti modi, & affectiones aliquæ, quibus incorporea mentis substantia purior, atque nobilior reddatur; ut quemadmodum nempe corporea corporum substantia plurimis corporeis qualitatibus, modis, & accidentibus exornatur, ita quoque spiritualis, incorporea, ac divina ferè mentis substantia incorporeis accidentibus exornetur, ac perficiatur.

(a) *Psal.* 31. *ver.* 1. 2. (b) *Sess.* VI. c. 7. *in Rom.* 5. v. 5.



IN TERTIAM
PHILOSOPHIÆ PARTEM
Sive
METAPHYSICAM
PRÆFATIO.



Am Sapientiæ partem, vel Scientiam illam nunc explicandam agredimur, quæ non modò veteri, constantique Philosophorum opinione ceteris Philosophiæ partibus accenseri, verùm etiam nobiliori quodam, ac meliori loco haberi consuevit, ut eximium proinde *Sapientia*, *prima Philosophia*, *naturalis Theologia*, plerumquè tamen *Metaphysica* nomen acceperit. Cùm etenim veteres intelligerent, accuratam rerum cognitionem, quæ in Physicâ, ceterisque scientiis omnibus inquiritur, ritè, ac feliciter comparari

Y non

non posse, nisi priùs communia quædam, ac universalia rerum principia, suprema illarum capita, incorporeæ denique substantiæ cognoscerentur, ex quarum contemplatione veluti ex uberrimo fonte particularium, corporearumque rerum cognitio manaret, principi ferè loco facultatem illam habendam esse putarunt, quæ hæc omnia fusè, diligenter, & uberrimè complecteretur. Ipsi verò Sapientiæ nomen indidere, quodd primas, & universalissimas rerum causas, sive Ens ipsum a circumstantiis omnibus abstractum, vel separatum consideret; primam Philosophiam vocarunt, sive quodd ceteris sublimior, atque nobilior faciem illis præferat, aditumque aperiat; sive quodd ante ceteras exponi consueverit; Theologiam naturalem, quod incorporeas substantias, animum nempe, Angelos, ac Deum ipsum solo rationis lumine, ac Naturæ viribus contempletur: unde etiam plurimi ipsum quoque *Metaphysicæ* nomen derivatum esse arbitrantur, quodd illa scientia quædam *trans-naturalis* videatur, omnes Naturæ limites superet, & ad incorporea, quoq;, vel immortalia transgrediatur. Communior est tamen, ac verisimilior opinio, quod *Metaphysicæ* nomen antiquis Philosophis prorsus incognitum ab Interpretibus Aristotelis inventum, usurpatumque fuerit. Quemadmodum enim in ipso Philosophiæ limine, sive Præfatione num xxiv. jam diximus, Aristotelis Opera, quæ Theophrasto primùm, tum Neleo cui-dam relicta fuerant, ab illius hæredibus, ne a Pergami Regibus inquiri, auferrique possent, humi sepulta fuerant, ibique blattis, tineisque corrosa, telluris humiditate, temporisque injuriâ corrupta, ac vitiata tandiu latuerunt, donec

nec Apelliconi Tejo tradita sunt, qui pluribus in locis lacunas supplevit, atque laciniis additis textus complevit. Deinde verò directis Athenis Aristotelis Opera a Sylla Romam translata a Tirannione primùm, deinde ab Andronico recensita, atque disposita sunt, Cum varios itaque Peripateticæ Doctrinæ libros in varias classes digessimus, ut aliqua Opera ad Logicam, alia ad Physicam, alia denique ad Ethicam, sive Moralem pertinerent, alia tamen Opera superesse observarunt, quæ ad nullam certam classem referri, aut in nullo Philosophiæ genere collocari posse videbantur. Hæc autem Aristotelis Opera post Physicam coniecerunt, unde Μετὰ τὰ φυσικά, Physicis nimirum adjecta, vel apposita nominarunt, quòd in librorum serie proximum post Physicam locum occuparent. Et certè, qui XI., aut XIII. Metaphysicorum libros consideret, perturbatos adeo, confusos, atq; permixtos illos esse comperiet, ut in ipsis plurima ex Logicis, aliqua ex Physicis, pauca, ac postrema solùm de spiritibus, huc illuc temere, nulloque ordine disiecta, miserrimè appareant, ut a Gassendo præsertim est observatum. Quid verò, quòd Gassendus ipse arbitratur ejusmodi libros non modò a Grammaticis, ac Interpretibus alteratos, ac vitiatos esse, verùm etiam temere Aristoteli suppositos?

Laërtius certè, qui longâ serie singulos Aristotelis libros enumerat, nullibi Metaphysicos libros commemorat; plures fuisse refert, qui Aristotelis nomine vocarentur, quorum proinde aliquis a Stagirita diversus, illorum auctor haberi possit; nisi fortasse verisimiliùs existimes a Peripatetico quodam conscriptos esse, atque illustri Aristotelis nomine exornatos,

ut inde robur, plurimamque lucem acquirerent. Verùm ejusmodi conjecturæ, vel argumenta tanti certè non sunt, ut libros illos Aristoteli abjudicandos esse putaverim. Puram nimirum, ac ingenuam Aristotelis indolem spirant, eam nempe obscuritatem, quæ in ceteris illius Operibus observatur, easdem sæpe sententias, eosdemque textus exponit, qui in aliis Operibus reperiuntur, ut veterem, constantemque famam ab antiquissimis usque temporibus traditam præteream, quæ Aristotelem ipsum veluti Metaphysicæ patrem veneratur. Quod si ceteris obscuriores illi fuerint, quod ægrè tamen concesserim, meminerit Lector 141. Capita, quibus componuntur, veluti disjecta rudera, siue fragmenta temere in corpus unum congesta haberi oportere. Sed de Aristotelicæ Metaphysicæ ordine plusquam satis.

Meliori verò, clariorique ordine Recentiores omnes hanc Philosophiæ partem uberrimè pertractarunt. Tres itaque in partes, siue Tractatus illam diviserunt, quarum prima de Ente in genere, ejusque affectionibus, siue proprietatibus loqueretur, unde *Ontologia*, siue scientia de Ente inscribi posset; altera verò de Caussis, siue principiis illis, a quibus Ens ipsum producitur, unde *Ætiologia*, scientiæ nimirum de Caussis, nomen accepit; ultima denique de Spiritibus, animâ nempe rationali, de Angelis, atque ipso Deo differeret, unde Spirituum scientia, siue *Pneumatologia*, diceretur.

Nobis tamen hanc ipsam methodum, & ordinem non nihil invertere libuit, ut eam Metaphysicæ partem, quæ secundo loco a ceteris exponi consueverat, in Physicâ traderemus,

at-

atque ubi de intrinsecis rerum Principiis, quibus nimirum intrinsecè corpora componerentur, in primâ Disput. differuimus, in secundâ de Principiis extrinsecis, sive de Caussis ita loquuti sumus, ut Ætiologiam, sive Tractatum de Caussis ibi complexi videamur. Dux itaque extremæ Metaphysicæ partes explicandæ supersunt, Ontologia nimirum, & Pneumatologia. Ac Ontologiam quidem in Logicâ melius fortasse, atque oportuniùs explicandam esse videretur, ut ubi nimirum de mentis viribus, intelligendi ratione, idearum origine, præcisione, abstractione, universalium naturâ, ac numero loqueremur, de Entis etiam ideâ, naturâ, proprietatibus, ordine, ac divisione ageremus, ut in Metaphysicâ de solis Spiritibus, quod accuratus rerum ordo exigere videbatur, differeremus. Veterem tamen ordinem hac in parte ita servabimus, ut Metaphysicam ipsam, secundam nempe, vel tertiam Philosophiæ partem ita dividamus, ut primo loco, sive Disputatione primâ de Ontologia, sive de Ente in genere; in alterâ verò de Pneumatologiâ, sive de Spiritibus; in tertiâ de Deo, sive Theologiâ naturali disputemus. Hinc facile poterit quicumque aliam methodum, vel ordinem magis amaverit, varias illius partes a nobis editas pro ingenio suo, temporis, ac loci opportunitate disponere, ac legere, ut nimirum Ætiologiam in Physicâ Generali a nobis traditam inter Ontologiam, ac Pneumatologiam inserat, & excurrat; quemadmodum Ontologiam ex Metaphysicâ in Logicam post primam illius partem transferre poterit, ut in Metaphysicâ demum sola Pneumatologia, atque Theologia naturalis explicanda, supersit.

METAPHYSICÆ

DISPUTATIO I.

De Ente in communi,

Sive

ONTOLOGIA.




Cum Scientiæ, vel facultates omnes aliquod ens veluti objectum considerent, variasque illius proprietates, & accidentia accuratissimè contemplantur, optimo sanè, sapientissimoque consilio institutum est, ut ad scientias omnes, vel facultates ejusmodi feliciter comparandas, scientia quædam inveniretur; quæ Ens ipsum in genere, vel in communi, hoc est a circumstantiis, & accidentibus omnibus separatim cognosceret, ut ab universali nimirum entis ipsius contemplatione clarior deinde cujuslibet particularis entis cognitio oriretur. Ejusmodi verò communis, & universalis Entis cognitio vocatur *Ontologia*, sive *scientia de Ente*; atque ab Aristotele definitur *scientia quædam, quæ speculatur ens, prout ens est, & quæ ei per se insunt; hac autem nulli earum, quæ in parte dicuntur, eadem est; nulla namque ceterarum universaliter de ente, prout ens est, considerat,*
sed

sed ejus aliquam partem abscindens, quod ei accidit, speculantur, ut Mathematica (a); unde mirari certè non possumus, ut Aristoteles ipse observavit, si in ejusmodi facultate obscuritas simul, & certitudo maxima reperiatur, ferè enim difficillima hominibus cognita sunt ea, quæ maximè universalia sunt, siquidem remotissima sunt a sensibus; scientiarum autem illa certiores sunt, quæ maximè primorum sunt (b). Clariori tamen, & accuratiori, quo poterit, ordine scientiam hanc complectemur; cùmque obscuritas, & difficultas maxima ex innumeris, intricatissimisque quæstionibus oriatur, quibus illam Arabes miserrimè deturparunt, quæstiones illas velut inutiles omitemus, atque Entis ipsum, ejusque species, ac proprietates omnes contemplati, de primis cognitionis nostræ principiis, quæ ex Entis ideâ nitidè, clarissimèque inferuntur, differemus.

CAPUT I.

De Ente in communi, ejusque
divisione

I.  E Ente primùm, ejusque divisione, methodo superiùs expositâ, loquuturi ab illius nomine, ut fieri plerumque solet, exordimur. Ens igitur est id, quodd est, aut esse potest; unde quidquid ab intellectu nostro concipitur, Ens appellatur; nihilque intelligi effingi, affirma-

Y-4

(a) *Metaph. III. c. 1.* (b) *lib. I. c. 2.*

IV. Privatio est carentia forma, vel perfectionis in subiecto, quod aptum, & capax sit ad formam illam accipiendam, ut tenebra in aëre, cæcitas in homine &c.; ideoque a negatione distinguitur, quæ est privatio, sive carentia forma in subiecto, quod alioquin incapax est ejusdem forma, ut tenebra in corpore opaco, cæcitas in lapide; cæcitas itaque, & tenebræ ita concipiuntur ab intellectu nostro, ut si modus aliquis forent, cum tamen sint purum nihil.

Relatio verò est ordo quidam, habitudo, sive respectus unius rei ad aliam, qui nempe concipitur in aliquâ re, ex eo, quod ipsa res ordinetur, vel referatur ad aliam, ut ex. gr. si Alexander referatur ad Philippum dicitur filius; si brachium referatur ad corpus dicitur pars; si totum referatur ad partem, dicitur majus, &c. cum tamen hoc esse filii, partis, aut majoris in intellectu solùm reperiatur.

Denominatio denique extrinseca est purum nomen, quod alteri rei tribuitur, etsi concipiat ab intellectu veluti ens aliquod, perfectio, vel modus alteri inhærens; ut qui Judex, eques, nobilis constituitur, qui laudatur, aut vituperatur, exteriorem hanc vocem, sive denominationem recipit; aliquid tamen a nobis concipitur, quod Judici, equiti, nobili, laudatori, vituperato, veluti intrinsecè inhæreat.

V. Hinc alia entis divisio desumitur in ens reale, & ens rationis. Ens reale dicitur illud, quod verè, ac realiter est, independenter ab intellectu, sive etiam si intellectus nihil consideret, esse debet, ut lapis, rosa, &c. ens rationis autem est illud, quod solùm concipitur, efficitur, dependet ab intellectu cogitante; ideoque,

que, si intellectus nihil consideret, ens rationis esse non poterit. Privationes itaque, relationes, & denominationes sunt entia rationis, quæ nimirum formantur ab intellectu, dum intellectus ipse rem aliquam in ordine ad aliud considerans, in illâ concipit aliquod esse; quod in ipsâ rêvera non est.

VI. Atque hîc exponenda, vel dirimenda videretur celeberrima quæstio, *utrum nempe ens ipsum generaliter sumptum, sive conceptus entis univocus sit respectu Dei, & creaturarum; quemadmodum etiam respectu substantia, & accidentis, denique respectu entis realit, ac entis rationis; utrum nempe conceptus entis eodem modo illis conveniat, & æqualiter omnia sint ens, etsi variis deinde proprietatibus, ac differentiis distinguantur?*

Quâ quidem in re ita Philosophi varias in partes abire solent, ut Scotistæ velint ens esse univocum respectu inferiorum, Thomistæ verò oppositum acerrimè tueantur; quamvis utrique in illo conspirent, ut ens rationis, quod, ut antea dicebamus, propriè, verè, & rigorosè ens esse, vel appellari non potest, *analogicè* solum, non verò *univocè* cum ente reali convenire velint.

Ceterùm, si Deus ipse cum creaturis, sive substantia cum accidente comparètur, verisimilior opinio videtur illa, quæ putat in ipsis conceptum entis æqualiter, & univocè convenire. Cùm etenim communis, ac generalissimus conceptus entis nihil prorsus significet, ut antea diximus, nisi *id quod est*, vel, id quod habet esse, Deus autem, & creatura habeant esse, sub hoc communi entis genere æqualitèr continebuntur. Quod si dicatur Deum longè diver-

diversâ ratione existere, quàm creaturæ, Deum nempe infinito, perfectissimoque modo, essentialiter, necessariò, independenter ab alio, ut proinde dixerit, *Ego sum, qui sum(a)*; creaturas verò finito, ac tenui modo, contingenter, & dependenter a liberâ Dei voluntate, ut *omnes gentes quasi non sint sic sunt coram eo, & quasi nihilum, & inane reputata sunt ei [b]*, responderi faciliè poterit discrimen ejusmodi, ac infinitum ferè intervallum, quo Deus a creaturis ipsis distinguitur, non in ipsâ entis ideâ, sive conceptu reperiri, sed in variis solùm, ac infinitis perfectionibus, differentiis, quæ reperiuntur in Deo, non autem in creaturis; quemadmodum ferè communis *anima* conceptus univocè animæ rationali, & animæ sensitivæ brutorum convenit, quamvis illæ miro, ac infinito ferè discrimine distinguantur. Et sanè, si conceptus entis, aut entis idea accuratissimè concipiatur, videbitur esse simplicissima, ac prorsus indivisibilis, quod verificari certè non poterit, si aliqua entis idea creaturis, altera Deo conveniret. Deinde verò, si idea, & conceptus entis creati, & increati, sive Dei, & creaturæ aliquâ ratione distinguerentur, distinguere certè deberent per aliquam rationem, seu differentiam, quæ utrique conceptui, vel enti conjungeretur, ideoque semper intelligi, vel admitti deberet universalis ille, & communis conceptus entis, cui differentiæ superadderentur. Iterum igitur inquiri potest an communis ille conceptus, cui differentiæ superaddantur, sit unus, & idem, & univocus, an potius a differentiis aliis distinguatur? si

unus;

(a) *Exod. c. 3. v. 14.* (b) *Isai. c. 40.*

unus, & idem dicatur esse, erit ille univocus respectu inferiorum; sin verò a differentiis aliis distinguatur, poterit ab illis abstrahi, & unus, simplex, indistinctus, ac indivisibilis reddi.

Quæ verò de Deo respectu creaturarum ostendimus, intelligi quoque debent de substantiâ ipsâ respectu accidentis; quamvis enim substantia sit ens independens ab alio, &c. accidens verò ab alio dependeat, ipsique inhæreat, præcisus tamen, & abstractis ejusmodi circumstantiis, quibus substantia ab accidente distinguitur, communis quidam entis creati conceptus omnino simplex, univocus, ac indivisibilis supererit, qui proinde non minùs substantiæ, quàm accidenti conveniet, ideoque potius univocus, quàm analogus vocari poterit.


VII. Id verò clariùs, ac meliùs adhuc intelligi poterit, si observetur, quod illa quoque, quæ *analogæ* vocari solent, si ritè a differentiis, vel circumstantiis abstrahantur, univoca sunt. Sic ex. grat. idea, vel conceptus *principii*, *regis*, &c. *analogæ* dicuntur esse, quòd idem nomen, idemque conceptus pluribus tribuatur, neq; tamen eodem prorsus modo singulis illis conveniat, ut *principium vite*, *principium libri*, *principium fontis*, &c. Si tamen principii nomine intelligatur id, aut pars illa, quæ ceteras omnes præcedat, conceptus ille, vel idea *principii* æqualiter *principiis* omnibus conveniet; varietas verò, non ex universali hac *principii* ideâ, sed ex variis differentiis, quæ illi superadduntur, variis nimirum rebus, quibus nomen, & conceptus ille tribuitur, desumi debet. Hinc *analogæ*, vel conceptus analogi ideæ quædam compositæ sunt,

ideo-

ideoque pluribus eodem modo convenire non possunt; quod si per abstractionem, vel præcisionem simplices illæ reddantur, conceptus aliquis universalis efformabitur, qui velut univocus haberi poterit. Quamvis itaque conceptus entis, qui Deo, & creaturis, sive substantiæ, & accidenti convenit, analogus, sive compositus foret, fieri tamen posset univocus, & simplex.

C A P. II.

De essentiâ, existienciâ, subsistentiâ.

I.  Quamvis conceptus entis omnino simplex, & incompositus videatur, ut superiori Capite demonstravimus, plura tamen attributa, ac veluti partes in illo distingui solent, quæ veluti proprietates entis haberi, vocarique merito solent. Eiusmodi certè sunt *essentia*, *existencia*, *subsistentia*, ex quibus deinde rerum discrimen, *hypostasis*, *personarum* nomina deducuntur, aliaque id genus plurima, quæ apud Philosophos, ac Theologos etiam mirificè commendantur. Diligenter itaque hæc omnia, quamvis breviter, hîc exponentur, non modò, quod exinde lux plurima in varias quæstiones diffundi possit, verùm etiam, quod ex receptâ jam Scholarum consuetudine hæc ipsa rerum, sive vocum discrimina ignorare nefas propemodum sit.

II. Itaque *essentia*, ut ab illâ exordiamur, nihil est aliud, nisi *id, per quod ens est, vel esse*

*se concipitur id, quod est; sive quod intrinsecè rem componit, sive quod intrinsecè dat esse rei. Cùm etenim rem, aut ens aliquod intellectu nostro concipimus, concipere etiam possumus aliquid, quod hoc ipsum ens constituit, sive illi dat esse, quod habet, & illud a ceteris omnibus entibus accuratè distinguit, ideoque semper exprimitur in definitione illius entis, quod ab intellectu nostro concipiebatur. Sic ex. gr. dum concipitur Deus, concipitur etiam principium aliquod, aliqua perfectio, vel forma, quæ dat esse Deo, quæque Deum ipsum distinguit, ut aseitias, intelligere actuale, cumulus perfectionum, &c. dum concipitur homo, concipitur etiam humanitas, sive animalitas, & rationalitas, quæ illi dat esse, sive quæ hominem ipsum constituit; dum concipitur circulus concipitur etiam rotunditas, atque radiorum aqualitas, quæ hanc figuram efficit esse, circulum, &c. Ejusmodi principium, atque perfectio, quæ dat esse rei, vocatur *essentia, natura, constitutivum* ejusdem rei; hoc uno discrimine, quod ubi concipitur, ut fons, & origo proprietatum, quæ in tali re reperiuntur, vocatur *essentia*; ubi verò concipitur, ut fons, & origo operationum, quæ a tali re produciuntur, dicitur *natura*; quandoquidem tamen operari sequitur ad esse, & qui dat esse dat etiam consequentiam ad esse, unum, idemque erit *essendi, & operandi principium*, ideoque *natura, & essentia* inter se minimè distinguuntur.*

III. Hinc dirimi, vel saltèm intelligi poterunt celeberrimæ quæstiones illæ, quæ in Scholis tanto apparatu agitari solent, *utrum nempe essentia rerum sint aterna, ac invariabiles*

les, utrum Deus contradictoria efficere possit, &c.

Quamvis enim plurimi existiment rerum essentias ita, reluctante licet intellectu nostro, a Deo variari posse, ut circulus angulis præditus, sive quadratus produci possit, ut Deus efficere possit bis duo non esse quatuor, &c. longè tamen verisimilius videtur, rerum essentias ita certas, ac invariabiles esse, ut neque ab infinità potentiâ Dei variari possint. Cùm etenim essentiæ nomine nihil aliud intelligatur, nisi principium illud, aut illa perfectio, quæ dat esse rei, impossibile est certè, ut principium illud varietur, quin ipsa quoque res constituta, sive, quæ recipit esse, variari debeat, ut ex. gr. si radiorum æqualitas, & angulorum privatio auferatur, circulus etiam auferri debet, sive ampliùs concipi, vel haberi non poterit. Et certè ejusmodi rerum essentiæ nihil aliud sunt, quàm archetypæ rerum ideæ, vel imagines illæ, quas ab æterno Deus in mente habuit, & ad quarum similitudinem res in tempore creavit; ideoque, sicuti imagines illæ, vel divinæ ideæ immutabiles sunt, ipsæ quoque rerum essentiæ invariabiles cense-ri debent.

IV. Exinde verò facilè infertur essentiam cuilibet enti, quod sit, aut esse possit, omnibus nimirum possibilibus convenire, ideoque cùm res possibiles infinitæ sint, ut inferiùs ostendemus, infinitæ quoque esse debent essentia rerum. Quandoquidem tamen ex infinitis illis entibus possibilibus, quæ nimirum a Deo produci poterant, aliqua sunt, quæ contingenter ab illo producta sunt, aut aliquando certè sunt producenda, concipi debet in rebus jam productis, aut producendis aliquid aliud, ali-

aliqua perfectio, vel modus, quo ab entibus merè possibilibus distinguantur. Atque hæc nova perfectio, quæ essentiæ superadditur, atque resultat in re productâ, vel producendâ, dicitur *existentia*, atque a Philosophis definitur *sistentia*, sive *positio entis*, aut *essentia extra nihil, & omnes causas*; ideoque inter essentiam, ac existentiam discrimen illud reperitur, ut essentia possibilibus etiam rebus conveniat, quæ in causæ primæ, sive secundæ potentiâ continentur; existentia verò iis rebus conveniat, quæ extra causam primam, sive secundam positæ, sive certè aliquando ponendæ sunt, ac in seipsis non sunt purum nihil, sed ens aliquod.

Hinc verò facilè apparet, quod in creaturis omnibus essentia rerum ab existentia distinguatur. Si etenim essentia possibilibus etiam rebus convenit, & æterna, ac invariabilis est, ut antea demonstravimus, existentia verò futuris solum, aut jam productis liberè, fortuitò, & contingenter in tempore convenit, necessariò dicendum est, quod existentia, quæ essentiæ superadditur, ab essentia ipsa, non intellectu solum, aut secundum concipiendi modum, sed reipsâ, sive realiter distinguatur.

V. Quandoquidem verò essentia, & existentia æqualiter substantiis omnibus, & accidentibus convenit, ut accidentia non minùs, quàm substantiæ, siabilia fuerint, habeant *esse*, si producta, vel producenda fuerint, habeant *existere*, & accidentia tamen, seu modi a substantiis maximè distinguuntur, in substantiis ipsis præter essentiam, & existentiam accidentibus quoque communem concipi, vel admitti debet alia perfectio, quæ accidentibus convenire non possit. Hæc nova perfectio dicitur
hypo-

hypostasis, vel *subsistentia* ultima nempe perfectio, forma, vel actus, quo res, aut natura, vel essentia ita perficitur, terminatur, completur, vel redditur sui ipsius, ut non indigeat alio ad essendum, & operandum, sive ut sit, ac operetur independenter ab alio, quod soli substantiæ convenire potest, quæ per se *subsistit*, & substat etiam, sive subjicitur accidentibus, ut superiori Capite ostendimus. Subjectum verò, substantia, sive compositum illud, quod hac ultimâ perfectione donatur, sive quod per se subsistit, dicitur *suppositum*; &, si spiritalis, & incorporeæ cognitionis capax sit, ut in Deo, Angelis, & hominibus, vocatur *persona*, quæ proinde a Boethio definitur *rationalis natura individua substantia*.

Hinc in divinis tres hypostases, vel subsistentiæ reperiuntur, ideoque etiam tres personæ, ut Disp. III. ostendetur, cùmque subsistentia divini Verbi, subsistentiæ creatæ, vel humanæ vices in Christo suppleverit, sive terminaverit naturam humanam, quæ propriâ creatâ, vel humanâ subsistentiâ terminari debebat, clarissimè apparet, quod in Christo duplex quidem natura, divina, ac humana, ideoque duplex voluntas, ut a VI. Synodo contra Monothelitas definitum est, reperitur, unica tamen persona, sive suppositum divinum, quemadmodum etiam unica hypostasis, vel subsistentia divina in illo reperiatur; cùmque non natura, sed persona sit illa, quæ operari, pati dicitur, juxta commune principium illud, quod *operationes sunt suppositorum*, operationes, aut merita Christi infiniti valoris, ac dignitatis, ideoque infinitis hominibus a scelerum culpâ, vel pœnâ redimendis pares esse debebant, quippequæ

ab infinitâ personâ, sive supposito divino producebantur. Sed hæc Theologis differenda, vel pro rei dignitate explicanda relinquimus.

VI. Id unum addere hîc liceat substantiæ, quæ propriâ hypostasi donata, sive completa jam fuerit, operandi vim, sive *potentiam* convenire. Sed hæc potentia, quatenus substantiæ concessa concipitur, dicitur operativa solum *in actu primo*, indifferens nempe, ut actualiter operetur, vel non operetur, sive solum operandi capax; deinde verò dum actualiter operatur, & exercetur, sive certè dum positis omnibus requisitis ad operandum erumpit in operationem ipsam, dicitur operativa *in actu secundo*. Alia similiter potentia *activa* dicitur, alia *passiva*. Potentia activa est illa, quæ datur ad operandum, & aliquando operatur, ut *calor in igne*, &c. passiva verò, quæ potius patitur, sive alterius causæ operationem recipit, ut *mobilitas* in lapide, sive capacitas, ut ab alio moveatur; possibilitas creaturarum, quæ produci possunt, &c. Atque passivam quidem potentiam faciliè intelligitur nihil aliud esse, quàm rem, aut substantiam ipsam, quatenus concipitur apta ut ab alio moveatur, perficiatur, alteretur; ideoq; esse debet pura denominatio extrinseca; potentia verò activa erit aliquod aliud ens, nova perfectio, quæ substantiæ superadditur, ut illa non modò habeat esse, sed illud ipsum alteri communicare possit. Ceterùm quid sint activæ potentiæ, virtutes, & qualitates ostendimus in Physicâ Generali ubi de activis qualitatibus loqueremur.

VII. Huic duplici *potentiarum* generi, quas explicavimus, tertium quoddam, novum, distinctumque potentia genus addere solent Thomistæ,

mixtæ, quod *potentiam obedientialem* appellant. Quum etenim effectus aliquos a creaturis aliquando produci videant, qui omnes prorsus ejusdem creaturæ vires, indolem, ac potentiam superant, sive a nullâ creaturæ potentiâ vel passiva, vel activa illa sit, produci possunt, existimant in creaturis ipsis potentiam aliam, reperiri, quâ illæ ita divinæ motioni, vel imperio subdantur, ut assumi, eligi dependentiâ quadam, ac *obedientiâ* elevari, vel adhiberi possint a Deo ad effectum quemlibet producendum; non aliter ferè quàm instrumenta singula ad opus quodlibet producendum ab artifice assumi possunt. Atque incredibile est certè, quàm nitidè difficultates omnes expediant hac *obedientiali* potentiâ, quæ alioquin gravissimæ viderentur. Sic ex. gr. Sacramentorum materiæ, ut aqua baptismatis, hac obedientiali potentiâ elevantur ad spiritualem quandam effectum, sive gratiam in animâ producendam; inferiorum ignis obedientiali potentiâ assumitur, ut incorporeas etiam animorum substantias afficiat; arida Elisei ossa cadaveri, quod attigerant, vitam reddidere; amarum lignum amaris aquis, quibus a Moyse injectum fuit, dulcedinem concessit, quòd hæc omnia obedientiali potentiâ divinum imperium fuerint obsequuta.

Hæc ipsa tamen potentia a ceteris omnibus Theologis, velut absurda, & inutilis refelli solet. Quamvis enim creaturæ singulæ supremo Dei imperio subsint, & ab illo liberrimè quamcumque in partem flecti possint, ut Disp. III c. 4. ostendemus, nullâ tamen ratione intelligi poterit quomodo assumi illæ possint ad effectus illos producendos, qui omnes prorsus

illarum vires, & conditionem excedunt; alioquin lapis etiam assumi posset ad videndum, cum multò facilius certè sit visionem a lapide, corporeum nimirum effectum a corporeâ causâ, quàm gratiam ab aquâ, incorpoream nempe rem a corporeo principio produci. Deinde verò, vel creatura, quæ a Deo assumitur ad operandum aliquam operandi vim recipit, quam antea non habebat, eamque exerit, tunc hæc non obedientialis aliqua potentia foret, sed nova quædam, ac distincta virtus activa, quæ illi repente a Deo concederetur; vel passivè solùm creatura impelleretur, & applicaretur ad operandum, nihilque per se ipsam produceret, sicque non esset aliqua potentia, quæ a simplici passivâ potentiâ distinguatur. Exemplum verò, quæ a Thomistis afferri solent, explicari faciliè poterunt ex iis, quæ in Physicâ Generali jam diximus ubi de causarum efficaciam loqueremur. Ostendimus enim, atque Durandi, & D. Joannis Chrysostomi autoritate confirmavimus, in Sacramentis, aliisque id genus effectibus producendis, creaturas esse causas tantummodo occasionales; quæ nimirum per sese nihil efficiunt, nullamque vim exerunt, sed occasionem solùm præbent, ut positâ tali conditione, vel circumstantiâ, Deus ex institutâ lege operetur; unde aqua baptismatis naturali suâ conditione, seu vi abluit corpus; sed ex institutione Christi fit ut hac ablutione corporis positâ, prolatisque verbis veluti conditione, Deus ipse in animâ gratiam producat, quod de ceteris etiam exemplis intelligi, & explicari faciliè posset, nisi ad Theologos pleno jure spectaret.

C A P. III.

*De aliis proprietatibus , vel attributis
entis , sive de unitate , veritate ,
& bonitate .*

I.



Proprietates illæ , vel attributa entis , quæ superiori Capite sunt explicata , non cuilibet enti , vel singulis entis generibus convenire possunt , sed essentia quidem in entibus omnibus etiam possibilibus , existentia verò solum futuris , atque creatis , subsistentia denique in substantiis tantummodo reperitur . Alia tamen sunt attributa , quæ sic universaliter enti conveniunt , ut omnes entium fines , vel terminos *transcendant* , vel excedant , unde *transcendentalia* vocantur , ideoque non aliqua solum , sed singula entium genera complectuntur , solentque tria præsertim a Philosophis enumerari , *unitas* nempe , *veritas* , & *bonitas* .

II. Unitas nihil est aliud , quàm *carentia* , sive *privatio divisionis* , neque aliâ de causâ conceptus entis unicus , & simplex est , nisi , quoddam varias in partes dividi , sive distrahi non potest . Quamvis tamen hæc unitas negativè solum exprimi consueverit , ideoque plurimi existiment unitatem non esse perfectionem , aut modum aliquem realem enti superadditum , sed solam privationem divisionis , verisimilius est tamen , quod sit aliqua perfectio positiva ejusdem entis , sive sit ipsum ens quatenus in se

simplex est, & a ceteris omnibus distinctum; quemadmodum certè sunt alia plurima, quæ etsi negativè exprimantur, sive definiantur, positiva tamen, ac realia sunt.

IV. Quandoquidem verò unitas est carentia divisionis, vel divisioni opponitur, totidem *unitatis* genera distingui possunt, quot sunt divisiones ipsæ, vel distinctiones, quæ inter entia reperiuntur. Distinctio verò, sive divisio triplex a Philosophis numeratur, *generica* nempe, *specificæ*, & *numerica*.

Distinctio generica dicitur illa, quæ reperitur inter entia, quæ sub diverso genere, sive categoriâ continentur, ut inter *circulum*, & *lineam*; circulus enim sub figuræ, linea verò sub longitudinis genere collocatur. Specifica reperitur inter entia, quæ, cum sub eodem genere contineantur, diversæ tamen speciei sunt, ut inter *circulum*, & *triangulum*, qui sub eodem *figura* genere collocantur, ad varias tamen figuræ species pertinent. Numerica denique est illa, quæ reperitur inter individua ejusdem speciei, sive quæ sub eadem specie continentur, & solis circumstantiis, vel conditionibus individuantibus distinguuntur, ut circulus A, circulus B. Distinctio generica, atque specificæ desumi concipitur a formâ, naturâ, vel essentiâ rerum; unde illa, quæ specificè, sive genericè differunt, diversam essentiam habere debent, idèque diversâ definitione definiuntur. Distinctio verò numerica, quæ *materialis* etiam vocari solet, ut plurimi existimant, a solâ materiâ, quæ proinde *principium individuationis* vocatur, vel a circumstantiis materialibus desumi debet; unde Thomistæ arbitrantur in Angelis, qui materiâ carent, hanc numericam di-

distinctionem admitti, sive plures Angelos in unicâ specie reperiri non posse, sed potius Angelos singulos specificè inter se differre. Quemadmodum tamen rationales animæ, etsi incorporeæ sint, numericè inter se distinguuntur ex ordine, vel habitudine, quâ singulæ ad proprium corpus diriguntur, ita quoque Angeli numericè distingui possunt ex accidentibus, vel circumstantiis spiritualibus, quibus affecti sint, aut certè ex variâ actione Dei, quâ creati fuerint, & conserventur.

V. Aliud etiam divisionis, vel distinctionis genus, atque varietas admitti solet, quæ ex ipsâ rerum indole, vel conditione deducitur, distinctio nempe *realis*, atque *rationis*.

Distinctio realis est illa, quæ independenter ab intellectu reperitur in re, quando nimirum illa, quæ concipiuntur ab intellectu, non sunt unum, ut *Plato*, & *Pythagoras*. Distinctio verò rationis est illa, quæ dependet ab intellectu, quando nimirum in unâ, eademq; re varios conceptus, ac veluti partes distinguimus.

Distinctio realis dividitur in *entitativam*, *modalem*, ac *virtualem*. Realis entitativa dicitur illa, quæ reperitur inter varias res, quarum entitates ita distinctæ sunt, ut una ab aliâ separari, una sinè aliâ perfectè concipi possit, ut inter *Lunam*, ac *Solem*; *aurum*, & *argentum*; *Pythagoram*, *Socratem*, &c. Realis autem modalis, quæ datur inter rem, & modum rei, qui modus ab ipsâ re separari, vel sinè ipsâ perfectè concipi non potest, ut inter *figuram*, & *corpus figuratum*, inter *motum* corporis, & *corpus ipsum*. Virtualis denique, quàm potius fundamentum distinctionis, quàm distinctionem

dixeris, reperitur in re, quæ, quamvis unica; & simplex sit, pluribus tamen æquivalet, ideoque occasionem præbet intellectui ut plures in illâ partes concipiat, ut in *lineâ bipalmari* duo *palmi* distinguî possunt; in *aureo nummo* *decem librarum* singulas *libras* ferè distinctas concipimus; in Deo, ejusque *attributis*, & perfectionibus, attributa ipsa veluti distincta concipimus, ut *justitiam* a *misericiordiâ*, &c.

VI. Præter hæc distinctionis genera Scotus distinctionem aliam admittit, quam dicit esse *formalem actualem ex naturâ rei*; *formalem* quidem quia non reperitur inter rem, ac rem, sive rem, & modum entis, sed inter varias *formalitates*, vel perfectiones ejusdem rei, ut inter attributa Dei, animalitatem, & rationalitatem hominis, &c. *actualem* verò, & *ex naturâ rei*, quia *actualiter*, *de facto*, independenter ab intellectu reperitur in rebus. Quod quidem distinctionis genus invexit, ac celebre reddidit gravissima quæstio, quæ inter Scotistas, atque Thomistas acerrimè agitur, quoniam nimirum distinctionis genere distinguantur *gradus metaphysici* ejusdem rei, ut ex. gr. *animalitas*, & *rationalitas*, quæ reperiuntur in homine; *gradus vegetandi*, & *sentiendi*, quæ reperiuntur in brutis, atque universaliter *genus*, & *differentia*, quæ in singulis rebus, sive speciebus continentur, ut in Logicâ fusiùs, & oportunè est explicatum. Thomistæ nimirum existimant inter hæc omnia distinctionem solum virtualem sufficere, ut, cum nempe animalitas, & rationalitas sint unica, & eadem entitas, neque entitativè, neque realiter distinguî possint; cumque tamen pluribus principiis, vel perfectionibus æquivalect, & variis
etiam

etiam definitionibus describantur, veluti plura concipi possint, ideoque virtualiter distinguantur. Scotistæ verò, præter hanc virtualement, formalem etiam admittunt, quâ gradus ipsi non veluti duæ res, aut modi (alioquin distinctio foret realis) sed veluti duæ *formalitates* concipiantur, ideoque formalis illa distinctio minor est reali, major autem virtuali, sive inter utramque media reperitur.

VII. Porro quid de celeberrimæ controversiæ statu, quid de exemplis illis, quæ afferri solent, quid de gradibus illis, atque formalitatibus, quæ fortasse liberius admittuntur, intelligi debeat, satis, ut opinor inferri poterit ex iis, quæ in Logicâ, & in Tractatu de Animâ sunt explicata. Fortasse enim animalitas illa, sentiendi vis, aliaque id genus, non eâ ratione concipi, vel explicari debent, quâ vulgo concipi solent. Ceterum quidquid de gradibus Metaphysicis censeretur debeat, illud nobis verisimilius videtur, quod si inter illos distinctio quædam admitti debeat, hæc virtualis solum, non formalis erit; ut enim operationes variæ, variæ definitiones, atque conceptus salventur, sola virtualis distinctio sufficit, quâ unica, eademque res, sive forma variis operationibus peragendis idonea concipiantur, ideoque variâ, ac diversâ ratione ab intellectu nostro concipi, sive definiri possit. Sed hæc alii viderint.

VIII. Dicendum est potius ipsam quoque distinctionem rationis in *majorem*, *minorem*, ac *minimam* dividi. Distinctio rationis major vocatur illa, quâ in unicâ, eademque re varii conceptus distinguuntur, quorum unus non continetur in alio, ut *justitia*, & *miserericordia*,

dia, quæ distinguuntur in Deo. Distinctio rationis minor, quando conceptus ipsi implicite mutuo includuntur, ut *unum*, *bonum*, *verum*, quæ concipiuntur in ente. Distinctio denique rationis minima vocatur illa, quæ sine ullo fundamento, sed ex solo intellectûs arbitrio, sive potius infirmitate, aut pravâ consuetudine unum ab alio distinguit, ut ex gr. Deum a *Divinitate*, hominem ab *humanitate*, &c. unde hæc distinctio *rationis ratiocinantis* vocatur, quod nempe a solâ ratione dependeat; cùm distinctio rationis major, aut minor *rationis ratiocinata* vocari soleat; quasi nimirum ratio quædam, aut fundamentum distinctionis in ipsâ re reperiatur. Sed hæc, aliaque id genus, quæ fuse a Scholasticis explicantur, tanti certè non sunt, ut uberius exponi debeant. Innuenda tamen hîc fuerant, quodd frequentissimus illorum usus in Theologiam ipsam irrepsit, ideoque plura intelligi nequeant, nisi hæc vocum significatio, vel obiter explicetur.

IX. Altera proprietas entis, quæ proximè unitatem sequitur, est *veritas*, aptitudo nempe, ut ens ipsum ab intellectu cognoscatur. Veritas ipsa in *transcendentalem*, ac *formalem* distinguitur. Veritas transcendentalis est entitas ipsa rei, quatenus ab intellectu, præsertim divino, concipitur; cùm nempe entitas ipsa, & essentia rerum in Deo, vel archetypis ipsius ideis, & imaginibus expressâ contineatur, potest a Deo cognosci, ideoq; concipi velut objectum, aut terminus divinæ cognitionis, quæ ipsi rei, vel ideæ cognitæ perfectissimè correspondet, ideoque veritatem ab illâ concipit, & vicissim illi communicat, ut idea vera, &
vera

vera cognitio dicatur. Veritas verò formalis est eadem conformatio intellectûs cognoscentis cum re cognitâ; quæ quidem conformatio, seu veritas non in apprehensione, vel perceptione, sed in iudicio solùm reperitur, ut in Logicâ ostendimus cum de veritate ipsâ, ejusque criterio loqueremur. Exinde verò facilè apparet, quod iudicii nostri, sive propositionis veritas dependet ex objecto cognito, de quo propositio formata fuerit, juxta celebre principium illud *ex eo quod res est, vel non est, propositio dicitur vera, vel falsa*. Objectum verò, vel ipsa res cognita ideo vera vocatur, quod archetypæ ideæ, vel imagini correspondet, quæ in divinâ mente, veluti speculo, continetur.

X. Quæ denique de Veritate jam diximus, de ultimâ quoque entis affectione, vel attributo, de *Bonitate* nimirum intelligi facilè poterunt, nisi quoddam veritas ad intellectum, bonitas autem ad voluntatem refertur. Quemadmodum itaque veritas transcendentalis est ipsum ens quatenus ab intellectu concipitur, ita bonitas transcendentalis est ipsum ens, quatenus appeti, vel amari potest a voluntate; bonitas verò *formalis*, quæ *moralis* etiam vocatur, est conformatio objecti *voliti*, & *amati* cum legibus morum, præceptis nimirum, & archetypâ boni imagine, quæ in Deo reperitur; de quo fusiùs, & oportuniùs in Morali differetur, ubi varias etiam boni species, *utile* nimirum, *honestum*, ac *delectabile*, ejusque proprietates, & accidentia complectemur.

C A P. IV.

*De primis cognitionis nostræ
principiis.*

Itidus rerum ordo, & accurata rerum discendarum methodus postulat, ut a simplicioribus ad composita, ab universalissimis ad singularia sensim, & tacitâ quadam serie deducamur. Cùm itaque in hac primâ Metaphysices Disputatione de universali entis conceptu, divisione, proprietatibus, nisi pro recepto Scholarum more, quantum certè rei dignitas exigere videbatur, dixerimus, id unum pro coronide explicandum superest, quomodo ex entis ideâ, & proprietatibus ejusmodi, veluti ex primis cognitionis nostræ principiis, atque seminibus uberrima deinde, & maxima rerum cognitio derivetur.

II. Prima itaque cognitionis nostræ principia, vel ut a plerisque vocari solent, *Axiomata, dignitates, pronunciata, communes notitia*, sunt propositiones illæ, quæ adeo claræ, certæ, evidentes, manifestæque sunt, ut illarum veritas statim intellectui effulgeat, ideoque ab ullo ignorari, sive negari non possit; cùmque cognitiones aliæ, sive propositiones minùs certæ, ac evidentes naturali quadam serie ex illis deduci debeant, *prima cognitionis principia* vocari solent. Plurima verò principia, vel propositiones ejusmodi numerantur, ut *totum est majus sua parte; quodlibet est, vel non est*.

est ; non potest idem simul esse , & non esse ; propter quod unumquodque tale & illud magis ; nemo dat quod non habet ; ex nihilo nihil fit ; operari sequitur ad esse ; ego cogito , ergo sum ; quidquid apparet in ideâ clarâ alicujus rei est verum , &c. De quorum omnium veritate dubitari certè non potest ; sicuti dubitari meritò poterit de aliarum propositionum veritate , quæ a nonnullis solùm Philosophis admittuntur , ab aliis verò negantur , ut quod *nihil sit in intellectu quin prius fuerit in sensu , &c.* Illud unum hìc inquiritur quodnam ex variis ejusmodi principiis veluti omnium primum censi possit , ex cujus veritate aliorum quoque veritas ostendatur , ideoque omnium clarissimum , atque certissimum habeatur .

III. Cartesius , aliique plurimi hoc primum cognitionis nostræ principium esse arbitrantur propositionem , aut illationem illam *ego cogito , ergo sum* . Quum etenim severioris , certissimæque sapientiæ studium auspicaturus cognitiones omnes , quas ante habuerat , se ponere , ac de rebus omnibus , etiam quæ certissimæ videbantur , dubitare Cartesius decrevisset , in hac ille universaliter rerum omnium dubitatione intimo quodam sensu , sive conscientia animadvertit , certòque deprehendit se cogitare ; cùmque intelligeret se cogitare non posse nisi existeret , statim deduxit se esse ; ideoque juxta Cartesium prima cognitio certissima , quæ menti nostræ de omnibus dubitanti obiicitur , est illa *ego cogito , ergo sum* , ex quâ deinde longâ , sed accuratâ illationum serie plurimæ cognitiones aliæ deducuntur .

IV. Hæc tamen Cartesii opinio , quæ plurimas apud Philosophos turbas , atque dissidia
exci-

excitavit, ut apud Cartesium ipsum, Gassendum, Huetium legi poterit, optima quidem est in eo quod ex cogitatione existentiam certissimâ cognitione, vel invicto argumentationis genere deduci posse arbitratur, cum certè id, quod non est, aliquid cogitare, dubitare, scire, vel ignorare non possit; in eâ tamen parte, quâ Cartesius existimat hanc illationem esse primum cognitionis nostræ principium, sive primam omnium cognitionem, quæ menti nostræ obversetur, meritò, ut opinor, a Gassendo, aliisque pluribus impugnatur.

Ut enim optimè ex cogitatione, sive dubitatione rei cogitantis, vel dubitantis existentia inferatur, principium aliud tacitè saltèm, implicitè, ac necessariò supponendum est, quod nempe *operari supponit esse; operari sequitur ad esse; quod nihil operari potest nisi priùs sit*; alioquin si principium ejusmodi veluti certum minimè supponatur, atque Cartesius in universali omnium dubitatione ejusmodi quoque principium complecteretur, sive de ipso quoque dubitaret, tota Cartesianæ demonstrationis illatio prorsus corrueret, quâ ex cogitatione, vel operatione concludit esse, vel existentiam rei cogitantis.

V. Communior itaque, ac longè verisimilior opinio est, quod primum cognitionis nostræ principium, quod nullum aliud ante se supponit, sit illud, quod ab Aristotele memoratur, quod nempe, *quodlibet est, vel non est; sive quod idem non potest simul esse, & non esse*. Si etenim principium ejusmodi accuratissimè perpendatur, nitidè, clarissimèque observatur, quod illud ex universali entis ipsius ideâ, sive conceptu deducitur; si nimirum aliquid habet esse

esse, est; si caret esse, non est; cùmque nihil concipi possit, quod sit medium inter esse, & non esse, nihil etiam concipi poterit, quod simul sit, & non sit. Deinde verò, cùm operari sit affectio quædam, aut modus entis, esse non poterit hoc operari, nisi etiam sit ipsum ens; ideoque operari sequetur ad esse, &c. Cùmque non-ens, sive nihil non habeat esse, non poterit operari, unde a nihilo nihil fieri poterit; cùmque operari sit efficere, vel dare alteri subiecto aliquod esse, nemo dare poterit esse, quod non habet; atque ita deinceps singula cognitionis nostræ principia, vel Axiomata ex superiori principio veluti ex uberrimo fonte deducuntur, ideoque principium illud omnium primum, clarissimum, certissimumque haberi meritò poterit.

VI. Huic affine est principium aliud, quod in Scientiis omnibus sæpius, atque feliciter adhibetur, quod nempe, *quidquid clarè, distinctè, que percipitur in ideâ alicujus rei, illi convenit, in illâ reperitur, est verum*. Cùm etenim idea exprimat accuratissimè rem, & objectum ipsum, quod a nobis concipitur, & proprietates omnes, & attributa, quæ in tali re reperiuntur, si aliquid in ideâ clarâ, & nitidâ rei percipiatur, illud etiam in ipsâ re reperitur, ideoque de illâ affirmari debet.

VII. Maxima tamen, ac incredibilis ferè difficultas est in efformandâ, excitandâ, vel contemplandâ ideâ, quæ verè nitida, & clara dici possit. Quemadmodum enim ostendimus in Logicâ ubi de idearum claritate loqueremur, plurima præjudicia, erroresque plurimi in ideâ nostras obrepere plerumque solent, quibus ideæ obscuræ, & confusæ siant; ideoque

vix ulla idea afferri poterit, quæ perfectè clara, vivida, & distincta censeri possit.

VIII. Cautè similiter, ac moderatè principium ejusmodi adhiberi debet, ne scilicet illa solùm vera existimemus, quæ clarè distinctèque percipiuntur; aut illa solùm attributa, vel perfectiones illas rei inesse arbitremur, quæ in illius ideâ nobis appareant. Plurima sunt nimirum, ut alibi ostendimus, quæ revera sunt, neque tamen a nobis percipiuntur; plurima attributa, vel perfectiones in qualibet re reperiuntur, quæ in illius ideâ non apparent; ideoque principium illud, etsi verum omnino sit, plerumque tamen inutile, aut vitiosum esse posset, ut variis in locis nos ipsi quoque observavimus.

Atque hæc de primâ Metaphysices parte, sive de Ontologiâ dicta sint, de Ente nimirum, illius speciebus, proprietatibus, attributis, primisque cognitionis nostræ principiis, quæ exinde inferuntur. Si cui fortasse plurimæ, ac infinitæ Scholasticorum quæstiones arrideant, illos adire poterit. Vereor tamen ne illum aliquando fortasse pudere debeat, in re levissimâ gravissimam operam collocasse.

METAPHYSICÆ

369

DISPUTATIO II.

De Spiritibus,

sive,

PNEUMATOLOGIA.




Uæ de animi, vel humanæ mentis naturâ, & origine alibi fusè, & accuratè jam diximus, plurimam certè lucem iis afferent, quæ de Angelorum viribus, naturâ, & origine nunc exponenda, vel explicanda nobis occurrunt. Quamvis enim Angelorum substantia animi ipsius naturâ purior, nobilior, atque perfectior videatur, cum tamen utraque spiritualis, & incorporea, adeoque incorruptibilis, & immortalis habeatur, eadem ferè munera, eadèmq; vires utrique conveniunt. Quemadmodum itaque de animi naturâ loquuturi illius essentiam, originem, vires omnes, & accidentia contemplati jam sumus, ita quoque Angelorum existentiam, naturam, & si quæ fuerint alia, quæ solis naturæ viribus percipi, aut Philosophum decere videantur, breviter quidem, sed accuratè, meliorique ordine complectemur, cetera Theologis, ad quos pleno, meliorique jure pertinent, relinquentes.

A 2

CAP.

C A P. I.

*De existentia, natura, & origine
Angelorum.*

I.  Irari certè quis poterit, quod arcana quidem, & occulta sit Angelorum natura, quippe quæ non corporeos modò sensus, sed ipsius quoque mentis acumen excedere videatur, nihil tamen illustrius apud veteres Philosophos, & Sapientes omnes extiterit, de quo planè mirificè consensere, quàm Angelorum, vel, ut ipsi loqui consueverant, Geniorum substantia. Si etenim veteres Chaldaeos, Assyrios, Persas, & Ægyptios consulamus, ex quibus omnis sapientiæ, doctrinæque fons uberrimè promanavit, nihil frequentius apud ipsos occurret, quàm Geniorum mentio, ut elegantissimè demonstravit Stanlejus in historiâ Philosophiæ orientalis. Pythagoras quoque, Plato, Socrates, Aristoteles Angelos, Genios, Intelligentias admiserunt, ut ex innumeris ipsorum auctoritatibus ostendi posset. Quid verò illos in opinionem istam impulerit, definiri vix potest; credibile est tamen illos aut acceptâ a parentibus, antiquissimisque temporibus traditione, id agnovisse; aut certè iis rationibus, quibus communiter defendi solet, Angelorum existentiam non modò lumine fidei, sed ipso quoque naturæ lumine ostendi posse.

II. 1. Illud itaq; primò verisimillimum cense-
ri poterit, pulcherrimumque ordinem, qui in
cetc.

ceteris Universi partibus observatur, decere videtur, ut in illo omnium substantiarum genera admitterentur, unde Mundi varietas oriretur. Quemadmodum itaque incorporeæ quædam substantiæ sunt, quæ regendo corpori destinatæ, atq; interdum corpori permixtæ, sive conjunctæ sunt, ut animæ rationales, ita, quoque spirituales aliæ, vel incorporeæ substantiæ reperiantur, quæ nulli corpori destinantur, sed ab omni corporis contagio liberæ intelligendo, ac amando vires suas exerant.

2. Divinam quoque, supremamque Dei majestatem decere maximè videbatur, ut ille, quemadmodum Rex solio residens Principes, nuntios, ministros habet, quibus in administrando, regendoque imperio utatur, Principes quosdam, nuntios, ac ministros haberet, quibus, aut in cœlestibus corporibus admirabili periodo contorquendis, juvandis, puniendisque hominibus uteretur.

3. Ac certè nuntios ejusmodi, quos proinde dixeris Angelos, reperiri, non superioribus modò conjecturis, sed plurimis quoque phænomenis, vel effectibus, præsertim verò ex energumenis, vel obsessis hominibus erudimur. Innumeris itaque Scriptorum testimoniis memoratur, homines aliquos ex uno in locum alium violenter, atque celerrimè abreptos esse; cùmque non alterius, quàm patrii idiomatis, gnari forent, nullamque scribendi artem, sive notitiam haberent, exterâ quacumque linguâ colloqui, vel quolibet characterum genere scribere consuevisse. Res etiam dissitas, vel arcana quoque cordium secreta cognovisse; cùmque secretò, solâ cogitatione, mentisque desiderio, & affectu de re quapiam interrogarentur,

palam liberè, & appositè respondisse. Quid enim commemorem, obsessorum corpora aut ingentia pondera sustinere, aut miserè contra naturæ leges contorqueri, aut gravissimis ejulatibus, ferarum instar, fremere, aut innumeris aliis motibus, & affectionibus agitari? Qui plura desideret Martinum del Rio, aliosque plurimos adire poterit, qui longâ de his oratione differunt, & exempla plurima complectuntur.

III Neque is tamen ego sum, qui exempla singula a Scriptoribus memorata credam, aut credi velim. Plurima gravissimis etiam viris ex præconceptis opinionibus, ex nimîâ credulitate, ex muliercularum fraude, ex maximâ verisimilitudinis specie excidisse concedam, atque in hac in parte plerasque fabulas irrepsisse, ut ex iis, qui velut obsessi, vel energumeni haberi solent, pauci admodum sint, qui dæmonis viribus operentur. Gravissimis tamen, doctissimisq; viris, in quibus aut error, aut præconceptæ opiniones effingi nequeant, omnibus denique historiis fidem negare, non modò periculosum, sed absurdum quoq; videtur; idque nonnisi temere, & impudenter fieri posse, graviter, elegantissimèq; docuit Plutarchus cum pluribus ejusmodi portentis enumeratis *Talibus*, inquit, *nimium credere, aut nimium diffidere periculosum est; propter humanam infirmitatem, qua finem non habet, neque sui compos est, sed fertur interdum quidem in superstitionem, & vanitatem; interdum verò in neglectum, & contemptum rerum divinarum. Metus verò, & nequid nimis optima sunt (a).* Itaque negari non poterit ob-

(a) In *Vita Camilli*.

obfessos aliquos, & energumenos reperiri, siue plurimos, ex motibus, & affectionibus antea memoratis, in hominibus observari; aut si cui fortasse negare liceat, mihi certè non liceat, quàm nuperrimè viderim mulierè non miris modò corporis agitationibus contorqueri, secreta cordium, de quibus interrogabatur, prodere, accensas, remotissimasque faces, dum juberetur, extinguere, patrii solùm idiomatis gnaram latinè, & gallicè, clarè, appositè, nitidè, distinctèque respondere; duodecim denique characterum species, quales a duodecim scribingentibus efformarentur, cùm neque legere, neque scribere prorsus sciret, exarare, quibus variorum spirituum, quibus obsideri jam dixerat, nomina, vires, numerum, exeundi fœdera, aliaque id genus explicabat. Hæc, aliaque plurima, qui accuratè, & ingenuè consideret, nullus dubito quin omnes ille naturæ, sensuum, imaginationis, & animi vires prorsus excedere existimet, ut a nullâ proinde corporeâ causâ produci possint; cùmque in hominum perniciem, religionis dedecus, Deique ipsius injuriam plerumque fiant, ut quando blasphemias, & impias voces edunt, optimo, sapientissimoque Numini, veluti causæ adscribi nequeunt. Id unum itaque superest, ut ab incorporeâ quadam, ac invisibili substantiâ producantur, cui a Deo in corpora vis, & imperium quoddam concedatur, ut præsertim pluribus Scripturæ testimoniis clarissimè, & invictissimè demonstratur.

IV. Exinde verò facilè intelligi poterit, quid de Angelorum substantiâ censerì debeat, corporea nimirum, an incorporea illa sit. Veteres certè Philosophi, ut de Platone, Pythagora, aliisque

diximus, etsi Angelos, Dæmones, Genios, Lemures spiritus esse putabant, ipsos tamen puriori, subtiliori, ac invisibili corpori conjunctos esse dicebant; quod ex Platoniciis veteres quoque Ecclesiæ Patres Tertullianus, Clemens, Origenes, aliique plurimi tradiderunt, ut cum in secundâ Nicænâ Synodo (a) quæreretur, an Angeli depingi, illorumque imagines coli possent, communi Patrum suffragio sancitum fuerit, Angelos depingi posse quod corporei, sive corpori permixti forent.

Neque ex Platoniciis modò, sed ex ipsis etiam sacris Literis hæc opinio desumpta, vel derivata videtur, quod in illis Angeli videre, audire, moveri dicantur, atque expressius adhuc asseratur, quod *videntes Filii Dei*, quo nomine Angelos intelligi solere compertum est, *filias hominum, quod essent pulchra, acceperunt sibi uxores ex omnibus, quas elegerant* (b).

V. Veteres tamen Ecclesiæ Patres præconceptis opinionibus hac in parte deceptos esse non modò clarioribus Scripturæ locis, sed ipsâ quoque ratione faciliè demonstratur.

Quod verò ad Scripturam attinet, ubi de Angelis in illâ differitur, veluti spiritus ex uno in locum alium celerrimè, ac momento translati, & ipsa quoque corpora pervadentes describuntur, quod fieri certè non posset, si alicui, licèt tenuissimo, corpori conjungerentur. Quod verò subinde humanâ formâ, vel corpore apparuerint, si quid ostenderet, ostenderet etiam crassiori, visibili, humanoque simili corpore illos donari; quemadmodum Angeli videre, moveri, non verè, sed allegoricè solum

(a) *Act. V.* (b) *Gen. c. 6. v. 2.*

lūm dicuntur, sicuti Deus ipse videre, moveri, quin etiam oculos, & aures habere memoratur. Quando verò mulierum pulchritudine allectos Angelos ait Scriptura, id non de Angelis ipsis, sed de posteris Sethi, qui avitam pietatem, religionemq; complexi, filii, vel Angeli Dei nominantur, atque hoc illustri nomine ab impiis hominibus, posterisque Cain, quos tamen *hominum filios* Scriptura vocat, distinguuntur. Cū tamen primis Ecclesiæ temporibus hæc opinio floreret, neque accuratius definita foret, a plerisque Patribus defendebatur; atque in Nicænâ Synodo, dum Angelos depingi posse sanciretur, quod unum ad fidei dogma spectabat, obiter etiam Joannis Thessalonicensis ratio audita est, qui corporeos illos esse putavit, quod ambiguum adhuc, incertumque erat, nondumque ad fidem pertinebat.

VI. Ceterū nulla ratio afferri poterit, quā Angelos corpori conjunctos esse ostendatur; siquidem operationes illæ, ex quibus Angelorum existentiam demonstrari posse jam diximus, nullo corpore peragi possunt; atque, si corpus aliquod Angelis concedatur, quo corpora impellere, vel movere possent, corpus aliud admitti oporteret, quo proprio corpori jungerentur; ideoque, sicuti proprium corpus, licet subtilius, immediatè moverent, ita quoque finè ullo subtiliori corpore, crassiora corpora impellent.

VII. Quod si Angelorum substantia spiritalis, & incorporea censi debeat, ut demonstravimus, incorruptibilis etiam, & immortalis haberi debet, ideoq; mentis humanæ instar, nec alterari, nec gigni, neque corrumpi illa poterit, sed a solo Deo ex nihilo creari, vel, si fortasse


ille velit, in nihilum redigi. Hoc insigne tamen discrimen inter Angelos, & rationales animas admitti debet, quod illæ subinde a Deo creantur, atque organizato jam corpori conjunguntur; Angeli verò, etsi novi subinde creari possint, omnes tamen simul, eodemque temporis momento producti verisimilius existimantur, cum nulla ratio, vel Scripturæ autoritas afferri possit, quâ novos Angelos subinde creari ostendatur, idque nonnisi tremere, & inconsultò defendi possit, quod nullâ ratione, vel authoritate fulciatur. Quo verò temporis momento Angeli creati fuerint, definiri vix potest, cum Moyses accuratissimè quidem corporearum rerum originem descripserit, Angelorum tamen creationem prorsus omiserit. Cum tamen Adamus dæmonis fraude, ac invidiâ deceptus memoretur, atque Angeli divinum Artificem vârias Universi partes disponentem laudasse dicantur (a), ipsos etiam initio tēporis, sive primâ die, quo cœlum, & terra creata sunt, productos esse putabimus: quod non modò innumeris Patrum, ac Theologorum sententiis, sed ipsius quoq; Lateranensis Concilii decreto clarissimè demonstratur, in quo *firma fide tenendum esse definitur, quod Deus initio temporis utramque de nihilo condidit creaturam, spirituales, & corporeas, angelicam videlicet, & mundanam, ac deinde humanam quasi communem ex spiritu, & corpore constitutam* (b). Quibus Concilii verbis clarissimè exprimitur discrimen illud, quod inter humanos animos, & Angelos reperitur, Angelum nempe ita spiritalem, & incorporeum esse, ut nulli regendo

(a) 2. p. c.... (b) Decr. lib. I. c. firmiter.

gendo corpori destinetur; animus verò ex admirabili fœdere, quod a Deo sancitum esse alibi diximus, corpori conjugantur, ut mutuâ quadam operationum dependentiâ, ac unione ab illo dirigatur; & quamvis Angeli singula, vel humana etiam corpora movere, ex uno in locum alium transferre possint, ut paullo superiùs ostendimus, id tamen non per modum animæ, sive, ut inquirunt, *forma*, vel principii *informantis*, sed extrinsecè solùm, per modum formæ, sive principii assistentis efficiunt, ut in sequenti Capite declarabitur.

C A P. II.

De Angelorum numero, divisionibus, muneribus, & accidentibus, &c.

I.  Astenus humanæ mentis ingenium, sive naturæ lumen in inquirendâ Angelorum existentia, ac naturâ facem velut prætulit; quæ nunc inquirenda, vel explicanda nobis occurrunt, partim conjecturis, partim divino Scripturarum lumine ostenduntur; unde omnia unico, breviorique Capite complectemur.

II. Cùm itaque non solùm in sacris Literis, sed in veteribus quoque Philosophis bonorum, malorumque Angelorum discrimen sæpissime memoretur, quæri poterit, unde discrimen ejusmodi derivetur; cùm non ab optimâ, perfectissimâque divini Artificis manu, sed ex liberâ potius ipsorum voluntate pravitas, & imper-

perfectio repetenda meritò videatur . Atque, ut Poëtarum fabulas hac in parte ommittamus, divino Fidei lumine erudimur, Angelos omnes, eâ libertate, vel, ut Augustinus ait, versatili gratiâ, & adjutorio creatos esse, quâ in bonâ voluntate, sive Dei amore, quo creati fuerant perseverarent, aut ab illo deflecerent. Plures itaque ex illis propriæ voluntatis, & arbitrii visibus, atq; auxilio, vel gratiâ versatili, Deum ipsum veluti summum bonum, ultimumque finem amarunt, eodemque charitatis actu immortalem beatitatem sibi compararunt, ut omnis prorsus peccandi potestas, vel indifferens illa arbitrii vis ablata, atque in perenni bono confirmata fuerit.

Plurimi verò, cum varias, ac admirabiles virtutes, quibus ab optimo, beneficentissimoque Artifice illustrati fuerant, liberius animadverterent, inani quodam superbiæ sensu perculsi, non in Deum, sed in semetipsos hujus naturæ, dignitatisque gloriam contulerunt; unde ab innocentia, atque perennis vitæ foelicitate detrusi, in malo, quod elegerant, perenniter confirmati fuere.

II. Hoc itaque arcano, atque imperscrutabili divinæ Sapientiæ consilio factum est, ut qui in Dei amore constantissimè permanserunt, *Angeli boni*, vel simpliciter *Angeli* dicerentur; qui verò a Dei amore deflexerunt, atque in malo perenniter obstinati sunt, *Angeli mali*, *Cæcodæmones*, vel *Dæmones* appellarentur.

III. Quæ verò sit in ipsis varietas, quis utrorumq; numerus haberi debeat, definiri vix potest; id unum a sacris Literis erudimur, quod *Lucifer*, dæmonum princeps, cum ex Cælo decideret tertiam siderum partem secum traxisse dici.

dicitur, quo tertiam Angelorum partem ab immortalī gloriā excidisse plurimi intelligunt.

IV. Exinde verò facilè ostendi poterit diversa omnino munera, diversam ferè indolem, ac affectus bonis, pravisque Angelis concedi oportere. Itaque ii, quos in divini Artificis amore, bonâque voluntate confirmatos esse jam diximus, perenni charitatis igne ardebunt, perennes Deo laudes referent, ejusque folio vigiles, celerisque nuntii supremis ejusdem jussibus exequendis assidebunt. Id innumeris Scripturæ locis nitidè, eloquentissimèque describitur; idque Orphei quoque carminibus adumbratum esse conspiciamus, cùm Deum alloquens, ait

Throno tuo ignito adstant laboriosi

Angeli, quibus cura est quemadmodum a mortalibus omnia gerantur.

Angelos etiam cuilibet homini, & regno veluti custodes præsidere clarissimis Scripturæ auctoritatibus erudimur, ut ab iis proinde non modò lux veluti quædam in mentibus nostris excitetur, sed vehemens etiam motus, & inclinatio in bonum subinde imprimatur, atq; pro variâ temporis, locorum conditione bona suadeant, mala avertant, ac affectibus, & votis propitium nobis, placatumque Deum efficiant.

Quod si boni Angeli hominis salutē, divinæque simul gloriæ vigiles consulant, dubitari certè non poterit, quin dæmones invidiā, rabie, & odio, quo Deum ipsum acerrimè prosequuntur, Dei injuriam, atque hominis perniciem omni studio consectentur, ut hominis mentem in malum abripere, pravis imaginibus, & affectibus inficere possint. Hinc certè quemadmodum a sacris. Literis admonemur inter-

nas

nos Angeli voces audiendas esse, ita quoque dæmonis insidias fugiendas esse docemur; atque ethnici quoque Philosophi singulis hominibus, dum nascerentur, bonum Angelum adesse dixerunt, quo ad pietatem, honestatem, fœlicitatemque veluti duce uteretur, simulque malum, quo ad pravitates, perniciem, & excidium veluti impellerentur. Neque tamen hinc fieri existimaveris, omnia mala, vel scelera dæmonis fraude, consilio, & industriâ perpetrari, ut vulgus opinatur; quemadmodum enim in Ethicâ demonstrabimus, unusquisque tentatur a concupiscentiâ suâ abstractus, & illectus; atque in dæmonem plerumque invidiam, scelerisque labem convertimus, ut a nobis iniquæ mentis vitium avertere, vel minuere certè videamur.

V. Quæcumque tamen sive bonis, sive pravis Angelis in humanos animos vis, & imperium concedatur, incredibilis certè, ac infinitus ferè illorum numerus admitti debet, cum incredibilis illorum multitudo in sacris Literis memoretur; ut meritò proinde dixerit D. Gregorius, quod *in cognitione humana rationis superiorum spirituum numerus non est* (a). Hinc mirè falluntur, ac mirè desipiunt ii, qui illorum numerum tenuissimis conjecturis ex ineptissimis plerumque Thalmudistarum fabulis temere, ac impudentissimè quoque definiunt, eorumque species, ac munera, ac si divini Artificis consilia nossent, accuratè describunt. Nobis id unum asserere liceat, quod ex sacris Literis, illustriores Ecclesiæ Patres ostenderunt; novem nimirum esse *choros*, aut *genera*, sive *clas-*

(a) In c. 6. Job.

classes Angelorum in sacris Literis sæpius memoratos, Seraphim, nempe Cherubim, Thronos, Dominationes, Virtutes, Potestates, Principatus, Archangelos, Angelos: qui novem Beatorum mentium, vel spirituum chori in tres etiam Hierarchias ita distingui plerumque solent, ut quælibet ex illis tres choros completatur. Quo verò discrimine, ac veluti caractere novem ejusmodi Angelorum ordines distinguatur, variè a Theologis explicatur. Plerique tamen in eo consentiunt, ut sicuti stella differt a stellâ in claritate, ita nobilior, atque superior Angelus puriori, clariorique gloriæ lumine perfundatur, plures ideas sibi impressas, aut in divinâ mente, veluti sinu, comprehensas intelligat, & contempletur; inferior verò minori luce perfusus, minori quoque cognitione decoretur. Quinetiam plurimi existimarunt divinum gloriæ lumen ex Angelo superiori in inferiorem ita derivari, ut quemadmodum Solis radii in speculum incidentes exinde in alia specula dirigi, reflectique possunt, sive per varias crystallos trajici; ut lux, in variis ejusmodi reflexionibus sensim debiliior, atque languidior evadat, ita gloriæ lumen, quo primus Angelus vividè, uberrimèque perfunditur, ad Angelos alios sensim translatum debiliùs fiat.

VI. Atque hæc ipsa Angelorum varietas in pravis Angelis admitti debet, cum ipsi quoque a supremo quodam *Damoniorum principe* dirigantur, atque ex majori mentis pravitate, intelligendi acumine, variisque sceleribus, quibus humanos animos alliciunt, varia nomina acceperint.

Quid verò de celeberrimâ quæstione dicendum

dum esse putabimus, quâ a Theologis inquiri-
tur, an Angeli unius ordinis, ex. gr. Seraphim,
specie, vel numero distinguantur, ut totidem
species quot Angeli, an verò plures Angeli,
vel individua in unâ, eâdemque specie admit-
ti debeant? Angelicus quidem Præceptor uni-
cum dumtaxat Angelum in quâlibet specie,
admitti posse opinatur, quodd numerica, vel
individualis distinctio a solâ materiâ repeten-
da videantur, quam proinde *individuationis*,
vel numericæ divisionis principium esse arbi-
tratur; ideoque, cùm Angeli materiâ, sive in-
dividuationis principio careant, numericè solùm
distingui non possunt, sed quilibet Angelus pro-
priam, alterique incommunicabilem speciem
constituet. Quemadmodum tamen corpora ex
corporeis circumstantiis numericè distinguun-
tur, ita quoque spiritus ipsi ex incorporeis
circumstantiis distingui poterunt; ac, nisi di-
scrimen aliud, vel individuationis principium
superesset, ipsa certè peculiaris, distincta, ac
determinata actio Dei, quâ quilibet Angelus
producatur, variis Angelis numericè distinguen-
dis sufficeret.

VII. Quandoquidem verò de variis Angelorum
cogitationibus diximus, illud inquiri poterit, an
corporea objecta, vel arcanas animi nostri, a-
liorumque Angelorum cogitationes cognoscant,
& quâ ratione inter se colloquantur. Atque ad
primum quidem respondetur Angelos corporeas
etiam res, & objecta percipere, ut ex innumeris
Scripturæ locis ostenditur; neque aliter certè
hominibus adesse, consulere, providere possent.
Quâ verò lege id fieri possit, cùm Angeli sen-
sibus omnino careant, quibus corpora cognoscun-
tur, intelligi, vel definiri potest ex iis, quæ
de

de animâ rationali sunt explicata. Quemadmodum itaque anima corpori humano conjuncta neque corpora, neque corporeas illorum imagines cerebro impressas conspicit, sed illarum tamen occasione, vel ex certo quodam spirituum motu, similis quidam, sed spiritalis motus, & affectio in illâ excitatur; atque vicissim dum incorporea quædam imago, & affectus excitatur in animâ, illius occasione, similis illi, sed corporeus motus producit in corpore; ita occasione cujusdam corporei, vel incorporei motus, qui producit in homine, incorporea quædam affectio producit in Angelo, atque ex affectu, quo Angeli mens commoveri contigerit, similis etiam motus, aut imago in homine producit.

VIII. Atque hinc intelligi poterit, quomodo Angelorum viribus, & imperio corpora ex uno in locum alium transferantur, quomodo invocantes homines audire possint, variosque ejusmodi effectus producere, qui sine sensibus fieri, vel explicari non posse videntur. Cum enim hæc Angelorum cognitio, non ex occulto quodam fœdere, connexionem, dependentiâ, quæ inter Angelos, & homines reperitur, sed ex solâ Dei voluntate oriatur, veluti verisimilius haberi debet, arcanas humanorum cordium cogitationes Angelis occultas esse, cum divinæ Literæ constanter asserant, *Deum solum nosse corda filiorum hominum* (a) *insuere cor* (b), *scrutari corda* (c). Fieri tamen subinde poterit, ut Angelis occulta cordium consilia Deus ipse revelet, aut ex variis hominum motibus com-

222
B. 7

(a) *Parall. III. c. 6. v. 30.* (b) *Reg. I. c. 16. v. 7.*
(c) *Jerem. c. 17. v. 10. vid. D. Thom. I. par. q. 57. ar. 4.*

muni, superiorique lege perceptis, eximio, quo pollent, mentis acumine occulta quoque conjiciant, ut in Evangelio (a) describitur, ubi Christus a Dæmone tentatus, ac vario, subdoloque modo interrogatus est, ut ex illius responsionibus aut occultam Christi divinitatem, aut humanam certè naturam conjiceret.

IX. Ita verò mutuo inter se colloqui, vel differere Angeli existimantur, ut proprios conceptus, sive cogitationes ad alium dirigant; velit nempe, ac desideret Angelus cogitationem propriam alteri innotescere; ex admirabili nimirum divinâ lege, vel fœdere statim in alterius Angeli mente eadem cogitatio excitabitur, eodemque ordine quidquid cogitanti, sive loquenti Angelo reponi, vel responderi contigerit, innotescet.

X. Quærendum postremò videretur, quâ lege, sive ratione Angeli in aliquo loco existere, ex uno in locum alium transire possint, de quo fusè, & acriter Theologi differunt. Verùm, id ipsi viderint; quod ad nos attinet, incorporeos, indivisibiles, ac invisibiles illos esse jam diximus, ut proinde spatium occupare, seu variis ejusdem partibus, corporum instar, correspondere non possint; in hoc verò potius, quàm alio in loco Angelus esse dicitur, quod ibi vires suas exerat, ac operetur; quemadmodum, quod huic potius, quàm altero corpori regendo destinetur, aut in hoc potius, quàm altero corpore operetur.

Ex uno verò in locum alium movebitur, ubi in uno loco operari desierit, atque in alio operari incæperit. Quod utique motûs genus vim

(a) *Matth. c. 4. v.*

cum corporum motu comparari certè non poterit, non modò, quòd celerrimè peragatur, ac nullo corporum interpositorum objice retardetur, verùm etiam, quòd ex uno in locum alium transvolat, etsi per intermedia loca non transeat; idque Theologi cogitationis, vel animi nostri exemplo declarare solent, qui repente Florentià Romam advolat, etsi per interposita loca non excurrat. Ceterùm, quidquid de animi motu censerì debeat, qui certè non e corpore egreditur, aut ex uno in locum alium transit, sed ex unâ potiùs in aliam imaginem contemplandam convertitur, Angelorum motus a corporum motu plurimùm dissidet; ideoque iis legibus coërceri, vel definiri non poterit, quas in corporum motu observari jam diximus. Sed hæc, aliaque id genus plurimà Theologi viderint, quorum est de substantiis ejusmodi differere. Nobis sufficiat summa veluti rerum capita breviter complecti, ut intelligi utcumque posset, quæ varietas, atque perfectio in Angelis admitti debeat.



METAPHYSICÆ

DISPUTATIO III.

De D E O,

five

THEOLOGIA NATURALIS.



I. cœlestis illa, atque divina pro-
pmodum ingenii vis, quâ men-
tes hominum præditas, & illu-
stratas esse jam diximus, in cor-
porum cognitione mirificè efful-
get, si eadem rerum cognitio a-
rioribus animi viribus est inquirenda, cum in
illius adspectu incredibili, atque humanissimâ
voluptate perfundamur, nihil est certè, quod
illustrius inquiri, aut magnificentius cognosci
possit, quàm supremi Numinis, optimi, sa-
pientissimique Artificis, Dei nimirum natura.
Quemadmodum enim elegantissimè ait Cicero,
*illum, qui intelligentia, sapientiaque se amato-
rem profitetur, necesse est intelligentis, sapien-
tisque natura primas causas cognoscere* (a).

Naturalium itaque rerum cognitio, etsi pul-
cherriima, ac jucundissima sit, rudis tamen, ac
inde-

(a) De Univerf.

indecora propemodum videretur, nisi ad ipsius Dei cognitionem, contemplationemq; nos deduceret; quod si levis illa, ac tenuissima divini Artificis imago, quæ corporeis rebus velut impressa conspicitur, nos vehementer adeo delectat, allicit, ac extollit, quid futurum putabimus, si Deum ipsum puriori quadam luce, & acriori mentis intuitu contemplemur? Admirabilem ergo, atq; incomprehensibilem divinæ mentis naturam, attributa, scientiam præfertim, ac voluntatem, quantum rudibus possit naturæ viribus, ac Philosophum deceat, breviter, & accuratè inquiremus, cetera, quæ prorsus innumera, ac infinita forent, Theologis tradituri. Utinam Deus, qui sui contemplandi vires, ac desiderium immortalis munere nobis concessit, ita se nobis contemplandum exhibeat, ut inde perennis ardor in nobis excitetur!

CAPUT I.

De Dei nomine, existentia, natura, sive constitutivo.

I. Inter illa, quæ nitidè quidem a nobis, clarissimèque concipiuntur, sed quæ verbis tamen exprimere vix possumus, meliori quodam, graviorique jure Deus haberi meritò poterit. Si etenim ideam, ac veluti divinæ mentis imaginem nobis impressam, ac ferè depictam consulam, nitida quædam, atque distincta Dei



imago statim effulget, quæ deinde clarioribus verbis exprimi non posse videtur, quàm si *Deum* esse dixerimus. Nihil itaque Dei nomine intelligunt; sive, qui Deum aliquem esse norunt, ac humiliter venerantur, sive, qui Deum omnino sustulerunt, quàm incorpoream, summè potentem, immensam, immortalem, omni denique perfectione cumulatissimam substantiam: quæ, cum a nullo principio producta fuerit, a nullo dependeat, cæteris omnibus, quæ in Universo conspiciuntur, esse dederit.

II. Hanc verò primam, sapientissimam, potentissimamque rerum omnium causam admitte oportere, sive Deum ipsum existere, variis, invictissimisque rationibus alibi ostendimus cum de Causâ primâ in *Phys. Gen. Tract. II. c. 4.* fusè, & uberrimè loqueremur. Ex admirabili nempe nationum omnium consensu, ex perfectissimæ naturæ conceptu, quam ex majori, minorique rerum perfectione deducimus, præsertim verò ex effectibus, qui liberè, & contingenter ab aliquâ primâ causâ produci debuerunt, manifestissimè demonstravimus Deum, veluti supremum, sapientissimumque rerum Opificem agnosci oportere. Ac plurimæ quidem aliæ demonstrationes a sapientissimis etiam viris afferri solent, quibus eadem veritas clariùs, & uberiùs adhuc ostendatur. Cum tamen aut incertis adhuc, & ambiguis principiis innituntur, aut invictissimæ, evidentissimæque rationi comparatæ tenuem veluti facem meridianæ luci adjungere videantur, facilè omitteri poterunt. Illud unum veluti coronidis loco afferre juverit, ut omnis prorsus Atheorum impietas, ac impudentia refellatur, quod, etsi ratio-

ratio-

rationes illæ, vel argumenta, quæ a nobis asferri solent, rem invictissimè, clarissimèque non evincant, aut si rationes illæ, vel argumenta, quæ contra Dei existentiam ab ipsis opponuntur, nos incertos adhuc, ambiguos esse compellerent, nonnisi tamen perditì, temerarii, impudentissimique consilii foret Dei existentiam, de quâ in utramque partem disse-ritur, & ambigitur, negare potius, quàm asferere. Ille nimirum, qui communi nationum omnium consensu cum illustrioribus sapientiæ luminibus Deum aliquem existere arbitratur, cujus amore, sive timore honestè operetur, nihil certè habet, quod hac in vitâ ab hominibus, vel in futurâ, si quæ fuerit, ab ipso Deo vereatur; quod, si revera Deus sit, maximam, & immortalem gloriam consequetur. Qui verò Deum esse negaverit, & absque illius amore, sive formidine, paullo liberius, tenuem, brevissimamque ætatem transegerit, nihil est, quod ab hominibus in hac vitâ, vel in futurâ a Deo, quem sustulit, sperare possit; quod, si revera Deus fortasse fuerit, maximæ, & immortalis pœnæ periculo obnoxius erit. Quis verò tam demens, perditique consilii fuerit, qui nullo, vel tenuissimo certè, vilissimoque emolumento (si Deus fortasse non fuerit) maximo, infinito, ac immortalì periculo (si Deus ipse fuerit) exponatur? Itaque Dei existentia nullâ ratione negari poterit, nihilque etiam esse, quod mentibus nostris clariùs, & illustriùs effulgeat, quàm hac supremi Numinis existentia.

III. Hic ergo potius de illius naturâ, & essentiâ, sive constitutivo dicamus, in quo definiedo Philosophi, sive Theologi maximè differunt. Plurimi quidem existimant Dei naturam, &

essentiam in hoc uno positam esse, quod ille, infinitis perfectionibus exornetur, sive quod ille in omni perfectionum genere sit infinitus, aut infinitum perfectionum cumulum completatur.

Cumque perfectiones ita distinguant, ut aliquas esse velint, aut vocent *perfectiones simpliciter*, quæ nimirum adjunctum non habeant defectum ullum, neque meliori perfectioni opponantur, ut *sapientia*, *justitia*, *bonitas*, &c. alias verò *perfectiones secundum quid*, quæ adjunctum habent defectum aliquem, & alteri majori perfectioni comparantur, ut *albedo* respectu nivis, &c. perfectiones primi generis formaliter, sive secundum propriam *formam*, ac entitatem in Deo reperiri volunt, ut ille formaliter *sapiens*, *justus*, *bonus* dicatur; perfectiones verò secundi generis *virtualiter* solum, ac eminenter in Deo reperiantur, ut Deus non formaliter *albus*, & *calidus* sit, sed *eminenter* solum, hoc est nobiliori quodam modo, & in virtute, quatenus albedinem, & calorem producere, & conservare potest; quemadmodum ferè gravitas, aut frigus, quod reperiatur in ferro, concipi etiam poterit, vel inesse *formaliter* in auro; valor tamen, qui reperitur in ferro, *virtualiter* solum, & *eminenter* reperitur in auro, cum nempe ferri præstantia, valor, aut pretium in nobiliori, majorique auri valore contineatur; & quidquid ferri valore comparari potest, auro quoque præstari possit.

Quandoquidem tamen in infinitis ejusmodi perfectionibus ordo quidam, sive connexio reperitur, ut una ex aliâ pendere, omnesque simul ex aliquo principio oriri videantur, hinc
me-

merito inquiritur, quænam ex his proprietatibus veluti aliarum fons, & origo concipi debeat, siue quo clariori, certiorique discrimine Deus ipse ab aliâ quacumque re distinguatur.

IV. Thomistæ duplicem serè potentiam, vel agendi modum in Deo concipiunt, quo nimirum intelligat, ac velit, vel, ut inquirunt ipsi, *intelligere*, & *velle*; cùmque intelligere, vel intelligendi vim nobiliorem esse arbitrentur actu volendi, in ipsâ veluti operationum omnium, ac perfectionum fonte Dei naturam, & essentiam positam esse arbitrantur; alii quidem in *intelligere radicali*, potentiâ nimirum, siue vi intelligendi; alii verò longè verisimiliùs in *intelligere actuali*, idest in actu, quo intelligendi vis exercitur, & exercetur. Cùm tamen intelligere, & velle veluti potentiæ quædam, vel operationes concipi soleant, neque operatio quædam intelligi, siue concipi possit, nisi priùs intelligatur esse, quod intelligit, ac operatur, ipsum intelligere, & operari veluti primum Dei constitutivum haberi non poterit, cùm præsertim intelligere non Angelis modò, sed ipsi quoque humanæ menti communicetur.

V. Accuratiùs itaque loquuntur ii, qui proprium veluti Dei characterem, siue constitutivum esse arbitrantur *independentiam*, quod nempe a nullo dependeat, a nullo receperit esse, sed a seipso, vel in seipso, non liberè, & contingenter, sed necessariò semper fuerit; unde hæc independentia, vel, ut barbarè loquuntur ipsi, *aseitas*, nulli unquam alteri convenire poterit, quàm soli Deo; ac licet Deus ipse proprietates omnes, ac attributa propria creaturis communicare possit, ut illæ quoque spirituales, activæ, immortales, & in aliquo genere infi-

nitæ sint, hanc ipsam tamen *aseitatem*, sive independentiam ab alio, alteri communicare non poterit; quin etiam in creaturæ ideâ, sive conceptu, dependentia ab alio involvitur, sive clarissimè effulget. Quod celebri, & illustri Scripturæ testimonio confirmari, vel illustrari maximè poterit. Cum etenim Deus naturam, nomenque proprium Moyfi roganti exponere vellet, quo veluti caractere tanquam verus Deus agnosci posset, ait *Ego sum, qui sum* (a), vel, ut expressius in græco textu legitur, *sum ipsum ens*; unde inferiùs etiam Moyfes ab ipso Deo eruditus divinam naturam exprimens ait, *qui est misit me ad vos*; quemadmodum etiam Apostolus Deum intelligens, inquit, *qui est, qui erat, & qui venturus est* (b), ac si verus, & proprius divinæ naturæ character sit hæc *aseitas*, vel independentia. Hinc D. Hilarius superiora Scripturæ verba considerans ait *admiratus sum tam absolutam Dei significationem, quâ natura divina incomprehensibilem cognitionem aptissimo ad intelligentiam humanam sermone lequeretur. Non enim aliquid magis proprium Deo, quàm esse intelligitur, quia id ipsum, quod est, neque desinentis est aliquando, neque capti* (c); quemadmodum D. Thomas, etsi opinionem aliam defenderit, ingenuè tamen fatetur hoc ipsum nomen, *qui est*, esse nomen propriissimum Dei (d).

VI. Neque mirari certè quis poterit, quod Dei natura negativè solùm exprimatur, quod ille nimirum dependentiâ, sive principio careat; ingenuè siquidem fatendum est, quod Dei natura-

(a) Exod. c. 3. v. 14. (b) Apostol. c. 1. v. 4. (c) lib. II. de Trin. (d) I. par. qu. 13. ar. 11.

tura, & essentia, sive *Deus ipse ineffabilis est; facilius dicimus, quid non sit, quam quid sit* (a). Cumque a nobis inquiritur, *quid est?* hoc solum possumus dicere *quid non sit*. Itaque, licet hæc independentia ab alio, vel *aseitas* negativè exprimatur, propriam tamen, ac positivam perfectionem continet, quâ Deus in seipso existere, vel sibi metipso tribuere concipitur esse, quod habet; quemadmodum perfectiones aliæ, vel attributa, etsi positiva, ac realia sint, ut *immortalitas, infinitas, &c.* negativè tamen exprimi solent, sive quoddam ita clariùs, & nitidiùs a nobis concipiantur; sive quoddam clarioribus verbis careamus; ideoque, cum Deus *lucem inhabitet inaccessibilem, quem nullus hominum vidit, sed nec videre potest* (b), aut illius perfectiones, & essentia a nobis concipi, sive videri non potest, aut etiamsi mentis acies in illam defigatur, hæc ineffabili, vehementissimâque luce perstringitur, ac serè opprimitur, ut clarè, & eleganter inquit Scriptura *scrutator Majestatis opprimetur a gloria* (c).



CAP.

(a) *Aug. in Ps. 85.* (b) *Ad Timoth. 1. c. 6, vers. 16.*
 (c) *Proph. 6. 25. 26. 27.*

CAP. II.

*De attributis, sive proprietatibus
Dei.*

I.



Ulcherrimæ, perfectissimæ, præstantissimæque substantiæ, qualem divinam esse jam diximus, pulcherrimas, admirabiles, ac infinitas esse proprietates, ac attributa faciliè, manifestissimèque intelligimus. Hinc innumera, vel infinita propemodum forent, quæ de attributis, vel perfectionibus divinis hoc loco, vel Capite dicenda nobis occurrerent, nisi summa potiùs rerum genera complecti vellemus, cetera suis, & accuratiùs illustranda Theologis tradituri. Nobiliora itaque solùm attributa Dei breviter hìc ordine subjiçiemus, ut exinde faciliè intelligantur illa, quæ a nobis ommissa fuerint; cùmque illorum aliqua *a priori*, idest ex ipsâ Dei naturâ, sive conceptu ostendantur; aliqua verò ex effectibus, aut *a posteriori*, de utrisque distinctè loquemur.

II. Atque, ut ab iis exordiamur, quæ veluti proximè, & immediatè, ex Dei naturâ superiùs explicatâ nitidissimè deducuntur, in Deo *spiritualitas, simplicitas, immortalitas, aternitas* admitti debet. Si etenim Deus veluti prima rerum omnium caussa, fons, & origo agnosci debet, ut in Physicâ Generali, atque superiori loco demonstravimus, idque nulli corpori concedi potest, cùm præsertim effe-

ctus

ctus omnes maximâ, & incredibili cognitione, & sapientiâ producti fuerint, & illorum aliqui spirituales sint, necessariò dicendum est illorum causam, aut Deum ipsum spiritualement, & incorporeum esse; cùmque nullis proinde partibus componatur, aut nulla in ipso potentialitas effingi possit, quæ actu perficiatur, alioquin ab aliquo alio perfici, vel actuari deberet, purissimus, ac simplicissimus etiam haberi debet. Hinc invariabilis, incorruptibilis, & immortalis erit; & quemadmodum a nullo recepit esse, sed in seipso, vel a se habet esse, ita nec ulla perfectio, nec ipsum divinum esse ab ullo variari, vel auferri poterit. Cùmque Deus a nullo receperit esse, neque liberè, aut contingenter fuerit, ut aliquando nimirum esse, aliquando non esse posset (sic enim inciperet esse ab alio, vel cum antea non haberet esse, illud ab alio reciperet) necessariò dicendum est, quod semper fuerit, vel æternitas illi conveniat. Hæc autem a Boëthio elegantissimè definitur *Incommutabilis vita tota simul, & perfecta possessio*, quod, licet in illâ partes aliquæ præteritæ, præsentis, atque futuræ concipi a nobis consueverint, nullas tamen ipsa verè contineat, sed indivisibilis sit, atque in illâ veluti in momento, vel instanti quodam, Deus omnia præterita simul, atque futura veluti præsentia contempletur. Non enim, ut optimè ait Augustinus more nostro ille vel quod futurum est prospicit, vel quod præsens est adspicit, vel quod præteritum est respicit; sed alio modo quodam a nostrarum cogitationum consuetudine longè, altèque diverso. Ille quippe non ex hoc in illud cogitatione mutatâ, sed omnino incommutabiliter videt; ita ut illa quidem,

dem, quæ temporaliter fiunt, & futura nondum sunt, & præsentia jam sint, & præterita jam non sint. Ipse verò hæc omnia stabili, ac sempiterna præsentia comprehendat: nec aliter oculis, aliter mente; non enim ex animo constat, & corpore: nec aliter nunc, aliter antea, & aliter postea: quoniam non sicut nostra, ita ejus quoque scientia trium temporum, præsentis videlicet, & præteriti, & futuri varietate mutetur, apud quem non est immutatio, nec momenti obumbratio (a); quemadmodum etiam D. Gregorius ait: Scimus quia Deo futurum nihil est, ante ejus oculos præterita nulla sunt, præsentia non transeunt, futura non veniunt. Quippe quia omne, quod nobis fuit, & erit, in ejus prospectu præsto est, & omne quod præsens est scire potest, scire potest priusquam præscire (b).

III. Quod verò Deus omnia in hac æternitate cognoscat, sive quod ipse infinitam cognitionem, vel scientiam habeat, quam *omniscientiam* plerumque vocare solent, non modò ex illius spiritualitate, vel intellectu, qui sine cognitione, vel scientiâ perfectus, vel perfectissimus haberi non posset, sed ex illius etiam operationibus demonstratur. Cum etenim admirabili, ac infinitâ sapientiâ, vel cognitione plurimos effectus, vel creaturas ille produxerit, necessarium est, ut illas antea cognosceret; cumque illæ tunc tantummodo possibiles forent, eâdem ratione, vel lege, quâ nonnullas ex possibilibus creaturis cognovit, ut illas produceret, atque futuras decerneret, sic ceteras etiam omnes creaturas possibiles, quæ infinitæ sunt, cognoscere debuit, ideoque in-

fini-

(a) II. de Civ. c. 21. (b) XX. Moral. c. 23.

finitam cognitionem, vel *omniscientiam* habere debet.

IV. Eâdem lege, siue ratione facîle ostenditur illum *omnipotentem* esse, siue infinitam potentiam habere. Quamvis enim non infinitos effectus ille produxerit, sed omnia potius fecerit *in numero, pondere, & mensura (a)*, infinitam tamen vim in producendis illis exercuit, cum ex nihilo illos eduxerit, idque sine infinitâ potentiâ fieri certè non possit, quâ infinitum intervallum, siue discrimen illud superaretur, quod inter *ens*, & *nihil*, siue inter *esse*, ac *non esse* reperitur. Deinde verò, sicuti ex infinitis effectibus possibilibus, aliquos ex nihilo producere potuit, ac liberè produxit, ita quoque ceteros omnes, licet infinitos, producere potuit; ideoque, etsi eam non exerat, omnipotentiam tamen habere debet.

V. Deinde verò, cum Deus non modò singulos effectus producere, sed etiam conservare, atque ad operandum impellere videatur, illis intimè semper adesse debet, ut optimè, clarissimèque dixit Apostolus, *neque enim distat ab unoquoque nostrâ; in ipso etiam vivimus, movemur, & sumus (b)*. Hæc verò proprietas, siue perfectio, quâ Deus rebus omnibus a se creatis intimè inhæret, siue infinitis etiam a se creabilibus inesse poterit, vocatur *immensitas*. Perperam itaque inquiritur an ante Mundi originem Deus immensus esset, an in spatiis imaginariis extendatur, &c. Immensitas enim est illa perfectio, quâ Deus omnibus rebus a se creatis est præsens, ideoque ubi nulla realis extensio, aut nulla creatura reperitur,

(a) *Sapient.* c. 11. v. 21. (b) *Act.* 17. v. 27.

tur, Deus præsens esse non poterit. Adhuc tamen immensus vocari, & haberi meritò poterit, etsi illius extensio Mundi finibus circumferibatur, quodd immensitas illa non secundum exercitium, vel respectu creaturarum, sed in ipso Deo, sive virtualiter considerari debeat; unde quemadmodum Deus ab æterno erat omnipotens, etsi nihil creasset, nunc est omnipotens, etsi omnes, vel infinitos effectus non produxerit, quodd illos producere potest, ita ab æterno erat immensus, etsi nulli creaturæ præsens foret, nunc est immensus, etsi infinitis creaturis non adsit, quodd infinitas creaturas producere, illisque inesse possit. Atque hoc certè sensu intelligitur id, quod in sacris Literis habetur, quod *Cali calorum eum capere non possunt (a)*; etsi enim in Coelis nobiliori quodam modo inesse dicatur, quod ibi clariùs se beatis mentibus contemplandum exhibeat, per singulas tamen, ac viliores etiam, si quæ sint, Universi partes diffunditur, eademque lege ad infinitos Mundos extenderetur, si illi existerent.

VI. Quandoquidem verò rerum productio, conservatio, atque in ipsis omnibus divinæ substantiæ præsentia liberè, & contingenter, ab ipso Deo dependet; in ipso voluntas admitti debet, quâ ex infinitis effectibus possibilibus, quos ille nimirum producere potest, aliquos eligat, quos actu producere, conservare, ac veluti fovere velit, Hanc verò liberrimam fore manifestissimè demonstratur non modò, quod a nullo cogi, sive determinari, vel applicari possit; verum etiam, quodd effectus omnes æ-

quæ

(a) III. Reg. c. 8, v. 27.

quæ possibiles fuerint, aut nulla prorsus ratio fuerit, cur ille potius, aut alius produci debuerit; unde, si illorum aliquem produci contigit, id a solo liberrimo divinæ voluntatis arbitrio pendere debuit, quo Deus ab æterno hanc potius, quàm aliam rem se producturum esse decrevit, hanc tali tempore, aut loco futuram voluit; cùmque hæc libera voluntas neque ab alio variari possit, cùm divina voluntas a nullo dependeat, neque ab ipso Deo, alioquin imperfectio quædam, nova determinatio, vel novum esse concipi, vel admitti deberet in Deo, Deus ipse *immutabilis*, ejusque decreta immutabilia censerentur debent; ut clariùs, adhuc, & uberius ostendamus, cum de voluntate Dei inferius disseremus.

VII. Quod si ex liberâ Dei voluntate rerum productio, conservatio, major, aut minor perfectio, quæ in illis conspicitur, oriri debuit, atque suprema, ac admirabilis illa providentia, quâ rebus singulis a se creatis consulit, proprios, peculiâtesque fines constituit, ad quos illas constantissimè dirigat, in ipso Deo *bonitas*, *justitia*, *misericordia*, aliaque id genus attributa, sive virtutes admitti debent. *Bonitas* quidem, atque perfectio, quâ proprium esse, perfectionesque proprias creaturis communicet, vel uberrimè largiatur; *misericordia*, quâ figmentum nostrum ipse cognoscens, quoniam pulvis sumus, reis, injustisque subinde parcat, sive gratiam largiatur, quâ iustificemur, ejusque iram, atque vindictam fugiamus; *justitia*, quâ sui, legumque contemptores homines puniat; *veracitas*, sive *fidelitas*, quâ, sicuti ob infinitam cognitionem falli non potest, ita non possit, aut velit nos fallere,

vel

vel in errorem aliquem inducere, ideoque illa, quæ fortasse promiserit, constantissimè efficiat. Nihil est verò quod eodem ordine, eademque ratione ceteras in ipso virtutes inesse ostendamus. Quidquid enim boni, sive perfecti in creaturis effulget, ex ipso Deo repeti, ac veluti uberrimo fonte hauriri debet; neque Deus ipse perfectissimus haberi posset, nisi virtutes, & perfectiones omnes uberrimè contineret.

VIII. Id unum potiùs coronidis loco addendum superest, quod proprietates omnes, vel attributa, quæ reperiuntur in Deo, sive illorum numerum, ac multitudinem, sive dignitatem, ac magnitudinem consideres, infinita esse debent. Primò quidem quòd infinita sit illius natura, nullisque finibus circumscribatur, ideoque etiam operationes, proprietates, & attributa, quæ tali naturæ conveniunt, sive potiùs a tali naturâ, ob infinitam illius simplicitatem, minimè distinguuntur, infinita quoque esse debent; deinde verò quòd, sicuti attributa plurima, ut *potentiam*, *cognitionem*, &c. infinita fore jam diximus, ita quoque cetera infinita esse debeant.

IX. Exinde verò manifestissimè apparet Deum unicum admitti oportere, sive ceteras inter Divinæ naturæ proprietates unitatem in primis habendam esse. Si etenim divinæ naturæ nomine nihil aliud intelligi posse jam diximus, quàm ens aliquod perfectissimum, cui innumere, ac infinitæ perfectiones conveniant, plures certè esse non poterunt; vel enim omnes illi Dii eadem omnino naturam, easdem prorsus innumeras, ac infinitas perfectiones haberent, siquæ non plures, sed unus, idemque Deus, eadem

dem naturâ, iisdemque attributis præditus foret; vel quilibet potius ex illis peculiarem aliquam naturam, vel perfectionem haberet, quâ veluti quodam discrimine ab aliis distingueretur, sicque nullus ex illis perfectiones omnes, ac infinitas haberet, nullus ens perfectissimum foret, ideoque nullus esset Deus. Id fusè ostendi posset in variis Ethnicorum Diis, quorum singulis certa quædam vis, ac potentia, sive perfectio concedebatur; sed, cum ceteris ille careret, aliorum Deorum opem implorare miserimè cogeatur.

X. Huic tamen simplicissimæ, perfectissimæque unitati, quæ in Deo, sive naturâ divinâ admitti debet, Personarum numerus, sive *Trinitatis* Mysterium non repugnat. Quemadmodum enim Theologi docent, eadem prorsus natura, eadem attributa, vel eadem perfectiones in singulis Personis reperiuntur, ideoque æqualiter omnes sunt Deus; solis verò *relationibus*, sive *notionibus* distinguuntur, quæ juxta meliorem, communio remque sententiam, perfectiones quidem non sunt, sed accuratè tamen, atque realiter Personam unam ab aliâ distinguunt. Id uberiùs exponere, vel clariùs intelligere fortasse non potest, aut decet; *Sacramentum enim hoc magnum est, & quidem venerandum, non scrutandum, quomodo pluralitas in unitate, & hac unitate, aut ipsa in pluralitate. Scrutari hoc temeritas est, credere pietas est, nosse vita, & vita aterna est (a).* Quandoquidem tamen *relationum*, atque *notionum* meminimus, quibus divinæ Personæ distinguuntur, juverit illas hîc obiter exponere, ut intelligi possit,

C c quid

(a) D. Bern. de Confid. V. c. 8.

quid in hoc ineffabili Trinitatis Myſterio credere, ac venerari debeamus.

XI. 1. In Divinis itaque, vel in Deo unica eſt *natura*, & eſſentia, ut paullo ſuperiùs oſtendimus, cui perfectiones, ac attributa plurima conveniunt, quæ a naturâ ipſâ non *realiter*, ſed *virtualiter* ſolùm diſtinguantur.

2. Duæ *proceſſiones*, vel Perſonarum origines admitti debent, altera nimirum ab intellectu, quâ Filius a Patre procedit, & altera a voluntate, quâ Spiritus Sanctus a Patre ſimul, & Filio producit. Cum etenim Deus ſeipſum nitidiſſimè, perfectiſſimèque cognoscat, imaginem quandam, vel, ut Philoſophi, ac Theologi loquuntur, *Verbum* aliquod elicere, & contemplari debet, in quo veluti in ſpeculo perfectiones omnes, ac attributa, & naturam, quæ reperitur in Deo, perfectiſſimo, ac infinito modo exprimantur; ideoque, cum Verbum ipſum, aut hæc imago, quæ ab intellectu Divino producit, eidem intellectui, vel Deo intelligenti ſimul, ac intellecto aſſimilari debeat, Verbum Divinum produci dicitur in ſimilitudinem naturæ, ideoq; *generari* dicitur, & in ſacris Literis *Filius* appellatur.

Deinde verò, cum Deus ſeipſum, & hoc verbum ipſum perfectiſſimo, & infinito amore diligat, atque mutuo amore diligatur, mutuus hic amor, qui a Deo nimirum, & ab ipſo Verbo producit, ab utroque *ſpirari*, ſive ab utroque *procedere* dicitur; unde communiter *amor*, *charitas*, aut *ſpiritus* in divinis Literis appellatur; cumque amor ille, qui ab amante producit, amanti ſimilis eſſe non debeat, hæc altera origo, ſive productio verè, & rigoroſè *generatio* non appellatur, ſed *proceſſio*.

3. Exin-

3. Exinde verò deducitur, quod in Divinis unicâ nimirum, ac simplicissimâ Divinâ essentiâ, & naturâ, tres Personæ distingui debent, juxta celebre Joannis effatum, *Tres sunt, qui testimonium dant in cælo, Pater, Verbum, & Spiritus Sanctus, & hi tres unum sunt* (a). Cùm etenim maxima, & infinita sit illa perfectio, simplicitas, atque nobilitas, quæ reperitur in Deo, impossibile est certè, ut aliquod accidens admittatur in Deo, sive ens aliquod, aut ulla perfectio, quæ distinguatur ab ipso Deo; sed quidquid concipi, vel inveniri potest in Deo, erit ipse Deus. Verbum itaque, aut imago, in quâ se Deus ipse contemplatur, sive, quæ a Deo intelligente producitur, erit eadem natura, vel essentia Divina; sicuti amor ipse, quo Pater, & Verbum sese mutuò diligunt, erit ipsa natura, substantia, & essentia Divina, alioquin amor, cognitio, & imago quædam accidentalis admitteretur in Deo. Quamvis tamen Amor, aut Verbum ab ipsâ divinâ naturâ minimè distinguantur, sed sint eadem natura, quæ intelligit, ac intelligitur, amat, & amatur; ipsæ tamen Personæ vero, ac reali discrimine distinguuntur; neque enim potest idem suppositum, atque persona seipsam producere, ideoque, si Verbum, & Spiritus producantur a Patre, ut antea dicebamus, debent inter se, atque ab illo verè, ac realiter distingui.

4. Quatuor itaque *relationes* reperiuntur in divinis, Patris nimirum ad Filium, & Filii ad Spiritum, & Spiritus ad utrumque simul. Relatio Patris generantis ad Filium genitum vocatur *paternitas*, unde ait Scriptura (b) quod

C c 2

a di-

(a) Joann. ep. 1. c. 5. v. 7. (b) Joann. c. 1.

a divino Patre dependet omnis paternitas, relatio Filii ad Patrem appellatur *filiatio*; relatio verò, vel ordo Patris, & Filii simul ad Spiritum *spiratio activa* vocatur, sicuti relatio Spiritûs ad Patrem simul, ac Filium *spiratio passiva* nominatur.

5. Quinque denique sunt *notiones*, aut characteres illi, quibus Divinæ Personæ distinguuntur; quatuor nimirum relationes mox explicatæ, ac insuper *Innascibilitas*, quæ soli Patri convenit, cùm hic a nullo generetur, aut producat, Filius autem a Patre, & Spiritus a Patre simul ac Filio procedat.

XII. Hinc attributa, quæ reperiuntur in Deo, vel *essentialia*, vel *notionalia* vocari solent; essentialia quidem, quæ in ipsâ naturâ nitidissimè, ac inseparabiliter continentur; ideoque singulis Divinis Personis inesse debent, ut *immortalitas*, *bonitas*, *justitia*, &c. notionalia verò, quæ uni distinctæ, sive determinatæ personæ conveniunt, ideoque sunt characteres, quibus una a personis aliis *noscitur*, sive distinguitur, ut *intelligere*, *generare*, & *spirare*, respectu Patris; *generari*, *intelligi*, & *spirare* respectu Filii, *spirari* respectu Spiritûs Sancti, &c. unde etiam attributa, quæ alioquin communia, & essentialia forent, uni solum Personæ quodammodo tribuuntur, ut illius ferè propria videantur, ut *potentia* Patri, *sapientia* Filio, *charitas*, *bonitas*, & *amor* Spiritui Sancto; quæ singula possent ex pluribus Scripturæ locis illustrari, etsi res admodum difficilis, ac obscura semper videatur.


XII Si tamen clarior, quædam, quo ad humanæ mentis imbecillitas ferat, illius explicatio desideratur, Theologos adire juverit, qui longâ

gâ de his oratione differunt. Nos enim, quî solo rationis lumine hac in parte progredimur, silentio potiùs venerari, quàm temere scrutari malumus. Id unum observasse juverit, hoc Trinitatis Mysterium arcanum adeo, humanique ingenii viribus impervium esse, ut optimo, sapientissimoque Dei consilio omnibus ferè Judeis incognitum, neque in veteri Testamento satis expressum; omnibus vero sapientissimis etiam, atque illustrioribus Philosophis omnino occultum fuerit; ut quidquid præinde aut ex apocryphis Trimegisti, Orphei, Zoroastris, Sybillarum carminibus, aut ex Poetarum fabulis, aut ex ipsius etiam Platonis libris afferatur, quo cognitionem, vel suspicionem aliquam Trinitatis illis affuisse ostendatur, aut falsum, aut omnino leve, aut temere contortum, aut liberiori industriâ ad Trinitatem translatum, manifestissimè videatur, ut facilè ingenuus, peritusque lector intelliget.



C A P. III.

De Scientiâ Dei.

I.  Tū de admirabili cognitione, vel Scientiâ Dei loquuturis, illud ingenuè potiùs usurpari posse videretur, quod frequenter admodum in Sacris Literis expressè dicitur, *o altitudo sapientia, & scientia Dei, quam incomprehensibilia sunt iudicia ejus, & investigabiles via ejus!* (a), cum noliſque de arcano illius mysterio, aut de variis Theologorum sententiis, quæ in illâ explicandâ, vel describendâ nostris temporibus circumferuntur, uberiùs expresse, cum tamen Divinæ voluntatis ordo, vis, ac potestas, vel humanæ mentis libertas satis intelligi, vel explicari non possit, nisi quædam de scientiâ divinâ, vel breviter, differantur, juverit illa complecti, quæ Philosophos maximè deceant, ut cætera ex Theologicis, uberrimisque fontibus hauriantur.

II. Atque, ut meliori, clariorique ordine progrediamur, variæ scientiæ, vel cognitiones in Deo admitti solent juxta varia objectorum, rerumque genera, quæ ab ipso Deo cognoscuntur. Itaque res, & objecta, quæ cognoscuntur a Deo, vel sunt *possibilia*, vel *futura*. Futura verò sunt, vel *necessaria*, vel *libera*, seu *contingentia*; contingentia denique sunt *absoluta*, vel *conditionata*.

Obje-

(a) Ad Rom. c. v. 5

Objecta *possibilia* dicuntur illa, in quibus nulla contradictio, vel repugnantia reperitur, unde in rerum naturâ fieri, sive produci possunt, nunquam tamen futura, vel producenda sunt, ut *montes aurei, centaurus, lacteum flumen*. Futura verò dicuntur illa, quæ aliquando erunt, sive actualiter producentur; *necessaria* quidem dicuntur, si non possint non produci, ut quod *bis duo sint quatuor, triangulum tres lateribus componatur*; *contingentia* verò, si produci etiam non potuerint, sive si contingenter solùm, & liberè producantur, ut *Antichristus, Juda peccatum*.

Futura *contingentia absoluta* dicuntur illa, quæ simpliciter, & absolutè erunt, independentè ab alterius objecti futuritione, ut *Mundi excidium*, &c.

Futura denique *conditionata* vocantur illa, quæ aliquando fierent, sive producerentur in aliquâ hypòthesi, vel dependentè a futuritione, vel positione alterius objecti, si quædam nimirum conditio verificaretur; ut quando Christus Judæos increpans ait, *si in Tyro, & Sidone facta essent virtutes, quæ facta sunt in vobis, in cilicio, & cinere pœnitentiam egissent* [a]. Itaque ex variâ objecti conditione, sive pro vario rei statu, variâ quoque, sive distincta cognitio in Deo admitti debet.

III. Possibilia, ut omnes ferè Philosophi mirificè consensere, cognoscuntur a Deo *non in seipsis, sed in seipso* [b], idest in archetypis illis imaginibus, quas Deus in se continet; imagines autem illæ, vel ideæ nihil sunt aliud, quàm eadem divina essentia, quatenus

Cc 4

se-

(a) *Matth. c. II. v. 21.* (b) *D. Thom. I. p. 2. ar. 46*

secundum aliquem modum participabilis est a creaturis (a), unde seipsam cognoscens divina sapientia, novit omnia [b]. Cum itaque Deus infinitum suum, ac perfectissimum esse clarissime contemplatur, infinitos etiam essendi modos, quos in se eminenter continet, vel infinitos modos, quibus a creaturis participari ipse potest, nitide contemplatur, unde varias, ac infinitas rerum possibilitium essentias, sive naturas cognoscit; cumque archetypæ imagines illæ, sive modi, quo Deus a creaturis participari potest, variari, vel alterari non possint, rerum essentiæ invariabiles adeo, immutabiles, ac æternæ dicuntur, ut Deus ipse libero quidem voluntatis arbitrio possit hunc potius, quàm alium essendi modum producere, vel ex infinitis possibilibus essentiis aliquam veluti futuram decernere, producere, & existentiam illi concedere, non tamen aliter ipsam producere, quàm in archetypâ imagine, vel in ipso Deo continebatur; ut ex. gr. circulum quidem producere, vel non producere poterit; at, si se circulum producturum esse decreverit, ipsum quadratum, vel inæqualibus radiis præditum efficere non poterit. Primum ejusmodi scientiæ genus, quo Deus res merè possibiles simpliciter intelligit, & contemplatur, scientia simplicis *intelligentiæ* vocari solet; cumque divinum decretum, sive potentiam in aliquâ re possibili producendâ dirigat, veluti remota quædam rerum causa censi merito poterit.

IV. Quod si ex infinitis illis creaturis possibilibus, quas a Deo scientiâ simplicis intelligentiæ cognosci jam diximus, aliquo temporis

spa-

(a) I. per. 4. 15. ar. 2. (b) Dionys. de div. nom. c. 4.

spatio quædam futura, vel producenda sit, hanc Deus veluti præsentem, & existentem videre, vel contemplari dicitur, unde respectu futurorum *scientia visionis* admittitur a Theologis, quæ, cum adjunctum habeat divinæ voluntatis decretum, sive res aliquando futuras, vel producendas respiciat, *practica*, vel operativa, censeretur solet.

Atque ejusmodi quidem futurorum contingentium certissimam, ac infallibilem cognitionem ab æterno Deo concedi oportere manifestissime demonstratur, quod alioquin providentia, vel infinita, ac invariabilis sapientia illi concedi non posset, sed aliqua potius in tempore cognosceret, quod ab æterno non cognovisset; unde optimè, meritòque ait Augustinus, quod *confiteri esse Deum, & negare præseium futurorum apertissima insania est* [a]. Gravis tantummodo, ac celeberrima difficultas est, opinionumque discrimen in assignando modo, vel medio, quo Deus futura contingentia, vel absoluta, vel conditionata illa, fuerint, ab æterno cognoverit, cum alioquin certissimum sit possibile, & futura quoque necessaria, a Deo cognosci in archetypis illorum ideis, quas in se continet, & quas decreto proprio variare non potest, ut antea dicebamus.

V. Thomistæ quidem, cum independentem a divino decreto, nihil omnino futurum, vel non futurum esse arbitrentur, acerrimè defendunt, quod *universas creaturas spirituales, & corporales, non quia sunt futura, ideo novit Deus; sed ideo sunt futuræ, quia novit* [a]; adeoque Deus res futuras in ipso decreto certò, ac infal-

(a) De Civ. V. c. 9. (b) Id. De Trin. XV. n. 22. scilicet 12.

fallibiliter cognoscit, quo illas futuras esse decernit, ut ex. gr. *Antichristum*, *Juda peccatum* ab æterno cognoverit, quod Antichristum producere, & Judæ peccatum permittere decreverit. Cum tamen hæc infallibilis, & invariabilis Dei cognitio hominis libertatem lædere videatur, atque humanis actibus aliquando futuris necessitatem imponere, quod illi non ex liberâ hominis voluntate, sed ex ab invariabili solùm Dei decreto futuri asserantur, nec aliter sint futuri, quàm sicuti ab ipso Deo prævisi, vel ab æterno decreti jam fuerint, plurimi, ac celeberrimi quoque Theologi, modos alios, aut media excogitarunt, in quibus independentem a divino decreto res aliquæ futuræ fuerint; quæ proinde non in divino decreto posterius ponendo, sed aliâ de causâ, quæ decretum præcedat, a Deo cognosci potuerint.

VI. Molina, Raynaldus, alique plurimi, ut nodum hunc dirimerent, atque humanæ libertatis arbitrium salvarent, existimarunt, res esse futuras independentem a divino decreto, ex solo voluntatis humanæ arbitrio, ut proinde Deus, qui admirabilem, ac infinitam cognitionem, vel, ut inquit ipsi, *super comprehensionem* habet, ab æterno cognoverit, quid in illis circumstantiis voluntas hominis sinè ullâ Dei motione, vel prævio concursu, sed solis arbitrii viribus esset factura; deinde verò invariabili sui decreto decreverit ea esse futura, quæ jam in causis creatis, idest in humanæ voluntatis viribus, & arbitrio esse futura cognoverat. Atque in hac ipsâ hypothefi, ex quâ arcana divinæ prædestinationis doctrina dependet, clarissimè apparet, quod aliqui destinantur ad gloriam intuitu bonorum operum, quæ hac scienc-

scientiâ mediâ Deus ab æterno cognoverat illos esse facturos; alii excluduntur ab illâ, quòd ab æterno Deus ipsorum peccata cognoverit.

VII. Alii verò opinantur Deum hæc futura contingentia cognoscere non in causis ipsis, vel hominum voluntate, sed potiùs in divino decreto, non quidem posito, sive formato, ut Thomistæ volunt, sed statim ponendo.

Alii futurorum contingentium cognitionem, desumendam esse arbitrantur ex vi contradictionis, quæ in duabus propositionibus reperitur, eâ lege, ut altera determinatè sit vera, altera verò determinatè falsa; ut ex. gr. ex his propositionibus *Antichristus erit, Antichristus non erit*; ex vi contradictionis alterutra determinatè falsa esse debeat; cùmque Deus ab æterno cognoverit, cui potiùs veritas, aut falsitas determinatè conveniat, cognovit etiam, quæ independentè a divino decreto verificanda jam fuerat.

Alii postremò ex hypothesi, quod effectus sit aliquando futurus, veritatem aliquam objectivam in illâ propositione reperiri, vel a Deo cognosci arbitrantur, quæ effectui, vel objecto futuro correspondet; unde in hac ipsâ veritate objectivâ, illorum futuritionem Deus cognoscet, atque ab illâ in proprio decreto dirigetur.

Hæ sunt illustriores illorum sententiæ, quæ futurorum cognitionem a solo divino decreto repetendam esse negant; quarum proinde varietas ipsa argumento esse poterit rem obscurissimam, illarumque singulas incertas admodum, & falsas esse.

VIII. Atque, ut ab hac ultimâ exordiamur, in quâ certa quædam, ac determinata veritas obje-

objectiva in rebus supponitur, ex eo, quod illæ aliquando sint futuræ, manifestissima repugnantia, vel contradictio reperitur, quod in seipso aliquid contingens potius futurum, quàm non futurum supponatur. Contingens itaque est illud, quod ex naturâ propriâ indifferens est, ut aliquando sit futurum, vel non futurum, ideoque objectum aliquod, quod revera contingens sit, futurum potius, quàm non futurum esse, vel existimari non poterit, nisi ab aliquâ causâ, sive principio determinetur ad esse; ideoque in rebus contingentibus independenter a divino decreto, vel ab aliquâ aliâ causâ determinante, nulla certa, sive determinata futuritio, adeoque nulla certa, sive determinata veritas haberi poterit. Cum ergo creaturæ singulæ, vel effectus omnes creati ex naturâ propriâ contingentes sint, atque ab æterno quoque contingentes esse debuerint, ut aliquando fierent, sive cognoscerentur futuri, ab alio determinari debuerunt; cumq; determinari certè non potuerint ab ullâ causâ, sive principio creato, quod similiter indifferens foret, sed a solâ primâ causâ, sive divino principio, quod, cum necessariò sit liberum, potest aliquid ex possibilibus, & contingentibus veluti futurum efficere, decernere nimirum, ut id, quod naturâ propriâ contingens, ac indifferens est, aliquando fiat, vel producat, manifestissimè infertur, quod ante divinum decretum, quo primam causam determinari jam diximus, nihil certò futurum haberi, sive cognosci poterit. Hinc optimè D. Thomas asseruit, quod *illud, quod nunc est, ex eo futurum fuit, antequam esset, quia in causâ suâ determinatâ erat, ut fieret; unde sublata causâ non erat futurum.*
illud

illud fieri; sola autem causâ primâ est aeterna, & determinata; unde non sequitur, quod ea, qua sunt, semper fuit verum ea esse futura, nisi quatenus in causâ sempiternâ fuit, ut essent futura, qua quidem causâ solus est Deus (a); quemadmodum alibi dixerat, quod cognoscere futura in causâ suâ nihil aliud est, quàm cognoscere præsentem inclinationem causâ ad effectum (b); ideoque, cùm in effectibus, sive causis contingentibus nulla inclinatio, sive determinatio concipi, sive defendi possit, nullus effectus veluti in propriâ causâ determinatus haberi poterit.

IX. Exinde verò refelli, sive revinci faciliè poterit altera opinio, quæ rerum futuritionem, ex vi, sive lege contradictionis pendere arbitratur, ut quandoquidem ex. gr. ex his contradictoriis *Antichristus erit, Antichristus non erit*, altera necessariò falsa, altera vera esse debet, certa quædam, ac determinata veritas in illarum aliquâ reperiatur, atque ab ipso Deo cognoscatur. Quamvis enim ea sit certissima contradictoriarum vis, atque natura, ut illarum utraque simul falsa, vel simul vera esse non possit, non tamen requiritur, ut illa potiùs, aut altera determinatè sit vera; sed solum requiritur, ut ubi hæc, aut altera vera fortasse fuerit, reliqua sit falsa; alioquin si alterutram ex propositionibus contradictoriis determinatè veram, sive determinatè falsam esse oporteret, nihil ampliùs contingens, ac indifferens foret, sed omnia necessariò contingerent, illa nimirum propositio, quæ esset ex vi contradictionis determinatè vera, non esset

(a) q. 16. art. 3. ad 3. (b) q. 6. de malo art. 3.

set ampliùs indifferens ad veritatem, vel falsitatem recipiendam, ideoque objectum, de quo talis propositio efformatur, non esset ampliùs indifferens, ut fieret, vel non fieret, sed ea prorsus lege necessariò, ac infallibiliter fieri deberet, quo enunciatur ab illâ propositione, quæ determinatè vera supponitur; alioquin propositionem determinatè veram in se determinatè falsam efficeret.

Cùm itaque ex vi contradictionis nulla determinata veritas haberi possit, non poterit Deus objectum aliquod, sive rem, de quâ contradictoriæ propositiones formatae fuerint, potius futuram, quàm non futuram cognoscere; sed cùm determinata propositionis veritas ex objecto determinatè futuro oriatur, nihilque ex naturâ propriâ contingens veluti determinatè futurum censerì possit, nisi ab aliquâ, id est a primâ causâ, vel a Deo determinetur, ante hoc decretum nulla certa veritas, sive futurorum cognitio haberi poterit, unde expressè docuit Augustinus, quod *Deum futura facere nihil aliud est, quàm earum causas præparare* (a); quo clarissimè altera quoque opinio rejicitur, quæ rerum futuritionem, aut scientiam ex decreto ponendo desumit, quemadmodum enim antea dicebamus, objectum ante decretum prorsus indifferens est, ideoque decretum supponi debet antequam res futura potius, quàm non futura concipiatur.

Explicanda, vel inquirenda nunc superest ultima opinio, quæ superioribus celebrior est, atque iis, si fieri id quidem possit, verisimilior quoque videtur, in quâ nimirum res ideo futura

ræ

(a) *De Gen. ad lit. VI. c. 17.*

ræ esse, vel cognosci dicuntur, quod a causis creatis aliquando sint producendæ.

X Illud tamen omnino falsum, ac impossibile censeretur debet, quod Deus ab æterno cognoverit quid humana voluntas, solis arbitrii viribus sine Dei motione, sive decreto esset factura. Cum enim humana voluntas veluti causa prorsus indifferens, ac libera cognosceretur, non poterat in illâ Deus effectum potius futurum, quàm non futurum certò, invariabiliter, ac infallibiliter cognoscere, cùm effectus aliquis certò, invariabiliter, ac determinatè futurus causam requirat, quæ invariabiliter, & certè ad illum producendum applicata, sive determinata jam fuerit. *Cùm itaque causa contingens se habeat ad opposita, contingens, ut futurum, non subditur per certitudinem alicui cognitioni. Unde quicumque cognoscit effectum, contingentem in sua causâ tantum, non habet de eo nisi conjecturalem cognitionem (a).* Quemadmodum itaque homines ipsi de futuris aliorum hominum actibus ita feliciter aliquando conjiciunt, ut illos præscire, vel prævidere dicantur, ita Deus ipse clariori, feliciorique conjiciendi modo futuras hominum voluntates cognosceret, nullam tamen certam, ac infallibilem illorum scientiam haberet.

XI. Sed, ut accuratiùs adhuc loquamur, futuras hominum voluntates Deus, neque etiam conjicere, vel suspicari poterit, ideoque independentem a divino decreto nihil contingens veluti futurum cognosci poterit. Quemadmodum enim sequenti Capite demonstrabitur, hominum voluntas, etsi volendi, vel operandi

po-

(a) D. Thom. I. par. 94, ar. 13.

potentiam, atq; admirabilem vim receperit, hanc tamen exerere nunquam, vel exercere, nihilque operari, seu velle unquam poterit, nisi priùs ad operandum, atque volendum applicetur, sive determinetur ab ipso Deo. Tantum itaq; abest, ut ab æterno Deus cognoverit quid in iis circumstantiis independenter a divino decreto, aut cum solo simultaneo Dei concursu, aut solis arbitriis viribus factura foret hominum voluntas, ut certissimè potiùs cognoverit, voluntatem ipsam nihil efficere, seu velle posse, nisi priùs applicaretur ad operandum: eâdemq; lege, sive ratione, quâ Deus ab æterno cognoscere, vel prævidere non potuit, quibus motibus independenter a suo decreto sol moveretur, quia nullus in sole motus haberi posset, qui non produceretur ab alio, ita Deus ipse ab æterno cognoscere, vel prævidere non potuit, quid independenter a suo decreto, sive determinatione factura esset hominum voluntas, quia nullus in voluntate motus, nulla volitio haberi potest, nisi priùs voluntas ab ipso Deo determinetur, & applicetur ad operandum. Hypothesis itaque, sive sententia Recentiorum falsa, chimerica, & impossibilis manifestissimè demonstratur, quòd illud veluti certò, ac invariabiliter futurum a Deo cognosci velint, quòd in propriâ causâ liberè solùm, & contingenter futurum est; sive potiùs independenter a divino decreto, vel in propriâ solùm causâ, nullâ ratione futurum erit; hoc est, neque liberè, neque contingenter ab illâ produci posset, nisi illâ priùs divino decreto, sive motione physicâ applicaretur ad operandum.

XII. Quandoquidem verò hæc Molinæ, aliorumque sapientum hominum opinio, quæ
duo.

duobus ferè ab hinc sæculis plurimas in scholis, & incredibiles turbas, atque diffidia excitavit, non modò rationibus, & argumentis impugnari solet, quas ipsi quoque paullo superiùs attulimus, verùm etiam invidiæ conciliandæ causâ cum damnatis Pelagianorum, ac Semipelagianorum erroribus paullo liberiùs, quàm gravem, & catholicum virum deceat, comparari; juverit ipsam Semipelagianorum doctrinam oculis ferè subjicere, ut inde diligens, ac ingenuus Lector intelligat, quo discrimine celeberrima hæc Recentiorum doctrinâ a Semipelagianorum hypothese distinguatur.

Cùm itaque constans, atque communis Pelagii, ac Semipelagianorum opinio foret, quòd voluntates hominum aut solis arbitrii, vel naturæ viribus, aut solo divino concursu, vel adjutorio aliquid operari possent, illud etiam existimarunt, quod ab æterno Deus futuras hominum operationes cognoverit, illarumque intuitu quibusdam præmia, vel gloriam, aliis pœnam, æternamque mortem decreverit. Id expressè colligitur ex D. Prosperi epistolis ad Augustinum, quibus varios Semipelagianorum errores commemorans, asserit, in illorum hypothese ex infantibus, qui aut suscepto baptismo, aut nondum regenerati moriuntur, tales perdi, talesque salvari, quales futuros illos in annis majoribus, si ad adultam servarentur ætatem, scientia divina præviderit (a); adeoque Deus in eis, quos hinc aufert, prævidit quemadmodum victurus esset, si viveret, & ideo quem nequiter novit esse victurum sine baptismo facit, & mori, sic in eo puniens opera mala, non quæ
 Tom. IV. D d . fecit,

(a) Prosp. ep. ad Aug.

fecit, sed qua factururus fuit (a) ; cùmque similiter illis opponeretur, non omnes homines salvari, non omnibus Evangelium prædicari, non omnes ad fidem allici, cùm tamen omnes æqualiter infideles forent, ideoque non ex operibus, aut bonæ voluntatis merito, sed solo divinæ misericordiæ, vel bonitatis arbitrio gratiæ dona conferri, respondebant, dispensasse Deum tempora, & ministeria prædicationis, juxta quod prævidebat aliquos credituros, & exorituram esse bonarum credulitatem voluntatum (a), vel dicunt id esse præscientia divina, ut eo tempore, & ibi, & illis veritas annuntiaretur, quando, & ubi prænoscatur esse credenda (b) ; unde penè omnium par invenitur, & una sententia, quâ propositum, & prædestinationem Dei secundum præscientiam receperunt, ut ob hoc Deus aliis vasa honoris, alios contumelia fecerit, quia finem uniuscujusque præviderit, & sub ipso gratia adiutorio, in quâ futurus esset voluntate, & actione præscierit ; & sic, ut fusè, & expressè Faustus Regienſis Semipelagianorum dux concludit, nisi præscientia exploraverit, prædestinatio nihil decernit (c).

XIII. Ut itaque hujusmodi errorem a Pelagianis, ac Semipelagianis infeliciter inventum, ac longè, latèque diffusum, ut in Historiâ Pelagianâ Norſius accuratissimè demonstravit, evelleret Augustinus, non modò constantissimè semper asseruit, quod prædestinatione suâ Deus ea præscivit, qua fuerat ipse factururus ; sicuti quando promissit Deus Abraham fidem gentium, non de nostra voluntatis potestate, sed de

(a) D. Aug. ep. 105. (b) Hilar. ep. ad Aug. (c) lib. II. de gr. & lib. arb. c. 3.

de sua praedestinatione promisit; promisit enim, quod ipse facturum erat, non quod homines (a); verum etiam gravissima Apostoli verba commemorans de Jacob, & Esau, qui cum nondum nati essent, nec aliquid boni, aut mali egissent, non ex operibus, sed ex vocante dictum est: Jacob dilexi, Esau autem odio habui, quia in re, inquit, si futura opera, vel bona hujus, vel mala illius, qua Deus utique praecebat, vellet intelligi, nequaquam diceret, non ex operibus, sed diceret ex futuris operibus, eoque modo istam solveret quaestionem, imò nullam, quam solvere opus esset, faceret quaestionem.

Mirum autem cum his coarctantur angustiis in quanta se abrupta precipitent metuentes retia veritatis. Ideo inquiunt nondum natorum alium oderat, alium diligebat, quia eorum futura opera praevidebat. Quis istum acutissimum sensum defuisse Apostolo non miretur? Hoc quippe ille non vidit quando sibi velut adversantis objectâ quaestione non id potius tam breve, tam apertum, tam, sicut isti putant, verum, absolutumque respondit. Cum enim rem stupendam proposuisset quomodo de nondum natis, nec aliquid agentibus boni, vel mali, rectè dici potuerit, quod unum Deus dilexerit, alium odio habuerit, ipse sibi objectâ quaestione motum exprimens auditoris, quid ergo dicemus, inquit, Nunquid iniquitas apud Deum? Absit. Hic ergo erat locus, ut diceret, quod isti sentiunt. Futura enim Deus opera praevidebat. Non autem hoc Apostolus dicit, sed potius ne quisquam de suorum operum audeat meritis gloriari, ad Dei gratiam, & gloriam commendandam voluit valere, quod dixit. Cum

Dd 2

enim

(a) De Praed. Sanct. c. 10. vid. Ench. c. 98.

enim dixisset, absit, ut sit iniquitas apud Deum tanquam ei diceremus, unde hoc ostendis, cum asseras non ex operibus, sed ex vocante dictum esse major serviet minori. Moyses enim dicit, Miserebor cui misertus ero, & misericordiam prastabo cui misericors fuero. Igitur non volentis, neque currentis, sed miserentis est Dei. Ubi nunc merita, ubi opera, vel praterita, vel futura tanquam liberi arbitrii viribus adimpleta, vel adimplenda? Nonne apertam protulit Apostolus de gratuita gratia, hoc est vera gratia commendatione sententiam? Quid autem agebatur, ut hoc Apostolus diceret, ut eorum geminorum commemoraret exemplum? Quid persuadere moliebatur, quid inculcare cupiebat? Nempe hoc, quod ipsorum oppugnat amentia, quod superbia non capiunt, quod sapere nolunt (a). Superbi enim sunt, nec noverunt Moysis sententiam, sed amant suam, non quia vera est, sed quia sua est. Ista temeritas non scientia, sed audacia est, nec visus, sed typhus eam peperit (b).

XIV. His ferè coloribus Pelagianorum, ac Semipelagianorum opinionem expressit Augustinus, atq; his etiam autoritatibus, & argumentis illam acriter quidem, & liberè, sed invictè quoque confutavit, opinionemque suam, quam a Moyse primùm, & ab Apostolo traditam esse uberrimè demonstravit, divino quo erat ingenii acumine, in libris de libero arbitrio, de gratiâ, & libero arbitrio, de correptione, & gratiâ, aliisque pluribus, luculentissimè confirmavit. Tanti verò semper hæc Augustini doctrina ab omnibus haberi consuevit, ut ille sapientia lumen præfulgidum, propugnaculum veri-

(a) *Epist. 105.* (b) *Id. lib. II, Conf. c. 25.*

ritatis omnes Doctores tum ingenio, tum scientiâ vicerit incomparabilis (a) ; illum Catholici conditorem antiqua fidei venerentur, atque suspiciant ; & quod majoris gloria est, omnes hæretici detestentur (b) ; illius assertiones ita probata sint, ut seipsum ore suo hæreticum detegat, qui Augustinum putaverit in aliquo reprehendendum eloquio (c) ; illum nunquam sinistra suspicionis saltè rumor asperserit, tantaque olim scientia ille fuerit, ut inter Magistros optimos a Romanis Pontificibus haberetur (d) ; illius doctrinam secundùm Romanorum Pontificum Statuta Romana sequatur, & servet Ecclesia (e), ita ut de libero arbitrio, & gratiâ Dei quid Romana, hoc est Catholica, sequatur, & asseveret Ecclesia in variis libris D. Augustini, & maxime ad Prosuperum, & Hilarium cognosci possit (f).

XV. Nec minoris certè ponderis, aut pretiî apud recentiores etiam Theologos D. Augustini auctoritas esse solet ; qui variis proinde illius testimoniis sententiam, opinionemq; suam defendere satagunt, seque illo duce Semipelagianorum hæresim infectari gloriantur, ut in eruditis illorum Operibus clarissimè demonstratur. Quamvis enim Molina dixerit, quod hæc ratio concilianda libertatis arbitrii cum divinâ prædestinatione a nemine, quem viderit, fuerit hucusque tradita ; &, si ab Augustino ea data, & explanata fuisset, Pelagiana hæresis nunquam fuisset exorta, neque ex Augustini opinione, concertationibusque ejus cum Pelagianis, tot fideles

D d 3

fuis-

(a) D. Possid. in Vita. (b) D. Hieron. ep. 80. ad Aug. (c) Serap. & Arnob. in Conf. (d) Cælest. P. in epist. ad Epif. Gal. (e) Joan. II. de duob. nat. (f) Hormisd. P. epist. 77.

fuissent turbati, nec ad Pelagianos defecissent (a); atque illi exciderit hac in re Augustinum *ca-*
cutiisse, accuratiores tamen, prudentioresque
Theologi, qui Molinæ doctrinam diligentius
defenderunt, illam *latuisse* quidem *Scholasticos*
ingenuè fatentur, e *tenebris* tamen, quibus
latebat, *erutam* *diligenti Patrum*, *assiduâque*
lectione [b] testantur, ut nullus proinde scien-
tiæ mediæ assertor videatur, qui plurima Au-
gustini loca non afferat, eisque veluti lydio la-
pide sententiæ veritatem distinguendam esse
non sentiat.

Perperam itaque, ac inutiliter gravissima
Augustini verba, quibus ille Semipelagianorum
hæresim vehementer adeo, & acerrimè inse-
quebatur, in scientiæ mediæ defensores con-
verti, vel intorqueri posse queruntur, cum
ipsi longè diversâ ratione, ac Semipelagiani,
de prævisis hominum operibus intelligi velint,
ac insigni discrimine opinionem suam ab illo-
rum hypothese distinguendam esse arbitrentur.
Massilienses enim, sive Semipelagiani, ut in-
quit Annatus (c) *pugnabant non pro quacumque*
libertate hominum, sed pro illâ, quæ sibi suffi-
ceret independenter a Dei auxilio ad dandam
causam divina constitutionis decernentis gra-
tiam, & gloriam post finalem exitum, nec non
gratiam predicationis Evangelii; neque præ-
scientiam futurorum a divino decreto indepen-
dentem pro futuris solùm conditionatis, aut
liberis, verùm etiam pro absolutis requirebant;
ideoque Augustinus contra illorum hypothe-
sim præscientiam illam de futuris *absolutis*
omni-

(a) In Concord. quest. 23. art. 4. 5. (b) *Herice I. par.*
disp. 7. c. 10. vid. Suarez. (c) *Disp. IV. num. 24.*

omnino rejicit, simulque errorem, aut divinæ præscientiæ abusum, quo Semipelagiani ab hominibus idoneam causam divinæ prædeterminationi exhiberi posse putabant; ideoq; scientiam mediam non quoad essentiam, sive substantiam confutavit, sed solum quoad characteres, & proprietates illas, quæ ipsi temere a Semipelagianis affingebantur, quorum utrumque recentiores ipsi Theologi Augustino duce præstare solent.

XVI. Cæterum an Semipelagianorum opinio a Molinistarum sententiâ satis hoc discrimine distinguatur, an Augustinus præscientiam illam a divino decreto independentem non pro *absolutis* solum, sed potius pro *conditionatis* etiam rejecerit; an Semipelagiani eam solum admitterent *libertatem*, quæ sibi *sufficeret independentem a divino auxilio ad dandam causam divinæ electioni*, an verò potius assererent, quod *Deus finem uniuscujusque præviderit, & sub ipso gratia adjutorio in quâ futurus esset voluntate, & actione præscierit*, viderint alii, quibus cordi est celeberrimam hanc controversiam dirimere. Nos enim ex superioribus Prosperi, Hilarii, & Augustini verbis, id nitidè, clarissimèque intelligi posse arbitramur, aut certè ex eruditis Operibus, quibus hanc uberrimam, præcipuamque Theologiæ partem sapientissimi viri illustrarunt; cùmque nullo partium studio nos abripiamur, sed ingenuo solum, & honesto, quo decet, inquirendæ veritatis amore incendamur, hæc illis differenda relinquimus, hoc uno contenti, quod ipsa creaturarum, & humanæ voluntatis conditio, suprema, ac invariabilis Dei cognitio, ipsa denique Augustini auctoritas manifestè nobis ostendit, nihil indepen-

denter a divino decreto verè futurum esse, aut ab ipso Deo veluti futurum cognosci posse, ideoque certam, ac invariabilem futurorum omnium cognitionem, quam in Deo admittendam esse defendimus, ita a divinæ voluntatis decreto pendere, ut in ipso solùm omnia futura scientiâ visionis clarissimè contempletur.

XVII. Quæ verò non a Pelagianis dixerim, id enim Thomistæ viderint, sed a Recentioribus opponi solent, etsi plurima sint, eò tamen omnia spectant, atque hoc duplici veluti capite continentur, quod hac præscientiâ, quæ in invariabili, ac prævio divinæ voluntatis decreto fundetur, sive hoc decreto, quod liberas, ac indifferentes hominum voluntates determinet ad operandum, earumque operationes futuras efficiat, ac veluti futuras divinæ scientiæ exhibeat, Deum operationum omnium, ideoque etiam peccati causam, & auctorem efficiat, ipsam deinde rerum contingentiam, atque humanæ libertatis arbitrium lædere videatur, cùm aliter illæ fieri, vel evenire non possint, quàm sicuti ab immutabili decreto constitutæ, atque in ipso decreto immutabili scientiâ, vel cognitione prævisæ fuerint. Hinc certè Cicero, cùm infallibilem Dei præsensio- nem unà cum fortuito rerum eventu componi non posse intelligeret, præsensio- nem illam Deo negavit; *Ne in Deum quidem, inquit, cadere videtur, ut sciat quid casu, & fortuito futurum sit. Si enim scit, certè illud eveniet, sin certè eveniet, nulla fortuna est; est autem fortuna, rerum igitur fortuitarum nulla præ- sensio est* [a].


Cùm

[a] De Divinat. I.

Cùm itaque necessitas illa, quæ a divinâ præscientiâ rebus futuris imponi concipitur, a divino decreto pendeat, quo res futuræ determinantur, sive ut futuræ cognoscuntur, gravissima hæc quæstio, sive nodus, aut ratio, quâ rerum contingentia & humana libertas cum divinâ præscientiâ, & sanctitate conjungatur, dirimenda, vel explicanda erit in sequenti Capite, ubi de divinâ voluntate, ejusque decretis differemus, ostendemusque futurorum contingentiam, ac humanæ voluntatis libertatem, cum divino decreto conjungi, sive componi posse.

C A P. IV.

De Dei voluntate, sive decretis.

- I.  Eleberrimam hanc, omniumque, facile difficillimam quæstionem, quam supremo tandem loco explicandam, vel dirimendam suscipimus, omnium gravissimam esse, is planè intelliget, qui ex illâ superioris, & arcanæ quæstionis vim pendere jam viderit. Admirabilis itaque, inscrutabilis, & occultissimus divinæ voluntatis ordo, consilia, vis, ac potestas est exponenda, quodque omnes ingenii, mentisque humanæ vires excedit, invariabilis, efficacissima; prævia decretorum. Dei dispositio cum liberâ, & contingentî rerum futuritione, præsertim verò cum humanæ libertatis arbitrio componi, sive

sive conjungi debet. Hinc iterum fortasse videretur ingenuè cum Apostolo exclamandum. *O altitudo sapientia, & scientiæ Dei, quàm incomprehensibilia sunt judicia ejus, & investigabiles viæ ejus (a)!* neque liberiùs adhuc inquirendum quâ ratione, quâ viâ divinæ voluntatis consilia, sive decreta formentur.

II. Ut admirabilis tamen, ac infinita divinæ causæ vis, & potestas illustriùs effulgeat, atque ut errores plurimi, qui mentes hominum in præceps abripere plerumque solent, nitidiùs detegantur; ut amplissima denique, ac tutissima via humanis moribus dirigendis aperiat, gravissimam hanc quæstionem, incredibili, ac divino ferè ingeniorum acumine, toties agitatam exponere, ac dirimere juverit. Quod, ut clariùs fieri possit, omnem primùm controversiæ statum oculis subjiciemus, tum varias opiniones, quæ illi dirimendæ sunt a Scriptoribus inventæ, exponemus; tum eam, quæ certa, ac vera fuerit, ostendemus, argumenta demum, atque difficultates, quibus premi, vel urgeri illa solet, diluemus.

III. Ac primò tria motionis genera satis accommodè distingui solent, quibus aliqua causa causam aliam moveat ad operandum, triplex nimirum modus, quo duæ causæ concurrere, sive conjungi possunt ad opus, vel effectum aliquem producendum; motio nempe *moralis, simultanea, & praviæ*.

1. Motio moralis est illa, quæ extrinsecè solum excitat, allicit, invitat ad operandum, ut proinde causa *moraliter* excitata, indifferens adhuc sit ad operandum, sive non operandum; ut

(a) *Ad Rom. c. 11. v. 33.*

ut ex. gr. *piorum exempla, consilia*, nos excitant, sed indifferens adeo voluntas ipsa sic excitata relinquitur, ut liberrimè dissentiri possit, nullusque effectus vi talis motionis in homine producat.

2. Motio concomitans, sive concursus simultaneous est illa motio, quâ causâ movens cum viderit causâ aliam determinatam ad operandum, ita cum illâ conjungitur, sive concurrat ad operandum, ut operatio, vel effectus ab utrâque simul causâ producat, ut ex. gr. cum duo equi eundem currum trahunt, duo homines idem pondus sustinent, &c.

3. Motio denique physica, & prævia, sive *præmotio physica* dicitur illa, quæ omnem motionem aliam prævenit, atque præcedit, quâ nimirum causâ movens causâ aliam prorsus indifferentem, ac indeterminatam applicat, determinat ad operandum; ut cum præceptor discipuli manum arripiens ita illam dirigit, ac impellit, ut ab illâ characteres formentur.

IV. Plurima harum motionum discrimina, etsi manifestissima sint, accuratissimè tamen sunt observanda, ut illarum vis, ac necessitas intelligatur. Moralis itaque motio, quemadmodum etiam physica, & prævia, causâ omnino indifferentem inveniunt, sive quemcumque motum, aut determinationem præcedunt; hoc tamen discrimine, quod moralis extrinsecè solum, & ineffaciter operatur, ideoque causâ adhuc indifferentem relinquit, physica verò infallibiliter, & efficaciter illam determinat ad operandum. Simultanea verò, sive concomitans, quemadmodum etiam physica, & prævia, physicè, & realiter aliquid operantur; hoc tamen discrimine, quod simultanea causâ reperit

de-

determinatam ad operandum, illamque adjuvat, a præviâ verò motione causa prorsus indifferens determinatur, & applicatur ad operandum. Moralis nihil in causâ motâ physicè, ac verè producit, sed solum sui cognitionem, & amorem excitat; simultanea verò nihil quidem in alterâ causâ, cui conjungitur, ponit, aut in ipsam influit, sed solum in effectu, cujus veluti partem virtuti, quam exerit, æqualem producit; physica denique, & prævia non modò in causâ motâ determinationem producit, illius vim antea indifferentem determinat, perficit, verùm etiam totum effectum, qui a causâ motâ, vel applicatâ producitur, ipsa quoque producit.

Cum itaque humanas voluntates, & creaturas omnes a Deo moveri ex innumeris Scripturæ locis, & argumentis etiam manifestissimè demonstretur, ut in *Physicâ Gener. Tractat. II. c. 4.* jam diximus, illud unum inquiritur, quo motionis genere Deus utatur, sive nimirum morali, sive simultaneâ, sive denique præviâ motione cum creaturis liberis, & humanâ voluntate concurrat ad operandum.

V. Pelagius, cum originale peccatum in Adæ posteroderivatum esse negaret, liberam adeo, sive perfectam arbitrii potestatem agnovit in voluntate, ut sine ullâ divinâ motione, auxilio, vel gratiâ voluntas hominis in utramque partem facillimè inflecti posset, sive quidquid libuerit velle, efficere, & amare posset. Cùmque gravissimis Scripturæ auctoritatibus urgeretur, quibus gratiæ, sive divinæ motionis, & auxiliî necessitas clarissimè ostenditur, primò quidem arbitrium ipsum, ac voluntatem bonam, Dei munus, & gratiam esse dixit; deinde verò va-

riis

riis in locis etsi non semper, neq; constanter *
 morales solum extrinsecas, ac inefficaces gra-
 tias, sive motiones admisit, legem nimirum,
 exempla, consilia, quibus omnibus excitare-
 mur, moveremur, ac impelleremur ad bonum.

Durandus verò, aliiq; nonnulli, etsi ori-
 ginale primi parentis peccatum in posteros o-
 mnes diffusum fateantur, neque solas arbitrii
 vires ad supernaturales actus sufficere cum Pe-
 lagio arbitrentur, naturales tamen actus, qui
 nimirum naturæ vires non superant, solis arbi-
 trii viribus, & morali motione, quâ ab exter-
 nis objectis, rerumque amore allicimur, fie-
 ri, & explicari posse putarunt.

VI. Cùm verò Pelagianorum hæresim ita Au-
 gustinus premeret, ut non modò moralis quæ-
 dam, indifferens, ac externa motio sufficere,
 sed interna quoque, physica motio, & auxilium
 ita requiri videretur, *sine qua nihil fieri pos-*
set [a], & sufficientia nostra ex Deo esset [b]
gratiam adjutorii, vel auxilium insuper admi-
 serunt, quo voluntas ipsa propriis solum ar-
 bitrii, ac naturæ viribus in bonum inclinata,
 sive determinata, illud perficere, sive comple-
 re posset. Cùmque auxilium illud, sive adju-
 torii gratiam homini volenti semper adesse,
 putarent, a libero voluntatis arbitrio, consen-
 su, acceptione illius usum, atquæ vim om-
 nem oriri dicebant; ut si proinde cum tali
 adjutorio, vel gratiâ effectus aliquis sequeretur,

* An *Pelagius* credat aliquod adjutorium bene agen-
 di adjunctum naturæ, atque doctrinæ per inspi-
 rationem flagrantissimæ, & luminosissimæ charita-
 tis non omnino apparet. *Aug. lib. de gr. Chr. c. 7.*
 & 10.

(a) *Joan. c. 15.* (b) *II. Corinth. c. 3.*

tur, ideoque auxilium ipsum *efficax* diceretur, hæc efficacia gratiæ non *ab intrinseco*, vel ab ipsius gratiæ naturâ, vel conditione penderet, sed *ab extrinseco* solùm, id est ab hominis electione, acceptatione, voluntate, determinatione oriretur.

VII. Quod verò in naturalibus, ac supernaturalibus etiam actibus Semipelagiani concesserant, in naturalibus certè Molina, & qui Molinæ nomen dedere, auxilii, motionis, vel gratiæ genus admittunt, ut ipsa nimirum voluntas solis arbitrii viribus determinari, vel applicari possit ad operandum; cum tamen ipsa per se nihil efficere possit nisi adjuvetur a Deo, fieri existimant, ut cùm Deus voluntatem viderit determinatam ad operandum, ipsam adjuvet, sive cum ipsâ concuſtrat, aut jungatur ad operandum, ut effectus ipse, partim a creaturâ determinante seipsam, & operante, partim a Deo non determinante quidem, sed cooperante, vel adjuvante producat.

VIII. Augustinus denique, Thomistæ, Lutherus, Calvinus, atque Iansenius non modò moraliter, ac simultaneè, sed physicè quoque, ac præviè creaturas omnes, atque ipsas hominum voluntates a Deo moveri existimant, ut cum antea ex naturâ propriâ indifferentes fuerint, ab insuperabili, victrici, efficacissimâ Dei motione, vel gratiâ applicentur, sive determinantur ad operandum, ex unâ voluntate, determinatione, vel affectu repente transferantur in alium; ut omnis proinde motionis, aut gratiæ vis, & efficacia, non a voluntatis electione, sive consensu dependeat, sed ab intrinsicâ solùm divinæ motionis indole, quæ consensum

sum omnem, sive voluntatis humanæ motum præcedit. Hoc insigne tamen discrimen inter Augustini, & Thomistarum, aliorumque hypotheseim reperitur, ut inferiùs ostendetur, quod hac insuperabili, præviâ, & efficacissimâ divinæ voluntatis motione, humanæ libertatis arbitrium minui, sive deleri Jansenius, Lutherus, atque Calvinus existimant, quod tamen incolume prorsus salvari, vel etiam perfici Augustino duce Thomistæ arbitrantur. Sed hæc uberiùs, & accuratiùs in posteriori loco ostendemus.

IX. Illud interim observasse juverit, quod variæ, ac dissidentes adeo Philosophorum, vel Theologorum sententiæ, quas hætenus enumeravimus, ad unum veluti caput, quod est totius ferè controversiæ summa, atque Philosophos magis decere videtur, satis accommodè revocari potest, utrum nempe voluntas hominis naturales actus, qui nimirum naturæ vires non superant, solo simultaneo concursu efficere possit, an verò physica quoque, vel prævia motio, sive præmotio physica requiratur, ut nulla prorsus actio, sive determinatio haberi possit in voluntate, nisi illa priùs a Deo physicè determinata, vel applicata fuerit ad operandum. Si etenim simultaneum concursum humanis actibus exerendis imparem esse ostendemus, exinde faciliè inferri poterit, quod multò minùs sola moralis, & extrinseca motio sufficiet; quemadmodum alterâ ex parte, si ad naturales etiam actus præviâ motionem requiri oportere demonstrabimus, manifestissimè quoque ostendetur multò magis illam ad supernaturales actus requiri, qui, cùm puriores, nobiliorefq; sint, omnes etiam naturæ, vel arbitrii vires excedunt.

His

His itaque meliori certè, clariorique, quo poterat ordine constitutis illud veluti certum, evidens nitidè, constantissimèque defendimus ad singulos humanos actus præviā simul, ac physicā Dei motionem requiri, ita ut nihil humana voluntas eligere, cognoscere, velle, operari unquam possit, nisi priùs a Deo physicè, ac efficacissimè applicata, sive determinata fuerit ad operandum.

X. Id pluribus, variisque rationibus ostendi, autoritatibus confirmari, exemplis, & si quæ sint alia argumentorum genera, illustrari, & explicari uberrimè solet; nos pauca quidem, sed quæ clariora fortasse, & efficaciora videntur, brevissimè complectemur.

1. Illud itaque certum, atque exploratum esse supponimus, quod, licèt hominis voluntas operandi vim a Deo receperit, non semper tamen operatur, ejusdemque potentiæ vires exerit; sed ex naturā propriā indifferens est ad operandum, sive non operandum. Id experiri certè solemus, dum varias a nobis operationes subinde fieri conspiciamus, quibus peragendis potentia quædam indifferens in nobis erat; & quamvis etiam Cartesio concedatur mentem perenni veluti motu, & agitatione aliquid semper operari, cogitare, seu velle, indifferens tamen est illa ad hoc potiùs, quàm objectum aliud cognoscendum, & amandum; ac liberè ex aliquā cognitione, & amore repente transfertur in aliam. Cujus quidem ratio, ac veluti fundamentum est, quod, cùm voluntas ipsa, quæ una, ac invariabilis est, a propriis operationibus, quæ plurimæ, contingentes, atque variabiles sunt, distinguatur, concipi debet, ut illis liberè peragendis indifferens, ut uni proinde

inde potiùs, quàm alteri se applicare, sive determinare possit, ut a Philosophis omnibus hac in parte mirificè conspirantibus conceditur.

Ut verò voluntas ejusmodi indifferens actualiter operetur priùs transferri debet ex potentiâ in actum, ex indifferentiâ ad determinationem, sive determinari debet, & applicari ad hoc potiùs, aut objectum illud amplectendum; quandiu enim otiosa, vel indifferens perseveret, nihil efficere, nihilque actualiter operari poterit. A quo verò indifferens illa voluntatis vis applicari, sive determinari poterit? Non ab objecto cognito, quod prorsus extrinsecum, ac indifferens est, neque etiam cognosci poterit, nisi priùs indifferens intelligendi vis ad illud cognoscendum applicata jam fuerit; non a simultaneo Dei concursu, quod voluntatem supponit applicatam, sive determinatam ad operandum; non a seipsâ, vel ab actione propriâ, cum ex seipsâ indifferens sit, nihilque agere, sive seipsam determinare possit, nisi priùs ab indifferentiâ transferatur: id unum itaque superest ut a causâ primâ, vel a Deo determinari possit voluntas, sive præviâ quadam Dei motione, & impulsu applicari possit ad operandum.

Reponere quidem solent Adversarii voluntatem applicari, sive determinari ab illâ vi, seu libertatis arbitrio, quod in liberis hominum voluntatibus reperitur; sed eadem prorsus ratio, vel difficultas iterum redit. Ipsa nimirum libertas, arbitrii vis, ac determinandi potentia indifferens est, ut voluntatem applicet, sive non applicet ad operandum, ideoque libertas, & arbitrii vis voluntatem actualiter

applicare, siue determinare non poterit, nisi prius libertas ipsa, vel arbitrium determinetur; cumque non a seipso, non ab objecto, non a simultaneo concursu determinari possit, ut antea dicebamus, a solo Deo libertas, arbitrii vis, ac voluntas ipsa determinabitur, ideoque ab ipso physicè, & præviè voluntas hominum applicabitur ad operandum.

2. Huic affine est argumentum aliud, quod etiam in Physicâ Gener. Tract. II. c. 6. fusiùs expositum est. Voluntas itaque applicata, siue determinata ad operandum nobilior, & perfectior est illâ quæ nondum applicata, siue determinata fuerit, hoc est illâ, quæ adhuc indifferens est ad operandum; ipsa nimirum actualis operatio, applicatio, siue determinatio ad operandum est entitas aliqua, modus, atque perfectio, quæ voluntati superadditur, ergo si voluntas indifferens seipsam applicare, siue determinare posset, sibi tribueret aliquod esse, quod antea non habebat, seque nobiliorem, perfectioremque redderet, quàm creata fuerit ab ipso Deo, quod absurdum planè, falsumque est.

Hoc ipsum argumenti genus adhibuit D. Augustinus, ut ostenderet Angelos creatos esse cum bonâ voluntate, siue bonam Angelorum voluntatem ab ipso Deo creatam esse; *si enim (a), inquit, boni Angeli fuerunt prius sine bonâ voluntate, eamque in seipsis, Deo non operante, fecerunt, ergo meliores a seipsis, quàm ab illo facti sunt? Absit . . . si itaque non potuerunt seipsos facere meliores, quàm eos ille fecerat, quo nemo meliùs quicquam facit, profectò, &*
bonam

bonam voluntatem, quàm meliores essent, nisi operante adjutorio Creatoris habere non possent.

Quod si fortasse ab Adversariis asseratur, quod voluntas nobiliorem se, perfectioremque redderet, quàm creata fuerit ab ipso Deo, sed dependenter tamen ab illo, ope nimirum illius virtutis, atque potentiae, seu libertatis, quam ab ipso Deo receperat, eadem tamen vis, idemque argumentum redire potest; ipsa nimirum arbitrii vis, ac libertas, seseque determinandi vis, ac potestas nobilior, atque perfectior est, dum actualiter exercetur, quàm ubi solum indifferens erat, vel exerceri poterat, ideoque potentia, vis, arbitrium, libertas ipsa, aut seipsam nobiliorem, perfectioremque redderet, aut certè ab alio nobilior fieri, determinari, vel applicari debet; unde quòcumq; se vertant Adversarii, aut asserere debent, aliquid in homine reperiri, quod nunquam indifferens, sed perenniter applicatum, determinatumque fuerit; aut libertatis exercitium, determinationem, operationemque neque ens, neque modum, neque perfectionem esse, aut denique voluntatem seipsam, viresque proprias nobiliores efficere posse, quàm a Deo creatæ fuerint, sibi que tribuere aliquid esse, quod ab illo non receperit; aut, si hæc omnia velut absurda manifestissimè deprehendantur, voluntatem, libertatem, agendi vim, determinationem omnem in hominibus a solo Deo produci posse, ideoque voluntates hominum, ab ipso Deo physicè, & præviè determinari ad operandum.

3. Accertè, nisi ipsa quoque determinatio libera voluntatis ab ipso Deo produceretur, daretur aliquid ens, aliqua creatura, quæ non.

E c 2

a Deo

a Deo, sed ab homine solo produceretur, quod fingi, vel affirmari certè non poterit, nisi clarissima Scripturæ authoritas eludatur, quæ constanter asserit, quod *omnia per ipsum facta sunt; sine ipso factum est nihil* (a), quod *omnia opera nostra operatus est nobis Dominus* [b]; quemadmodum Apostolus interrogat, *quis te discernit, quid habes, quod non accepisti, si autem accepisti quid gloriaris quasi non acceperis* (c)? & expressius adhuc asserit alibi, quod *Deus operatur in nobis velle, & perficere* (d)? reponere siquidem, gloriari, vel respondere quis posset, determinationum suæ voluntatis non a Deo, sed a seipso factam esse; hanc non Deum, sed arbitrii vim operari; hac ipsâ determinatione, quam non a Deo receperit, discerni, & gloriari posse. His itaque, & talibus testimoniis divinorum eloquiorum, qua omnia commemorare nimis longum est, satis, quantum existimo, manifestatur operari Deum in cordibus hominum ad inclinandas eorum voluntates quæcumque voluerit, sive ad bona pro suâ misericordiâ, sive ad mala pro meritis eorum (e).

Hæc verò fieri, vel explicari certè non poterunt, sive per motionem moralem, quæ indifferens, & inefficax est, sive per motionem simultaneam, quæ causam secundam determinatam supponit ad operandum. Et certè Pelagius ipse dicebat, quod *Deus operatur in nobis velle, quod bonum, & sanctum est, quatenus nos multiformi, & ineffabili dono gratiæ celestis illuminat, quatenus stupentem suscitât voluntatem, & suadet omne, quod bonum est* [f],
ideo-

(a) Joann. c. 1. (b) Isai. c. 26. (c) I. Corinth. c. 4.
(d) Philip. c. 2. (e) Aug. de gr. & lib. arb. l. 21.
(f) Aug. de gr. Chris. c. 7. 10.

ideoque moralem Dei motionem admisit, neque tamen Augustinus hac solâ motione, aut supremum Dei dominium salvari, aut miseræ voluntatis humanæ conditioni consuli existimavit, nisi prævia quoque, physica, & efficacissima motio poneretur, quâ faceret, ut faciamus *præbendo vires efficacissimas voluntati* (a); quâ bonam voluntatem cujusque non invenit, sed facit; quâ ex nolentibus volentes, ex repugnantibus consentientes fiant (b); quâ denique subventum est infirmitati voluntatis humana, ut indeclinabiliter, & insuperabiliter ageretur (c).

XI. Sed ex autoritatibus, quas Thomistæ innumeras, atque clarissimas afferre solent, nulla aut clarior illâ, aut uberior afferri poterit, quæ ex celeberrimo Tridentini Concilii Decreto desumitur.

Animadverterant itaque sapientissimi Concilii Patres, quod inter varios, gravissimosque Calvini, ac Lutheri errores, quibus præsertim damnandis Tridentina Synodus convocata fuerat, illud etiam asserebatur, quod Deus ita præviâ, physicâ, insuperabili, efficacissimâ, ac ineluctabili motione voluntatem hominis determinaret, & applicaret ad operandum, ut hac præviâ, & insuperabili motione omne voluntatis arbitrium, cooperandi vim, ac resistendi potentiam, omnem deniq; libertatem extingueret. Atque hanc quidem fuisse Lutheri, & Calvinî mentem, sive illud physicæ motionis genus ab ipsis admitti, clarissimis illorum verbis ostendi posset, nisi id ingenuè ab Adversariis agnosceretur, ubi Thomistas a Calvino *nisi verbo*

E c 3

te.

(a) *De grat. & lib. arb. c. 16.* (b) *ep. 107.* (c) *de corr. & gr. c. 12.*

tenus, & usu vocum differre eâdem amborum, existente sententiâ [a], liberiùs fortasse, quàm Catholicos deceat, asserere consueverunt. Tres itaque partes in Calvinî sententiâ distingui poterunt, dari nimirum physicam, ac præviâ motionem, quâ Deus voluntates hominum excitet, & applicet ad operandum; hanc motionem efficacem adeo, activam, & victricem esse, ut ab illâ tota operatio producat, nihilque ab humanâ voluntate, quæ proinde passivè solum impelli, nihilq; cooperari debeat; ab illâ denique omnem resistendi potentiam, vel libertatem auferri. Ut Calvinî erroribus catholicum Fidei Dogma opponerent Patres, Sess. VI. Canone 4. decreverunt, ut Si quis dixerit liberum hominis arbitrium motum, & excitatum a Deo nihil cooperari assentiendo Deo excitanti, & vocanti, quo ad obtinendam justificationis gratiam se disponat, & præparet, neque posse dissentire, si velit, sed veluti inanime quoddam nihil omnino agere, merèque passivè se habere, anathema sit.

Constans itaque Concilii sententia fuit, quod illa motio, quam Calvinus, atque Lutherus admittebant, ejusmodi foret, cui voluntas humana cooperari, ac dissentiri posset, ipsam nimirum physicam, ac præviâ motionem admittere oportere, sed characteres illos, qui temere, & impudenter ipsi ab hæreticis affigebantur, quod nempe cooperandi, dissentiendique vim tolleretur, rejiciendos esse; alioquin certè, nisi Concilii Patres motionem illam, quæ ab hæreticis ponebatur, admittere posset putassent, aut nisi Patres ipsi de physicâ, ac præviâ motionem,

(a) *Annat. defens. scient. med. disp. 4.*

ne, sed de morali solùm, ac simultaneâ loquerentur, non directè contra Calvinì sententiã, quæ proposita, ac dirimenda fuerat, definirent, sed inutile prorsus decretum ederent de morali, vel simultaneâ motionis viribus, de quibus hæretici minimè loquebantur, sive de quibus nullus unquam existimavit, vel suspicari unquam poterat humani arbitrii libertatem, cooperationem, ac resistendi potentiam auferri; ineptissimè demum secundarios solùm Calvinì errores, non verò infectam eorum radicem, præviæ nimirum motionis effectus, aut characteres, non verò motionem ipsam negassent.

Hæc sanè, si quis ingenuè, ac seposito partium studio perpenderit, nullus dubito quin ille Concilii mentem, adeoque Fidei Dogma hæreticæ doctrinæ contrarium nitidissimè intelligat. Quid verò, si plurimos, sapientissimosq; Patres afferremus, qui Tridentinæ Synodo interfuerunt, qui suffragio decretum confirmarunt, qui denique decretum ipsum exararunt, & physicam certè, ac præviã motionem juxta Thomistarum hypothesim tunc admiserunt, ac deinde scriptis editis illustrarunt, superiorique decreto confirmarunt? quid si in Tridentinâ Synodo, quemadmodum in Conciliis omnibus, ubi de gratiæ, vel arbitrii viribus disputari contigerit, Augustinum unicum ferè hac in hac parte, gravissimum veluti ducem, habitum asseramus, eandemque prorsus motionem Tridentinâ Synodo propugnatam esse, quam Augustinus admiserat? quid deniq; si non modò a Cathéchismo Romano, qui veluti clarior doctrinæ traditæ explicatio Synodi jussu ab iisdem Patribus, qui Synodo interfuerunt, edi-

tus est, sed a plurimis quoque Conciliis, quæ deinde Tridentini verbis explicandis habitæ sunt, præviam, ac physicam motionem clariùs, & expressiùs traditam, atque explicatam esse dicamus? Sed hæc, aliaque id genus plurima apud Theologos haberi poterunt, qui longâ de his oratione differunt; nobis hæc delibasse sufficiat, ut non modò rationibus, sed autoritate quoque doctrinam ejusmodi defenderemus.

XII. Id unum fortasse clarissimis ejusmodi, & invictissimis Scripturæ, Concilii, & Augustini auctoritatibus opponi potest, quod illæ non de motione physicâ, & præviâ, sed de præveniente gratiâ loquantur, sive ad actus solùm supernaturales, qui omnes prorsus naturæ, & arbitrii vires excedunt, non verò ad naturales etiam, qui solis naturæ viribus peraguntur, præviam hanc, insuperabilem, efficacissimamque motionem requirant.

Quamvis tamen ingenuè concedatur plurima Scripturæ loca de solis supernaturalibus actibus, sive de præveniente divinâ gratiâ intelligi posse, superior tamen difficultas faciliè dissolvi poterit. Si etenim aut argumenta superiùs exposita, aut ipsa Scripturarum testimonia accuratè observentur, de omnibus humanæ voluntatis actibus ita differunt, ut nullus sine Deo præmovere fieri possit. Id optimè viderat Augustinus(a), qui constanter asserit, quod *Scriptura divina, si diligenter inspiciatur, ostendit non solùm bonas hominum voluntates, quas ipse facit ex malis, & a se factas bonas in actus bonos, & in æternam dirigit vitam; verùm etiam illas, quæ conservant sæculi creaturam, ita*
esse

a) De gr. & lib. arb. c. 20.

esse in Dei potestate, ut eas quod voluerit, quando voluerit, faciat inclinare; quod alibi quoque repetit, & illorum exemplo demonstrat, quorum corda, seu voluntates Deus præviè, ac insuperabiliter inclinavit, ut Saul, & David in Regem eligerent, suâ, inquit, voluntate utique isti constituerunt Regem David, quis non videat, quis hoc neget? & tamen hoc in eis egit, qui in cordibus hominum, quod voluerit operatur.... adduxit istos, ut Regem constituerent.... intus egit, corda tenuit, corda movit, eosque voluntatibus eorum, quas ipse in illis operatus est, traxit (a); quemadmodum, de variis Assueri affectibus, qui naturales certè fuerant, loquens, Deus, inquit, occultissimâ, & efficacissimâ potestate cor Regis convertit, & transulit ab indignatione ad lenitatem, hoc est a voluntate ladendi ad voluntatem favendi juxta illud Apostoli Deus est enim, qui operatur in nobis & velle (b), clarissimè ostendens Augustinus, quod hæc Apostoli verba, ideoq; etiam plurima alia Scripturæ loca de naturalibus quoque actibus intelligi debent.

Et certè in illo sensu, sive de illis actibus Concilii, vel Augustini verba intelligi debent, in quibus Calvinus, atque Lutherus arbitrii libertatem ab invictissimâ, & insuperabili divinâ motione lædi putabant; cùm itaque Calvinus ad naturales etiam actus physicam, & præviam motionem admitteret, eâque liberum arbitrium prorsus extinguere sentiret, manifestissimè infertur, quod hæc ipsa divina motio ad naturales etiam actus admitti debeat, neque

(a) *De corrept. & gr. c. 14.* (b) *lib. I. contr. 2. epist. Pelag. c. 20.*

que tamen ab ipsâ cooperandi, vel dissentiendi vis auferatur, ut a Concilio definitur.

Sed quamvis etiam liberè concedatur superiora Scripturæ, Concilii, vel Augustini verba de solis supernaturalibus actibus intelligi oportere, adhuc tamen ex illis inferri poterit præviam hanc motionem in naturalibus etiam actibus admitti posse. Eâ nimirum de causâ ad naturales actus hæc physica divina motio rejicitur, quòd arbitrii libertatem lædere, fatalem quandam necessitatem inducere, omnem denique operandi, ac dissentiendi vim auferre videatur. Si itaque in supernaturalibus actibus hæc ipsa divina motio arbitrii libertatem non destruit, fatalem necessitatem non inducit, omnem denique cooperandi, dissentiendique vim incolumem prorsus relinquit, ut ille nimirum, qui credit, liberè credat; qui volens ex nolente fit, liberè velit; qui insuperabiliter, ac indeclinabiliter trahitur, liberè trahatur, quis apertè non videat in naturalibus etiam actibus id fieri posse, ut efficacissimè quidem, & præviè voluntas, sed liberè moveatur, ideoque hæc insuperabilis divina præmotio in omnibus voluntatis actibus admittatur; hoc uno discrimine, ut in supernaturalibus actibus *gratia*, in naturalibus verò *præmotio physica* nominetur?

XIII. Reliquum est, ut argumenta, quæ ab Adversariis afferri solent, diluamus. Ea verò ex variis plerumque capitibus deduci solent, quod ipsa nimirum præmotio inutilis sit; quod Deum auctorem efficiat peccati, quod arcana, & inexplicabilis sit, quod arbitrii libertatem minuat, vel prorsus etiam extinguat.

Ac primò, quod præmotio physica non inutilis,

tilis, sed necessaria maximè sit, sive Deum, sive voluntatem ipsam consideres superioribus rationibus manifestissimè demonstratur.

Si creaturam quidem consideres, quia, cum indifferens ipsa sit, debet ab alio determinari, neque seipsam nobiliorem, perfectioremque reddere potest, quàm creata fuerit ab ipso Deo; Deum verò, quia, cum caussa prima ille sit, nihil in voluntate concipi, vel reperiri potest, quod non producat a Deo; cumque supremum rerum omnium dominium habere ille debeat, & *magis habeat in potestate voluntates hominum, quàm ipsi suas (a), habet sinè dubio humanorum cordium, quòcumque voluerit, inclinandorum omni potentissimam potestatem (b)*, unde nihil ulterius asferri debet, quo primum argumenti genus uberiùs diluatur.

XIV. Quòd verò in Thomistarum hypothesi Deus auctor peccati fieri videatur facilè Adversarii ostendi posse arbitrantur.

Si etenim voluntas hominis prævio, & physico impulsu applicatur ad operandum, ut Deus illorum omnium caussa censerì debeat, ad eos quoque applicari debet voluntas, ideoque Deus illorum quoque caussa censerì poterit; qui mali sunt, sive malitiam intrinsecè adeo, arctissimèque conjunctam habent, ut ab illà separari non possint. Et certè Calvinus, quì præviam hanc, & physicam motionem Deo concedit, Deum ipsum auctorem peccati pluribus in locis evidenter asserit, etsi labem hanc ab illo avertere studeant Calvinistæ.

XV. Sed hoc argumentum ex divinà sanctitate, vel perfectione desumptum, quod certè
gra-

(a) *Ang. de corr. & gr. c. 14.* (b) *Ibi c. 16.*

gravissimum foret, si quid ostenderet, ostenderet etiam nullam motionem in Deo admitti posse, sive Deum nullo modo ad singulos voluntatis actus concurrere; ideoque argumentum illud in Adversarios ipsos retorqueri merito potest. Æqualiter itaque divinæ sanctitatis, vel perfectioni repugnat, quod Deus, aut physicè, & præviè voluntatem applicet, sive determinet ad peccatum, aut moraliter solum illam invitet, alliciat ad peccandum, aut, cum viderit sponte applicatam ad peccandum, illam adjuvet, simulque cum ipsâ peccatum producat; semper enim Deus concurreret ad peccatum, & illius causa dici, vel haberi merito posset; sicuti certè peccati causa diceretur homo, qui sive moraliter, sive simultaneè, sive denique physicè, & præviè hominem alium induceret, adjuvaret, impelleret ad peccatum. Aut nullum itaque divinæ motionis genus in malis operibus admitti deberet, aut, si moralis, & simultanea divina motio admitti potest, etsi divina sanctitas ab ipsâ lædi non debeat, physica quoque, & prævia motio sine ullo divinæ sanctitatis discrimine admitti poterit.

Sed, ut non physicæ modò, sed simultaneæ quoque motionis divinæ sanctitas ostendatur, observari debet in peccato distingui oportere operationem ipsam, vel actum, qui *materia*, vel *materiale* peccati vocari solet, atque malitiam, sive pravitatem, quæ cum tali actu conjungitur, ipsumque malum, sive peccatum constituit, quæque proinde *forma*, sive *formale* peccati appellatur. Quod hæc verò distincta, sive diversa sint clarissimè demonstratur, non modò, quòd aliquando sejuncta, ac separata sunt,

sint, idest actus ipse, vel operatio sine ullâ malitiâ reperiatur; verum etiam, quod operatio, vel actus a vitali vi, siue potentiâ producatur, malitia verò, seu pravitas oriatur ex objecto, ad quod actus ille dirigitur, ex lege, quâ prohibetur, ex intentione, quâ fiat. Actus itaque, vel operatio, si consideretur in genere physico, ut actus est, semper erit aliquod ens, aliquod bonum, aliqua perfectio; atque in ordine ad mores, ut antea dicebamus, indifferens est, ut bonus, vel malus sit, malitiam nimirum conjunctam habeat, vel honestatem; malitia verò semper est aliquod malum, imperfectio, defectus, siue privatio honestatis, ejusque rectitudinis, quæ reperiiri deberet in voluntate, unde est purum nihil.

Cum itaque dicimus voluntatem ad singulos actus etiam malos applicari a Deo, id intelligimus de actu, vel operatione peccati, quæ semper bona, vel indifferens est; non verò de malitiâ, seu pravitate, quæ semper aliquod malum est, siue privatio, vel purum nihil; actus nimirum, cum sit aliquod ens, bonum, perfectio, a primâ, supremâque omnium rerum, causâ, omnisque bonitatis, vel perfectionis fonte produci potest, ac debet: malitia verò, cum sit purum nihil, pura privatio, defectus, & imperfectio, a Deo produci nec potest, nec debet.

XVI. Quod si malitia inseparabilis esse dicatur ab actu, ideoque divinâ motione, quâ producit actus, malitiam quoque produci oportere asseratur, hoc primum quidem in Adversarios ipsos retorqueri meritò poterit, a quibus asseritur Deum ad materiale peccati concurrere, non ad formale, quamvis formale, siue malitia

litiâ cum materiali, vel operatione inseparabiliter conjungatur; deinde verò observandum est hoc in hominibus verificari, qui, cum defectibiles sint, possunt ita actum velle, ut simul malitiâ, quæ cum ipso conjungitur, velint; non verò in Deo, cujus perfectissima vis, ac potestas ita creaturis applicari potest, ut juxta liberam illarum conditionem ad singulos actus moveat, ad illos etiam, qui fortasse malitiâ conjunctam habeant, cum tamen malitiâ ipse non velit, neque ipsius motio ad malitiâ extendatur. Neque mirum est certè, vel impossibile, quod hac divinâ motione operatio solum, non malitiâ, quæ cum actu inseparabiliter conjuncta fuerit, producat; quemadmodum enim, si eximius aliquis scriptor malè aptato calamo utatur nonnisi informes characteres delineare poterit, ut eodem actu, quo characteres efformat, illorum etiam deformitatem producat, neque tamen characterum deformitas scriptori, sed calamo solum tribuitur, quodd nimirum scriptoris manus aptè calamum dirigat, & characteres efformet, sed ex ipsius calami imperfectione fiat, ut optima, ac perfecta motio, quâ calamus a scriptore movetur, characteres imperfectos reddat; ita quoq; Deus veluti perfectissima, & prima causa, voluntatem hominis tanquam instrumentum aptissimè ad motum dirigat, sed ex ipsius voluntatis imperfectione, sive defectibilitate oritur, ut cum actu, ad quem a Deo movetur, imperfectio, defectus, deformitas aliqua inseparabiliter conjungatur.

Quamvis itaque Deus voluntatem hominis ita movere posset, ut voluntatis defectum victricis gratiâ superaret, ac nulla prorsus imper-

perfectio, siue deformitas in voluntatis actu reperiretur, occultis tamen consiliis, præsertim verò ne arbitrii libertatem lædere videretur, dum potentiam, quæ ad bonum, ac malum indifferens est, quæ nempe cum proprio actu, siue bonitatem, siue malitiam conjungere potest, ad bonum potius, quàm ad malum inflecteret, motionem propriam liberæ voluntatis naturæ, vel conditioni accomodat, ut motionis suæ vi operatio, solo creaturæ defectu operationis malitia cum operatione producat.

Hinc evidens est discrimen illud, quod inter hypothese[m] Calvini, ac Thomistarum reperitur, quod ille nimirum voluntati creatæ omnem operandi vim auferat, & quidquid in peccato reperitur soli Deo tribuendum velit; isti verò creatæ voluntati, etsi applicata a Deo, siue determinata illa fuerit, operandi, liberamque agendi vim concedunt, quâ operationem ipsam, atque malitiam, quæ operationi conjungitur, efficiat.

XVII. Illud etiam opponi subinde solet, quod Thomistarum opinio, siue concordia, quæ inter arbitrii libertatem, & præviam Dei motionem statuitur, nullâ ratione concipi, vel intelligi potest; Molinistarum autem hypothesis clarior, humano captui, vel infirmitati accommodatior videatur.

Sed hoc argumenti genus, quod certè Molinam, aliosque impulit, ut novam concordiam, siue doctrinæ rationem inveherent, in ipsos retorqueri meritò poterit, ut si nempe Thomistarum opinio difficilis, & obscura videatur, veluti vera habenda sit; sin verò Molinistarum doctrina facilior, & clarior sit, omnino falsa censeri debeat. Ipsa nimirum obscuritas, & altitudo
velu-

veluti character haberi debet, quo vera, & catholica opinio ab errore distinguatur. Quid enim aliud Apostolus, ubi de divinâ motione differit, expressius, atque frequentius exclamat, quàm illam impenetrabilem, incomprehensibilem, investigabilem, profundam esse? Quid aliud Augustinus innumeris ferè locis ostendit, quàm voluntates hominum miro, & ineffabili modo a Deo moveri? *istam quæstionem, ubi de libero arbitrio voluntatis, & Dei gratiâ disputatur, ita ad discernendum difficilem esse, ut quando defenditur liberum arbitrium, negari Dei gratia videatur; quando autem asseritur Dei gratia, liberum arbitrium putetur auferri (a);* atque Petilianum impugnans ait: *Si tibi proponam quæstionem quomodo Deus Pater attrahit ad filium homines, quas in libero dimisit arbitrio? fortassis eam difficile soluturus es, quomodo enim attrahit, si dimittit, ut quis, quod voluerit, eligat? & tamen utrumque verum est, sed intellectu penetrare hoc pauci valent (b).*

Quid aliud itaque, dum Thomistis objicitur illorum hypothesim miram, ineffabilem, obscuram, incomprehensibilem, investigabilem esse, quid, inquam, aliud ipsis opponitur, nisi quod illorum hypothesi eos omnes characteres habet, qui veræ sententiæ a Scripturâ, & Patribus tribuuntur, sive quod illi hypothesim a Scripturâ, ab Apostolo, ab Augustino, a Patribus omnibus traditam, acerrimèque contra hæreticos propugnatam amplectuntur? quod certè objectionis, vel argumenti genus tantum abest, ut Thomistas movere debeat, vel

(a) *De gr. Chr. c. 47. & contra Julian, IV. c. 8.*

(b) *lib. II. contra epist. Petilian.*

vel ab institutâ opinione recedere, ut ipsa potius gloriari, atque ad illam severius confirmandam mirificè incendi debeant.

Deinde verò quis apertè non videat eandem, multòque fortasse graviozem difficultatem in Molinistarum hypothefi reperiri? Si etenim physica Thomistarum præmotio cum libertate conjungi non posse videtur, libertas ipsa indèpendens, quæ a recentioribus homini conceditur, cum efficaci, supremoque dominio, vel gratia Dei conciliari non potest; si Thomistæ arbitrium lædere, recentiores gratiam evertere existimantur; si intelligi fortasse non potest quomodo voluntas a Deo præmotâ adhuc indifferens, vel libera sit intelligi facillè quoque non poterit, quomodo voluntas ipsa a se moveri, seipsam perficere, vel determinare possit, adeoque semper in utraque hypothefi difficultas, & obscuritas etiam maxima reperitur. Sed obscuritas illa, vel difficultas, quæ in recentiorum sententiâ reperitur, ut ex rationibus superius adductis intelligi potest, dirimi, solvi, vel explicari certè non poterit, obscuritas autem illa, quæ in Thomistarum opinione observatur, facillè vinci poterit, ut illa non modò certa, ac invictissimis autoritatibus, atque rationibus confirmata, quod unum hac in parte, sinè ullâ evidentia spe, nobis sufficeret, sed etiam clara, & evidentissima demonstretur.

XVIII. Fortius tamen, & efficacius argumentum, quo prævia hæc, & physica divina motio impugnari consueverit, desumitur ex quarto capite, quod nimirum, si voluntas hominis præviè, & physicè moveretur a Deo, arbitrii libertas offenderetur, voluntas non esset domina suorum actuum, non esset indifferens

ad oppositum, non posset resistere, ideoque omnis prorsus libertas hac insuperabili necessariâ motione extingueretur.

Si etenim, inquiunt, voluntas ipsa nihil velle, nihilque operari unquam possit, nisi præviâ quidam, insuperabili, efficacissimâ motione, cui dissentiri non possit, applicata, sive determinata fuerit ad operandum; si dissentiri, vel oppositum velle, vel operari non potest, nisi prius novâ, & oppositâ motione determinetur, si denique hæc nova motio non est in manu, vel potestate creaturæ, sed expectari debet a liberâ, & arcanâ Dei voluntate, & arbitrio, quid voluntas ipsa libera, indifferens, propriorum actuum domina diceretur? quid illi vis, & facultas conceditur, quâ quidquid voluerit, ubi voluerit, & quomodo voluerit, operetur? quid denique operationes illæ, quæ a voluntate sic applicatâ fieri contigerit, ipsi voluntati, non verò potius ipsi Deo veluti causæ tribuantur?

XIX. Hæc ab Adversariis pro arbitrii libertate servandâ, maximâ, & incredibili veritatis specie afferri solent. Quibus, ut clariùs, atq; faciliùs responderi possit, illud ingenuè fate-mur, hanc divinæ motionis, ac humanæ libertatis concordiam difficilem adeo, arcanam, & obscuram esse, ut non modò hæreticos impulerit, ut alterutrum, divinæ nimirum motionis vim, aut humanæ libertatis arbitrium negaverint, sed Apostolum quoque, & Augustinum ancipites adeo reddiderit, ut ad arcana solùm, & inscrutabilia divinæ Sapientiæ judicia, atque consilia confugerint, ut sapiùs ostendimus.

Deinde verò observasse juverit, quod eandem

dem prorsus difficultatem sibi Apostolus Paulus objecerat, atque idem argumentum a Pelagianis deinde, ac Semipelagianis opponebatur Augustino; querebantur illi nimirum ex Augustini doctrinâ sub prædestinationis nomine fatalem quandam necessitatem induci (a); & sub pietatis fronte gentilitatis malum, & inter gratia vocabulum absconditum esse fatale decretum (b); ideoque scripta Augustini, quibus error Pelagianorum impugnatur, infamabant dicentes, eum liberum arbitrium penitus dimovere (c), & illius verbis quandam desperationem hominibus exhiberi [d]; occasionem deniq; teporis [a], & desidiam (b) induci; studium (e), pœnitentia remedia (b), correctionis instantiam (d), orationis adjutorium (b) labefactari, vel prorsus everti.

Quæ mira prorsus, & incredibilis argumentorum affinitas, atque conjunctio observari plurimum debet, non quidem, ut oppositæ sententiæ invidia concilietur, ac si nihil afferre illa possit, quod non a Pelagianis olim, & Semipelagianis oppositum fuerit, verum potius, ut ostendatur eandem prorsus a nobis sententiam tradi, quæ a D. Augustino acerrimè defensa fuerat, cùm utraque iisdem omnino difficultatibus oppugnetur.

Quod si Augustinus optimè noverat, ex sui doctrinâ, ex physicâ nimirum, ac præviâ Dei motionem inferri posse, quod humani arbitrii libertas offendeatur, neque tamen ab inîstitutâ opinione, sive sententiâ discessit, verum

F f 2

po-

(a) D. Prosp. ep. ad Aug. (b) Faustus Pelag. lib. I. de lib. arb. c. 4. (c) Prosp. ep. ad Rufin. (d) Hilary. epist. ad Aug. (e) Aug. contr. Juli. IV. c. 8.

potius incredibili studio arbitrii libertatem, cum hac ipsâ divinâ motione componere conjungere, & conciliare studuit *, necessariò dicendum est, aut ipsum turpissimè hac in parte propriæ sententiæ amore in errorem abreptum fuisse, aut certè divinæ physicæ, ac præviæ motionis vim, cum voluntatis arbitrio aliquâ ratione conjungi posse; cùmque asserere, vel suspicari Augustinum hac in parte deceptum esse, perditum, impudentissimique consilii sit, quippe cujus doctrina antiquissimo, atque constanti sæculorum omnium testimonio, atque ad coercendam quoque latè serpentis erroris audaciam nuperrimis etiam Pontificum decretis ab omni prorsus erroris labe, vel suspicione, liberetur, id unum superest, ut arbitrii libertas cum præviâ, ac efficacissimâ divinâ motione jungatur; & quamvis modus ille, vel ratio, quâ admirabile hoc fœdus, & unio, sive concordia peragatur, hætenus inveniri, vel explicari non possit, neque ab Augustino ipso clarè tradita supponatur, nonnisi tamen temere hæc eadem unio, sive concordia negari poterit.

XX. Quandoquidem tamen neque solâ Augustini autoritate dirimenda quæstio, sive solvenda difficultas est, neque certitudinem solùm, sed evidentiam quoque, & perspicuitatem, si fieri id quidem potest, inquirimus, variis

* Nihil hæc moverunt Augustinum quominus sententiam suam constanter tueretur usque ad mortem, neque scandala, quæ ob id oriebantur, & nonnullis accidebant, curanda esse putavit, judicans esse passiva, ut quæ ex infcitâ veritatis, & imperitiâ divinatum Scripturarum nascerentur. *Poterius Tom. VI. disp. in Script. disp. 213.*

riis etiam rationibus ostendemus, quomodo hac præviâ, & efficacissimâ Dei motione humana libertas non lædatur. Itaque, ut aliquâ ratione admirabilis illa concordia, vel unio defendatur, & quantum humanæ mentis imbecillitas patitur, explicetur, aliqua observasse joverit, quibus humanæ libertatis natura, sive conditio exponatur, atque nodus ille dirimatur.

Illud itaque primò veluti certum supponimus, quod, ut humana voluntas libera sit, non certè requiritur, ut illa omnino semper indifferens, ac ferè suspensa sit, sed poterit aliquando applicari, sive determinari ad aliquid operandum, adhuc incolumi libertate. Ut ergo libera dum operatur, sui actus domina, atque indifferens sit, nihil aliud requiritur, nisi ut operetur cum velit operari, atque seipsam determinet ad operandum; *non enim possumus aliud sentire esse in potestate nostra, nisi, quod cum volumus facimus (a), & hoc quisque in potestate habere dicitur, quod, si vult, facit; si non vult, non facit (b).*

Exinde verò, cum voluntas semel applicata, sive determinata fuerit ad operandum, ut libera censeatur, non certè requiritur, ut simul, eodemque tempore, quo determinatur ad unum, determinetur etiam ad aliud, sive simul, eodemque tempore, quo ponit actum, ponat etiam negationem actûs, aut oppositum actum; eodem nimirum tempore, quo amat, simul non amet, aut odio habeat; sed solum requiritur, ut cum actualiter amat, retineat potentiam, quâ, misso amore, non amare possit, aut odio habere.

F f 3

Quod

(a) Aug. Retrat. I, c. 9. (b) Id. de Spir. & lit. c. 21.

Quod verò hic sit ingenuus libertatis character, atque ad perfectissimum libertatis arbitrium nihil aliud requiratur, manifestissimè demonstratur non solum in hypothesi Adversariorum, in quâ eadem prorsus libertatis notæ, sive characteres conveniunt, sed in hypothesi quoque Pelagii, qui independenter a quacunque divinâ motione solis arbitrii viribus hominem operari posse putavit. Neque enim impudenter adeo quis ineptiret, ut ad arbitrii libertatem requireret, ut voluntas ipsa, vel agendi vis semper indifferens, otiosa, ac suspensa foret; cùmque determinata, vel applicata foret ad unum, simul, eodemque tempore oppositum efficere posset; aut denique dissentientiendi potentiam in voluntate destructam esse arbitretur, ex eo, quod voluntas ipsa determinatur ad unum, non verò id unum potius ad libertatem requiri, sive sufficere intelligat, ut voluntas operetur cum velit, & quia velit operari, cumque seipsam determinaverit, & applicaverit ad unum, simul, eodemque tempore potentiam retineat, quâ, si velit, oppositum efficiat, vel certè priorem determinationem suspendere, & revocare possit.

Illud itaque solum nunc inquirendum est utrum omnes characteres illi libertatis voluntati nostræ convenient, dum physicè, & præviè ab insuperabili, victrici, & efficacissimâ Dei motione applicatur ad operandum; si etenim characteres, & proprietates illæ incolumnes adhuc sub ipsâ divinâ motione salventur, necessariò concedi debet, quod ipsa quoque libertas incolumis perseveret.

XXI. Calvinus quidem, atque Lutherus existimant voluntati hominis divinâ motione applicari.

plicatæ, siue determinatæ ad operandum characteres illos minimè convenire; primò quidem, quod voluntatem ita a Deo applicari, moveri, siue determinari velint, ut ipsa nihil operetur, sed passivè solùm divinam vim, & impulsus recipiat; ideoque operetur non quia vult operari, sed solùm, quia a solo Deo impellitur ad operandum. Deinde verò, quod in sensu composito, quandiu nimirum divina motio perseverat in voluntate, nullam dissentendi, vel resistendi, vel oppositum operandi potentiam superesse arbitrentur, & quamvis eadem voluntas operari velit, nova tamen motio expectanda est, quâ determinetur ad operandum.

XXII. Ab hac ipsâ tamen Lutheri, & Calvini sententiâ Thomistarum doctrina longissimè abhorret, omnesque libertatis characteres superius expositos incolumes adhuc superesse illi putant in voluntate, quæ a præviâ Dei motione applicata fuerit ad operandum. Ac primò quidem salvatur, quod voluntas ipsa operatur, quia vult, & cum vult operari. Quamvis enim a Deo præviè, & efficacissimè moveatur, hæc ipsa tamen divina motio non efficit, ut voluntas ipsa sese non determinet, vel applicet ad operandum, siue non impedit actum, quo voluntas humana seipsam moveat, atque determinet, sed illum potius producit, hoc est voluntas ipsa a divinâ motione applicatur ad volendum operari, cùmque indifferens illa foret, ut vellet, vel non vellet operari, ab hac divinâ motione determinatur, ut potius velit, quàm non velit.

In hoc itaque mirificè falluntur ii, qui a Thomistarum doctrinâ, vel a præviâ Dei mo-

tionem libertatem lædi arbitrantur, quod ipsi putant ab illâ omnem agendi vim in voluntate impediri, voluntatem agi non agere, moveri solum non movere, hoc est a solâ divinâ motione determinari, ut ipsa nihil cooperetur, sed passivè solum divino impulsu, sive motione impellatur ad operandum. Quemadmodum enim antea dicebamus, Augustinus, ac Thomistæ divinam motionem requirunt, quæ actum ipsum volendi in voluntate producat, quæ faciat, ut faciamus præbendo vires efficacissimas voluntati (a).

Id perspicuè contra Pelagianos jam dixerat Augustinus celebre argumentum illud dissolvens, quod sibi a Pelagianis ipsis objiciebatur, quod nempe, si prævia divina motio admitteretur, quâ voluntas hominis applicaretur ad operandum, homines ipsi non liberè operarentur, sed nolentes crederent, & converterentur.

Constanter enim asserit Augustinus, quod *nos volumus, sed Deus in nobis operatur & velle; nos operamur, sed Deus in nobis operatur, & operari pro bona voluntate; quod hoc nobis expedit & credere, & dicere, hoc est pium, hoc est verum* (b); quod certum est *nos velle cum volumus, sed ille facit, ut velimus bonum, de quo scriptum est, preparatur voluntas a Domino; certum est nos facere cum facimus, sed ille facit, ut faciamus præbendo vires efficacissimas voluntati, qui dixit faciam, ut in justificationibus meis ambuletis* (c); quod *ut velimus sine nobis operatur, cum autem volumus & sic*

(a) De gr. & lib. arb. c. 17. (b) de dono persév. c. 12.
(c) de gr. & lib. arb. c. 16.

& sic volumus, ut faciamus, nobiscum cooperatur (a); quod denique Deus intus in ipsis hominum cordibus operatur, non ut homines, quod fieri non potest, nolentes credant, sed ut volentes ex nolentibus fiant (b); cum enim Deus vult aliquid fieri, quod nonnisi volentibus hominibus [idest liberè] fieri oportet, inclinantur eorum corda, ut hoc velint: go scilicet inclinante, qui in nobis mirabili modo, & ineffabili operatur & velle (c), habens sine dubio humanorum cordium, quocumque placeret, inclinandorum omnipotentissimam potestatem [d].

XXIII. Salvatur itaque in Thomistarum hypothesis libertas hominis, quodd nihil ipse operetur, nisi prius velit operari, operatur, quia vult, & quando vult operari; cum tamen nihil velle possit, nisi prius Deus voluerit ipsum velle, sive ipsum inclinaverit, & applicaverit ad volendum, salvatur etiam suprema efficacissima divinæ motionis necessitas.

Deinde verò cum voluntas hominis inclinata, & applicata a Deo seipsam applicaverit ad operandum, & actualiter operetur, dissentienti, vel resistendi potentiam retinet, quam tamen exerere, vel exercere non poterit, nisi prius dissentiri voluerit, non poterit autem velle dissentiri, nisi prius novâ divinæ voluntatis motione inclinata, & applicata fuerit ad volendum dissentiri; ideoque divina motio non efficit, ut voluntas ipsa non operetur, atque dissentiri non possit, si velit; sed solum efficit, ut hæc omnia creata voluntas efficiat de-

pen-

(a) De gr. & lib. arb. c. 17. (b) lib. I. contra 2. ep. Pelag. c. 19. (c) de prad. Sancti. c. 20. (d) de corrupti, & grat. c. 16.

pender ab ipso Deo; seipsam nimirum determinet, quia prædeterminatur a Deo; velit dissentiri, quia ad hoc ipsum velle dissentiri determinatur a Deo.

XXIV. Quandoquidem tamen hæc ipsa determinatio, siue dissensio voluntatis, quæ fiat dependenter a Deo, libera censeretur non posse putatur, atque in Thomistarum hypothese superius explicatâ contradictio quædam, vel repugnantia videtur, juverit ipsam libertatis ideam clariùs, atque nitidiùs exponere, ex quâ veluti ex fonte opiniones, & errores omnes uberimè profluxerunt, & quâ probè intellectâ, vel explicatâ, opiniones ipsæ dirimi, erroresque vitari faciliè poterunt.

Illud itaque certum, manifestissimèque perspectum est, quod ubi Philosophi de arbitrii viribus, de libertate, de gratiâ differunt, illorumque aliqui divinâ motione libertatem lædi arbitrantur, dum alii incolumem superesse defendunt, non eandem omnes libertatis ideam, siue conceptum admittunt, ideoque, cum in ipso libertatis nomine differant, immane quantum in libertatis characteribus differre debeant; neque hoc immane dissidium dirimi, vel conciliari fortasse poterit, nisi priùs in definiendâ libertate conveniant.

XXV. Pelagius itaque, Calvinus, & Molinistæ *libertatis* nomine intelligunt vim, aut facultatem quandam hominibus inditam, quâ voluntas humana independenter a quacumque aliâ causâ, siue principio aliquid velle, vel nolle, seipsam determinare, quamcumque in partem flectere possit; ideoque Pelagius, cum intelligeret hanc libertatem, vel independentiam salvari, vel explicari non posse, si Deus

voluntatem ipsam alliceret, inflecteret, applicaret ad operandum, libertatem quidem in homine, vel independentiam admisit, divinam, verò motionem, & gratiam omnem, veluti arbitrio inimicam rejecit. Calvinus verò, cum similiter, & ipse cognosceret eam libertatem cum præviâ, ac efficaci divinâ motione conjungi, vel conciliari non posse, divinam quidem motionem præviâ, ac efficacissimam posuit, sed libertatem omnem, omnemque agendi, vel dissentiendi potentiam deleri, vel extinguî putavit.

Atque illud quidem negari certè non poterit, quod ubi semel hæc libertatis idea admissa fortasse fuerit, quæ ab Auctoribus illis admittebatur, illa cum divinâ præviâ motione conjungi non potest, ideoque meritò prorsus, aut libertas ipsa cum Calvino, aut divina motio cum Pelagio negari debet.

XXVI. Verùm non hanc ingenuam, ac veram esse libertatis humanæ vim, ac ideam, Augustinus, Thomistæ, alique plurimi acerrimè profitentur, sed eam potiùs potentiam, vim, & facultatem esse arbitrantur, quâ voluntas hominum velle, applicari, determinari possit ad operandum, sed dependenter tamen ab ipso Deo; ad libertatem requiri constanter asserunt, ut arbitrii libertas a nullo creato principio dependeat, a nullâ creatâ causâ inflecti, dirigi, vel applicari possit, possit tamen, ac etiam debeat a primâ, ac supremâ omnium causâ, vel a Deo.

Ut itaque hæc celeberrima quæstio dirimatur, atque omnibus Adversariorum rationibus satisfiat, priùs constitui, vel definiri debet, qui nam ex superioribus *libertatis* creatæ con-

ceptibus admitti debeat; utrum nempe libertas ipsa omnem creaturæ solùm, an insuper etiam increaturæ causæ motionem excludat, an libertas ipsa, adhuc libertas haberi possit, etiamsi nihil velle, nihilque operari possit, nisi prius applicetur, sive determinetur a Deo.

XXVII. Nobis illa solùm libertas admitti posse videtur, quæ dependentiam illam non modò patitur, verùm etiam requirit, neque aliam in homine libertatem effingi posse putamus, nisi nimium, quàm par est, homini concedatur, simulque nimium, quàm par est, ipsi Deo detrahatur.

Si etenim clarissima Scripturæ verba, aut ipsa ratio superius exposita consulatur, manifestissimè apparet, quod nihil in creaturâ admitti poterit, quod non dependeat, sive non producat, aut esse recipiat a Deo; cùmque operari sequatur ad esse, & ipsi proportionetur, accuratèque respondeat, nihil esse poterit in creaturâ, quod non dependeat etiam in operari, quod ens aliquod, actus, & perfectio est, ab ipso Deo.

XXVIII. His ita constitutis facilè dilui, solvique poterunt argumenta singula, quæ ab Adversariis afferri solent. Cùm itaque dicunt

1. Quod voluntas hominis præmota a Deo non esset ampliùs indifferens,

2. Quod præmota ad amorem amare debet,

3. Quod motioni divinæ resistere, vel dissentiri non potest,

4. Quod ad dissentiendum expectanda est illi nova præmotio,

5. Quod hæc nova motio non est in manu creaturæ,

6. Quod creatura actum proprium revocare, vel impedire non posset,

7. Quod

7. Quod non esset domina suorum actuum,
8. Quod ab alio dependeret,
9. Quod non esset libera,
10. Quod deniq; hæc opinio cum Calvinii, ac Jansenii sententiâ ad deprimendam arbitrii libertatem conspirat.

Singulis hisce capitibus ex doctrinâ superiùs expositâ responderi facîle poterit.

1. Quod est indifferens non quoad actum, sed quoad potentiam, quæ sola indifferentia ad libertatem requiritur,

2. Quod amare debet, sed liberè non necessariò, ita enim movetur ad amandum, ut moveatur ad velle amorem,

3. Quod dissentiri potest ubi voluerit dissentiri, etsi non possit velle dissentiri nisi applicetur a Deo ad volendum dissentiri.

4. Quod expectanda quidem est nova præmotio, idest nova volitio voluntatis, quod voluntati, seu libertati non repugnat.

5. Quod hæc nova motio est in manu creaturæ, non solum quod Deus movet creaturas singulas juxta conditionem illarum, ideoque, necessarias necessariò, liberas liberè, verum, etiam quod illam habebit, ubi voluerit.

6. Quod suspendere, revocare, impedire poterit actum, si velit, volet autem, si applicabitur a Deo ad volendum.

7. Quod est domina suorum actuum, & potest operari cum vult, & quomodo vult operari; dominio tamen creato, vel dependente, quod nempe supponit dominium Dei supra voluntatē.

8. Quod dependeret ab alio non creato quidem, quod libertati repugnat, sed increato solum, idest a Deo, quod libertatem non destruit, sed ad ipsam potiùs requiritur.

9. Quod

9. Quod non esset libera eâ libertate, quæ a Pelagianis ipsi tribuitur, libera tamen esset eâ libertate, quæ a Scripturâ, Augustino, aliisque sapientissimis viris illi conceditur.

10. Sed hæc, ut apparet, clariora certè sunt, quàm ut fusiùs, & uberius exponi debeant. Quod verò ultimo tandem loco opponeretur, hanc nimirum opinionem cum opinione Calvinii, & Jansenii occulto quodam fœdere conjunctam esse, iniquiùs ferendum fore dicunt Thomistæ, nisi partium studium, ac perditam quædam, & insolens calumniandi licentia plurimos ad hæc consilia abripuisset; nisi hæc ipsa Augustinianæ doctrinæ conditio semper fuisset, ut his nominibus traduceretur; nisi deniq; Augustinus ipse hac labe, vel erroris suspitione liberiùs impetitus esset, ut hanc Pelagianorum audaciam commemorans, dixerit *nihil aliud nituntur, nisi, ut hac horribili* (non Calvinistarum quidem, aut Jansenistarum, quæ nondum eruperat, sed Manichæorum) *hæresi oblectâ, cujus se adversarios fingunt, lateant inimici gratia sub laude natura* (a), atque ideo excogitaverunt Manichæorum detestabili nomine, imperitos, quos potuerunt detertere, ne adversus eorum perversissima dogmata aures accommodent veritati (b).

Illud etiam addunt Thomistæ, quod si aliqua erroris etiam, aut hæresis suspicio in hac illorum hypothefi reprehendi fortasse posset, ut ipsi libertati detrahere viderentur, & inimici naturæ vocari, id leviùs tamen ferendum esset, quàm divinæ voluntatis dominio detrahere, & inimicos haberi gratiæ Christi; si Thomistarum

(a) Lib. II, contr. 2, epist. Pelag. (b) lib. III, c. 9.

rum hypothesis hac unâ lineâ a Calvinî errore distinguitur, atque in illum ita pendere videtur, ut arbitrii vim minuere, vel extinguere quoque dicatur; Molinistarum hypothesis exiliori fortasse lineâ a Semipelagianis dissideat, atque in eam ruere videatur, ut divinæ gratiæ vim, gratuitam prædestinationem, Redemptoris meritum, & gloriæ beneficium subvertat. Utrumque denique, dicunt Thomistæ, malum, utrumq; hæreticum, utrumq; piis auribus non ferendum, utrumque impudentissimè, & contra Apostolicæ Sedis iudicium, quæ graviores ejusmodi notas alterutri sententiæ inuri certè non patitur, sed hoc certè leviùs, ut quis arbitrii inimicus, quàm gratiæ destructor habeatur.

XXIX. Tantum tamen abest, ut nos iniquis ejusmodi Adversariorum criminationibus repouendum esse velimus, ut perditam hanc consuetudinem nonnisi temere, & impudenter adhiberi posse existimemus, eamque non modò Catholicis viris prorsus indignam, sed ab ingenio quoque, ac honesto veritatis amore, quem unicè profitemur, alienam mirificè aversemur. Id unum itaque coronidis loco hîc addere joverit, quo non invidia quidem in Adversarios congeratur, sed ut opinio nostra clariùs adhuc, & uberius defendatur, oppositam nimirum sententiam eidem principio innixam esse, cui Pelagianorum, & Calvinistarum hæresis innitebatur, nostram verò principium ejusmodi evertere, omnique autoritatum, & rationum pondere impugnare. Quemadmodum enim paullo superiùs ostendimus, Pelagianorum, & Calvinistarum hypotheses, etsi plurimùm inter se, atq; mirificè dissiderent, in hoc tamen maximè consensere, ut liberum humanæ voluntatis ar-

bi-

bitrium, cum præviâ, ac efficaci divinâ motionem conjungi, vel conciliari non posse defenderent; ideoque Pelagius, cum libertatem admitteret, efficacem gratiam, sive motionem negavit; Calvinus verò, cum gratiam, sive motionem admitteret, libertatem sustulit. Augustinus itaque, & Thomistæ arbitrii libertatem cum efficaci divinâ motionem conjungi posse defendunt, ideoque utramque simul hæresim, vel utriusque hæresis principium, vel fundamentum impugnant. Molinistæ verò eodem principio uti solent, ut efficacis gratiæ, sive motionis necessitatem impugnent. Quænam ergo Theologorum opinio ab errore remotior, & immunior haberi poterit, illa ne, quæ commune hæreticorum principium assumit, an illa potius, quæ illud acerrimè impugnat? an illa forsàn, quæ eisdem prorsus auctoritatibus, & argumentis utitur, quæ contra Apostolum, & Augustinum adhiberi consueverant, aut illa potius, quæ auctoritates omnes, & argumenta plurima ex istorum fontibus derivavit? illane denique, quæ nuperrimè inventa, vel excitata, ubique impugnata, non ubiq; fortasse victa, sed nullibi certè victrix emerfit, an illa potius, quæ constanti sæculorum omnium traditione ad hæc usque tempora nullibi victa, sed ubique victrix feliciter floruit?

XXX. Hæc, aliaque id genus plurima, alii viderint. Nobis hæc indicasse sufficiat, ut de celeberrimâ hac controversia, quæ acriter adeo agitari solet, judicium aliquod ferri possit, donec illa ab Apostolicâ Sede, quod bonorum omnium votis optari intelligimus, dirimatur.

F I N I S.

Ad 1 1453244

